

लक्ष्मीवेङ्कटेशायनमः ।

श्रीमान्महानुभाविब्रजदासीदासकृत ।

ब्रजविलासः

सटिप्पण

जिसमें नित्यानिकुंजविहारी राधाकृष्णकी अशेष चित्रविभिन्न ब्रज-
लीला अनेक दोहा, तोरठा, चौपाई आदिमें वर्णन करी हैं ।

जिसको

लोकरंजनार्थ अनेक विद्वजनोंके द्वारा शुद्ध कराकर

द्वितीयवार

गंगाविष्णु-श्रीकृष्णदासने

निज "लक्ष्मीवेङ्कटेश्वर" छापाखानेमें छापकर

प्रकट किया

कल्याण-मुंबई

भाद्रपद संवत् १९५१ तथा सप्टेंबर सन् १८९४ ईसवी.

सन् १८६७ ऐक्ट २५ के बमोजिम इस ग्रंथका सब प्रकारका रजिष्टरी हक
यन्त्रालयाधीनने स्वाधीन रक्खा है.

श्रीमद्भारवि तुलसीदासजीके सटीक टीका

श्रीभुत पं० ज्वालाप्रसाददत्त संपादनी टीका ।

महाशय ! लीजिये गुसाईं तुलसीदासजीकी अपूर्व कविताका अन्वय भाषासूत लीजिये, संपूर्ण शेषकों व रामाश्रममेध सहित सुनोध टीका किया गया है उत्तम जिल्द बंधी है मूल्य केवल ८ रु०
रामायण मझोला ।

सुन्दर अक्षर समस्त शेषक तथा रामाश्रममेध सहित जिल्द बंधी है मूल्य २ रु०

रामायण मोटा अक्षर ।

सुन्दर टैपमें छापी है सब शेषक रामाश्रममेध युक्त है यह बालवृद्धोंको सुखदायक है मूल्य ४ रु०

रामायण गुटका ।

यह पुस्तक देशाटनीय पुरुषोंको लाभदायक है मूल्य १ रु०

जैमिनि अश्रममेध भाषा ।

मूल्यको यथातथ्य सरल हिन्दुस्थानी भाषामें उल्था बनवाकर स्वच्छता पूर्वक छापा है मूल्य केवल २ रु०

श्रीमद्भारवि कीय रामायण

भाषा टीकासहित.

भक्तगणो ! अति उत्तम टीका सरल पदोंमें हरेक देशोंके समझने योग्य कराई गई है और रुचिर स्थलोंमें मधुर दृष्टान्तों और उदाहरणोंसे अर्थ पुष्ट किया है किन्तु गूढ़ाशयोंका अर्थ तो विशेषही दर्शाया है, विशेष प्रलापसे क्या, शीघ्रता करो पीछे मूल्य बढ़ाया जावेगा. यह पुस्तक कथा वांचनेमें परमोपयोगी है मूल्य केवल २३ रु० है ॥

श्रीमद्भारवि कीय रामायण

केवल भाषा

उपरके अलंकारों समेत प्रतिसर्गके आदि अंतका प्रतीकको एक २ श्लोक है. प्रतीककेलिये श्लोकांकभी डाले गये हैं पुस्तक दो जिल्होंमें बहुत पुष्ट बंधी है मूल्य केवल १० रु० मात्र है ॥


याज्ञवल्क्य मिताक्षरा

पद, योजना, भावार्थ, तात्पर्यार्थ सहित

यह धर्मशास्त्र सम्बन्धी ग्रन्थ समस्तगृहस्थोंको अवश्य रखना चाहिये इसके द्वारा लौकिक काम धर्म पूर्वक होते हैं सर्व देशोपकारक उत्तमटीका हुई है, गूढ़ाशयोंमें अन्यस्मृतियों की टिप्पणी लगाई गई है जिससे अन्य ग्रंथ की अपेक्षा नहीं रहती यद्यपि उक्त अलंकारों से ग्रंथ बढ़ गया है तथापि मूल्यकेवल ६ रु० है ॥

श्रीमद्भारवि तुलसीदासजीके षोडश ग्रंथ एकत्र और अलग २ भी मिलते हैं रामकथानुरागियोंके अवलोकनार्थ बड़े परिश्रमसे गुसाईंजी के १६ग्रन्थ मुद्रित किये हैं मूल्यथोड़ा है पुस्तक मिलनेका ठिकाना—गंगाविष्णु श्रीकृष्णदास. लक्ष्मीवेङ्कटेश्वर छापाखाना. कल्याण—बंबई.

प्रस्तावना.



विदित हो कि यह जगत्प्रसिद्ध पुस्तक कई बेर अन्यत्र छपी परन्तु रसिकवृन्द इसके रसकापान कर संतुष्ट न हुये इसलिये हमने अत्यन्त उत्तमता पूर्वक बहु प्राचीन ब्रजकी पुस्तकोंसे सुकाबिला करवाय और श्रीवर पण्डित दत्तराम चौबे आयुर्वेदोद्धारकसे शुद्ध करवाय परम पुष्ट मोटे अक्षरोंमें छापी जो आप लोगोंके नेत्रगोचर है इसकी टिप्पणीभी उक्त पण्डित व पण्डित कृष्णविहारी शुक्ल बदक ग्राम निवासि से कराई जिससे सब छोटे बड़े सुजन जनोंको समझनेमें सुलभ पड़े आप लोगोंके चित्तविनोदार्थ हमने जो यह परिश्रम कियाहै आशा है कि सर्व महात्मा लोग हरिभक्त कृपापूर्वक ग्रहण करेंगे. और जो कोई भूलचूक इसमें छपते रह गई हो उसको सर्व महात्मा लोग क्षमा करके कृपापूर्वक उसका शुद्धाशुद्ध पत्र बनाकर भेजेंगे तो हम पुनर्बार छापकर आप लोगोंके दृष्टिगोचर करेंगे.

दोहा—यद्यपि छापिहै बंबई, लखनउ मथुरामाहिं ।

पर प्रभुकी यह प्रेरणा, छपी सो दूसरि नाहिं ॥

श्रीयुत पण्डित विशदमति, दत्तराम गुणवान ।

सहित टिप्पणी शोधि यीह, कियो जगतकल्यान ॥

बहुरिसो अवसर पाय धन, करि मन बहुत बिचार ।

पण्डित कृष्णविहारिने, शोधी मतिअनुसार ॥

जो यह पुस्तक छापि हैं, विनआज्ञा यंत्रेश ।

उचित दण्ड ते पाइहैं, लाभ लागि बहु क्लेश ॥

आपका शुभचिंतक—

गंगाविष्णु श्रीकृष्णदास,

“लक्ष्मीवेंकटेश्वर”छापाखाना

कल्याण—मुम्बई.

॥ श्रीः ॥
अथ ब्रजविलास की लीलाओं का सूचीपत्र.

सं०	नामलीला	पृष्ठांकः	सं०	नामलीला	पृष्ठांकः	सं०	नामलीला	पृष्ठांकः
	पूर्वार्द्धम्।		३०	मोतीबेनेकी लीला...	११८	५७	शृंगारभूषण वर्णन लीला	३९१
१	मंगलाचरण	१	३१	बकासुरवध लीला.....	११८	५८	नयनअनुराग लीला...	३९९
२	उपोद्घात.....	५	३२	चकईभौरा खेलन लीला	१२३	५९	मुरली लीला.....	४०४
३	अथ कथाप्रसंगवर्णन	१३	३३	राधाजूकी प्रथम मिलन		६०	रासलीला	४१४
४	कृष्णजन्मोत्सववर्णन....	२५		लीला.....	१२५	६१	अन्तर्द्धान लीला.....	४२८
५	कृष्णकीछठीवर्णन ...	२९	३४	श्लोक गीतगोविन्द ...	१२८	६२	महामंगलरासलीला....	४३८
६	कुरताटोपीवर्णनलीला	३१	३५	अघासुरवध लीला ...	१३७	६३	मानचरित्र लीला	४४८
७	पूतनावध लीला.....	३४	३६	ब्रह्माके मोहकी लीला	१४०	६४	मध्यममान लीला.....	४६६
८	कागासुरवध लीला...	३८	३७	गोदोहन लीला.....	१४८	६५	गुरुमान लीला.....	४७८
९	शकटासुरवध लीला...	३९	३८	धेनुकवध लीला.....	१६१	६६	हिंडोरा वर्णन लीला...	४८५
१०	तृणावर्तवध लीला ...	४१	३९	कालीदमन लीला...	१६७	६७	फाल्गुनवर्णन लीला...	४८८
११	अन्नप्राशन लीला ...	४४	४०	दावानलवर्णन लीला....	१८८	६८	सुदर्शन शापमोचन लीला	५०२
१२	नामकरण लीला ...	४९	४१	प्रलम्बासुरवध लीला....	१९२	६९	शंखचूडवध लीला ...	५०५
१३	वर्षगांठ लीला	५२	४२	पनिघट लीला ...	१९४	७०	वृषभासुरवध लीला ...	५०७
१४	ब्राह्मण लीला	५५	४३	चीरहरण लीला.....	२१०	७१	केशीवध लीला.....	५१०
१५	चंद्रप्रस्ताव लीला ...	५७	४४	वृन्दावनवर्णन लीला....	२१०	७२	व्योमासुर वध लीला....	५१३
१६	पुरातन कथा लीला...	५९	४५	द्विजपत्नी याचन लीला	२२७	७३	अक्रूरआगमन लीला....	५२२
१७	कर्णछेदन लीला.....	६०	४६	गोवर्द्धन लीला	२३६	७४	मथुरागमन लीला.....	५३०
१८	माटीखान लीला.....	६३	४७	नंदएकादशी वरुण लीला	२६२	७५	रजकवध लीला	५४३
१९	शालिग्राम लीला.....	६५	४८	वैकुण्ठदर्शन लीला...	२६७	७६	मल्लयुद्ध लीला.....	५५१
२०	अन्हवावन लीला ...	६६	४९	दानलीला.....	२७०	७७	कंसासुरवध लीला.....	५५६
२१	भोजनकरन लीला ...	७१		अथोत्तरार्द्धप्रारंभः		७८	वासुदेव गृहउत्सव लीला	५६२
२२	पय छुड़ावन लीला ...	७३	५०	गोपिनके प्रेमकी उन्मत्त		७९	कुबिजागृहप्रवेश लीला	५६५
२३	चौगानखेलन लीला...	७३		अवस्था लीला.....	३०६	८०	नंदविदा लीला.....	५६७
२४	माखनचोरी लीला....	७६	५१	स्नानविधि लीला.....	३२८	८१	ब्रजकी विरह लीला....	५७२
२५	दावरी बंधनलीला.....	९४	५२	वाटके मिलनेकी लीला	३५१	८२	श्रीकृष्णजीकी यज्ञोपवीत	
२६	औखमिचौली लीला...	१०५	५३	संकेतके मिलनेकी लीला	३५७		लीला	५८५
२७	वृन्दावनगमन लीला...	१०७	५४	प्यारीकेघरमिलनेकी ली.	३६५	८३	उद्धवजीकी विदा लीला	५८७
२८	वत्सासुरवध लीला...	११३	५५	गर्वव्याजविरह लीला....	३७४	८४	उद्धवजीकीब्रजागमनली.	५९५
२९	धेनुदुहन लीला.....	११६	५६	परस्पर अभिलाष लीला	३८३	८५	उद्धवजीकीमथुरागमनली.	६३०

शाक्तप्रमोद.

दश महाविद्या और पञ्च देवों का पञ्चाङ्ग ।

भारतनिवासी सम्पूर्ण द्विजोत्तमों को विदित हो कि यह अलभ्य, क्लिष्टता से प्राप्त, परम गुप्त, अत्युत्तम, नवीन ग्रन्थ हमारे यहां छपा है । इस में आदिशक्ति जगन्माता के दशों स्वरूप अर्थात् काली, तारा, त्रिपुरसुंदरी, भुवनेश्वरी, छिन्न-मस्ता, त्रिपुरभैरवी, धूमावती, बगलामुखी, मातंगी, कमलात्मिका तथा पञ्च देवता—दुर्गा, शिव, गणेश, सूर्य, विष्णु का वेदोक्त, शास्त्रोक्त, मंत्रोक्त, तंत्रोक्त, विस्तार पूर्वक वर्णन लिखा है तथा फोटोग्राफ के अनुसार सब देवी देवताओं के यथावत् चित्र भी दिये गये हैं । मूल्य ५ रु०

भागवतसार ।

भगवान के चरण-कमलों के प्रेमियों और कथा श्रवण करने के नेमियों के निमित्त भक्ति मुक्ति के क्षीरसागर श्रीमद्भागवत का भली भांति मथन कर अमृतरूप यह 'भागवतसार' तयार किया गया है कि जिस का बारंबार पठन पाठन कर भक्त जन अनुपम आनन्दको प्राप्त करें । और भगवान के मंदिर में जाने को महान् परिश्रम समझते हैं ऐसे नरभी इस 'सार' का घरद्वार पर बैठे पाठ कर भवसागर से पार उतरें । इसकी रसीली भाषा और लेख की गम्भीरता का अनुभव पुस्तक देखनेही से होगा । इस अधमउद्धारिणी भक्तिप्रचारिणी परम हितकारिणी पुस्तक का मूल्य १ रु० मात्र ।

सामान्य निरुक्ति—न्यायशास्त्र तत्वप्रदर्शिनी श्रीरंगनाथीय नवीन विवेचनासहित अपूर्व ग्रन्थ मूल्य ४ रु० मात्र गोरक्षपञ्चति—परम प्रसिद्ध, अलौकिक योगशक्तिशाली, परम योगीश्वर श्रीगोरक्षनाथजी ने स्वयम् यह परम उपकारक ग्रन्थ निर्माण किया है इसलिये इसकी प्रशंसा जितनी की जाय उतनी थोड़ी है । विशेषता यह कि भाषाटीका साथ है । सर्व साधारण के सुभीते के लिये मूल्य केवल १२ आनेही रखे गये हैं । हितोपदेश—नीतिविषयक परम प्रसिद्ध और सर्वोत्तम ग्रन्थ । भाषाटीका सहित छपागया है मूल्य १ रु० ८ आ० मात्र । जंजीरा—कवि कालिदास विरचित जुह-चुहाते और टपकते हुए ललित कवित्तों का संग्रह । इसमें श्रीकृष्णभगवान की केलिकथा का वर्णन है । मूल्य ३ आ० । सद्गुणपदेशमाला—महाभारत और भागवतादिक ग्रन्थों की अनेक कथाओं के धर्म अर्थ और राजनीति के बोधक सार वचनों का यह छोटासा संग्रह है मूल्य २ आ० मात्र । न्यायमुक्तावली—न्यायशास्त्र का प्रसिद्ध ग्रन्थ । मूल्य ८ आ० मात्र । संस्कृतनामावली—बोलचाल में काम आनेवाले सब प्रकार के संस्कृत शब्दों का भाषा में अर्थ, मूल्य २ आ० कलाविलास—एक हजार कलाओं की कलित कथा । व्यवहार का रहस्य समझाने और संसार का सुख प्राप्त करानेवाला यही पुस्तक है । छपगया । मदनपालनिघंटु—वैद्यजनों का परमसहायक और संपूर्ण द्रव्यों के नाम गुण बतानेवाला चमत्कारक प्राचीनग्रन्थ भाषाटीका सहित छपकर तैयार है । न्यायतत्वबोधिनी—न्यायदर्शन की अति उत्तम सरल भाषाटीका सुन्दरता के साथ छपकर तयार है मूल्य १। रु० । श्रीगोपाल सहस्रनाम अति सरल, प्रामाणिक और गूढार्थ प्रकाशिका भाषाटीका सहित छपकर तयार है । इसकी टीका को देख विद्वज्जन अवश्य संतुष्ट होंगे । मूल्य ६ आना मात्र । गीताश्लोकार्थदीपिका—गीताजीकी सम्पूर्ण प्रकाशित टीकाओं में सबसे उत्तम यही टीका है इसलिये कि किसी मतविशेष का पक्ष न कर यथार्थ अर्थ का प्रतिपादन करती है कि जिसको अनेक विद्वज्जनों ने मान्य किया है मूल्य १। रु० । नारायणकवच (भाषाटीका) मूल्य २ आ० सप्तगीत (श्रीमद्भागवतान्तर्गत वेणुगीत, गोपीगीत, भ्रमरगीत, युगलगीत, श्रुतिगीत, महिषीगीत और अवधूतगीत) परम पावनरसमय श्लोकों की चित्त-कमल को प्रफुल्लित करने वाली भाषाटीका सहित छपकर तयार, मूल्य ८ आ० गीता चिद्घनानन्द स्वामीकृत टीका सहित ८ रु० गीता आनंदगिरि कृत भाषाटीका ३ रु० । शिवसंहिता १ रु० शाक्तप्रमोद ५ रु० गरुड पुरान भाषाटीका १ रु० मनुस्मृति भाषाटीका २॥ रु० मनुस्मृति कुल्लूकभट्टीय संस्कृतटीका २ रु० ज्योतिषसार भाषाटीका १ रु० गीतगोविंद संस्कृत तथा भाषाटीका सहित १। रु० रघुवंश सटीक २ रु० बृहन्निघण्टुकार वैद्यक का अति उत्तम ग्रन्थ भाषाटीका सहित ४ भाग १२ रु० संप्रदाय कल्पद्रुम १। रु० रागरत्नाकर बड़ा २ रु० सितारचन्द्रिका ६ आना । विशेष देखना हो तो एक पोष्टकार्ड भेजकर बड़ा सूची-पत्र मंगालीजिये ।

श्रीमद्भागवत केवल भाषा—खुलापत्रा श्लोकांकसहित (कथा बांचने वालों के लिये परम उत्तम) श्रीमद्भागवत—मूल मात्र—(पाठ करने के उपयोगी) शुकसागर—वृजभाषाटीका और श्रीमद्भागवत भाषाटीका । श्रीमद्भागवत वीरराघवी टीका—स्वरताल समूह (गान विद्याका अलौकिक पुस्तक बिना उस्ताद के सितार बजाना और गाना सीखनेके लिये परम उत्तम) काव्यमंजरी (छन्दोंके भेद और बनाने की रीति तथा अलङ्कार का पूरा वर्णन छत्रवं धादिक प्रस्तार इत्यादिक विषयोंका पूर्ण रीति से ज्ञान कराने वाला उत्कर्ष ग्रन्थ) ये सब ग्रन्थ छप रहे हैं ।

ग्ले० किं० ४॥ रु० बड़े रामायण के अक्षरों का नमूना । रफू० किं० ३॥ रु०

दोहा—दानिशिरोमणि कृपानिधि, नाथ कहौं सतभाव ॥

चाहौं तुमहिं समान सुत, प्रभुसनकवनदुराव ॥ १५६ ॥

देखि प्रीति सुनि वचन अमोले * एवमस्तु करुणानिधि बोले ॥

आप सरिस खोजौं कहँ जाई * नृप तव तनय होब मैं आई ॥

ग्ले० किं० २॥ रु० मझोले रामायण के अक्षरों का नमूना रफू० किं० १॥ रु०

दोहा—सोइ सुख सोइ गति सोइ भगति, सोइ निज चरण सनेहु ॥

सोइ विवेक सोइ रहनि प्रभु, मोहिं कृपा करि देहु ॥

सुनि मृदु गूढ रुचिर वर रचना * कृपासिन्धु बोले मृदु वचना ॥

जो कुछ रुचि तुम्हरे मन माहीं * मैं सो दीन्ह सब संशय नाहीं ॥

ग्ले० किं० ८ रु० टीकासहित रामायण के अक्षरों का नमूना । रफू० किं० ७ रु०

चौपाई—खल गहै अगुण साधु गुणगाहा, उभय अपार उदधि अवगाहा ॥ १ ॥

तेहिते कछु गुण दोष वखाने * संग्रह त्याग न विनु पहिंचाने ॥ २ ॥

फिरभी साधुमहात्माओं का विभाग दिखलाते हैं कि खल जो दुष्ट हैं वे अवगुणों को ग्रहण करते हैं साधु गुणों को ग्रहण करते हैं दोनों अपार गहरे समुद्र हैं ॥ १ ॥ इसी कारण कुछ गुण और दोषों का वर्णन किया है क्यों कि विना पहिंचाने संग्रह और त्याग नहीं बनता ॥ २ ॥

दोहा—भले भलाईही लहहिं लहहिं निचाई नीच ॥

सुधा सराहिय अमरता, गरल सराहिय मीच ॥ ६ ॥

परन्तु जो भले पुरुष हैं वे भलाई करने से भलाई पाते हैं नीच निचाई करने से निन्दा पाते हैं सुधा-सेवन से अमरता और विष-सेवन से मृत्यु होती है अपने गुणों में दोनों सराहे जाते हैं ॥ ६ ॥

ग्ले० किं० १॥ रु० गुटका रामायण के अक्षरों का नमूना । रफू० किं० १ रु०

सो—तहं करि भोग विशाल, तात गये कछु काल पुनि ॥

होइहु अवध भुआल, तब मैं होब तुम्हार सुत ॥ २३ ॥

इच्छामय नर वेष संवारे * होइहौं प्रकट निकेत तुम्हारे ॥

अंशन सहित देह धरि ताता * करिहौं चरित भक्त सुखदाता ॥

ग्ले० किं० १० रु० शुकसागर के अक्षरों का नमूना । रफू० किं० ८ रु०


दोहा—तात स्वर्ग अपवर्ग सुख, धरिय तुला इक अंग ॥

तुलहि न ताही सकल मिल, जो सुख लव सतसंग ॥ ३५ ॥


सब संन्यासियों को गति देनेवाले साक्षात् भगवान् श्रीमन्नारायण की सत्कथाओंमें सब संग जिन्हों ने त्याग दिये हैं, ऐसे मुक्तसंग पुरुष बारंबार नारायण की स्तुति किया करते हैं । थोड़े मूल्यवाला शुकसागर छपरहा है ।

सूचना—यह पुस्तक बहुत बड़ा होगया । इस पृष्ठके समान लम्बे चौड़े २०२५ पृष्ठ इस ग्रन्थ के हैं । जिल्दें बहुत उत्तमता के साथ बांधी गई हैं । इन कारणों से इस पुस्तकपर कमिशन नहीं दिया जावेगा और शीघ्रही मूल्य भी बढ़नेवाला है इस कारण अभी नमंगा लेने से पीछे को पछताना पड़ेगा । विलायती कपड़ेकी जिल्दके १० रु० और रेशमी कपड़ेकी बढिया जिल्द कालेके १२ रु०









श्रीः ।

श्रीनिकुञ्जविहारिणे नमः ।

अथ श्रीब्रजविलास ।

(मंगलाचरण)

सोरठा-

होत गुणनकी खान, जाके गुण उरगनतहीं ॥

द्रवो सु दयानिधान, वासुदेव भगवंत हरि ॥ १ ॥

मिटत तापत्रय फांसि, जासु नाम मुखसों कहत ॥

वन्दौं सो शुभराशि, नन्दसुवन सुन्दर सुखद ॥ २ ॥

अरुण कमल दलनैन, गोपचन्द्र मंडन शुभग ॥

करहु सो मम उर ऐन, पीताम्बर वर वेणुधर ॥ ३ ॥

वन्दौं जगत आधार, कृष्णाग्रज बलदेवपद ॥

अभिमत फल दातार, नीलाम्बररेवतिरमण ॥ ४ ॥

श्रीगुरु कृपानिधान, वन्दौं पद महि माथ धरि ॥

जासु वचन जलंयान, नर चढि भवसागर तरहिं ॥ ५ ॥

वंदौं संत कृपाल, पद सरोजरज राखि शिर ॥

जग हितरत शुभमाल, जिन जिन गुण हरिवशकरे ॥ ६ ॥

पुनि वंदौं ब्रजदेश, परम रम्य पावन परम ॥

महिमा जासु सुदेश, राधानाथ विहारथल ॥ ७ ॥

प्रथमकृष्णको तात मनाऊं * श्रीवसुदेव चरण शिरनाऊं ॥

बहुरिदेवकी पद जलजाता * वंदन करौं कृष्णकी माता ॥

इनते और कौन बड़भागी * ब्रह्म धर्यो नर तनु जिनलागी ॥
 वंदौ नंद महरके चरणा * सहित यशोमति मंगल करणा ॥
 जिनकी महिमा भाग्य बढ़ाई * निर्गमागम शिव शारद गाई ॥
 वंदौ रोहिणि पद जलजाता * कृष्णायज बलदेवकी माता ॥
 कीरतयुत वृषभानु गोपवर * वंदौ चरण कमल रज शिरधर ॥
 तात मात राधा रानीके * त्रिभुवन ठाकुर ठकुरानीके ॥
 कृष्ण कमल दृगकी कमलाके * कलुष विभंजन सब विमलाके ॥
 वंदौ श्रीराधापद अम्बुज * जिनके ध्यान मिटत भव भैरुज
 होत कृष्ण सहजहि वशताके * प्रेमसहित गुणगावत जाके ॥
 वन्दौ सो वृषभानु दुलारी * कृष्ण प्राण जीवन धन प्यारी ॥

दोहा—राधाकृष्ण पदाम्बुजन, वन्दौं मंहि शिर टेक ॥

ब्रज विलास हित दौयतन, प्रगट कियेहैं एक ॥

सो ० वन्दौं युगल किशोर, रूपराशि आनंदधन ॥

दोऊ चंद्र चकोर, प्रीति रीति रसवश सदा ॥

अपर गोप गोपी गोपाला * जिनके सँग विचरहिं नंदलाला ॥
 गाय बच्छ बालक ब्रजवासी * जिनके सखा कृष्ण अविनासी ॥
 और जात जो ब्रजहिं निवासी * वंदौं सकल सुकृतकी रासी ॥
 मथुरापुरी नारि नर नागर * गोकुलादि जो ग्राम उजागर ॥
 श्रीयमुनासरि पर्व पुनीता * जासु दरश नहिं यमपुर भीता ॥
 पर्वत बाँपी कूप तडांगा * श्रीचंदावनादि वन बागा ॥
 खंग मृग जलचर जीव विभागा * वंदौं सकल सहित अनुरागा ॥
 वंदौं गिरि गोवर्द्धन देवा * अपरदेव तिन सम नहिं केवा ॥
 सुरंपति मेटि जाहि हरि पूजा * आनदेव तिन समको दूजा ॥

अति रमणीयरेत यमुनातट ✽ उपवन अमित सुभग वंशीवट ॥
जहँ जहँ श्रीहरि धेनु चराई ✽ सुन्दर श्यामल कुँवर कन्हवाई ॥
रास विलास जहां हरि कीन्हों ✽ भक्तवछल भक्तन सुखदीन्हो ॥

दो०—जड़चेतन ब्रजदेशके, तूण तरु मंहिरज जेत ॥

वंदौ कीट पतंग सब, पुनि पुनि प्रीति समेत ॥

सो०—ब्रज जनपद शिर राख, विनय करौं करजोरि पुनि ॥

मोमनको अभिलाष, पूरन करिये जानजन ॥

ब्रजविलास कछु कहौं बखानी ✽ करन पुनात जान निजवानी ॥
सो तबलों नहिँ उरमें आवै ✽ जबलग तुम्हरी कृपा न पावै ॥
मैं मन वच क्रम तुम्हरो दासा ✽ ताते पुरवहु मोरी आसा ॥
यद्यपि मति इतनी मोहिं नाहीं ✽ करौं उक्ति कछु निज तेहि माहीं ॥
तहां एक मैं कियो विचारा ✽ या विधि बल अपने उर धारा ॥
श्रीशुकदेव कही हरि लीला ✽ सुनी परीक्षित सब गुणशीला ॥
सूरदास सोइ हरिरस सागर ✽ गायो बहु विधि परम उजागर ॥
फैल रह्यो सो त्रिभुवन माहीं ✽ गावत सुनत सुयश हरषाहीं ॥
विविध प्रकार चरित हरिकेरे ✽ तामहि वरणे सूर घनेरे ॥
सो वह प्रीति रीति सुखदाई ✽ मेरे मन अतिशय करिभाई ॥
सो तो कथा अमित विस्तार ✽ मोपै पायो जात न पारा ॥
तामें ब्रजविलास सुखदाई ✽ सो कछु कहिहौं कर चौपाई ॥

दो०—भाषाकी भाषा करों, क्षमियों कवि अपराध ॥

जिहि तिहिं विधि हरि गाइये, कहत सकल श्रुतिसाध ॥

सो०—हरिपद प्रीति नहोय, विन हरि गुण गाये सुने ॥

भवते छुटत न कोय, विना प्रीति हरिपद भये ॥

ताते मैं सन्तन शिर नाई * गावों हरियश जन सुखदाई ॥
 जो ब्रजमें हरि कियो विलासा * सो कछु कहिहों सहित हुलासा
 यामें इतनी * कथा बखानों * ताकी सूचनका यह जानों ॥
 श्रीवसुदेव देवकी व्याही * चलयौ कंस पहुँचावनताही ॥
 तहां भई नभवाणी वाही ॥ सुनिके कंसडन्यो पुनिताही ॥
 अठ्यों गर्भ होयगो याके तेरी मृत्यु हाथ ह ताक ॥
 तबइ देवकी हतन विचान्यो करि विनती वसुदेव उबान्यो ॥
 सब सुत ताहिदेन को भाखे नृप तब दुहुँन वन्दिमें राखे ॥
 षट् बालक तिनके नृप मारे पातक भये भूमिपर भारे ॥
 दुखित गई सो हरिके पासा हरिताको जिमि दई दिलासा ॥
 पुनि संकर्षण गर्भहि आये तिनको बहुरि रोहिणी जाये ॥
 सो सब कहिहों मति अनुमाना * जैसी भांतन सुन्यो पुराना ॥
 दोहा—पुनि भगवान अनादि अज, ब्रह्म साञ्चदानन्द ॥

प्रगट भये वसुदेव गृह, निज इच्छा सुखकन्द ॥

सो०—तात मात सुख दैन, सुन्दर रूप दिखायकै ॥

कियो परम उरचैन, दूर किये दुखद्वंद्व सब ॥

तात मात पुनि जिमि समझाये * लैगोकुल वसुदेव सिधाये ॥
 यशुदा गोद राखि घनश्यामहि * कन्या तासु गये लै धामहि ॥
 कंसासुर सो कन्या पाई * सो जैसे आकाश सिधाई ॥
 तासु वचन सुनि अति भयमाना * बालक हतन मंत्र तबठाना ॥
 बजे नन्दघर अँनद वधाये * ब्रज युवतिन मिल मंगल गाये ॥
 भयो नन्दघर अति उत्साह * ब्रज वासिनको परम उछाह ॥
 प्रीति सहित सो सब सुख गैहों * जितनो निज मति को बल पैहों

बहुरि कंस पूतना पठाई सो जैसे हरिके ढिग आई ॥
ताहि मारिजननी गति दीन्ही * प्राण पान करि पावन कीन्ही ॥
कागासुरपुनि जाविधि आयो * ताको पुनि हरि मारि बहायो ॥
बहुन्यो शकट चरण ते डान्यो * तूणावर्त्तको जाविधिमा यो ॥
अन्न पराशनादि जे कर्मा * कियेनंद जिमानजकुलधर्मा ॥

दो०—बाल चरित्र पवित्र पुनि, जिमि कीने अभिराम ॥

जानु पाणि चलि सुख दियो, तात मातकोश्याम ॥

सो०—ब्रज जनके मनमोद, चले बहुरि पाँयन कछुक ॥

कीने बाल विनोद, नन्द यशोमतिके अजिर ॥

गर्ग आय लक्षण पुनि भाषे * पुनिसबब्रजवासी अभिलाषे ॥
पुनि बालनसंग खेलन लागे * बालखेल लाला अनुरागे ॥
विप्रपाक जैसे छुइ लीनो * चन्दाहेत बहुरि हठ कीनो ॥
कर्णछेदन लीला सुखदाई * कहि सब आनन्द बधाई ॥
पुनि हरि खेलत माटी खाई * यशुमतिलै सांटी उठिधाई ॥
माता आगे मुख जिमि बायो * ताही में त्रिभुवन दिखरायो ॥
शालग्राम मेलि मुख लीन्हों * नन्दहि पूजामें सुख दीन्हों ॥
अन्हवावनहित जिमि मचलाये * बहुत भाँति यशुमति फुसलाये ॥
ग्वालन संग बहुरि अनुरागे * माखन चोरीके रस पागे ॥
बहुरों माता क्रोध उपायो * भक्तिहेत दावरी बँधायो ॥
यमला अर्जुन वृक्ष ढहाये * धनद सुतनके पाप नशाये ॥
पुनि वनगोचारन मन आन्यो * ग्वालन संग जान हठठान्यो ॥

दो०—बहुरि जाय वनमें हन्यो, बत्सासुर नँदनन्द ॥

ग्वाल संग आनंद सहित, घर आये सुखकन्द ॥

सो०—सोकरिकै विस्तार, प्रेम सहित सब वरणिहैं ॥

निज मतिके अनुसार, ब्रजवासी प्रभुके गुणन ॥

गोदोहन जैसे पुनि कीनो * तात मात ब्रजजन सुखदीनो ॥
 मोतीबये नन्दके धामैं * सुरनर लखि चकृत भये जामैं ॥
 बहुरि जाय वन नन्दकुमारा * वका असुरको वदन विदारा ॥
 बहुरों बालचरित चित दीने * भौरा चकई खेलन लीने ॥
 श्रीराधा सों प्रीति बढ़ाई * कीने चरित ललित सुखदाई ॥
 अघा असुर मान्यो पुनि जाई * ग्वालन संग छाक वन खाई ॥
 भयो मोह जिमि विधिके मतमें * बालक वत्स हरे तिन वनमें ॥
 तिनको रूप आप प्रभु कीनो * ब्रजके वासिनको सुखदीनो ॥
 सो सब कहिहों कर विस्तारा * अघनाशन प्रभु चरित उदारा ॥
 श्रीवृषभानु लली पुनि आई * जैसे हरिसों गाय दुहाई ॥
 कहिहों सो रसकथा सुहाई * अति विचित्र जनमन सुखदाई ॥
 बहुरो धेनुकको वध कीनो * विष जलते ग्वालन रखलीनो ॥

दो०—पुनि नाथ्यो काली उरंग, जलमें पैठि मुरारि ॥

यमुनाजल जिर्मल कियो, ब्रजते दियो निकारि ॥

सो०—कियो दावानल पान, राखिलिये ब्रज लोग सब ॥

जिनके कृपानिधान, सदा भक्ति संकट हरण ॥

बहुरि प्रलंब असुर ब्रज आयो * खेलतमें हरि ताहि नशायो ॥
 पनघट यमुनातट पुनि जाई * गोपिनसो रसकियो कन्हाई ॥
 चीरहरण लीला पुनि कीनी * कहिहों सकल प्रेम रसभीनी ॥
 पुनि वृन्दावनमें सुखशीला * ग्वालनसंग करी जो लीला ॥
 वृन्दावनकी महत बढ़ाई * श्रीमुख श्रीबलजू सों गाई ॥

ऋषिपत्निनसों भोजन लीनो * भक्ति दान तिनको प्रभु दीनो ॥
 पुनि श्रीगोवर्द्धन गिरि राई * ब्रज थापे सुरपतिहि मिटाई ॥
 सुरपति कोपिकियो यह जानी * वरुण्यो प्रलय काल को पानी ॥
 तब प्रभु गिरिकेशधरि ब्रज राख्यो * जै जै सब ब्रजवासिन भाख्यो
 सो सब अनुपम कथा सुहाई * कृष्ण कृपाते कहिहों गाई ॥
 नन्दहि पकरि वरुणके दासा * जिमि लै गये वरुणके पासा ॥
 लाये श्याम तहाँ ते जाई * ब्रजमें भई आनन्द बधाई ॥

दोहा—बहुरों पुरवैकुण्ठजो, अति पुनीत निजधाम ॥

ब्रजवासिनको करि कृपा, दिखरायो घनश्याम ॥

सो०—सो सब कथा अनूप, अति विचित्र पावन परम ॥

कहिहों मति अनुरूप, सन्तजनन मन भावनी ॥

पुनि जो करी श्याम सुखशीला * अति अद्भुत ब्रजमें रसलीला ॥
 श्रीराधा वृषभानु दुलारी * और सकल ब्रज गोप कुमारी ॥
 तिन सों मिल श्रीकुञ्जविहारी * रस शृंगार लीला विस्तारी ॥
 आनंद मई सकल सुखकारी * गाय तरत भव सब नर नारी ॥
 जिमि गोपिन हरि सों मन लायो * प्रेम पंथ दृढ़करि दिखरायो ॥
 गोरस लै निकसीं ब्रजनारी * जिमि दधि दानलिये वनवारी ॥
 भई प्रेम उनमत्त गुवारी * लोक लाज तनु दशा विसारी ॥
 बहुरि चरित्र कुँवरि राधाके * परम पवित्र हरण बाधाके ॥
 जैसे मिली श्याम सों जाई * बहुरों जैसी प्रीति दुराई ॥
 पुनि संकेत चरित्र विविधवर * किये प्रिया प्रीतम अतिसुन्दर
 गर्व विरह अभिलाष परस्पर * अति रहस्य लीलासुंदरवर ॥
 कहिहों सकल कथा सुखदाई * भक्ति रसज्ञान के मन भाई ॥

दोहा—देखि मुँकुरमें लाडिली, पुनि जैसो निजरूप ॥

विवस भई सो गायहाँ, लीला परम अनूप ॥

सो०—पुनि नैनन अनुराग, अरु मुरलीकी प्रियकथा ॥

कहिहौं सहित विभाग, प्रेम सुधारस सों भरी ॥

बहुरौं शरदरैनि अति पावन * श्रीचन्दावन परम सुहावन ॥

तहाँ श्याम बाँसुरी बजाई * घर घरते ब्रज नारि बुलाई ॥

कियो रास रसरसिक बिहारी * भई प्रेम गर्वित तहँ नारी ॥

अन्तरध्यान चरित तब कीनो * गर्वगोपिकनको हरिलीनो ॥

कियो महा मंगल पुनि रासा * बाढ्यो परमानन्द हुलासा ॥

पुनि जल केलि करी मनभावन । कहिहौं चरित सकल अतिपावन

मानं चरित लीला सुखदाई * करी बहुरि जिमि कुँवर कन्हवाई

विस्तर सहित कहौं सो वरनी * भरी प्रेम रस आनंद करनी ॥

बहुरौं जाय हिंडोला झूले * भये सकल गोपिन अनुकूले ॥

ऋतु बसंत फागुन जब आयो * कियो फाग रँग सब मन भायो

सो रस कथा सकल सुखदानी * मति समान सब कहौं बखानी ।

पुनि विद्याधर शाप नशायो * अजगर तनु ते ताहि छुड़ायो ॥

दोहा—शंखचूड़ मारयो बहुरि, अधम निशाचर नीच ॥

पुनि मारयो वृषभा असुर, हरि ब्रजवासिन बीच ॥

सो०—वध्यो बहुरि गोपाल, केशी व्योमा असुरजिमि ॥

दुष्टदलन नंदलाल, कहिहौं चरित पुनीत सब ॥

बहुरि आय नारद यश गायो * सुनि के श्याम बहुत सुख पायो

तबहिं कंस अक्रूर पठायो * लेन कृष्ण को सो ब्रज आयो ॥

भये सुनत ब्रज लोग उदासी * मधुपूरि चले बहुरि सुखरासी ॥

जब अक्रूर हृदय दुख पायो ❀ तब हरि जलमें दरश दिखायो ॥
 भये सुखी लखि प्रभु प्रभुताई ❀ सो सब चरित कहौं सुखदाई ॥
 गये बहुरि मथुरा रजधानी ❀ मान्यो प्रथम रजंक अभिमानी
 बसन लुटाय सखन पहिराये ❀ बहुरि सुदामाके घर आये ॥
 कुबजाते चन्दन हरि लीन्हों ❀ ताको रूप अनूपमदीन्हों ॥
 तोन्यो धनुष असुर बहु मारे ❀ द्विदंजीति पुनि दंत उखारे ॥
 भिरे बहुरि मल्लन सों जाई ❀ कियो युद्ध तिनसों दोउ भाई ॥
 जीति मल्ल सब असुर संहारे ❀ डन्यो कंस लखि अति बलभारे
 गये नृपति पहुँ तब दोउ भाई ❀ दियो मंचते भूमि गिराई ॥

दोहा—मारि कंस पुनि केश धरि, दियो यमुनजल डारि ॥

उग्रसेन राजा कियो, चमर छत्र शिर डारि ॥

सो०—बहुरि दियो सुख जाय, बन्दि काटि पितु मातकी ॥

सुंदर दरश दिखाय, भयो तहां मंगल परम ॥

कहिहौं सकल चरित विस्तारी ❀ भव भय भंजन मंगलकारी ॥
 करि मधुपुरिके लोग सनाथा ❀ कुबिजासदन बसे ब्रजनाथा ॥
 नंद विदा करि ब्रजहिं पठाये ❀ बिछुरत ब्रजवासिन दुखपाये ॥
 हरितजि नंद आये ब्रज जबहीं ❀ भई यशोदा व्याकुल तबहीं ॥
 गोपी सुनि हित कुबिजा हरिको ❀ कियो परेखौ अति गिरिधरको ॥
 भई बिरहवश सब ब्रजबाला ❀ कहिहौं सो सब प्रेम विशाला ॥
 पुनि कुल रीति जानि बसुदेऊ ❀ हरि हलधरको कियो जनेऊ ॥
 विद्या निधि पुनि जानतराई ❀ विद्या पढन लगे दोउ भाई ॥
 पूरण काम गुरूके कीन्हे ❀ मरे पुत्र प्रभु तिनके दीन्हे ॥
 ज्ञान गर्व उद्धव मन जानी ❀ पठये ब्रजहिं श्याम सुखखानी ॥

सो उद्धव गोपी सम्वादा ❀ प्रेम भक्ति रसकी मय्यादा ॥
कहों सु कथा विचित्र सुहाई ❀ भक्त जननको अति सुखदाई ॥

दो०—पुनि उद्धव जैसे गये, प्रेम भक्तिको पाय ॥

ब्रजवासिनकी सब कथा, कही श्याम सों जाय ॥

सो०—ब्रजहिं रहे ब्रजराज, ब्रजवासिनके प्रेमवश ॥

किये सुरनके काज, धारि चतुर्भुज रूप पुनि ॥

सो द्वारका चरित्र सुहाये ❀ प्रकट पुराणनमें सब गाये ॥

अति विचित्र हरि चरित अपारा ❀ काहू गाय लख्यो नहिं पारा ॥

मति समान बुध जन सब गावैं ❀ गाय गाय तनु पाप नशावैं ॥

हरिपदपङ्कज प्रीति बढावै ❀ मन चंचलको तहाँ रमावै ॥

ब्रजविलास हरिको अतिपावन ❀ रस माधुर्य चरित्र सुहावन ॥

ताते कछुक कहत हों गाई ❀ सब सन्तनके पद शिरनाई ॥

यामें कछुक बुद्धि नहिं मेरी ❀ उक्ति युक्ति सब सूरहि केरी ॥

कियो सूररस सिंधु उधारा ❀ तामें प्रेम तरंग अपारा ॥

हरिके चरित रत्न विधि माना ❀ ब्रजविलास सो सुधा समाना ॥

पद रचना करि सूर बखान्यो ❀ कोमल विमल मधुर रस सान्यो ॥

समय समयके राग सुहाये ❀ अति विस्तार भाव मन भाये ॥

ताको स्वाद कख्यो नहिं जाई ❀ कहत सुनत श्रवणन सुखदाई ॥

दो०—अतिशय करि मोहत मनहिं, गंधर्वगुणके संग ॥

कहत बनै तामें नहिं, क्रमसों कथा प्रसंग ॥

सो०—मेरे मन अभिलाष, प्रभु प्रेरित ऐसो भयो ॥

कहिहों यह रस भाष, क्रमसों कथा प्रसंग सब ॥

ताते निजमनकी रुचि जानी ❀ इहि विधि करें प्रबंध सुबानी ॥

द्वादश चौपाई प्रति दोहा ❀ तहँ पुनि एक सोरठा सोहा ॥
 कहूँ कहूँ शुभ छन्द सुहाई ❀ भाषा सरल न अर्थ दुराई ॥
 कहत सुनत समुझत मनभाई ❀ ध्यान रूपमय कथा सुहाई ॥
 कर्म धर्म नहिं नीति बखानी ❀ केवल भक्ति प्रेम सुखदानी ॥
 जानि कृष्णके चरित पुनीता ❀ कहिहै सुनिहै सन्तसप्रीता ॥
 बहुरि कहत दोऊ करजोरी ❀ सुनियो विनय कृपा करिमोरी ॥
 चूकपरी जो मोतन होई ❀ सुजन सुधारि लीजिये सोई ॥
 मैं नहिं कवि न सुजान कहाऊँ ❀ कृष्णविलास प्रीति करि गाऊँ ॥
 सो विचारके श्रवणन कीजै ❀ काव्य दोष गुण मन नहिं दीजै ॥
 ऐसे सबको विनय सुनाई ❀ कृष्णचरित वरणौं सुखदाई ॥
 कृष्णचरित आनंदके रासा ❀ मंगल करण हरण भववासा ॥

दोहा—विघन विनाशन शुभ करण, हरण ताप त्रयशूल ॥

चरित ललित नंद नन्दके, सकल सुखनके मूल ॥

सो०—चरण कमल उरधार, श्रीराधा नंदलालके ॥

सुन्दररस आगार, ब्रजविलास अब वरणिहौं ॥

सम्बत शुभ पुराण शत जानौ ❀ तापर और नक्षत्रहि आनौ ॥
 माघ सु मास पक्ष उजियारा ❀ तिथि पंचमी सुभग शशिंवारा ॥
 श्रीवसन्त उत्सव दिन जानी ❀ सकल विश्व मन आनंद दानी ॥
 मनमें करि आनन्द हुलासा ❀ ब्रजविलासको करों प्रकासा ॥
 वन्दौं प्रथम कमलपदनीके ❀ श्रीवल्लभ आचारज जीके ॥
 श्रीलक्ष्मण भट कुँवर उदारा ❀ जन उद्धारन हित अवतारा ॥
 माया व्याधि मिटाय अनेका ❀ कियो प्रेम मार्ग दृढएका ॥
 श्रीगोकुलवसि सुख उपजायो ❀ कृष्ण नामको दान चलायो ॥

विरहानलमें सुभग शरीरा * वाणी प्रेम सिन्धु गम्भीरा ॥
 हरिप्रापतिकी रीति बताई * विरहरूप करि प्रकट दिखाई ॥
 विरह भन्यो जिनको सब नेमा * विरहरूप करि जिनको प्रेमा ॥
 विरहै भरी भक्ति विस्तारी * ताते गोकुल गैल निहारी ॥

दोहा—द्वापरतनु धरि सुरनहित, कृष्ण संहारे दुष्ट ॥

श्रीवल्लभ वपु धरि कियो, प्रेमपंथ कलिपुष्ट ॥

सो०—मन वच क्रमसों चित्त, श्रीवल्लभ चरणनलग्यो ॥

वही आश वहि वित्त, वहिसाधन वहि युक्तफल ॥

पुनि श्रीवल्लभ कुलहि मनाऊं * चरणकमल तिनके शिरनाऊं ॥
 श्रीगोकुलमें जिनको धामा * विश्व विदित सुन्दर गुणग्रामा ॥
 प्रेम भक्तिकी ज्योति विराजै * तेज प्रताप जगतपर राजै ॥
 जिनके सदन देखिये ऐसे * नन्द महारिके सुनियत जैसे ॥
 तहां कृष्णकी नितनवलीला * बाल विनोद भरी सुख शीला ॥
 तिनकी शरण जीव जो आवै * तौ दृढ भक्ति कृष्णकी पावै ॥
 देत श्रवण मग अति सुखदाई * कृष्ण नाम रससुंघा पियाई ॥
 भक्ति दानको परम उदारा * जगत विदित श्रीगोकुलद्वारा ॥
 तामहँ मंगल वंश मझारी * परम कृपालु दीन दुखहारी ॥
 श्रीमोहनजी नाम गुसाई * सुन्दर श्याम श्यामकी नाई ॥
 परम विशाल कमल दल लोचन * दया दृष्टि उरताप विमोचन ॥
 मधुर मनोहर शीतल वानी * प्रेम सुधारससों लपटानी ॥

दोहा—तिनतीरथपति मधि दियो, कृष्ण नाम मोहिंदान ॥

दीन जानि राख्यो शरण, लगिकै मेरेकान ॥

सो०—तिनके पद उर राख, ब्रजविलास वर्णन करौं ॥

मोमनको अभिलाष, पूरण करिहै जानि जन ॥
 वन्दतहौं सब सूर सुजानै ❀ जिन्हैं सूर सम सबकोउमानै ॥
 प्रेम रूप वाणी परकासा ❀ प्रफुलित अम्बुज सुनि हरिदासा ॥
 कृष्ण रूप बिन और न देख्यो ❀ जगत विषय तृण सम करि लेख्यो ॥
 राखे नैन सदा करि ध्याना ❀ दिव्य दृष्टि करि सुयश बखाना ॥
 लीला श्याम जन्म भरगाई ❀ रहस कोलि सब प्रगट जनार्द ॥
 वाणी भांति अनेक बखानी ❀ कृष्ण प्रेम रस सों लपटानी ॥
 चढे कठोर मोह वश जेऊ ❀ होत प्रेम वश सुनिकै तेऊ ॥
 कीन्हों अति उपकार जगतको ❀ मार्ग दयो चलाय भगतको ॥
 मोहिं बडाई करि नहिं आवै ❀ जिनको गायो सबको उगावै ॥
 चरण शीश धरि तिन्हैं मनाऊं ❀ यह अपराध क्षमा करि पाऊं ॥
 मोते यह अति होत ठिठाई ❀ करत विष्णु पदकी चौपाई ॥
 सोमम दोष न उरमें धरिये ❀ सफल मनोरथ मेरो करिये ॥

दोहा—अब सन्तनकी मण्डली, वन्दतहौं शिरनाय ॥

बिना कृपा जिनकी भये, हरि यश गाय न जाय ॥

सो०—करिहैं मोहिं सहाय, गुणगाहक परहित करन ॥

तिनको सहज सुभाय, संतत संत कृपालुचित ॥

संत मण्डली को शिर नाऊं ❀ जिनकी कृपा विमल मति पाऊं ॥
 जिनकी कृपा विघ्न सबनाशै ❀ जिनकी कृपा कृष्ण गुणभाशै ॥
 जिनकी प्रेम भक्ति फल पाई ❀ जिनकी कृपा कुमति मिटिजाई ॥
 जिनकी कृपा होंय गुणनाना ❀ जिनकी कृपा सर्व कल्याना ॥
 जिनकी कृपा मोहतमनाशै ❀ जिनकी कृपा ज्ञान परकाशै ॥
 जिनकी कृपा सकल सुखमूला ❀ होहुसो सन्त मोहिं अनुकूला ॥

जय जय जय श्रीकुंजविहारी * नंदनंदन वृषभानु दुलारी ॥
 मंगल मूरति आनंद करी * लीला ललित भक्त भयहारी ॥
 रूपनिधान प्रेम की रासी * श्रीवृन्दावन धाम निवासी ॥
 अखिलनामगुण सुखके धामा * पूरण काम श्याम अरु श्यामा ॥
 युगुल किशोर ध्यान उर धरिकै * सुभग कमल पद वन्दन करिकै ॥
 ब्रजविलास रस परम हुलासा * गावत है ब्रजवासी दासा ॥

अथ कथाप्रसङ्गवर्णनम् ॥

दोहा—तत्त्व नाम पद परम गुरु, पुरुषोत्तम जगदीश ॥

कृष्ण कमल लोचन सुखद, सकल देव मणिशीश ॥

सो०—वन्दौं नन्दकिशोर, वृन्दावनवासी सदा ॥

श्रीराधा चित चोर, आनंद घन भव भय हरण ॥

कहौं कथा सुन्दर सुखदेनी * अर्घ हरणी वैकुण्ठ निशेनी ॥
 कृष्णचरण पंकज रति देनी * जन पावन करती जिमिवेनी ॥
 श्रीकलिन्दतनया तट पावन * बसत मधुपुरी परम सुहावन ॥
 जाकी महिमा सुर मुनि गावैं * तीनिलोक पर वेद बतावैं ॥
 दर्शन ते नर पावन होई * कृष्ण कृपा बिन सुलभ न सोई ॥
 उग्रसेन तहँ बसैं नरेशाँ * नीति निपुण सह धर्म सुवेशा ॥
 ताको सुवैन कंस अतिपापी * असुर बुद्धि भो विश्व संतापी ॥
 कियो तांत गहिवन्दीशाला * आपन भयो कंस भूपाला ॥
 तांत अनुज तहँ देवक नामा * सुता तासु देवकी ललामा ॥
 दई कंस वसुदेवहि ताही * लोक वेदकी रीति विवाही ॥
 दायज दियो अनेक विधाना * हय गज रथ पट भूषण नाना ॥
 दासी दास बहुत संगदीनो * दान मान परिपूरण कीनो ॥

दोहा—तब चढाइ रथदेवकी, आप भयो रथवान ॥

पहुचावन अति हेतसों, चलयो सहित अभिमान ॥

सो०—तेहि क्षण गिरा विशाल, होत भई आकाशते ॥

होय कंसको काल, देवकिके सुत आठवें ॥

कंसासुर सुनि वचन अकाशा❀ भयो चकित मन मिट्यो हुलाशा
शत्रु समान देवकी मानी❀ रथते उतरि पन्यो अभिमानी ॥
खड्ग निकासि हाथमें लीन्हों❀ यह विचार अपने मन कीन्हों ॥
अब हीं याहि मारि दुख मेटों❀ पुनि कलेश काहेको भेटों ॥
केश पकरि देवकि गहि लीन्हीं❀ नहिं कछु कानि बाहिनकी कीन्हीं
तब वसुदेव दीन है कहहीं❀ तिय वध नहीं भूप यश लहहीं ॥
बहुरो यह पुनि स्वसाँतिहारी❀ राजन कीजै काज विचारी ॥
सुन वसुदेव भई नभ बानी❀ तुमहुं सुनी कछु नाहिं छिपानी
ताते उग्र शोच किन करिये❀ पाछे काहेको दुख भरिये ॥
वृक्ष फलै जो विषफल आगे❀ ताहि बनै पहिलेही त्यागे ॥
जो नहिं हतौं आज यह बाला❀ मिटै न उरसों शोच विशाला ॥
कन्या ओर व्याहि तोहिं देहों❀ याहि मारि उर शोचन शैहों ॥

दोहा—मुनिजन गुरुजन संगजे, तिन्हहिकह्यो तिहिकाल ॥

वृथा होत है यज्ञफल, यह न उचित महिपाल ॥

सो०—यहै तुम्हारे मान, आनक दुन्दुभि देवकी ॥

इन्हें न हतिये जान, वेद विरोध न कीजिये ॥

पुनि वसुदेव कह्यो करजोरी❀ राजन सुनिय विनय कछु मोरी
वृथा देवकीको जिन मारो❀ याको सुत है शत्रु तुम्हारो ॥
सब सुत याके हमसों लीजै❀ जीवदान याको प्रभु दीजै ॥

यह वाचा हम तुमसों भाखें * चन्द्र सूर साखी दै राखें ॥
 भली बात यह सब दिन जानी * भावी विवश कंसहू मानी ॥
 हरि कीनो चाहैं सो होई * ताहि मिटावन हार न कोई ॥
 तिन्हैं सहित नृप घर फिरि आये * करि अगोट दोऊ रखवाये ॥
 प्रथम पुत्र जब देवकी जायो * लै वसुदेव कंस पहुँ आयो ॥
 बालक देखि कंस हँसि दीनो * इन तौ कछु अपराध न कीनो ॥
 अठवों गर्भ शत्रु है मेरो * सो दीजो तुम मोहिं सबेरो ॥
 यह कहि अपनो पाप क्षमायो * तब वसुदेव हर्षको पायो ॥
 ऐसे बाल फेरि जब दीनो * तब वसुदेव गमन हँसकीनो ॥

दोहा—तब ऋषि नारद कंस पहुँ, लिये हस्ततल बीण ॥

गुण गावत गोविन्दके, आये परम प्रवीण ॥

सो०—उठ्यो देखिकै कंस, शीशनाइ पद वन्दिकै ॥

बैठाये परशंस, शुभ आसन ऋषि नारदहि ॥

समाचार जो कछु है आये * सो सब ऋषिको कंस सुनाये ॥
 सुनि नृप वचन बिहँसि ऋषि बोले * तुम कत रहत शत्रुसों भोले
 जाके भय तुम अति भय मानो * अठवों कौन सु तुम कछु जानो
 जो वह प्रथमहि आयो होई * देव चरित्र जान कछु कोई ॥
 आठलकीर खँचि दिखराई * गिनतीमें सब आठों आई ॥
 यह समझाय गये ऋषि ज्ञानी * कंसासुर उर अति भयमानी ॥
 तेहि क्षण बालक फेरि मँगायो * लै वसुदेव तुरतही आयो ॥
 लियो मूढगहि करमें ताई * पटकत भयो शिलापर बाही ॥
 याही विधि षट् बालक मारे * मात पिता अति भये दुखारे ॥
 कहत अहो श्रीपति असुरारी * तुम बिन कासों करहिं पुकारी ॥

यह सन्ताप मिटै कब भारी ❀ बेगिलेहु प्रभु सुरति हमारी ॥

केहि विधि नाथ राखिये प्राणा ❀ करत कंस निरवंश निदाना ॥

दोहा—विपति विनाशन दुख दमन, जन रंजन सुरराय ॥

अब हमको कोऊ नहीं, तुम बिन और सहाय ॥

सो०—विनतीप्रभुहिसुनाय, मनमहँ दम्पति दुखितअति ॥

होन न प्रकट जनाय, कंस असुरके त्रासते ॥

भई भूमि जब अधिक दुखारी ❀ बढ्यो पाप असुरनको भारी ॥

सहि न सकी तब गोतनुधारी ❀ शिवविरञ्चि पै जायपुकारी ॥

सकलसुरनमिलिकियोविचारा ❀ हमते नहिं उतैरे भुवि भारा ॥

विनयकरियचलिश्रीपतिपाहीं ❀ कृपा करै तब सब दुख जाई ॥

भूमि सहित सुर सकल सिधारे ❀ क्षीर सिंधु तट जाइ पुकारे ॥

जहँ श्रीपति श्रीसहित निवासी ❀ पुरुषोत्तम अविगतिअविनासी ॥

धेनु अग्र करि विनय सुनाई ❀ जय जय जय त्रिभुवनकेसाई ॥

जय सुखकन्द संत हितकारी ❀ जयजग वन्द्य भूमि भयहारी ॥

जयजयअसुरसमूहनिकन्दन ❀ जय जय भक्तनके उर चंदन ॥

जयजयजयप्रणतारत मोचन ❀ दैत्य दलन सुर शोच विमोचन ॥

जयजयजय प्रभु अंतर्द्वामी ❀ सुनियविनयसचराचरस्वामी ॥

करिये प्रभु सोवेग उपाई ❀ हरिये नाथ भूमि गरुवाई ॥

दोहा—धरिय मनुजतनु दनुजहति, करियधरणिउद्धार ॥

परशत पदपंकज मिटहिं, सकल भूमि अध भार ॥

सो०—पाहि पाहि भगवंत, शरणागत वत्सल हरे ॥

क्षमा करहु अबकंत, दीन दुखित जन जानि हरि ॥

दीन वचन जब धेनु पुकारी ❀ भई गिरानभ मंगलकारी ॥

जाहु सकल सुर घर भय त्यागी * धरिहों नर तनु तुम हित लागी ॥
 प्रथम जन्म देवकी वसुदेवा * मोसन मांगलियो करि सेवा ॥
 तुम सम पुत्र हमारे होई * मैं तिनको वर दीनो सोई ॥
 तेसे नन्द यशोदा जानौं * दूधपियावन उनहिनमानौं ॥
 गर्भ देवकीके अवतरिहों * बाल चरित गोकुलमें करिहों ॥
 तुमहूं गोप वेष ब्रजहोऊ * मम सँग सुखपावो सब कोऊ ॥
 यह कहि सुरनबिदा हरि कीन्हों * आयसुयोग शक्ति कहैं दीन्हों ॥
 सप्तम गर्भ देवकी केरा * तहाँ शेष मम अंश बसेरा ॥
 सो आकर्षणके क्षण माहीं * राखो गर्भ रोहिणी पाहीं ॥
 शक्ति जबहिं हरि आयसुपायो * ततक्षण ताहि वहीं पहुँचायो ॥
 हरि चरित्र कछु जान न कोई * जो कछु करन चाहैं सो होई ॥

दोहा—तब कृपालु जनके सुखद, अविगति कमलाकन्त ॥

निज आगम देवकी उदर, दिय जनाय भगवन्त ॥

सो०—तनु द्युति बढी अपार, परम प्रकाशित भवन सब ॥

आनन मुकुर निहार, अति प्रसन्न मन देवकी ॥

निजमुख मुकुर देवकी देख्यो * शरद चन्द्र पूरण सम लेख्यो ॥
 मिट्योतिमिर भ्रम अति सुखपायो ॥ जान्यो कंस काल हरि आयो ॥
 प्रभु आगमन जानकर देवा * आये सकल जनावन सेवा ॥
 नभते गर्भ स्तुति सब करहीं * जय जय जय जय जय उच्चरहीं ॥
 जय ब्रह्मा शिव सेव्य सदाई * जय वेदान्त वेद सुरसाई ॥
 जय तीर्थ पद भवनिधि वोहित * प्रणतपाल जय दीननके हित ॥
 जय संकल्प सत्य गुणधामा * जय मन बांछित पूरण कामा ॥
 जय गो द्विजहित नरतनु धारी * जय सन्तन पतिगति अपहारी ॥

जय कृपालु आनन्द बरूथां ❀ वन्दत चरण सकल सुर यूथा ॥
जय पुरुषार्थ अमित अनूपा ❀ महापुरुष सचराचर भूपा ॥
जय अंहीश नित नव गुण गावैं ❀ तदपि नाथ गुण अन्त न पावैं ॥
जो मुनि जन मन ध्यान न आवैं ❀ भक्ताधीन वेद यश गावैं ॥

दोहा—अलख अरूप अनीह अज, प्रभु अद्वैत अनादि ॥

गर्भवास सो देवकी, कौतुकनिधि सर्वादि ॥

सो०—किनहुँ न पायो भेव, शेष महेश गणेश विधि ॥

नमोनमो तिहि देव, परम विचित्र चरित्र शुभ ॥

करि विनती सुरसदन सिधारे ❀ परमानंद मगन मन भारे ॥
तब देवकिपति पास बखाने ❀ कोमल वचन प्रेमते साने ॥
हो पिय सो उपाय कछु कीजै ❀ अबकै यह बालक रखलीजै ॥
बुधिबल छल पिय कीजै सोई ❀ जामें कुलको नाश न होई ॥
मैं मन वच अबकै यह जाना ❀ हैं मम उदर देव भगवाना ॥
कहा करौं कछु यत्न न पाऊं ❀ कौन भांति यह गर्भ दुराऊं ॥
सत्य धर्म बरु जाय तौ जाऊ ❀ पति यहि सुतहित करिय उपाऊ ॥
कर्म धर्म सब हरि हित भाखें ❀ सो हरितजि कहूँ धर्महिं राखें ॥
सुनहु पिया असको हितकारी ❀ जो यह बालक लेहि उबारी ॥
शिर ऊपर बैठे रखवारे ❀ पाँयन पडे निगड अति भारे ॥
कंस असुर अपवंश विनाशन ❀ केहि विधिसों उबरे तियतासन ॥
ऐसोको समर्थ जग पाई ❀ जो इहि अवसर होय सहाई ॥

दोहा—षट बालक बध सुरतिकरि, दम्पति दुखित विचार ॥

अति आकुल भय कंसके, दृगंन चली बहि धार ॥

सो०—करुणासिन्धु दयाल, तात मात अति दुखित लखि ॥

प्रकट भये तिहि काल, दुख मोचन लोचन सुखद ॥
 योग शक्ति हरि आयसु पाई ❀ प्रगटी नन्द भवन सो जाई ॥
 ताके प्रकटही नरनारी ❀ भये नींदवश देह बिसारी ॥
 भादों कारी निशि अति पावन ❀ आठैं बुध रोहिणी सुहावन ॥
 अखिललोकपति जन सुखदायक ❀ आयै जन्मलियो सुरनायक
 शीशमुकुट कल कुण्डल कानन ❀ शरदमयंक सरस शुभ आनन ॥
 चारु चरण पंकजदल लोचन ❀ चितवन सुखद तापत्रय मोचन ॥
 कुटिल अलक भ्रूमेचकताई ❀ जन मन हरण परम सुखदाई ॥
 पीतवसनतनु श्यामतमाला ❀ उरश्रीवत्स चारु मणिमाला ॥
 भुजा विशाल मनोहर चारी ❀ शंख चक्र गद अम्बुज धारी ॥
 अंग अंग सब भूषणनीके ❀ परम विचित्र भावतेजीके ॥
 चरण सरोज उदित नख जोती ❀ कमलदलन राखे जनुमोती ॥
 परम प्रताप शुभग शिशु वेषा ❀ अद्भुत रूप देवकी देखा ॥

दो०—देखिअमितछविचकितमति, पतिढिगलियेबुलाय ॥

दम्पति परमानन्द मन, परे हर्ष सुत पाय ॥

सो०—भरे प्रेम जल नयन, अति सनेह आकुल शिथिल ॥

बोले गदगद बैन, जोरि पाणिं विनती करत ॥

प्रभुकिहि विधि तुम गुणनबखानो ❀ तुम मायावश तुमहि न जानो ॥
 सहस्रानन जाके गुण गावैं ❀ नेति नेति जेहि निर्गम बतावैं ॥
 जाकी भ्रूविलास अनयासा ❀ अखिललोक उपजै अरु नासा ॥
 जो स्वरूप मुनि ध्यान लगावैं ❀ कृपा करहु तब दर्शन पावैं ॥
 जो सबतेपर अज अविनाशी ❀ सो किमिकहिय उदर ममबासी ॥
 परम विचित्र चरित्र तुम्हारे ❀ मोहतहैं प्रभु मनहिं हमारे ॥

तात मातके वचन सुहाये ❀ सने प्रेम वश प्रभु मन भाये ॥
 बोले तात मात सुखदानी ❀ मधुर मनोहर अमृतवानी ॥
 सुनहु मात मैं तुमहिं सुनाऊं ❀ प्रथम जन्मकी कथा बताऊं ॥
 तुम जांच्यो मोहिं करत पभारे ❀ तुम समान सुत होय हमारे ॥
 जन हित विरद मोर श्रुति गायो ❀ सो कैसे करि जात लजायो ॥
 ताते मैं बर तुमको दीन्हों ❀ सो हम आय सत्य अब कीन्हों ॥

दोहा—शिव ब्रह्मा सनकादिमुनि, ध्यानसक्त नहिं पाय ॥

सो मैं तुम्हरे प्रेम वश, दियो दरश निज आय ॥

सो०—कौतुक निधि सुरराय, करत चरित मुनि मनहरण ॥

महा मोह उरझाय, दियो बहुरि पितु मात मन ॥

करहु तात अब वेग उपाई ❀ हमहिं कंस ते लेहु बचाई ॥
 गोकुल हमहिं देहु पहुँचाई ❀ तहां यशोदा कन्या जाई ॥
 मोहिं राखि कै यशुदा पासा ❀ कन्या लै आवहु अनयासा ॥
 सो कन्या लै कंसहि दीजै ❀ तात हमारो नाम नलीजै ॥
 ऐसहि मात पिता समुझाई ❀ भये तुरत शिशु यदुकुलराई ॥
 देखि चरित सुनि प्रभुकी बाता ❀ विषमय हर्ष विवश पितुमाता ॥
 सुत उठाय उरसों लपटायो ❀ प्रेम विवश लोचन जलछायो ॥
 कहति देवकी पति सुनि लीजै ❀ गमन वेग गोकुलको कीजै ॥
 जब लगि सुनहिन वह हत्यारो ❀ मन वच क्रम नृप कोन पत्यारो ॥
 बनै नाथ उर धीरजधारे ❀ नाहिन इतने भाग्य हमारे ॥
 जो यह सुख नयनन पुट पीजै ❀ ऐसे सुतको यश सुनि लीजै ॥
 दरशन सुखित दुखित महतारी ❀ शोचत विकल कंस भयभारी ॥

दोहा—अति अँधियारि अर्द्ध निशि, भटघेरे चहुँ ओर ॥

कौन भाँति जैहैं दई, पाँय निगडं अति घोर ॥

सो०—बरषत अति जल जोर, घनगरजत चमकतचपल ॥

बीच यमुन अति घोर, पार कवन विधि पाइहैं ॥

कहाकरौं अब काहि पुकारौं * कौन भाँति धीरज उर धारौं ॥

कंस सरोष तबहिं किनमारी * विनती करि पति वृथा उबारी ॥

ऐसो सुत बिछुरत महतारी * कौन भाँति जीवै दुखभारी ॥

कृपा समुद्र भक्त सुखदानी * सुनत मातुकी आरतबानी ॥

कृपाकरी सब भ्रम भय टारे * गिरे निगड पाँयनते भारे ॥

तब वसुदेव हरष तिहि ठाहीं * लक्ष धेनु मनसी मन माहीं ॥

पुत्र गोदलै तुरत सिधायै * द्वार कपाट खुले सबपायै ॥

रखवारे सब सोवत देखे * संपदि चले उर हरष विशेषे ॥

तबहीं मधँवा दृष्टि निवारी * मन्द समीर भई श्रमहारी ॥

हरिमुख चन्द्रप्रभा तमनाशै * क्षण क्षण तडित पंथ परकाशै ॥

प्रभु पर शेष छांह फनछाई * आगे सिंह दहाड़त जाई ॥

सो वसुदेव न जानत भेवा * पहुँचे जाय यमुनतट देवा ॥

दोहा—सरित देखि गम्भीर अति, मनमें शोच विचार ॥

गोकुलके सम्मुख धँस्यो, प्रभु प्रताप उरधार ॥

सो०—यमुनापति पहिचानि, मन अनंद हुलस्यो हियो ॥

परसन हित पदपानि, अति प्रवाह ऊँचो उठ्यो ॥

गुल्फं जंघं कटिलों जल आयो * तब हरिको कछु ऊर्ध्व उठायो ॥

ज्यों ज्यों वसुदेव सुतहि उठावै * त्यों त्यों जल ऊपरको आवै ॥

नाक प्रयन्त नीर जब आयो * तब हरिपद अँधको लटकायो ॥

परशि नीर हुंकारहि दीनो * तुरतहिं भयो गुल्फते हीनो ॥

भयो पारलैकै धनभ्यामहि ❀ गये वसुदेव नन्दके धामहिं ॥
 तहां सकल जन सोवत पाये ❀ सुतलै यशुमति पास सिधाये ॥
 कन्या तहां पुनीत निहारी ❀ लई उठाय राखि दैत्यारी ॥
 फिरि फिरि सुतको वदन निहारी ❀ चले तुरत भय कंस विचारी ॥
 जो सम्पति निगमांगम गाई ❀ योगी जनन जानि नहिं पाई ॥
 सनकादिक सरबस विधि प्राणा ❀ शंकर जासु धरत हैं ध्याना ॥
 शारद नारदादि यश गावैं ❀ सहस बदनहू पार न पावैं ॥
 अहो विलोकहु भाग्य बडाई ❀ सोई सोवत यशुमति माई ॥
 दोहा—वहां देवकी प्रेम वश, अति व्याकुल अकुलात ॥

बालक अरु वसुदेव कहैं, पठै बहुत पछितात ॥

सो०—बैठत उठत अधीर, व्याकुल सोई सेज पर ॥

पोंछत नयन न नीर, बालि सकत नहिं कंस भय ॥

मनमन सुर मनाय सनमानै ❀ मत यह भेद दर्द कोउ जानै ॥
 रखवारे कहूँ जान न जाहीं ❀ मत कोउ दुष्ट मिलै मग माहीं ॥
 याते अधिक शोच मोहि भारी ❀ क्यौं दुरिहै शशिमुख उजियारी ॥
 मग महँ यमुना अति गम्भीरा ❀ केहि विधि पहुँचैगे वहितीरा ॥
 गोकुल पहुँचे धौं मग माहीं ❀ भई बेर पति आयो नाहीं ॥
 यहि विधि शोच विवश अकुलाई ❀ इकक्षण कल्प समान विहाई ॥
 पहुँचे वसुदेव तिहि क्षण जाई ❀ बूझत उठी पुत्र कुशलाई ॥
 केहि विधि पुत्र राखि पति आये ❀ समाचार वसुदेव सुनाये ॥
 कन्या दर्द देवकी जबहीं ❀ द्वार कपाट गये लगि तबहीं ॥
 बेडी व्हेगई पग ततकाला ❀ कन्या रोय उठी तिहि काला ॥
 चहुँ दिशि जागि परे रखवारे ❀ तुरत कंस पहुँ जाय पुकारे ॥

सुनतहि उठि अति आतुर धायो * लीन्हें खड्ग तहां चलि आयो
दोहा—कन्यालै तब देवकी, आगे राखी आय ॥

दीन वचन आधीनहै, कंसहि कही सुनाय ॥

सो०—अहो भ्रात यह दान, तुम हम कहँ अब दीजिये ॥

है कन्या जिय जान, याते भय तुमको नहीं ॥

सुनत कंस भगिनीकी बानी * मृत्यु त्रासते शठ रिसमानी ॥

यामें कलू होय छल कोई * को जानै बिधनागति गोई ॥

यह विचार कन्या गहिलीनी * पटकनकी मनसातिहि कीनी ॥

करते छूटिगई आकाशा * दिव्यरूप तहँ कियो प्रकाशा ॥

बोलति भई गगनते बानी * अरे मन्दमति अधम अज्ञानी ॥

ममहत्या तैं लई वृथाहीं * तेरो रिपु प्रगट्यो ब्रजमाहीं ॥

सर्प ग्रसित जिमि दादुर होई * माखी खान चहत शठ सोई ॥

तेस तू चह मारन मोहीं * आयो काल निकट शठ तोहीं ॥

ऐसे कहिकै स्वर्ग सिधारी * कंसहि शोच भयो सुनि भारी ॥

पन्यो देवकी चरणनमाहीं * मैं मारे तुवपुत्र वृथाहीं ॥

क्षमा करौ मेरे अपराधा * है विधिकीगति अलख अगाधा ॥

वसुदेवहुसन क्षमा कराई * निगंडदिये पगते कटवाई ॥

दोहा—गयो शोच व्याकुल सदन, परयो सेजपर जाय ॥

जागतही बीती निशां, नींदपरी नहिं ताय ॥

सो०—हरिके चरित अनूप, असुर विमोहन सुर सुखद ॥

नर न परत भवकूप, सहज प्रेम गावहिं सुनहिं ॥

यशुदा जब सोवतते जागी * सुत मुख देखतही अनुरागी ॥

पुलक अंग उर आनंद भारी * देखिरही मुखशंशि उजियारी ॥

गदगद कण्ठ न कछु कहि आयो * हर्ष वन्त है नन्द बुलायो ॥
 आवहु कन्त पुत्र मुख देखो * बड़ो भाग्य अपनो करि लेखो ॥
 भये प्रसन्न आजु सब देवा * सफल भई सबहिनकी सेवा ॥
 सुनत नन्द प्रिय तियकी बानी * प्रेम मगन तनुदशा भुलानी ॥
 हर्षित है उठि आतुर धायो * यशुमति सुतको बदन दिखायो ॥
 देखत मुख उर सुख भयो जैसो * कहिन सकहिं श्रुति शारद तैसो
 कहा कहौं तिहि क्षणकी शोभा * मनहुं महा छवितरुके गोभा ॥
 आनंद मगन नन्द मनमाहीं * जानत नहिं हमको केहि ठाहीं
 रोय उठे तब नन्दके लाला * जागि परे सब ग्वालिन ग्वाला ॥
 जित तितते हर्षित उठ धाये * मनहुं रंक धन लूटन आये ॥

दोहा—देहिं बधाई नन्दको, परैं यशोदा पाव ॥

कहैं पियारे लालको, नेक हमहिं दिखराव ॥

सो०—अति हर्षित नंदराय, कछो बजावनसोहिलो ॥

नारि उठीं सब गाय, लाग्यो बजन बधावनो ॥

छं० सुरसिद्धमुनिन्दा परम अनन्दा सुनिगोकुलहरि आये
 दुन्दुभी बजावत मंगल गावत तियन सहित उठि धाये ॥
 विद्याधर किन्नर सुघर कण्ठबर करत गान सचुपाये ॥
 गरजत तिहिकाला मधुररसाला धनगति जनन जनाये ॥
 बाजत करताला बरषत माला सुरतरुसुमन सुहाये ॥
 सब करैं किलोलैं हर्षित बोलैं जय जय जय सुखपाये ॥
 नभ महँ धुनि होई सुन सब कोई भये सबन मन भाये ॥
 संतन हितकारी असुर संहारी आवत क्षितिसुखछाये ॥
 शिव ब्रह्मादिक मुनि सनकादिक परम प्रफुल्लित गाता ॥

गुणि गण सब गावैं प्रभुहि सुनावैं आनँद उर न समाता ॥
 भएमन चीते सब भय बीते प्रगटे दनुज निपाता ॥
 अतिमनमें हर्षे पुनि पुनि वर्षे सुमन जो सुरतरु जाता ॥
 सुरतियमनमाहीं निरखिसिहाहीं यशुमतिके बड़ भागा ॥
 इनसमहमनाहीं पुण्यनमाहीं कहैं सहित अनुरागा ॥
 योगीजेहि ध्यावैं ध्यान न पावैं करि करि योग विरागा ॥
 जो वेद न जानै नेति बखानै सो सुतव्हे उरलागा ॥
 दोहा—भरे परम आनन्द सुर, उपजावत अनुराग ॥

बार बार वरणन करै, नन्द यशोमति भाग ॥
 सो०—रहे सदन सुर भूल, गोकुलको उत्सव निरखि ॥
 जन्मे मंगल मूल, ब्रजवासी हर्षित सबै ॥

ब्रजवासिन सबहिन सुनि पायो * नन्दमहरघर ढोटा जायो ॥
 परमानन्द लोग सब धाये * नन्दराय तब विप्रबुलाये ॥
 काढि लग्न ग्रह योग सुधायो * अति विचित्र सब द्विजन सुनायो
 करत वेद ध्वनि अति सुखपाई * देहिं नन्दको सकल बधाई ॥
 तब स्नान महारि उठि कीन्हो * भाल तिलक चन्दन लैलीन्हो ॥
 जाति कर्म करि पितर पुजाये * भूषण बसन द्विजन पहिराये ॥
 गैया लक्षं सर्वत्ससुहाई * बाढी दूध नवीन मँगाई ॥
 सब विधि सकल अलंकृतकीनी * करि संकल्प द्विजनको दीनी ॥
 मुदित विप्र सब देई अशीसा * चिरजीवहु सुत कोटि बरीसा ॥
 हँसि हँसि बहुरि महारि मँदराई * हित कुटुम्ब सब निकट बुलाई ॥
 बहु सुगंधि मथि तिलक बनाये * भूषण बसन विविध पहिराये ॥
 हुते जु कुलभे बृद्ध जिठरे * हित सों पाँय परे सब केरे ॥

दोहा—वंदी मागंध सूत गण, भरे भवन बहु आय ॥

लैलैनाम बुलाय सब, परितोषे नंदराय ॥

सो०—मन बांछित सबलेहिं, जोजाके भावै मनहिं ॥

नन्द भरे रस देहिं, किये अयाँचीयाचकनि ॥

सुनिसुनि धाई ब्रजकी नारी ❀ लेकर कमलन कंचन थारी ॥

मंगल साज साज सब लीन्हें ❀ सहजशृंगार सुभग तनु कीन्हें ॥

चारु चीरतनु दृग कजरारे ❀ भालंतिलककुच शिथिलसँवारे ॥

मांग सिंदूर तरोना कानन ❀ रोरी रंग किये कछु आनन ॥

अँगिया अंगकसे छविछाजै ❀ विविध भांति उर हार बिराजै ॥

अति आनन्द मगन मनफूलीं ❀ अंचल उडत सँभारन भूलीं ॥

निज निज मेल मिलीं सब गावैं ❀ विहरत नन्द धामको आवैं ॥

इक भीतर इक आंगन माहीं ❀ इक द्वारे मग पावत नाहीं ॥

सबको यशुमति निकट बुलावैं ❀ मुख उधार सुतको दिखरावैं ॥

देहिं अशीश परो शिशुपायन ❀ जीवहु जबलग नभ तारागन ॥

पूरण काम भयो ब्रजसारो ❀ धन्य यशोदा भाग्य तिहारो ॥

धन्यसो कोखि जहां सुत राख्यो ❀ पुण्य तिहारो जात न भाख्यो

दोहा—धन्य दिवस धनि राति यह, धन्य लग्न तिथिवार ॥

जहँजायो ऐसो सुवन, थिरथाप्यो परिवार ॥

सो०—पुनि पुनि शीशनवाय, देहिं अशीश मनाय सुर ॥

जियहु सुवन नंदराय, रूप अचल कुलकी थुनी ॥

परमानंद नंद अनुरागे ❀ चित्र विचित्र वस्त्र बहु मांगे ॥

सारी सुरंग कसबके लहंगे ❀ अति चटकीले मोल न महंगे ॥

सिगरी बधू बोल पहिराई ❀ जो जैसी जाके मनभाई ॥

देहिं अशीश मुदित ब्रजनारी ❀ फूलीं कमल कलीसी न्यारी ॥
 एक रहंसि निज निज गृह जाहीं ❀ इक हुलसी आवैं गृह माहीं ॥
 एक कहैं एकनसों धाई ❀ हौं यह बात भली सुनि आई ॥
 महारि यशोदा ढोटा जायो ❀ नंदद्वार सखि बजत बधायो ॥
 चलो वेग सखि देखिये सोई ❀ विधना चाहतहीहै जोई ॥
 इक नाचै इक ढोल बजावैं ❀ एक नन्दको गारीगावै ॥
 एक साथिये द्वार बनावैं ❀ एकै बंदनवार बँधावैं ॥
 ध्वज पताक तोरण छबिछाई ❀ घर घर होत अनंद बधाई ॥
 पुनि पुनि सुमन देव वर्षावैं ❀ फूलनसों सब गोकुल छावैं ॥

दोहा—ध्वज पताक तोरण कलश, बंदनवार दुवार ॥

गोपनके घरघर बँधे, तोरन मंगलचार ॥

सो०—नंद सदनसविचार, वरणिसकैसो कौन कवि ॥

लियो जहाँ अवतार, छबिसागर त्रिभुवन धनी ॥

ग्वाल वृंद सब सुनि उठि धाये ❀ बाल वृंद सब निकट बुलाये ॥
 घसिबन धातु चित्र सब कीन्हें ❀ गुंजा भूषित भूषण लीन्हें ॥
 यद्यपि अरु भूषण तन माहीं ❀ तद्यपि अहिरन गुंज सुहाहीं ॥
 एक कहैं एकन समुझाई ❀ आज वनहिं कोऊ नहिं जाई ॥
 गैया लेपन सहित बनावो ❀ चित्र विचित्र वेगिलै आवो ॥
 पत नन्दके घर है जायो ❀ भयो सबनके मनको भायो ॥
 कितनो गहर करत विन काजा ❀ वेगि चलो सब सहित समाजा ॥
 दधि माखनके माट भराये ❀ कछु इक हरदो रंग मिलाये ॥
 लिये शीशपर केतिक गावैं ❀ केतिक ताल मृदंग बजावैं ॥
 मिलमिल निजनिज यूथन माहीं ❀ नंद सदन निरखत सब जाहीं ॥

देखि नन्द अति आनंद पावें * हँसि हँसि सबको निकट बुलावें ॥

छुइ छुइ चरण भेंट धरिआगे * देहिं वधाई अति अनुरागे ॥

दोहा—नाचत गावत मगन मन, भई सदन अति भीर ॥

मनु आये उत्साह सब, धरि धरि गोप शरीर ॥

सो०—देहधरे आनंद, मनहुं नंद तिन मधिलसै ॥

जन्मे आनंद कन्द, कहि नकसहिं सुख सहसमुख ॥

इक नाचत इक गावत ठाढे * इक कूदत अति आनंद बाढे ॥

छिरकत एक दूध दधि डोलैं * एक कुलाहल करत कलोलैं ॥

मचो नंद घर दधिको कांदौं * बरसत दूध दही जनु भादौं ॥

एक धाय एकन पै जाहीं * एकै मिलत डारि गलबाहीं ॥

एक एकके पायँन परहीं * इकदधि दूर्वाक्षत शिरधरहीं ॥

अति उछाह सबके मन माहीं * राजा राव गनत कछु नाहीं ॥

गोकुल मध्य देखिये जितहीं * करत गोप कौतुहल तितहीं ॥

एकै लूटि नंदको लेहीं * एकै एकन को धन देहीं ॥

एकन हित करि नंद बुलावैं * पट भूषण तिन कोप हिरावैं ॥

एक कहैं हम तब कछु लेहैं * जब लालन मुख देखनदेहैं ॥

एक जो एकन ते कछु लेहीं * ते निशंक एकन को देहीं ॥

अति आनंद मगन पशु पालक * नाचत तरुण वृद्ध अरु बालक ॥

दोहा—गोकुलको आनंद सब, कापै वण्यो जाय ॥

जहां परम आनंद मय, लियो जन्म हरि आय ॥

सो०—नितनव होत विलास, हरि मुकुंदके जन्मते ॥

ब्रज संपदा सुपास, सुर भूलहिं कौतुक निरखि ॥

जबते जन्मलियो हरि आई * सुख संपति ब्रज घर घर छाई ॥

सब उदार सब परम प्रवीना * सब सुंदर सब रोग विहीना ॥
 मुदित जहां तहँ सब ब्रजवासी * सब यशुमतिसुत प्रेम उपासी ॥
 नंद सदन वण्यो किमिजाही * शतसुरेशलखि विभ्रमजाही ॥
 अति प्रकाश मन्दिरके माहीं * फैलिरही हरि छबिकी छाहीं ॥
 ग्वाल गाय गोपनकी भीरा * कहूँ दधि कहूँ माखन कहूँ क्षीरा ॥
 भूमि बाग बन गिरि रमणीया * खग मृग सर सरिता कर्मनीया ॥
 विटपवेलिसबसहित फूलफल * दिशा प्रकाशित निर्मल जलथल ॥
 सुरभी सुर सुरभी सम तूला * भयो सकल ब्रज मंगल मूला ॥
 विभव भेद यह कोउ न जाने * आदिहिते हम ऐसे माने ॥
 कृष्णजन्म आनंद बधाई * सुर पुर नाग तिहूँ पुर भाई ॥
 ब्रज बासिनगण अधिक उछाहूँ * करि नहिँ सकहिँ सहसमुख काहूँ
 दोहा—ब्रजको सुख को कहिसकै, सुखमा बढी अपार ॥
 सुखनिधान भगवान जहँ, लियो मनुज अवतार ॥
 सो०—प्रकटे गोकुल चंद, संत कुमुद वन मोदकर ॥
 तम कुल असुर निकंद, ब्रज जन चारु चकोरहित ॥
 नित नव भीर नंदके द्वारे * याचक जन सब होय सुखारे ॥
 गाँव गाँवते सुनि सुनि आवैं * मन भायो सब कोऊ पावैं ॥
 पांचदिवस इहिविधि सुख पायो * छठ्योदिवस छठीको आयो ॥
 मन्दिर सकल सुवास लिपायो * जहांतहाँ चित्रित करवायो ॥
 बीथी चारु सुगंधि सिंचाई * द्वारन बंदनवार बधाई ॥
 जानि कुटुम्ब मित्र हित जेते * नंदराय न्योते सब तेते ॥
 ठौर ठौर बहु व्यंजन होई * भोजन कहँ आये सब कोई ॥
 गोप बधू सब बनि बनि आवैं * लालन को पहिरावनल्यावैं ॥

जरिकस कुरता भूषण टोपी ❀ रत्न समेत प्रेम रँग ओपी ॥
रोरी अक्षत पान मिठाई ❀ धरि धरि कंचन थारिन लाई ॥
गावहिं मंगल कोकिल बानी ❀ नंद भवन आवहिं हर्षानी ॥
करि आदर यशुदा बैठावैं ❀ देखि श्याम घन सब सुखपावैं ॥

दोहा—वृषभानादिक गोपवर, ब्रजवासी समुदाय ॥

आये सब नंदराय गृह, भूषण बसन बनाय ॥

सो०—अति आदर करि नंद, शुभ आसन दीने सबन ॥

सबके मन आनंद, बजत दुंदुभी नचत नट ॥

कहू ग्वाल गावतहैं हेरी ❀ कहूं खिलावत गाय घनेरी ॥
वंश प्रशंसा भाट सुनावैं ❀ कितहूं ढाढी ढाढिनिगावैं ॥
देहिं गोपगण तिनको दाना ❀ भूषण बसन धेनु मणि नाना ॥
परजा सकल खिलौनाल्यावैं ❀ अति अद्भुत कापै कहि आवैं ॥
धरहिं नंदके आगे आनी ❀ राखहिं सब अतिशय सुखमानी ॥
तिनहीं देहिं निछावरि हरिकी ❀ कोमल श्यामल सुन्दर बरकी ॥
विश्वकर्मा पलना गढिलायो ❀ रत्न जटित शुभरंग सुहायो ॥
लालन हितसो नंद रखायो ❀ विश्वकर्मा सब बांछित पायो ॥
ऐसे दिवस यामयुग आयो ❀ तब सब गोपन नंद जिमायो ॥
छिरकि सुगंध पान कर दीन्हों ❀ तब सब गोपन भोजन कीन्हों ॥
मंगल मय रजनी जब आई ❀ गाय उठीं सब नारि सुहाई ॥

अथ कुरताटोपीवर्णनम् ॥

दोहा—कुरता टोपी पीतरँग, लालनको पहिराय ॥

लैउछंगं पूजन छठी, बैठीं हर्षित माय ॥

सो०—करि कुलको व्यवहार, करी आरती श्यामकी ॥

करति निछावरि नार, तन मन धन शशिमुख निरखि ॥
 नेग जोग सब नेगिन पायो * दियो सबनि यशुदामनभायो ॥
 प्रातहि उठि लालन अन्हवायो * सुदिन शोधि पलना पहुँढायो ॥
 निरखि निरखि यशुदा बलिजाई * अरुण चरण कर कोमल ताई ॥
 ब्रजवासी जीवन नंदलाला * मातु सुकृत फल मदन गोपाला ॥
 नितनव मंगल होहिं सुहाये * मंगल निधि जबते हरि आये ॥
 नन्द सुकृत वर्षाकृतु सोई * यशुमति सुकृत अकाश बनोई ॥
 तहँ धनश्याम श्याम तनु उनये * मंदहँसनिदामिनिद्युति जुनये ॥
 गरजन मंद मधुर किलकारी * ब्रजजन मोरन आनंदकारी ॥
 दादुर गुणगण गावहिं दासा * परम प्रीतिमन परम हुलासा ॥
 पलना पचरंग मणि छविछाई * इन्द्र धनुष उपमा तिनपाई ॥
 गज मुक्तनकी लर लटकाई * सोई मानों बगपांति सुहाई ॥
 ब्रज घर घर सुख संपति छाई * सोई मनहुँ भूमि हरिआई ॥

दोहा—वर्षत परमानंद जल, नंद सदन जगमाहिं ॥

ध्यान भूमि दृग सरित मग, जन उर सिंधुसमाहिं ॥

सो०—पूरण होत सुनाहिं, यद्यपि निशि बासर भरन ॥

बढत लहरि पुलकाहिं, हरि मुख शशिराका निरखि ॥

कंसहि वहां नींद निशि नाहीं * अति चिंता व्याकुल मन माहिं ॥
 बैठ्यो निकसि सभा उठि प्राता * मंत्री बोलि कहहि सब बाता ॥
 मेरो रिपु प्रगट्यो ब्रजमाहिं * कौन भांति पहिंचानों ताहिं ॥
 जाते जाय वेगि वह मारो * ऐसो तुम कछु मंत्र विचारो ॥
 दिन दिन बढो होय अबसोई * कोजाने फिरि कैसी होई ॥
 बोल्यो एक असुर सुनु राजा * क्यों डरपत इतनेके काजा ॥

मोपै एक मंत्र सुनिलीजै ✽ धर्म काज कछु होन न दीजै ॥
जप तप होम होन नहिं पावैं ✽ विप्रन साधुन असुर सतावैं ॥
जो यह देव होयगो कोऊ ✽ सहिनहिं सकै प्रकट है सोऊ ॥
तब तेहिं असुर जाय संहारै ✽ याविधि शत्रु तुम्हारो मारै ॥
बोलो एक बात यहनीकी ✽ औरो सुनौ हमारेजीकी ॥
देश देशको असुर पठावो ✽ बालक मासकके जे पावो ॥

दोहा—तिन सबहिनको बधकरैं, वचन न पावै कोय ॥

इनहीं में वह होयगो, मार्यो जै है सोय ॥

सो०—कह्यो कंस हर्षाय, कहे मंत्र दोऊ भले ॥

पठवहु असुर निकाय, जायकरैं कारज सँभारि ॥

याविधि असुर बिदा बहुकीन्हों ✽ बाल बंधनकी आयसु दीन्हों ॥
कह्यो जाय ब्रज वेगहि कोई ✽ तहँके बालक मारै सोई ॥
कह्यो पूतना आयसुपाऊं ✽ तो यह कारज मैं करिल्याऊं ॥
सकल घोर शिशु जाय नशाऊं ✽ जो कहिये तौ जीवत ल्याऊं ॥
क्षणमेंरूप मोहिनी धारैं ✽ वशीकरण पढ़ि सब परडारैं ॥
घिसि कंकोल उरोजन लाऊं ✽ ब्रजबासिनके बाल पियाऊं ॥
तौ पूतना नाम कहवाऊं ✽ जो नृपको कारज करि आऊं ॥
तुरत कंसतेहि आयसुदीन्हों ✽ सुनतहि वचन गवन तिन कीन्हों ॥
तादिन नंद मधुपुरी आयो ✽ राज अंश कछु नृप कहँ ल्यायो ॥
नृप दरबार ताहि पहुँचायो ✽ समाचार वसुदेव को पायो ॥
छोडि बंदिते नृपने राखे ✽ हते मित्र सुनिके अभिलाषे ॥
मिलनगये तिनको नंदराई ✽ उठि वसुदेव मिले हर्षाई ॥

दोहा—कुशल पूछि करि परस्पर, बारम्बार सप्रीति ॥

बैठारे नँदराय ढिगं, करिके आदर रीति ॥

सो०—तब बोले नँदराय, सुनिय दैव भावी प्रबल ॥

तासों कछु न बसाय, जगत भ्रमत जाके बिवस ॥

तुम अति कष्ट कंसते पायो * सुनि सुनि भयो बहुत पछतायो ॥
 आजु देखिके चरण तिहारे * भये हमारे नैन सुखारे ॥
 तब वसुदेव कही मूढुबानी * अहो नन्द तुम सत्यबखानी ॥
 कर्मरेख नहिं जात मिटाई * विधि की गति कछु जात न पाई ॥
 सुन्यो नंद सुत भयो तुम्हारे * तब ते अति सुख भयो हमारे ॥
 तुमको जरा आय नियराई * बड़ी बेस विधि भयो सहाई ॥
 तब नंद हलंधर जन्म सुनायो * प्रथमहिं तिन्हें रोहिणी जायो ॥
 तिनको उत्सव प्रगट न कीनों * कंस चांस अपने उरलीनों ॥
 सुनि वसुदेव बहुत सुख पायो * तब ऐसे कहि वचन सुनायो ॥
 सुनहु नंद तुमनीके जानौ * कंस नृपति कृत नाहिं छिपानौ ॥
 ताते अब वे दोऊ बालक * अपने मानि करौ प्रतिपालक ॥
 अब तुम वेगि गोकुलहि जाहू * बालक हित पतियाहु न काहू ॥

अथ पूतनावधलीला ॥

दोहा—जित तित भेजे कंसके, करत असुर अनरीति ॥

प्रजा लोगके बालकन, ताते है अति भीति ॥

सो०—गई पूतना आज, ब्रजके बालक घातिनी ॥

करि है कछू अकाज, वेग धाम सुधि लीजिये ॥

सुनि वसुदेव वचन नँदराई * भये बिदा तुरतै भय पाई ॥
 निकसत शकुन अशुभ मग पायो * ताते अधिक शोच उर छायो ॥
 क्षिप्र चले कछु सुधि तन नाहीं * बालककी चिन्ता मनमाहीं ॥

इहां पूतना ब्रजमें आई ❀ रूप मोहनी प्रगट बनाई ॥
 गरल बांटी कुच सों लपटायो ❀ ऊपर शुभग शृंगार बनायो ॥
 अतिही कपट छबीली साहै ❀ जो देखै ताको मन मोहै ॥
 इत उतहै नन्द धामहिं आई ❀ देखि रूप यशुदा मन भाई ॥
 देखि रही मुख सुन्दर ताई ❀ कै यह नर कै सुरकाँ जाई ॥
 काकी वधू कौनकी बेटी ❀ अबलौं ब्रजमें कबहुं न भेटी ॥
 बिन पहिंचाने आदर कीन्हो ❀ बैठनको शुभ आसन दीन्हो ॥
 अहो महरि पालागन मेरो ❀ हौं आई सुत देखन तेरो ॥
 हरिपलनापर मन मुसुकाई ❀ यशुमति कछु गृहकाज सिधाई ॥

दोहा—तबहिं राक्षसी दुष्टमति, पलनाके ढिग जाय ॥

निरखि बदन मुख चूमिकै, लीन्ह उछंग उठाय ॥

सो०—दियो कमल मुख माहिं, विषलपट्यो अस्तन तुरत ॥

पकर दुहं कर माहिं, लगे करन पय पान हरि ॥

पय संग प्राण खिचे जब वाके ❀ हैं गये अंग शिथिल सब ताके ॥
 तब सो लगी छुडावन बालक ❀ सो क्यों छुटै दुष्ट कुलघालक ॥
 पय संग प्राण खींचि हरि लीन्हा ❀ पठै स्वर्ग जननी गति दीन्हा ॥
 परी मृतक है असुर सुनारी ❀ योजनलों निजतनु विस्तारी ॥
 यशुमति धाय देखि गुहरायो ❀ पलना पर बालक नहिं पायो ॥
 चाहि चाहि करि ब्रज जन धाये ❀ व्याकुल विपुल नन्द गृह आये ॥
 अति व्याकुल यशुमति महतारी ❀ दूढहिं श्यामहिं रोवत भारी ॥
 हरि ताकी छाती लपटाने ❀ करत चरित जो अचरजसाने ॥
 दूढत दूढत उर पर पाये ❀ लै उठाय माता उर लाये ॥
 दुख सुख ताको कल्यो न जाई ❀ जिमि मणि गई भुवंगन पाई ॥

सुखित भई सब ब्रजकी बाला * कहति बच्यो अति नँदको लाला
नन्द यशोमति भाग बडेरी * सुतकी करवरटरी करेरी ॥

दोहा—आई अद्भुत रूप धरि, अति विपरीत कुमारि ॥

कपट हेतु नहिं सहिसक्यो, तेहि मान्यो करतारि ॥

सो०—कहत यशोमति माय, पुनि पुनि सबके पांयपरि ॥

उबरयो आजु कन्हाय, तुम पंचनके पुण्यते ॥

बडो कष्ट यह सुतने पायो * आजु विधाता बहुत बचायो ॥

कोउ कह भागवन्त नँदराई * कुलके देवन करी सहाई ॥

कोउ कहै नेक मोहिं सुत देरी * देखहुं मुख मैं पुनि तू लेरी ॥

कोउ मुख चूमि बलैया लेई * लै उछंग पुनि यशुदहि देई ॥

बच्यो काह सब ब्रज सुधिपाई * घर घर बजी आनंद बधाई ॥

तबहिं नंद गोकुलमें आयो * देखि पूतनहिं अति भय पायो ॥

जो वसुदेव कही ही बानी * सो सब मनमें सांची जानी ॥

तहँ सब ब्रजवासी जुरि आये * समाचार सब प्रकट सुनाये ॥

तब सुखपाय गये नंद धामहिं * देख्यो जाय सुवन घनश्यामहिं ॥

बदन विलोकि हारि उरलाये * बहुत दाने दे देव मनाये ॥

तब ब्रजवासी सकल बुलाये * अंग पूतनाके कटवाये ॥

बाहर एक ठौर सब कीन्हें * अग्नि लगाय फूँकि सब दीन्हें ॥

दोहा—अति सुगंध ता अंगमें, कीन्ही अग्नि प्रकाश ॥

हरि अस्पर्श प्रतापते, ब्रज सब भयो सुबाश ॥

सो०—रहे अचम्भो पाय, ब्रजवासी चक्रित सबै ॥

चरण कमल चित लाय, नंद सुवन महिमा सुनत ॥

हरि रोये माताकी कनियां * दूध पियायो तब नंदरनियां ॥

पुनि पलना पौढाय झुलावै ✽ हुलरावै दुलराय मल्हावै ॥
 लालनके हित नींद बुलावै ✽ मधुरे सुर जोइ सोई गावै ॥
 रेलालनको आव निदरिया ✽ तोहिं बुलावत श्याम सुंदरिया ॥
 जो करि कपट लालको आवै ✽ तौ अबकीलों विधि विनशावै ॥
 अहो देवता या कुलकेरे ✽ मैं पूजिहौं कमलपद तेरे ॥
 बेगि बडो करदे यह बालक ✽ ब्रज जन प्राण पूतना घालक ॥
 दुतियाके शंशि लौं शिशु बाँटे ✽ आँवा लौ अरि उर नितडाँटे ॥
 सोवै मेरो बाल कन्हाई ✽ माता मुखकी बलि बलि जाई ॥
 सोवत देखि मौन गहि रहई ✽ जागत देखि बहुरि कछु कहई ॥
 अँग फरकाय अलंप मुसुकाने ✽ ता छबिकी उपमा को जाने ॥
 बार बार शिशु वदन निहारै ✽ यशुमति अपनो भाग्य विचारै ॥

दोहा—हुलरावत गावत मधुर, हरिके बाल विनोद ॥

जो सुख सुर मुनिको अगम, सो सुखलेत यशोद ॥

सो०—कबहुँ लेत उछंग, उर लगाय चूमत मुखहिं ॥

निरखि मनोहर अंग, कबहुँ झूलावत पालने ॥

दर्शनको नित सुर मुनि आवैं ✽ बाल विनोदनिरखि सुख पावैं ॥
 कहैं परस्पर सुर नर नारी ✽ हरिके अद्भुत चरित निहारी ॥
 अलख अगोचर अज अविनासी ✽ पुरुष पुरातन विश्व निवासी ॥
 जाको भेद न शिव मुनि जानैं ✽ ब्रह्मा पढि पढि वेद बखानैं ॥
 सो हलरावत नंदकी घरणी ✽ पुरण भई पुरातन करणी ॥
 मन अभिलाष बढावत भारी ✽ हुलसत हँसत देत किलकारी ॥
 वर्षि प्रसून हर्षि मनमाहीं ✽ धन्य २ कहि ब्रज घर जाहीं ॥
 नित तव कौतुक होहिं अकासा ✽ ब्रजवासिनमन अमित हुलासा ॥

यशुदा नवनित लाड लडावैं * निरखि २ ब्रज जन सुख पावैं ॥
 नित नव मंगल नंदके धामा * नितनवरूपश्याम अभिरामा ॥
 भक्तबछल भक्तन हितकारी * भक्तन हित नाना तनुधारी ॥
 भजत संत यह हृदय विचारी * जन ब्रजवासी हैं बलिहारी ॥

दोहा—जब हरि मारी पूतना, सुनि डरप्यो नृप कंस ॥

प्रगट भयो ब्रज शत्रु मम, यह जानी निःशंस ॥

सो०—बसो तासु उरमाहिं, ताही क्षणते अचल हरि ॥

भूलत इक छिन नाहिं, शत्रु भाव लाग्यो भजन ॥

अथ कागासुरवध लीला ॥

कागासुर नृप निकट बुलायो * ताहि मतो सब कहि समुझायो
 आवहु वेगि नंद सुत मारी * करियहु कारज बुद्धि विचारी ॥
 आयसु धरि शिर गर्व बढायो * काग रूप तिहि असुर बनायो ॥
 वेगवन्त उठि गोकुल आयो * प्रेरितकाल अवधि नियरायो ॥
 बैठ्यो नंद धामपर आई * पलना पौढे बाल कन्हआई ॥
 ताको आवतही हरि जान्यो * कागन होय असुर पहिचान्यो ॥
 यशुदा हरिको सोवत जानी * कछु गृह कारजमें लपटानी ॥
 तबहिं असुर पलनापर आयो * चाहत हरिको चोंच चलायो ॥
 कंठ पकरि हरि करसों लीन्हो * चोंच मरोरि फेंकि तिहिं दीन्हो
 पश्यो जाय नृपपास उतान्यो * यह ब्रजवासीकाहु न जान्यो ॥
 तुरत कंस तिहि बूझन धायो * बीते यांम बोल तब आयो ॥
 सुनहु कंस वह बाल न होई * है अवतार महाबल कोई ॥

दोहा—एक हाथसों पकरि मोहिं, फेंकि दियो तुम पास ॥

है हैं तुम्हरो काल वह, मैं कीन्हो विश्वास ॥

सो०—अति डरप्यो महिपाल, कागासुरके वचन सुनि ॥

बढ़ सो गयो विशाल, जम्यो जु उरमें शोचं तरु ॥

सभा मध्य सब असुर सुनाई ❀ बार बार शिरधुनि पछिताई ॥
बजमें उपज्यो मेरो काला ❀ ताको अबहीं ते यह हाला ॥
दनुज सुता पूतना पठाई ❀ ताको इकक्षण माँझ नशाई ॥
कागासुरके ऐसे हाला ❀ सोतो दिन दिन होत विशाला ॥
है कोउ बीर जुताहि नशावै ❀ मम कारज करि आप बचावै ॥

शकटासुर वधलीला ॥

ऐसो कौन कहाँ मैं जासों ❀ अब कै जाय भिरै जो तासों ॥
असुरनको ये नृपति सुनायो ❀ शकटासुर मन गर्व बढ़ायो ॥
उठि कै पान नृपति सों मांगे ❀ कहा काम यह मेरे आगे ॥
तव प्रताप तेहि पलमें मारैं ❀ कहौ तौ सब बजको संहारैं ॥
कंस हर्ष तेहि बीरा दीन्हों ❀ शूर सराहि बिदा तेहि कीन्हों ॥
यहां श्याम पलना पर खेलैं ❀ करगहि पद अँगुठा मुख मेलैं ॥
अपने मन यह करत विचारा ❀ इह मम पद संतन आधार ॥

दोहा—ये पद पंकज राखि उर, निरखत शम्भु सुजान ॥

इनको रस मन मधुप करि, करत निरंतर पान ॥

सो०—पुनि इनपदको ध्यान, करत ब्रह्मसनकादिमुनि ॥

लक्ष्मी अति सुख मान, उरते क्षण टारत नहीं ॥

इन पद पंकज रस अनुरागा ❀ मगन सकल सुर नर मुनि नागा ॥
ऐसो धौं का रस इन माहीं ❀ सोतो मोहिं विदित कछु नाहीं ॥
मोको यह रस दुर्लभ भारी ❀ देखौं धौं मैं ताहि विचारी ॥
ताते पद अँगुठा मुख मेलैं ❀ लैलै स्वाद मगन रस खेलैं ॥

ताअन्तर शकटासुर आयो * पवनरूप काहु न लखि पायो ॥
 भारे शकट नन्द घर केरे * पलनाके ढिग हते घनेरे ॥
 तिनमें सो शठ आय समान्यो * नन्दसुवन तबहीं यह जान्यो ॥
 ताको हरि यक लात चलाई * गिरयो शकट तब अति हहराई ॥
 दनुज निधन काहु नहिं जान्यो ॥ गिन्यो शकट यह सबहिन मान्यो
 सुनत शब्द सब व्याकुल धाये * नन्द आदि सब जुरि तहँ आये
 यशुमति दौरि श्यामको लयऊ * सबके मन अति विस्मय भयऊ
 कारण कहा कहैं नर नारी * गिन्यो शकट आपुहिते भारी ॥

दोहा—पलनाढिग खेलत हुते, कछुक गोपके बाल ॥

तिनन कद्यो डारयो शकट, पलनाते नँदलाल ॥

सो०—सोनहिं करी प्रतीति, काहु बालनकी कही ॥

यह तौ कछु विपरीति, भई कुशल अति श्यामकी ॥

यशुमति अति मन मन पछिताई * भये आज कुलदेव सहाई ॥
 बार बार उरसों सुत लाई * निरखि नंद पुनि पुनि बलि जाई
 मेरे निधनी के धन छैया * लगै मोहिं तेरी रोग बलैया ॥
 ऐसे बहु विधि लाड लढाये * पर्यं पियाय पलना पौढाये ॥
 मन्द मन्द कर ठोंकि सुनावैं * कछु इक मधुर मधुर सुर गावैं ॥
 सोवत श्याम शुभग सुंदर बर * चौंकि चौंकि शिशु दशा प्रगट कर
 लिये मातु छतियां लपटाई * जनु फणि मणि उर माँझ दुराई
 प्रात निरखि मुख आनंद कीनो * चूमि वदन सुत को पय दीना ॥
 कोमल घाम अजिरं जब आयो * तब सुत पलना पर पौढायो ॥
 आप मथन दधि भवन सिधारी * नंदहि सुतके ढिग बैठारी ॥
 निरखि नन्द सुत आनंद भारी * कमल वदन छबि रहे निहारी ॥

चुटकी दैदौ सुतहिं खिलावैं * निरखि निरखि मुख अति सुखपावैं
दोहा—किलकिउठेलखितात मुख, करपददृग अतुराय ॥

झपट झटकि उलटे परे, सुखनिधि त्रिभुवनराय ॥

सो०—सो छवि कहिय न जाय, निरखिनन्द टेरत महारि ॥

आपन सकत उठाय, अति कोमल मम सकुचमन ॥

नंदहिं टेरत सुनि नंदरानी * तजी तुरत दधि मथनमथानी ॥

जाने महारि गिरे सुखदाई * ताते अति आतुर उठिधाई ॥

नंदहि देखि हँसतिहैं पासा * तब धीरज धरि कियो हुलासा ॥

उलटि पन्यो सुत देख्यों आई * उठि न सकत करसेजलगाई ॥

सो छवि निरखि मातु सुखपायो * तुरत मुदित उलटाय उठायो ॥

उर लगाय मुख चुम्बन लागी * कहत आज मैं भई सभागी ॥

पेटकरियन हरि उलटनलागे * डेढ मासके भये सभागे ॥

चिरजीवहु मेरे कुँवर कन्हवाई * आज करों मैं अनंद बधाई ॥

नंदरानी ब्रज नारि बुलाई * यहसुनि सब आनंद कर धाई ॥

हरिको निरखि परम सुख पायो * हरषित सबहिन मंगल गायो ॥

बाँटी घर घर पान मिठाई * नन्दसुवन ब्रजजन सुखदाई ॥

धनि धनि ब्रजकी बालसभागी * हरिके बाल चरित अनुरागी ॥

दोहा—जननी अति आनंद भरी, निरखत श्यामलगात ॥

जैसे निधनी पाय धन, मुदित रहत दिन रात ॥

सो०—धनि धनि ब्रजकोवास, धन्य यशोदा धन्यनंद ॥

धनि ब्रजबासी दास, जिनको मन या रस मगन ॥

अथ तृणावर्त्त वध लीला ॥

धनि धनि ब्रजकी भूमि सुहाई * बाल चरित लीला सुखदाई ॥

यशुदा भाग्य न जात बखाने * त्रिभुवन पतिको सुतकर माने ॥
 हरिको गोदलिये पंयप्यावै * विविध भांतिकरि लाड़ लड़ावै ॥
 कबहूं हरि मुखसों मुखलावै * कबहूं हर्षित कंठ लगावै ॥
 मोनिधनीको धन सुतनान्हा * खेलतहँ सतरहौ नित कान्हा ॥
 कबधौं मधुर वचन कछु कैहें * कब जननी कहि मोहिं बुलैहैं ॥
 कब नन्दाहि कहि बाबाबोलैं * खेलत इत उत आँगन डोलैं ॥
 कबधौं तनक तनक कछु खैहैं * अपने करले मुख में नैहैं ॥
 कब विधि यह अभिलाष पुरावै * मनहीं मन कुलदेव मनावै ॥
 किलकत हरिजननीकी कनियां * करत चरित्र मातु सुखदनियां ॥
 तृणावर्त हरि आवत जाना * पठयो कंस सहित अभिमाना ॥
 भयो गरुव जननी भरपायो * सहि न सकी तब भुव बैठायो ॥

दोहा—आपलगी गृहकाज कछु, राखि अजिर गोपाल ॥

अति प्रचंड वह डर उठ्यो, गोकुलपुर तिहकाल ॥

सो०—बात चक्रमिस आय, तृणावर्त पापी असुर ॥

हरिको लियो उठाय, अन्धधुंध गोकुल कियो ॥
 हरिको लैकै गयो अकाशा * धूरि धुन्ध गोकुल चहुँपासा ॥
 जहाँ तहाँ नर नारि छिपाने * प्रलय काल सम करि सब माने
 यशुमति दौरि अजिरमें आई * तहाँ नपायो कुँवर कन्हाई ॥
 नन्द नन्द करि शोर लगावो * तेरोसुत अँधवायु उड़ायो ॥
 दौरै वेगि गुहार लगावो * ब्रजबासिनको ढेरि बुलावो ॥
 अति व्याकुल खोजत नँदरानी * जिततित फिरत भुवन बिलखानी
 तृणावर्तको हरि यों कीन्हो * ग्रीव लिपट तिहिनी चेलीन्हो ॥
 कठिन शिलापर ताहि गिरायो * ताके ऊपर आपुन आयो ॥

चूर चूर करि ताके गाता * कीन्हे भुक्ति मुक्तिके दाता ॥
 धूरि धुन्ध सब तुरत विनाशी * खोजत हरिहिं विकल बजबासी ॥
 बजवनितन उपवनमें पाये * लिये उठाय कण्ठ लपटाय ॥
 अति आतुर यशुमति पै लाई * हैगइ घर घर अनंद बधाई ॥
 दोहा—लिये धायकै मायने, छतियां रही लगाय ॥

नन्द निरखि सुख पायके, मनसीं बहुतिक गाय ॥

सो०—बार बार बजनारि, देहिं बसन भूषण मगन ॥

जित तित कहैं विचारि, नयो जन्म हरिको भयो ॥

उबरे श्याम महारि बडभागी * देखहु धौं कहु चोट न लागी ॥
 रोग लेउँ बलि जाउँ कन्हाई * हरि हैं बजके जीवन माई ॥
 भली न प्रकृति यशोदा तेरी * इकलो हरिको छाँड़त हैरी ॥
 घरको काज इनहु ते प्यारो * बौरी अजहूँ सुरति संभारो ॥
 बहुत बच्योरी आज कन्हाई * भयो पुरबलो पुण्य सहाई ॥
 यशुमति सब सों कहत लजानी * अबमें सीख तिहारी मानी ॥
 मोहिं कहा हो यह सुखमाई * मैं तो रंक परी निधिपाई ॥
 अबमें अपनो लालचितैहों * एकौ क्षण काहु न पत्यैहों ॥
 ऐसे कहि सब सो नंदरानी * कीन्ही बिदा सकल सनमानी ॥
 यशुमति हरिको गोद खिलावै * देखि देखि मुख नयन सिरावै ॥
 अति कोमल श्यामल तनु देखी * बार बार पछितात विशेषी ॥
 कैसे बच्यो जाउँ बलिहारी * तृणावर्तकी घात निवारी ॥
 दोहा—नाजानों किहि पुण्यते, को करिलेत सहाय ॥

कियो काम सब पूतना, तृणावर्त यह आय ॥

सो०—मातु दुखित जियजानि, कृपासिन्धु वत्सलभगत ॥

बाल चरित सुखदानि, करन लगे सुन्दर परम ॥

खेलत मातु उछंग कन्हाई * करत बाल लीला सुखदाई॥
 जननी बेसर लटकत देखी * चितवतताहि बिसारि निमेषी॥
 ताहि गहनको पाणि चलायो * तब जननी कछु वदन उचायो॥
 नहि पहुँचे तब अति उकताई * सो छवि निरखिमातु बलि जाई॥
 जननीवदननिकटकरिलीन्हो * तबहरिहुलसिकिलकिहँसिदीन्हो
 बिहँसत चमकि परीं दुइदतियाँ * जनु युग बिज्जु बीजकी पतियाँ॥
 प्रमुदित निरखि यशोदा फूली * प्रेम मगन तनुकी सुधि भूली ॥
 बाहरते तब नंद बुलाये * परमानन्द सहित उठि धाये ॥
 हो पति सफल करो दृग आई * देखिहु सुत मुख दतुलि सुहाई॥
 हर्षित हरिहिं गोद नंद लीन्हो * निरखितात मुख हरिहँसि दीन्हो॥
 देखत वदन नयन सियराने * दूध दांत किधौं छविके दाने ॥
 अहो महरि बड भाग्य तुम्हारे * सफल फले मनकाज हमारे ॥

दोहा—कछु दिन घट षट मासके, भये श्याम सुखदान ॥

अन्न पराशनके दिवस, बूझहु विप्र बिहान ॥

सो०—सुनिपुलके नंदराय, भये पराशन योग हरि ॥

प्रेमरह्यो उरछाय, सो सुख कापै जाय कहि ॥

अथ अन्नप्राशनलीला ॥

प्रातकाल उठि विप्र बुलायो * राशि बूझि शुभ दिवस धरायो॥
 यशुमति सो दिन आछो पायो * सखिन बोलि शुभगान करायो॥
 युवतिमहंरिको गारी गावैं * और महरको नाम सुनावैं ॥
 मणि कंचनको थार मँगायो * भांति भांतिके बासन आयो ॥

नन्दधरनि ब्रजबधू बुलाई ❀ जे सब अपनी जाति सुहाई ॥
 कोउ जिवनार कोऊपकवाना ❀ षट्सके बहु करत विधाना ॥
 बहु प्रकारके व्यंजन ठाने ❀ जिनके स्वाद न जायँ बखाने ॥
 अतिउज्ज्वलकोमलशुभनीके ❀ कियोविविध विधिमनहुअमीके
 यशुमती नन्दहि बोलि कल्यातब ❀ बोला महर जाति अपनी सब
 आय गये नँद सकल महर घर ❀ ल्याये बोलि सबन आदरकर ॥
 बैठारे सब आनि अथाई ❀ भीतर गये आप नँदराई ॥
 यशुमति हरिको उबटि न्हावाये ❀ सुन्दरपट भूषण पहिराये ॥
 दोहा—तन झँगुली शिर चौतनी, कर चूरा दुहुँ पाँय ॥

बार बार मुख निरखिकै, यशुमतिलेतिबलाय ॥

सो०—लै बैठे नँदराय, जानि शुभ घरी गोद हरि ॥

लीने सदन बुलाय, गोप सकल आनँद भरे ॥

बैठे सकल गोपगण आई ❀ अति आनन्द मगन नँदराई ॥
 कनकंथार भरि खीर धराई ❀ मिसिरी घृत मधु डारि मिलाई ॥
 लगेनन्दहरि मुख जुठरावन ❀ गोप बधू लागीं सब गावन ॥
 आंगन बाजी विविध बधाई ❀ शंख निशान भेरि सहनाई ॥
 षट्सके व्यंजनहैं जेते ❀ हरिके अधर छुवाये तेते ॥
 तनक अधर जल पोंछि सुहाये ❀ हरिको यशुमति पै पहुँचाये ॥
 हर्षवन्त युवती सचुपायो ❀ लैलै मुख चुम्बति उरलायो ॥
 विप्रन बोलि दक्षिणा दीन्ही ❀ नाना वस्तु निछावरि कीन्ही ॥
 गोपन संग महारि नँदराई ❀ बैठे पनवारे पर जाई ॥
 अति रुचि सबहिन भोजन कीनो ❀ बीरा वहुरि सबनको दीनो ॥
 गोप बधू सब महारि जिमाई ❀ दैके पान सुगंधि सिचाई ॥

इहि विधि सुख बिलसैं ब्रजवासी * निरखैं श्यामशुभग शुभराशी
दोहा—सुरसिहाहिं ललचाहिं मुनि, लखि ब्रजजनके भाग ॥

धन्य धन्य कहि सुमनझरि, करहिं सहित अनुराग ॥

सो०—नितनवमंगलचार, नितनवलीला श्यामकी ॥

कोकवि वरणै पार, शेष न पावैं पार जिहिं ॥

नेति नेति जिनकों श्रुति गावैं * तिनको ब्रज जन गोद खिलावैं ॥

जो सुख नंदभवनके माहीं * तीनि लोक महँ सो कहूँ नाहीं ॥

नित्य नयो सुख यशुमति पावैं * नये नये नित लाड लड़ावैं ॥

नयन ओट हरि करत न कैसे * जुंगवत रहै फणिकमणि जैसे ॥

निंदति निमिष होत पल ओटा * निरखतही सुखपावति ठोटा ॥

तनक कपोल अधर अरुणारे * तनक तनक कच घूंघरवारे ॥

कुटिल भुकुटि की रेख सुहाई * मसिविन्दुक तापर सुखदाई ॥

नयन नाशिका भाल विशाला * कलबल बोलन परमरसाला ॥

अल्प दशन चिबु कंदर ग्रीवा * तनघन श्याम मृदुल छवि सींवा ॥

मातु निरखि नयनन सुखपावैं * प्रेम विवश मति गति बिसरावैं ॥

निरखिरूप यशुमति अनुरागै * कहत कहूँ मम दांठि न लागै ॥

तब अँचरातर लेत छिपाई * डारत बार लोन अरु राई ॥

दोहा—कबहुँ झुलावति पालने, कबहुँ खिलावति गोद ॥

कबहुँ सुवावति पलंगपर, यशुदासहित विनोद ॥

सो०—नित प्रति ब्रजकी बाम, आवैं यशुमतिके सदन ॥

मुदित निरखि घनश्याम, लैलै गोद खिलावहीं ॥

इहि विधि विहरत बाल कन्हाई * कछु दिनमें संतन सुखदाई ॥

लागे चलन घुटुरुवनि आँगन * लगे मातु सों माखन माँगन ॥

खेलत मणिमय आँगन माहीं * देखि रहत लखि निज परछाहीं॥
 कबहुँ तात कहि पकरन धावैं * जानुं पाणि बिचरत छबि पावैं ॥
 कबहुँ किलकि तात मुख पेखैं * कबहुँ हँसि जननी तन देखैं ॥
 कबहुँ बुलाय लेत नँदराई * कबहुँ जननि ढिग आवत धाई॥
 कबहुँ किलकि अनत उठि भाजैं * गिरत परत घुटुवन छबि छाजैं
 कबहुँ कि जात जहाँ बलभाई * खेलत गोप बाल समुदाई ॥
 कबहुँ कहत कछु खंडित बाता * सुनत होत सुख पूरण गाता ॥
 कहन चहत कछु प्रगट न आवै * माखन माँगत सैन बतावै ॥
 मात समझ मथनीते लेई * कछु खवाय कछु करं धर देई ॥
 खेलत खात काह मणि अँगना * इत उत करत घुटुरुवन रिंगना॥

दोहा—करचूरा पगपैजनी, तन रंजित रजपीत ॥

उर हरि नख कंठि किंकिणी, मुखमंडित नवनीत ॥

सो०—होत चकित चितवाय, बजत पैजनी शब्दसुनि ॥

सुर मुनि रहत लुभाय, बालदशाके चरित लखि ॥

खेलत आँगन बाल गोविन्दा * तात मात उर करत अनन्दा ॥
 चलत पाणि पदकी परछाहीं * प्रतिबिम्बत मणि आँगन माहीं
 मनहुँ शुभग छबि महित टपाई * जल भाजन जल लेत भराई ॥
 किधौं जानि पद कोमलतासन * धरि धरि देत कमलके आसन॥
 निरखि शुभग शोभा सुखदनियाँ * लिये हरषि सादर नंदकनियाँ
 नीलजलजर्तनु सुन्दरश्यामा * शुभग अंग सब छबिके धामा॥
 अरुण तरुण नख ज्योति सुहाई * कोमल कमल चरण सुखदाई
 रुनु झुनु पैजनि पाँयन बाजैं * मनसिंजयंत्र सुनत सुरलाजैं।
 कंठि किंकिणी जटित खनकारी * पीत झंगूलिया सुभग सवारी॥

कर कमलनि चूरा छविछाजै * रुचिर बाहु भूषण अतिराजै ॥
 कटुला हार जो अंग सुहाए * बिच बिच पदिक प्रवाल पुहाए ॥
 चारु चिबुक द्युति वरणि न जाई * गोलकपोल परम छवि छाई ॥
 दोहा—अरुण अधरमधि दर्शन द्युति, प्रकट हँसनमें होति ॥

मानहु सुन्दरता सदन, रूप रत्नकी ज्योति ॥

सो०—मधुरतोतरे बैन, श्रवण सुखद मुनि मन हरण ॥

सुनत होत चित चैन, समुझत कछुक बनै नहीं ॥

नाशा सुभग कमल दल लोचन * भाल विशाल तिलक गोरोचन
 भ्रुकुटि निकट मंसिविन्दुकलाग्यो। मनो अलि शवकसोयन जाग्यो
 लाल चौतनी शीश सुहाई * विविध रंग मणि गण लटकाई ॥
 बाल दशाके कंचधुंधरारे * छिटकिरहे कछु घूमघुमारे ॥
 मंजुल तारन की चपलाई * बाल दशा की ललित सुहाई ॥
 चन्द्र बदन सुख सदन कन्हवाई * निरखिनन्द आनद अधिकाई ॥
 वदन चूमि उर सों लपटायो * सोसुख कापै जात बतायो ॥
 ब्रज युवती सब चितवत ठाढ़ीं * मनहुँ चित्र पुतरी लिखि काढ़ीं ॥
 प्रेम मगन नंद सुवन निहारैं * गृह कारजकी सुरति बिसारैं ॥
 ब्रज युवती हरि सों मन लावैं * नन्द सुवन सबके मन भावैं ॥
 ब्रज बासी प्रभु सबके नायक * प्रेम विवश जनके सुखदायक ॥
 बाल चरित लिखि सुर सुख पावैं * योग दशा सनकादि भुलावैं ॥

दोहा—करत बाललीला ललित, परम पुनीत उदार ॥

सुन्दर श्याम सुजान हरि, सन्तनके आधार ॥

सो०—कापै वरण्यो जाय, बालचरित नंदलालको ॥

कल्पनसकहि न गाय, शेषकोटि शारद सहस ॥

अथ नामकरण लीला ॥

इकदिन श्रीवसुदेव विज्ञानी ✽ पठये बोलि गर्गमुनि ज्ञानी ॥
 करि पूजा विधिवत बैठायो ✽ युगं पद कमल शीशतवनायो ॥
 बहुरि कट्यो सुनिये ऋषिराई ✽ जबते भयो कंस दुखदाई ॥
 तबते गोकुल नन्द अबांसा ✽ जाय रोहिणी कियो निवासा ॥
 जाके गर्भ जन्म सुतलीन्हों ✽ कंस चासते प्रगट न कीन्हों ॥
 नाम करण ताको अबताई ✽ भयो नाहिं तुम बिना गुसाई ॥
 करिकै कृपा तहां प्रभु जइये ✽ ताको नाम राखिकै अइये ॥
 सुनि वसुदेव वचन सुखपायो ✽ हर्ष सहित मुनि गोकुल आयो ॥
 नन्दराय ऋषि आगम जान्यो ✽ अपनो बडो भाग्य करि मान्यो ॥
 चरण धोय चरणोदक लीन्हों ✽ अर्घासन अतिहित करि दीन्हों ॥
 बडी कृपा कीन्ही ऋषिराजू ✽ मोसम धन्य आन नहिं आजू ॥
 अति पुनीत भोजन बनवायो ✽ विविध भाँति ऋषिराय जिमायो ॥

दोहा—बहुरि महरि ऋषि रायसों, कट्यो जोरि कर दोय ॥

किहिकारज प्रभु आगमन, कहो कृपा करिसोय ॥

सो०—तब बोले ऋषिराज, पठयोहै वसुदेव मोहिं ॥

नामकरणके काज, सुभग रोहिणी सुर्वनको ॥

सुनत नन्द अति भये सुखारे ✽ लै आये कनियां दोउ बारे ॥
 मुनि चरणन मेले दोउ भाई ✽ दई अशीष मुदित ऋषिराई ॥
 हरिकी छवि अति आनंदकारी ✽ देखिरहे मुनि पलक विसारी ॥
 प्रथम नन्द बलहाथ दिखायो ✽ जन्म दिवस मुनि पास सुनायो ॥
 देखि गर्ग उठि कियो विचारा ✽ है यह शिशु सब जगत अधारा ॥
 अतिशुभ लक्षण बलको धामा ✽ धन्यो नाम तिनको बलरामा ॥

बहुरि नन्द चरणन शिर नाथो ❀ कत्योकि ऋषि मम भागन आयो
 तुम सर्वज्ञ अहो मुनि नाथा ❀ देखिये यह बालकको हाथा ॥
 मुनिवर देखत चिह्न भुलान्यो ❀ प्रेम भगन सब तनुपुलकान्यो ॥
 पुनि पुनि हरिको बदन निहारी ❀ बोल्यो मुनिवर सुरत सँभारी ॥
 धन्य नन्द धनिमहरि यशोदा ❀ धनि धनि धन्य खिलावत गोदा
 सुनहु नन्द मैं सत्य बखानों ❀ इनको तुम सुत करि मत जानों ॥

दोहा—रूपरेख जाके नहीं, अलख अनादि अनूप ॥

सो भक्तनहित अवतस्थो, निज इच्छा अनुरूप ॥

सोरठा—इनते बड़ो न कोय, येकर्ता सब जगतके ॥

जोये करें सो होय, तुम सो हम साँची कहें ॥

इनके नाम अमित जगमाहीं ❀ तदपि कहो मैं कछु तुम पाहीं ॥
 इन कबहू वसुदेवके धामा ❀ लियो जन्म सुन्दर वर श्यामा ॥
 ताते वासुदेव इक नामा ❀ सो सुमिरत पावाहिं नर कामा ॥
 कहिहैं कृष्ण बहुरि जगमाहीं ❀ जाके सुमिरत पाप नशाहीं ॥
 अरुये जैसे कर्मनि करिहैं ❀ तैसे नाम जगत विस्तरिहैं ॥
 दुष्टदलन सन्तन सुखदाई ❀ भूमिभार हरिहै दोउ भाई ॥
 तुम कबहू तपकरि यह माँगा ❀ तुमहिं खिलावैं अति अनुराग ॥
 ताते सुत करि तुम इनपायो ❀ मत जानो इनको निज जायों ॥
 ये अति सुखदायक ब्रजकेरे ❀ करिहैं अति आनन्द घनेरे ॥
 सुनि ऋषिमुख हरि यशसुखराशी ❀ आनंदे सब ब्रजके बाशी ॥
 सुनत नन्द यशुमति सुखपायो ❀ मुनि चरणनकोशीशनवाथी ॥
 बहुत भेंटलै आगे राखीं ❀ अस्तुति बहुत भाँति सोँभाखी ॥

दोहा—बिदा भये ऋषिराजतब, नन्दभाग्यबड़ भाखि ॥

चले मधुपुरीको हरषि, हरि मूरति उरराखि ॥
 सो०—कद्यो हर्षि ऋषिराय, सब वृत्तान्त वसुदेवको ॥
 सुनत बहुत सुखपाय, ऋषिहि पूजि कीन्हें विदा ॥
 यशुमति समुझि गर्गकी बानी ✽ आपुनि अतिबड़भागिनजानी ॥
 हरिको लै उरसो लपटायो ✽ प्रमुदित अस्तनपान करायो ॥
 श्यामराममुख निरखत मोदा ✽ मातु रोहिणी और यशोदा ॥
 रवँकि रवँकि हरि बैठत गोदा ✽ भावत हरिके बाल विनोदा ॥
 हरिको गोदलिये दुलरावैं ✽ पुनि पुनि तुतरे बोल बुलावैं ॥
 कबहुँक गावत दैकर तारी ✽ कबहुँ सिखावत चलन मुरारी ॥
 तनक तनक भुज टेक उठावैं ✽ क्रम क्रम ठाढे होन सिखावैं ॥
 पुनि गहि भुज पद द्वेक चलावैं ✽ लरखरातलखि मनसुख पावैं ॥
 मनहीं मन यो विधिहि मनावैं ✽ कबधौं अपने पांयन धावैं ॥
 कबहुँक छोड देत अँनैया ✽ खेलत मुदित तहांदोउ भैया ॥
 गौरश्याम बलराम कन्हैया ✽ संगहि संग फिरत दोउ भैया ॥
 जिमि बछराके पाछे गैया ✽ ब्रजवासी जनलेत बलैया ॥

दोहा—धवल धूरि धूसरिततनु, बाल विभूषण अंग ॥

अंजन रंजितदृगचपल, निरखत लजत अनंग ॥

सो०—विहरत आनंद कन्द, मणिमय आंगन नन्दके ॥

यदुकुल कैरव चन्द, दहन दनुज कुल बन अनल ॥

कबहुँ ठाढि होति गहि भैया ✽ कबहुँ डोलत चलत कन्हैया ॥
 कुलही चित्र विचित्र झंगुलिया । दमकि उठत द्वैललित दंतुलिया
 मुनि मन हरणमंजुमसि बिंदा ✽ सुखद चारुलोचन अरविंदा ॥
 कलबल वचन तोतरे बोलैं ✽ गहिमणि खंभडगत डगडोलैं ॥

निरखत झुक झांकत प्रतिबिम्बै * देत परम सुख पितु अरु अम्बै ॥
 मथति जहां दधिनंदकी रानी * होतखरे तहँ टेकिमथानी ॥
 मात तनिकदधि देति खवाई * लेत प्रीति सों सो सुखदाई ॥
 क्षीर समुद्र जासु रजधानी * तनकदही सों तिन रुचि मानी ॥
 तनिकसो बदन तनिकसी दंतियां। तनिकसो अधर तनिकसी बतियां
 तनकबदन दधि तनक कपोलन * तनक हँसन मनहरण अमोलन
 तनक तनक कर तनकै माखन * तनक अँगुरिया तनकै चाखन
 तनक तनक भुज चरण सुहाये * तनक स्वरूप मनोज लजाये ॥

दोहा—तनक विलोकन जासुकी, सकल भुवन विस्तार ॥

तनक सुने यश होतहै, तनक सिन्धु संसार ॥

सो०—तनकरहत नहिं पाप, तनक नाम जाके लिये ॥

मिटत सकल भवताप, तनक कृपा जापै करहिं ॥

अथ बरसगांठलीला ॥

बरसगांठ लालनकी आई * द्विषट मासके भये कन्हाई ॥
 फूली फिरत यशोमति माई * घरघर ते सब बधू बुलाई ॥
 प्रमुदित मंगल गान करायो * आनंदउमगे तूर बजायो ॥
 आंगन सकल सुगंधि लिपायो * रचिरचि मोतिन चौक पुरायो
 फूले फिरत नन्द सुख भारी * लिये गोप गण सकल हँकारी ॥
 द्वारन बन्दनवार बँधाये * ध्वज पताकरचि विविध बनाये
 पान फूल फल डार रसाला * हरदिदूब दधि अक्षत माला ॥
 मंगल द्रव्य सकल मँग वाई * बहुमेवा बहुभांति मिठाई ॥
 यशुमति कीन्ह उबटि अन्हवाये * अंग पोंछि भूषण पहिराये ॥
 टोपी जरकस पीत झंगुलिया * दमकत द्वै चार दंतुलिया ॥

कठुला कंठ बधनखानीको * किये भालकेसरको टीको ॥
लटकत ललित ललाट लटूरी * वरणि न जाय वदन छबिरूरी।

दोहा—नैन आँज भ्रुकुटी निकट, कियोमातुमसि विन्द ॥

करि शृंगार हरि मुख निरखि, चूम्यो मुख अरविन्द ॥

सो०—लिये गोद सुखकन्द, नन्द बोलि यशुमति कट्यो ॥

बोलहु भूसुर वृन्द, लग्न घरी आवत चली ॥

काहेको अब गहरु लगावत * विप्र वेगि काहे न बुलावत ॥

नन्द क्षिप्र वर विप्र बुलाये * पदपखार आसन बठाय ॥

लै उछंग लालन नँदराई * बैठे हर्षि चौकपर जाई ॥

वेद मंत्र विधि साहत पढावत * बरसगांठि सुख सहित जुडावत

बजनारी सब बनिबनि आवैं * मंगल तिलक श्यामको लावैं ॥

गावत मंगल कोकिल बैनी * हरि दर्शन प्यासी मृगनैनी ॥

तिलक सवनि मोहनकै दीन्हों * देखि देखि मुख अति सुखलीन्हों

विप्रन बहुत दक्षिणा पाई * बाँटी सबको पान मिठाई ॥

धन मणि चीर निछावरि कीन्हे * बार बार नेगिनको दीन्हे ॥

तब सारा पचरग मगाः हर्षित महरि वधुन पहिराई ॥

देत अशीष सकल अतिमोदा * लेत यशोमति भरि भरि गोदा ॥

नित नव गोकुल होत बधाई * सदा श्याम जनके सुखदाई ॥

दोहा—धन्य यशोमति धन्य नँद, धन २ बाल विनोद ॥

धन्य सुमन जिन जननके, रहत सुधारस ओद ॥

सो०—धनि धनि ब्रजकी बाल, कहि २ सुर वर्षाहिं सुमन ॥

धन्य धन्य नँदलाल, दैत्यदलन सज्जन सुखद ॥

कान्ह चलत पग द्वै द्वै धरनी * होत मुदितलखिनँदकी धरनी ॥

करत हुती आभिलाषा जोई * निरखत अपने नयनन सोई ॥
 रुनुकु झुनुकु नूपुर पग बाजै * डगमगात डोलत छबिछाजै ॥
 बैठ जात पुनि उठत तुरतहीं * देहरिलों चलिजात फुरतहीं ॥
 धाम अवधि राखत अटकाई * गिरि २ परत नांघि नहिं जाई ॥
 कीन्हीं तीन पडै जिन बसुंधा * देहरिताहि नँधावत यशुदा ॥
 पकरि पाणि क्रम २ उतरावै * लखि सुर मुनि मनविस्मयपावै ॥
 कोटिन अंड रचै पल माहीं * पलमें बहुरि मिटावै ताहीं ॥
 ताहि खिलावत यशुमति ग्वारी * नाना विधि सुख करि २ भारी ॥
 कबहूँ दै करतारि नचावै * कबहूँ मधुर २ सुर गावै ॥
 देखि श्याम जननीके ताँई * आपुन गावत तारि बजाई ॥
 पग नूपर कटि किंकिनि कूजै * लखि छबि मन अभिलाष हिपूजै ॥

दोहा—शोभित कठुला कंठकल, उरहरिनँख छबिराश ॥

मनहुँ श्याम घनमें कियो, नवशशिविमल प्रकाश ॥

सो०—जननि कहत बलिजाउँ, नचहु लेहु नवनीतसद ॥

धरत रुनक झुन पाउँ, त्रिभुवनपति नवनीत हित ॥

बोलन लगे श्याम कलबानी * कछुकतोतरी कछुक सयानी ॥
 नंदहि तात यशोदा मैया * बलसों दाऊ कहत कन्हैया ॥
 प्रातहि उठि मांगत दोउ मैया * माखन रोटी देरी मैया ॥
 अँचरागहैं न मानत बाता * अति आतुर ठुनँकत दोउ भ्राता ॥
 सुनि २ मधुर वचन सुख पावैं * ताते जननी गहँरु लगावैं ॥
 जननि मध्य सन्मुख संकर्षण * पाछै ठाढे सुभग श्यामतन ॥
 मनौ सरस्वति सँग युगपक्षी * राजहंस अरु मोर विपक्षी ॥
 कर्वरी गही श्याम खिझलाई * मुक्ता माँग गही बल भाई ॥

मनहुँदुहुन निज २ भखं लीनो ❀ जननी सों झगरो यह कीनों ॥
नंददेखि हँसि हँसि गएलोटी ❀ यशुमति मुदित कर्मकी मोटी ॥
कतहौ आरि करत गहि चोटी ❀ यहँ बात मोहन तेरी खोटी ॥
जो चाहौ सो लेउ दोउ भैया ❀ करहु कलेवा मैं बलि जैया ॥

दोहा—दियो कलेऊ मात उठि, माखन रोटी हाथ ॥

खात खवावत बालकन, सकल विश्वके नाथ ॥

सो ०—जेहि ध्यावैं योगीश, सनकसनंदन आदि मुनि ॥

कौतुकनिधि जगदीश, करत चरित संतन सुखंद ॥

अथ ब्राह्मणलीला ॥

चलत लालपैजनिके चायन ❀ पुनि २ हर्षितलखि २ पायन ॥
विविध ग्वाल बालन संगलीने ❀ डगमगात डोलत रंगभीने ॥
कबहुं दौरी द्वार लौ जाहीं ❀ कबहुं भजि आवैं घर माहीं ॥
ब्राह्मण एक नन्दके आयो ❀ महाभाग्य हरिभक्त सुहायो ॥
गोपनको सो पूज्य कहायो ❀ पुत्रजन्मसुनिके उठिधायो ॥
यशुमति देखि अनन्द बढायो ❀ आदर करि भीतर बैठायो ॥
पाँय धोय जल शीश चढायो ❀ पाँक करनको भवन लिपायो ॥
अहो विप्र विनती सुनि लीजै ❀ जो भावै सो भोजन कीजै ॥
धेनु दुहाय दूधलै आई ❀ पाँडे रुचि करि खीर बनाई ॥
घृत मिष्टान्न खीर मिश्रितकर ❀ कृष्ण भोग हित थार परसिधर ॥
वेद मंत्र पढिकै हरि ध्यायो ❀ नयन मूँदिकै ध्यान लगायो ॥
नैन उधारि विप्र जब देख्यो ❀ श्यामहि आगे जैवत पेख्यो ॥

दोहा—अहो यशोदा आपने, सुतकृत देखौ आय ॥

सिद्धपाँक सब आयकै, डान्यो कान्ह जुठाय ॥

सो०—महरि जोरि युगंपान, विनय करी द्विजं राजसन ॥

बालक अति अज्ञान, बहुरि पाक विधि कीजिये ॥

बहुरि दूध मिष्टान्न मँगायो * ब्राह्मण फिरकर पाक बनायो ॥
जबहीं ध्यान धन्यो मन लाई * तबहीं लागे खान कन्हाई ॥
ऐसेहि विप्र न जेवन पावै * बार बार हरि छूछू आवै ॥
तब यशुमति हरि सों रिसि आई * कतहि अचकरी करत कन्हाई
मैं इच्छाकरि विप्र जिमाऊं * बार २ भोजन बनवाऊं ॥
यह अपने ठाकुरहि जिमावै * ताको तू गोपाल खिझावै ॥
मैया मुहि जिनि दोष लगावै * बार बार यह मोहिं बुलावै ॥
नयन मूँदि कर जोरि मनावै * बहुत भाँति कर विनय सुनावै ॥
लैलै नाम कहत प्रभु ऐये * खीर खांड यह भोग लगेये ॥
तब मैं रहि न सकौं उठि धाऊं * याको दीनो भोजन पाऊं ॥
प्रेम सहित जब मोहिं बुलावै * तब नहिं रहत मोहिं बनि आवै ॥
सुनत गूढ मृदुहरिके बयनां * खुलिये विप्र हृदयके नयना ॥

दोहा—धनि धनि गोकुल नंदधनि, धन्य यशोदा माय ॥

धनि ब्रजवासी धन्य ब्रज, जहँ प्रगटे हरि आय ॥

सो०—सफलजन्म प्रभु आज, प्रगट भयो सब सुकृतफल ॥

दीनबन्धु ब्रजराज, दियो दरश मोहिं कृपा करि ॥

बार बार कहि नंदके आँगन * लोटत द्विज आनंद मगन मन ॥
मैं अपराध कियो बिन जाने * को जाने किहि भेष समाने ॥
भक्तहेतु वश रहत सदाई * यहै नाथ तुम्हरी बड्याई ॥
जेजे शरण तुम्हारी आये * तेते भये पुनीत सुहाये ॥
पतित उधारन यश विस्तारा * अघ जारन इकनाम तुम्हारा ॥

देह धरत गो द्विज हित लागी * पायौ दरश भयो बडभागी ॥
 हितकी चितकी मानन हारे * सबके जियकी जानन हारे ॥
 शरण २ प्रभु शरण तुम्हारी * दीनदयालु कृपालु मुरारी ॥
 हँसत श्याम यशुमति ढिग ठाढे * प्रेम मगन मन आनंद बाँढे ॥
 निजजन जानि कृपा अति कीनी * प्रेम भक्ति हरिताको दीनी ॥
 प्रेम मगन द्विज बारहिं बारा * कहि जै जै जै नन्दकुमारा ॥
 पुनि २ पुलकत देत अशीशा * विदा भयो घरको द्विज ईशा ॥

दोहा—देख चरित यशुमति चकित, परी विप्रके पांय ॥

दिये रत्न बहु दक्षिणा, चले हर्ष द्विजराय ॥

सो०—यशुमति लिये उठाय, गोद खिलावत कान्हको ॥

चितै वदन बलिजाय, आनंद निधि सुखको सदन ॥

अथ चंद्रप्रस्तावलीला ॥

शोभा मेरे हरिपै सोहै * मैं बलि बलि पटतरंकोकोहै ॥
 मेरो श्याम मनोहर जीवन * बिहँसि श्याम लागे पयपीवन ॥
 ठाढी अजिर यशोदा रानी * गोदी लिये श्याम सुखदानी ॥
 उदय भयो शशि शरद सुहावन * लागी सुतको मात दिखावन ॥
 देखहु श्याम चन्द्र यह आवत * अति शीतल दृग ताप नशावत ॥
 चितै रहे हरि इकटक ताही * करते निकट बुलावत वाही ॥
 मैया यह मीठो कैखारौ * देखत लगत मोहिं यह प्यारौ ॥
 देहि मँगाय निकट मैं लैहौं * लागी भूख चन्द्रमें खैहौं ॥
 देहि वेग मैं बहुत भुखानौ * मांगतही मांगत बिरुझानौ ॥
 यशुमति हँसत करत पछतायो * काहे को मैं चन्द्र दिखायो ॥
 रोवत है हरि विनहीं जाने * अवधौं कैसे करिके माने ॥

विविध भांति कर हरिहि भुलावै * आन बतावै आन दिखावै ॥

दोहा—कहति यशोदाकौन विधि, समझाऊं अबकान्ह ॥

भूलि दिखायो चन्द्रमें, ताहि कहत हरिखान ॥

सो०—अनहोनी क्यों होय, तात सुनी यह बात कहुं ॥

याहि खात नहिं कोय, चन्द्रखिलौना जगतको ॥

यहै देत नित माखन मोको * क्षण क्षण तात देत सो तोको ॥

जो तुम श्यामचन्द्रको खैहौ * बहुरो फिर माखन कहांपैहौ ॥

देखत रहौ खिलौना चन्दा * हठ नहिं कीजै बाल गोविन्दा ॥

मधु मेवा पकवान मिठाई * जो भावै सो लेहु कन्हाई ॥

पालागों हठ अधिक न कीजै * मैबलि रिसही रिस तनु छीजै ॥

खसि २ कान्ह परत कनियांते * देशशिं कहत नंदरनियांते ॥

यशुमति कहति कहा धौं कीजै * मांगत चन्द्र कहांते दीजै ॥

तब यशुमति इक जलपुटलीनो * करमें लै तिहिउंचोकीनो ॥

ऐसे कहि श्यामहिं बहकावै * आव चन्द्र तोहिं लालबुलावै ॥

याहीमें तू तनु धरि आवै * तोहिं देखि लालन सुखपावै ॥

हाथ लिये तोहि खेलत रहिहै * नेक नहीं धरणी पर धरिहै ॥

जलपुटआनिधरणिपरराख्यो * गहिआन्योशशिजननीभाख्यो

दोहा—लेहु लाल यह चन्द्रमें, लीनो निकट बुलाय ॥

रोवे इतनेके लिये, तेरी श्याम बलाय ॥

सो०—देखहु श्याम निहारि, या भाजनमे निकटशशि ॥

करी इती तुम आरि, जाकारण सुन्दर सुवन ॥

ताहि देखि मुसिक्याय मनोहर * बारबार डारत दोऊ कर ॥

चन्द्रापकरत जलके माहीं * आवत कछू हाथमें नाहीं ॥

तब जलपुटके नीचे देखै * तहां चन्द्र प्रतिबिंब नपेखै ॥
 देखत हँसी सकल बजनारी * मगन बाल छबिलखि महतारी
 तबहिश्याम कछु हँसिमुसकानें * बहुरो मातासो विरुझानें ॥
 ल्यों गो री मा चन्दा ल्यों गो * वाही अपने हाथ गहोंगो ॥
 यह तौ कलमलात जल माहीं * मेरे करमें आवत नाहीं ॥
 बाहर निकट देखियत वाही * कहौ तौ मैं गहिल्यावों ताही ॥
 कहति यशोमति सुनहु कन्हाई * तब मुख लखि सकुचत उडराई
 तुम तिहि पकरन चहत गुपाला * ताते शशि भजि गयो पताला ॥
 अब तुमते शशि डरपत भारी * कहत अहो हरि शरण तुम्हारी ॥
 विरुझाने सोये दैतारी * लिय लगाय छतियां महतारी ॥

दोहा—लैपौढाये सेजपर, हरिको यशुमतिमाय ॥

अति विरुझाने आज हरि, यह कहि २ पछताय ॥

सो०—कर सों ठोकि सुनाय, मधुरेसुर गावत कछुक ॥

उठि बैठे अतुराय, चटपटाय हरि चौंकिकै ॥

अथ पुरातन कथालीला ॥

पौढो लाल कहत महतारा * कहा कथा इक श्रवणन प्यारा ॥
 हर्षे यह सुनि मन बनवारी * पौढि गये हँसि देत हुँकारी ॥
 नगर एक रमणीय सुहावन * नाम अवध अति सुंदर पावन ॥
 बड़े महल तहँ अगम अटारी * सुंकर विशद चारु गचढारी ॥
 बहुत गली पुर बीच सुहाई * रहैं सदा सब सुगंधि सिंचाई ॥
 भांति भांति बहुहाट बजारू * अति शूंगार जनु विश्व शूंगारू ॥
 तहां नृपति दशरथ रजधानी * तिनके नारि तीन पटरानी ॥
 कौशल्या कैकयी सुमित्रा * तिन जन्मे सुत चार पवित्रा ॥

राम भरत लक्ष्मण रिपुहन्ता * चारौ अति सुन्दर गुणवन्ता ॥
 तिनमें राम एक व्रतधारी * अति सुन्दर जनके हितकारी ॥
 विश्वामित्र एक ऋषिराई * तिनहिं सतावें निशिचर आई ॥
 तिन नृप सों द्वैसुत लै मांगे * अपनी रक्षाके हित लागे ॥

दोहा—राम लषण ऋषिलै गये, दनुज हते तिनजाय ॥

ऋषिदीनी विद्या बहुत, तिनको अति सुख पाय ॥

सो०—तहां जनक इकभूप, धनुषयज्ञतानेरच्यो ॥

कन्यातासु अनूप, जुरे तहां भूपति अमित ॥

ऋषि लैगये कुँवर तहँ दोऊ * जनकराय सनमाने सोऊ ॥
 धनुष तोरि भूपन मुखमारी * राम विवाही जनककुमारी ॥
 चारहु कुँवर व्याह तहँ आये * भये अवधपुर अनंद बधाये ॥
 रामहिं देन लगे नृपराजू * सज्यो सकल अभिषेक समाजू ॥
 ताही समय कैकयी रानी * चेरीकी मतिसों बौरानी ॥
 वचन मांगि राजा सोलीनो * वनको वास राम को दीनो ॥
 सुनि पितु वचन धर्म हितकारी * नारी सहित भये वनचारी ॥
 तिन्हें चलत भ्राता संगलाग्यो * उनके जात पिता तनुत्यागो ॥
 चित्रकूट गये भरत मिलनजब * दैपद पाँवर कृपा करीतब ॥
 युवती हेत कपट मृग मारा * राजिव लोचन राम उदारा ॥
 रावण हरण कियो तब नारी * सुनतश्याम घन नींद बिसारी ॥
 चौंकि कल्यो लक्ष्मण धनुदेहू * देख भयो यशुदहि सन्देहू ॥

अथ कर्णछेदनलीला ॥

छं०—सन्देह जननीमनभयो हरि चौंक धौं काहेपर्यो ॥

कहूँदीठखेलतमें लगी धौं स्वप्नमें कान्हर डर्यो ॥

बहुँ भांति देव मनाय पढि २ मंत्र दोष निवारही ॥
 लैपियति पानी वारि पुनि २ राई लोन उतारही ॥
 दोहा—सांझहिते बिरुझाय हरि, करी चन्द्रहित आरि ॥
 झिझकिउठयो धौं ताहि ते, रथ्यो सुरत उरधारि ॥
 सो०—बडभागी नंदनारि, महिमा वेद न कहिसकैं ॥

हरिको बदन निहारि, बिसरावत त्रय ताप दुख ॥
 प्रात नन्द उठि हरिपै आये * मुखछवि देखनको अतुराये ॥
 निशिकै द्वंद्व नैन अति आरत * हरुवै करि मुखते पट्टारत ॥
 स्वच्छ सेजते बदन प्रकाश्यो * द्वंद्वतिमिर नयननिको नाश्यो ॥
 मनहुँ मथनपै निधि उडराई * फेणु फोरि कै दई दिखाई ॥
 धाये बज जन चतुर चकोरा * इकटकरहे बदन शशि ओरा ॥
 फूली कुमुदनिसी महतारी * कहत उठहू सुतमें बलिहारी ॥
 माखन रोटी अरु मधु मेवा * जो भावै सो करहुकलेवा ॥
 सद माखन मिसरी तब आनी * कछु खवाय धोयो मुखपानी ॥
 देखि बदन छवि महरिसिहानी * कहति नन्दसों यशुमति रानी ॥
 कनछेदन अब हरिका कीजै * कुंडल सहित देख मुखलीजै ॥
 बोलि विप्र शुभ दिवस गनायो * जाति कुटुंब सबन्योत बुलायो ॥
 कुल व्योहार कियो सब साजा * विविध भांति बहु बाजन बाजा
 छंद—बाजी बधाई विविध आंगन नारि मंगल गावहीं ॥

सुर निरखि अतिहर्षि सों सुमननिवर्ष गोकुल छावहीं ॥
 करिप्रथम मुंडन श्यामको पुनि कर्ण वेधन विधलई ॥
 धरि कै सुपारी पान ऊपर बहुरि गुरु भेली दई ॥
 हँसत सुरगण सहितविधि हरि मात उर अतिधुकधुकी ॥

अतिहि कोमल श्रवण वेधत सकत नहिं सन्मुख तकी॥
 भरिसीं करोचन देत श्रवणनि निकट करि अतिचातुरी ॥
 द्वेदुर मँगाये कनक के कह कहौं छेदन आतुरी ॥
 देख रोवत जननि लीन्हे बिहंसि तबहीं झुकि अली ॥
 हँसत नंद सबयुवति गावत झमकि भीतर लेचली ॥
 कहति सुर वनिता परस्पर धन्य धन ब्रजभामिनी ॥
 नहिंनइनकी किंकिरी सम हम सकल सुर कामिनी ॥
 दोहा—करति निछावरि ब्रज वधू, धन मणि भूषण चीर ॥
 सकल अशीशत नंद सुत, जहँ तहँ याचक भीर ॥
 सो०—पहिरावत नंदराय, ब्रज युवतिन भूषण वसन ॥
 आनंद उर न समाय, मनहुँ उमँग चहुँ दिश चलयौ ॥

नितही नवमुद मंगल ताके * मंगल मूरति हरि सुत जाके ॥
 जेहि विधि तात मात सुखपावैं * सुखनिधान सोइ चरित उपावैं ॥
 जाको भेद वेद नहिं पावैं * नंद भवनसो कान छिदावैं ॥
 निज भक्तन हित नरतनु धारी * करत बाललीला सुखकारी ॥
 हरि अपने रंगनि कछु गावैं * नंद भवन भूषण मनभावैं ॥
 तनक तनक चरणनसों नाचैं * मन २ रीझ विविध विधिराचैं ॥
 मन्द मन्द पग नूपुर बाजैं * बाल विभूषण अंगविराजैं ॥
 कबहुं भुज उठाय गुहरावैं * धौरी धूमरि गाय बुलावैं ॥
 कबहुं माखनलै मुख नावैं * कबहुं खंभ प्रति बीच खवावैं ॥
 माखन मांग दुहं करलेई * एक भाग प्रतिबिंबहिं देई ॥
 तासों कहत लेत क्यों नाहीं * डारदेत काहे महिमाहीं ॥
 दुर देखत यशुमति महतारी * उर आनंद करति अतिभारी ॥

दोहा—हरषि जननि मुख चूमकै, लीनो गोद उठाय ॥

परमानंद रस मगन मन, सो सुख किमि कहि जाय ॥

सो०—कौतुक निधि भगवान, करत चरित नित २ नये ॥

सुन्दर श्याम सुजान, ब्रज वासिनके प्रेमवश ॥

अथ माटीखानलीला ॥

खेलत श्याम धामके द्वारे ❀ सोहत ब्रज लरिका संगवारे ॥

अति अज्ञान सबनिमति भोरी ❀ सबकी प्रीति श्याम सँग जोरी

एक वैस सब परम सुहाये ❀ करत बाल लीला सुखपाये ॥

गावत हँसत देत किलकारी ❀ लखि २ सुखपावत महतारी ॥

निरखि रूप सब ब्रजजन मोहै ❀ कोटि काम नहिं पटतरसोहै ॥

तनु पुलकित अति गद २ बानी ❀ निरखि मनहिं मनमहरि सिहानी

तबहिं श्याम घन माटी खाई ❀ यशुमति देखि सांटिलै धाई ॥

पकरी भुजा श्यामकी जाई ❀ कहति कहा यह करत कन्हाई ॥

उगलहुवेगि वदन ते माटी ❀ नाहीं तौ मारतहौं सांटी ॥

सबदिन झूठवतहै सब ग्वालन ❀ मोसों अब कहा कहिहौलालन ॥

तब मोहन कीनी लँगराई ❀ कहति किमैं माटी नहिं खाई ॥

झूठहि मोको लोग लगावै ❀ माटी मोको नेकनभावै ॥

दोहा—झूठ कहत तोसों सबै, माटी मोहिं न सुहाय ॥

नहिं माने जो माततू, दिखराऊं मुँह वाय ॥

सो०—दीनो मुखहि उधारि, नयन मूँदि माता निकट ॥

देखि चकित नँदनारि, तनुकी सुरत रही नहीं ॥

दिखरायो त्रिभुवन मुखमाहीं ❀ नभ शशि रवि तारा इकठाहीं ॥

सुर सागर सरिता गिरि कानन ❀ सुर सुर नायक शिव चतुरानन ॥

सकल लोक लों लय यमकाला * महिमंडलसब अग जग जाला
 देखि चरित यशुमति अकुलानी * करते सांटी गिरति नहिं जानी ॥
 बदन मूँदित ब दृगं हरिखेले * डरसमेत माता सों बोले ॥
 मैया मैं माटी नहिं खाई * यशुमति चकित रही अरगाई ॥
 कहत नंद सों यशुदरानी * हरिकी कथा न जात बखानी ॥
 माटीके मिसकरि मुख बायो * तीन लोक तामहि दिखरायो ॥
 स्वर्ग पताल धराणि बन बागा * सुर नर असुर विपुल खंगनागा ॥
 अपरसृष्टिकहि जाति सुनाहीं * देखो सकल बदनके माहीं ॥
 मोको परत सांच सब जानी * जो कछु कही गर्ग ऋषिवानी ॥
 चकित नंद सुनि अचरजवानी * मन मन करत विचार विनानी ॥

दोहा—नन्द कहत सुनि बावरी, हरि अति कोमल गात ॥

अचरज तेरी बातको, पुनि पाछे पछतात ॥

सो०—अचरज तेरी बात, को जानै देख्यो कहा ॥

कुशल रहौ दोउ भ्रात, रामश्याम खेलत हँसत ॥

कहति श्याम सों यशुमति मैया * मैं तेरी बलिहारि कन्हैया ॥
 मैं अजान रिस बीच न जानी * वृथा श्याम तुम पर रिस यानी ॥
 जरहु हाथ जिन सांटी उठाई * बरहु आंखि जिन दीठ दिखाई ॥
 मधु मेवा दधि माखन मांटी * खात लाल तुम काहे माटी ॥
 सिंगरोइ दूध पियो तुमन्यारे * बलको बांट न देहु पियारे ॥
 कहत नंद सों यशुमति मैया * दुहा लाल की ठाडी गैया ॥
 कजरीको पय पियो गुपाला * जो तेरी चोटी बढे विशाला ॥
 सब लरकनमें तो तनु माही * वेगवैश बल श्री अधिकाही ॥
 मात वचन सुनिके अनुरागे * ज्यों त्यों करि पय पीवन लागे ॥

खिन पीवत खिन २ कचटोवै ✽ देखि २ मुखहँसति यशोवै ॥
मैया कब बाँटैगी चोटी ✽ यह तौ है अबही लौं छोटी ॥
तूजो कहतहि बललौं हैहै ✽ छोडत गुहत गोडलौं जैहै ॥

दोहा—कितीबार भइ पर्यपियत, चोटी बडी न होहि ॥

कहि कहि झूठी बात नित, दूध पियावत मोहि ॥

सो०—सुनि सुनि भोरी बात, सुन्दर श्याम सुजानकी ॥

यशुमति मन न अघात, हँसि लीने उर लाय हरि ॥

भोरहिं महर यमुनतट धाये ✽ दर्शन करि अतिही सुख पाये ॥

अथ शालिग्रामलीला ॥

करि स्नान नन्द घर आये ✽ पूजा हित यमुनाजल लाये ॥

तुलसीदल अरु कमल पुनीता ✽ प्रभु निमित्त आने अति प्रीता ॥

पाँय धोय प्रभु मन्दिर आये ✽ करी दण्डवत प्रेम बढाये ॥

स्थल लीप पात्र सब धोये ✽ पूजाके सब साज सँजोये ॥

छाप तिलक सब अंग सँवारे ✽ प्रभु पूजा विधि करन सँवारे ॥

कुँवरकान्ह खेलत ते आये ✽ देखत पूजा विधि चित लाये ॥

विधिवत देव नन्द अन्हवाये ✽ चन्दन तुलसी फूल चढाये ॥

भूषण वसन अलंकृत कीन्हें ✽ धूप दीप अतिहित कर दीन्हें ॥

पट अन्तरदै भोग लगायो ✽ आरति चरणनि शीश नवायो ॥

तबहीं श्याम बिहँसि उठि बोले ✽ कहत तात सों वचन अमोले ॥

बाबा तुम जो भोग लगायो ✽ सोतो देव कछु नहिं खायो ॥

सुनि हरि वचन श्रवण सुखदाई ✽ चितैरहे मुख हँसि नँदराई ॥

दोहा—कहत नन्द सुख पायकै, यों नहिं कहिये तात ॥

देवनको कर जोरिये, कुशल रहोजिहिगात ॥

सो०—हँसत श्याम सुखदानि, नंद स्वरूप न जानहीं ॥

रह्योतिनहिं सुत मानि, करत ब्रह्म लीला सगुण ॥

देखत जननि तहां दुरि ठाढी * मगन प्रेमरस आनंद बाढी ॥
 बैठे नंद समाधि लगाई * तब यह लीला रची कन्हाई ॥
 शालग्राम मेलि मुख माहीं * बैठि रहे हरि बोलत नाहीं ॥
 ध्यान विसर्जन करि नंद जागे * शालग्राम न देखे आगे ॥
 खोजत चकित चित्त नंदराई * इष्टदेव किन लिये चुराई ॥
 इतउत खोजत पावत नाहीं * भयो बडो अचरज मन माहीं ॥
 बिहँसत हरिके मुखमें जाने * देखत महरि महर मुसकाने ॥
 सुनहु तात जननी बलिजाई * उगिलहु शालग्राम कन्हाई ॥
 मुखते तबहिं काढि ब्रजनाथा * दियो देवता नंदके हाथा ॥
 हरिके चरित कहत नहिं आवैं * बालविनोद मोद उपजावैं ॥
 लखि लखि मात पिता पुलकाहीं * देखि देखि सुर सिद्ध भुलाहीं ॥
 धन्य धन्य सब ब्रजके बासी * बिहरत जहाँ ब्रह्म अविनाशी ॥

दोहा—परते पर परब्रह्म जो, निर्गुण अलख अनूप ॥

सो ब्रज भक्तन प्रेम वश, विहरत बालक रूप ॥

सो०—प्रेम मगन पितु मातु, निशिंदिन जात न जानहीं ॥

क्योंहूँ मन न अघात, सुनत वचन देखत दरश ॥

अथ अन्हवावनलीला ॥

यशुमतिश्यामहिं कह्यो न्हवावन * सुनतहि मचलि परे मन भावन
 उबटनलै आगे गहिबाहीं * लोटिगये हरि मानत नाहीं ॥
 तब यशुमति बहुभांति दुलारे * मैं बलि उठहु न्हवाऊं प्यारे ॥
 उबटन पाछे धरयो चुराई * फुसलावत सुत श्याम कन्हाई ॥

मैं बलि ऐसी आरि नकीजै ❀ जोचाहौ सो मोपै लीजै ॥
 कहत लाल रोवै दुख पावै ❀ ऐसो को जो तोहिं खिझावै ॥
 अतिरिसते मैं बलि तनु छीजै ❀ सुन्दर कोमल अंग पसीजै ॥
 बरजतही बरजत बिरुझाने ❀ करिकरि क्रोध मनहिं अकुलाने
 धरत धरत धरणी पर लोटे ❀ गहि माताके चीर निझोटे ॥
 गहि गहि अँगकेभूषण तोरैं ❀ दधि माखनके भाजन फोरैं ॥
 धरयो तपत जल जननी पासै ❀ मानत नाहिं ताहि लंखि त्रासै ॥
 मँहरि बाँह धरिकै तब आने ❀ जबहीं तेल उबटने साने ॥

दोहा—तब दुचती करिमातुको, गिरत परत गये भाज ॥

नेक निकट लागैं नहिं, मन मोहन बजराज ॥

सो०—तब पुजकारे मात, साम भेद कहि कहि वचन ॥

मैं बलि आवहु तात, नहिं आवहु तो जानिहौ ॥

तुम मेरी रिसको हरी जानौं ❀ मोको नीकी विधि पहिंचानौ ॥
 जो नहिं आवहु मदनगोपाला ❀ आज तुम्हें तौ बांधों लाला ॥
 तबहिं नन्द उतते चलि आये ❀ कहत हरिहि किन अतिहि खिझाये
 लै कनियाँ उरसों लपटाये ❀ बदन चूमि यशुमति पहुँ ल्याये ॥
 कत खिझवत मोहनहिं अयानी ❀ लै हियलाय लिये नँदरानी ॥
 क्योंहुँ यत्न करिकै जब पायो ❀ तब उबटन हरिके अंग लायो ॥
 पुनि तातो जल न्हान समोयो ❀ दियो न्हाय बदन शशि धोयो ॥
 सरस बसन लैकै तनु पोछ्यो ❀ बहुरो बदनसरोज अँगोछ्यो ॥
 अंजन दोऊ दृगं भरि दीनों ❀ भूपर चारु चखोडा कीनों ॥
 सब अँगके भूषण मँगवाये ❀ क्रम क्रम लालनको पहिराये ॥
 ऐसी रिस नहिं कीजै कान्हा ❀ अब कछु खाउ जाउँ बलिनान्हा

तब तुतरात कट्यो काहेरी * जोमोको भावै सो देरी ॥

दोहा—कहत जननि या वचन पर, मैया बलि बलि जाय ॥

जोइ जोइ भावे लालको, सोइ सोइ ल्यावे माय ॥

सो०—किये अमितपकवान, मैं अपने सुतके लिये ॥

सो सब कहैं बखान, जो भावे सो लीजिये ॥

सदमाखन अरु दही सजायो * तुम्हरे हित पय औटि जमायो ॥

खोवा औट्यो मधुर मलाई * तापर मिसिरी पीसि मिलाई ॥

अरप्यौसार अति सरस सर्वाँरी * तामहिं सोंठि मिरच रुचि करी ॥

खीर बरा करिकै दधि बोरे * मानहुँ चंद्र अमी मधु खोरे ॥

खुरमा और जलेबी बोरी * जेहि जेंवत रुचि होत नथोरी ॥

अरु लड्डुआ बहुभांति सँवारे * जे मुख मेलत कोमल प्यारे ॥

अरु गूझा बहु पूरिन पूरे * अति सुवास उज्ज्वल अति खूरे ॥

पापर घैवर घीउ चमोरे * मिश्री पीस तल ऊपर बोरे ॥

सुन्दर मालपुआ मधु साने * तप्त तुरत करि रोहिणि आने ॥

अतिहीं सुन्दर सरस अँदरसे * घृत दधि मधु मिलि स्वादन सरसे ॥

सरस सर्वाँरी दाल मसूरी * अरु कीन्हो सीरा घन पूरी ॥

पूरी सुनिके हिय हरि हरषे * तब जेंवन पर मनकरि करषे ॥

दोहा—सुनत यशोदा तुरतही, ले आई हरषाय ॥

बलदाऊको टेरिके, लीन्हे नन्द बुलाय ॥

सो०—षटरसके परकार, जे वरणे यशुदा प्रथम ॥

परसि धरे सब थार, जेंवत हरि बलवीर दोउ ॥

जेंवत एक थार दोउ बीरा * हरषिष्याम रुचि राख्यो सीरा ॥

तब शीतल जल लियो मँगाई * भरि झारी यशुमति लैआई ॥

जल अँचवावत नैन जुंड़ाने ✽ दोऊ हर्षि हर्षि मुसकाने ॥
 तब जननी हँसि चुरू भराये ✽ तनक तनक कछु मुख पखराये ॥
 रचि रचि उजरे पान खवाये ✽ अतिही अधर अरुण है आये ॥
 ठाढे तहाँ सकल ब्रजदासा ✽ लागिरेहे जूठनि की आशा ॥
 तनक तनक कछु मोहन खायो ✽ उबन्यो सो ब्रजदासन पायो ॥
 सखाँचन्द प्रिय द्वार पुकारे ✽ खेलन आवहु काह पियारे ॥
 तृषित दरशरसचातकदासा ✽ हरि अब बरषि नवघन छविपासा ॥
 विनय वचन सुनि हर्ष कृपाला ✽ चले मनोहर चाल रसाला ॥
 लघु लघुललित चरण करलाला ✽ कमलनैन उर बाहु विशाला ॥
 चन्द्रबदन तनु छवि घनश्यामा ✽ अंग अंग भूषण अभिरामा ॥
 दोहा—निरखत छवि नँदलालकी, थकित सकल सुरचन्द ॥

निहचल चखँन चकोरजनु, तकत शरदको चन्द ॥

सो०—अति आनन्द उमंग, मिले सखनको जाय हरि ॥

ब्रीडत कोटि अनंग, क्रीडत बालक चन्द सब ॥

खेलत दूरिगये कहु कान्हा ✽ सखन संग धावत है नान्हा ॥
 बहुत अबैर भई घनश्यामहिं ✽ खेलत ते आये नहिं धामहिं ॥
 नँदहि तात मातु मोहि कानन ✽ योहीं सुनत सुहात जु आनन ॥
 मन अवँसेर करत महतारी ✽ पलक ओट रहि सकत नन्यारी ॥
 देखत द्वार गलीमें ठाढी ✽ सुतमुख दरश लालसा बाढी ॥
 ततक्षण हरि खेलनते आये ✽ दौरि मातु लै कण्ठ लगाये ॥
 खेलत दूरि जातकिन कान्हा ✽ मैं बलि तुम अबहीं अति नान्हा ॥
 आज एक बन हाऊ आयो ✽ तुम नहिं जानत मैं सुनि पायो ॥
 इक लरिका भजि आयो तबहीं ✽ सो वह मोसों कहि गयो अबहीं ॥

वहतो पकरि लेतहै तिनको * लरिका करि जानतहै जिनको ॥
 चलहूभाजिचलियेनिज धामहिं * यह सुनि ढेरलिये बलरामहिं ॥
 कनियाँ करि लै आई धामहिं * बडभागिनि यशुमति सुतश्यामहिं
 दोहा—रूपरेख जाके नहीं, विधिहर अन्त न पाय ॥

हाऊ सों डरपाय तिहिं, यशुमति राखत स्वाय ॥
 सो०—भाव बश्य भगवान, भावइ करिके पाइये ॥

भक्तनके सुखदान, तिहि तैसे जैसे भजे ॥
 ब्रज वीथिन खेलत मनमोहन * हलधर सुबल सुदामा गोहन ॥
 और गोप बालक बहुबारे * एक वयस सब हरिके प्यारे ॥
 बाल विनोद मोदमन देने * नानारंग करत रस भीने ॥
 तारी हाथ मारि सब भाजैं * धावत धरत होड कर बाजैं ॥
 बरजत बलि हरि तुमति दौरे * लगिहै चोट गोड केंहु तोरे ॥
 तब हरि क्यो दौरि मैं जानो * मेरो गात बहुत बलवानों ॥
 है श्रीदामा जोड हमारी * तासों मारि भजो मैं तारी ॥
 बोलि उठ्यो तबहीं श्रीदामा * तारी मारि भजौ तुम श्यामा ॥
 तबहीं श्याम भजे दैतारी * धन्यो जाय श्रीदाम हँकारी ॥
 तब हरि क्यो वदौं नहिं तोहीं * ठाढो भयो छियो तब मोहीं ॥
 ऐसे कहि हरि ताहि रिसाने * कहत सखा सब श्याम खिझाने
 तबतो क्यो दौर मैं जानौ * हारे श्याम बुरो अब मानौं ॥

दोहा—बोलि उठे बलराम तब, इनके मायन बाप ॥

हारि जीति जाने नहीं, लरकन लावत पाप ॥

सो०—ये है तनुके श्याम, झूठहिं झगरत सखन संग ॥

रूठि चले हरि धाम, लखि उदास पूछति जननि ॥

मैं बलि क्यों उदास हरि आयो ❀ कौने मेरो लाल खिझायो ॥
 मैया मोहिं दाऊ दुख दीन्हों ❀ मोसों कहत मोलको लीन्हों ॥
 कहाकरों या रिसके मारे ❀ मैं नहिं खेलन जात दूआरे ॥
 पुनि पुनिकहत कोन तेरि माता ❀ कोतेरो तात कोन तेरो भ्राता ॥
 गोरे नन्द यशोदा गोरी ❀ तुमतो करे आये चोरी ॥
 मोसो कहत देवकी जाये ❀ लेवसुदेव यहां निशिं आये ॥
 मोल कछू वसुदेवहिं दीन्हो ❀ ताके पलटे तुमको लीन्हो ॥
 ऐसे कहि कहि मोहिं खिझावै ❀ अरु सब लरकन यहै सिखावै ॥
 मोहीं कोतू मारत धावै ❀ दाउहि कबहुंन खीज डरावै ॥
 रोष सहित सुनि बतियां भोरी ❀ बहत मातु उर प्रीति नथोरी ॥
 सुनहु श्याम बलराम चवाई ❀ झूठहिं तोहि खिझावत जाई ॥
 मोहिं गोधनकी सोह कन्हैया ❀ मेरो सुततू मैतेरि मैया ॥

दोहा—पाछे ठाढे सुनत सब, नन्द श्यामकी बात ॥

लीन्हें गोद उठाय हँसि, सुन्दर श्यामलगात ॥

सो०—बलको धरियो नंद, सुनि मनहर्षे श्याम तब ॥

लीला नटवर चन्द, करत चरित जनमन हरन ॥

अथ भोजनकरनलीला ॥

भोजनके समये नँदराई ❀ करे सुरति बलराम कन्हारि ॥
 कट्यो बुलाय लेहु दोउ भैया ❀ मोसँग जेवें आय कन्हैया ॥
 खेलत बहुत बेर भइ आज्ञा ❀ उनबिन भोजन कौने काजा ॥
 यशुमति सुनत चली अतुराई ❀ बज घर घर टेरेत दोउ भाई ॥
 कहत बोल लेहु कोऊ श्यामहिं ❀ खेलत हैं धौं काके धामहिं ॥
 जेवन सिद्ध सिरात धरोई ❀ उनबिन नंद न जेवत सोई ॥

ऐसे जननीके सुनि बैना * आये खेलतते सुख देना ॥
 चलहु तात मैया बलि जाई * जेवन को बैठे नँदराई ॥
 परस्यौ थार धन्यो मंग हेरति * मैं तबहीं सों तुमको ढेरति ॥
 दौरि चलहु आगे गोपाला * छाँडि देहु गति मन्दमराला ॥
 चलहु वेगि दौरै दोउ भाई * सो राजा जो आगे जाई ॥
 जो जैहै पहिले बलि भाई * तौहँसिहैं तोहिं ग्वाल कन्हवाई ॥

दोहा—आये दौरै श्याम तब, तुरतहिं पांय पखार ॥

बैठे जेवन नंदके, सँग दोऊ सुकुमार ॥

सो ०—कछु डारत कछु खात, कछु लपटानो पाणि दुहुँ ॥

शुभगसांवरे गात, बालकेलि रस वशखरे ॥

बडोकौर मेलत मुख भीतर * आय गई तब मिरचि दशन तर
 तीक्ष्ण लगी नैन भरि आये * रोवत बाहरको उठि धाये ॥
 रोहिणि फूँकिदेत मुख माहीं * लिय लगाय उरसों गहि बाहीं ॥
 मधुर ग्रास लैतात निहोरे * लै बैठे फुसलाय अँकोरे ॥
 जेवत कन्ह नंदकी कनियां * छवि निरखत ठाढी नँदरनियां
 बेसनके व्यंजन विधि नाना * बराबरी बहु शाक विधाना ॥
 मूंग ठरहरी हींग लगाई * दाल चनाकी पीत सुहाई ॥
 राज भोगको भात पसायो * उज्ज्वल कोमल सुगंध सुहायो
 बेसन मिली कनककी रोटी * सदघृत बोरी पतरी छोटी ॥
 आंव आदि बहुभांति सँधाने * दोउ भैया जेवत रुचि माने ॥
 मिश्री दधि ओदन मिश्रित कर * लेत श्याम सुन्दर अपने कर ॥
 आपुन खात नंद मुख नावैं * सोछवि कहत कौनपै आवैं ॥

दोहा—भोजन कर अचमन कियो, लैझारी नँदराय ॥

अपने करसों श्यामको, दीनो वदन धुवाय ॥
सो०—कोकरि सकै बखान, भाग्य यशोमति नंदके ॥
बह्म रत्नो रुचिमान, बाल रूप जिनके सदन ॥

अथ पयछुडावन लीला ॥

बैठे श्याम मातकी कनियां ✽ पियत दूध सुन्दर सुखदनियां ॥
बार बार यशुमति समुझावे ✽ हरिसों अस्तन पान छुडावे ॥
कहति श्याम तूभयो सयानो ✽ मेरो कट्यो लाल अब मानो ॥
दूध पियत देखत लरिका सब ✽ हँसत तोहिं नहिं लाज लगत अब
जैहैं दांत बिगारि सब तेरे ✽ अजहूं छांड़ि कट्यो करि मेरे ॥
सुनत वचन मुसकाय कन्हारि ✽ अचरांतरमुख लियो छिपाई ॥
आये तबहीं सखा बुलावन ✽ मात कट्यो खेलहु मनभावन ॥
यह सुनि हर्ष उठे बनवारी ✽ मांगतदे चौगान कहांरी ॥
मथनीके पाछे कहि दीन्हों ✽ हर्षित श्याम तहांते लीन्हों ॥
लै चौगान बढाकर आगे ✽ चले सखन देखत अनुरागे ॥
कहत सखनसों हरि हरषाई ✽ खेलहुगे किहिं ठोहर भाई ॥
खेलत बनिहै घोष निकासू ✽ हरषि चले सब सहित हुलासू ॥

दोहा—कान्हर हलधर बीर दोउ, भये भुजा बरं जोर ॥

श्रीदामा अरु सुबल मिलि, जुरे सखा इकठोर ॥

सो०—और सखनके वृन्द, बांढि लिये जुरि जोटं जुटा ॥

अति आनंद नंदनन्द, दियो बटां ढरकाय महि ॥

अथ चौगानखेलनलीला ॥

अय अपनी बातन लैजाहीं ✽ एक एक सन पावत नाहीं ॥
इतते उत उतते इत धेरें ✽ बटा मारि चौगाननि फेरें ॥

दौरत हँसत खसत उठि मौरें * आप आपनी जीत विचारें ॥
 जम्यो खेल अति मगन कन्हाई * देखत सुर मुनि रहे लुभाई ॥
 जीतत सखा श्याम जब जाने * करो खेल कछु तब मचलाने ॥
 कहत सखा सब सुनहु गोपाला * रुंगटैयांको कौन खियाला ॥
 श्रीदामासों हो तुम हारे * झूठी सोहैं खाउ ललारे ॥
 खेलतमें को काको सैयां * कहा भयो जो नंदगुसैयां ॥
 तातें तुम गर्वित मन महियां * तनक वसत हम तुम्हरी छहियां ॥
 अति अधिकार जनावत ताते * तुम्हरे अधिक गाय कछु जाते ॥
 अब नहिं खेलहिं संग तुम्हारे * भये सखा सब रिस करि न्यारे ॥
 खेल्यो चाहत त्रिभुवन राई * दियो दांव तब पीठ चढाई ॥

दोहा—जाके गुणगण अगंम अति, निगंम न पावत ओरा ॥

सोप्रभु खेलत ग्वाल सँग, बँधे प्रेमकी डोर ॥

सो०—खेलत भई अबेर, जननी टेरत श्यामको ॥

आवहु धाम सबेर, सांझ समय नहिं खेलिये ॥

सांझ भई घर आवहु प्यारे * बहुरि खेलियो होंत सबारे ॥
 आपुहि जाय बाँह गहि आने * शुभग श्याम तनु रज लपटाने ॥
 बोलिलिये यशुमति बलरामहिं * लैआई दोऊ सुत धामहिं ॥
 धूरि झारि तातो जल ल्याई * तेल परशि दीन्हे अन्हवाई ॥
 सरस बसन तनु पोंछि सँवारे * लै गोदी भीतर पगु धारे ॥
 करहु बियारू कछु दोउ भाई * पुनि तुमको राखौ पौढाई ॥
 सीरा पूरी सरस सँवारी * और धरी मेवा बहु न्यारी ॥
 दीन्हीं परसि कनककी थारी * बलमोहन दोउ करत बियारी ॥
 मिसिरी मिलै दूध ओटाई * लैआई तब रोहिणि माई ॥

प्रेमसहित दोउ जननि जिमावत ✽ देखि देखि छवि नैन जुडावत ॥

खात खात मोहन अलसाने ✽ बारहि बार श्याम जमुहाने ॥

आरससों कर कौर उठावत ✽ नैनन नींद झमकि झुकि आवत ॥

दोहा—उठहु लाल तब मातु कहि, धोये मुख अरविन्द ॥

पौठाये लै सेजपर, बल अरु बाल गोविन्द ॥

सो०—सोये बाल मुकुंद, दोउ भैया सुख सेजपर ॥

जननी अति आनन्द, शोचत गुण गोपालके ॥

माखन मोहनको प्रियलागे ✽ भूखो छिन न रहत जब जागै ॥

ताहि बंदों जो गहरु लगावै ✽ नहिं मानै जो इन्द्र मनावै ॥

मैं इहि जानत बात श्यामकी ✽ दृगमीचेनवनीत खानकी ॥

लै मथनी दधि धन्यो बिलोई ✽ जबलगि लालन उठहिंन सोई ॥

भोरभयो जागहु नंदनंदन ✽ संग सखा ठाढे जगवंदन ॥

सुरभी पैहित बच्छ पियाये ✽ पंछी तरुताजि चहुँदिशि धाये ॥

चन्द्रमलिन उडगण धुतिनाशी ✽ निशिनिघटीरं विकिरणिप्रकाशी ॥

कुमुदिनि सकुची बारिज फूले ✽ गुंजत मधुप लता लागि झूले ॥

दरशन देहु मुदित नर नारी ✽ ब्रजवासी प्रभु जन सुखकारी ॥

सुनि जननीके वचन रसाला ✽ खोले दृगरांजीव विशाला ॥

हंसत उठे संतन सुखदाई ✽ मुखछवि देखि मातु बलिजाई ॥

हरि कछु करहु कलेऊ प्यारे ✽ मैं माखन मथि धरेउ सवारे ॥

दोहा—रोटी अरु माखनतनक, देरीमा मोहिं हाथ ॥

लै आई जननी तुरत, कछु मेवा धरि साथ ॥

सो०—करत कलेऊ श्याम, माखन रोटी मानि रुचि ॥

त्रिभुवन पति सुख धाम, चार पदारथ हाथ जेहि ॥

अथ माखनचोरीलीला ॥

मैयारी मोहिं माखन भावै ❀ और कछु अनिरुचि नहिं आवै ॥
 मधु मेवा पकवान मिठाई ❀ सोमोको नेकहु न सुहाई ॥
 ब्रजयुवती इक पाछे ठाढ़ी ❀ हरिके वचन सुनतरति बाढ़ी ॥
 मन मन कहत कबहु अपने घर ❀ माखन खात लखौं सुंदर बर ॥
 बैठे जाय मथनियां पाहीं ❀ अपने करनि काढिके खाहीं ॥
 मैं बरु देखहुं कहँ छिपाई ❀ कैसे मोघर जाहिं कन्हाई ॥
 हरि अन्तर्यामी सब जानें ❀ ग्वालनि मनकी प्रीति पिछानें ॥
 गये श्यामता ग्वालनिके घर ❀ ठाढ़े भये जाय द्वारे पर ॥
 इत उत देखत कोऊ नाहीं ❀ तब पैठे ताके घर माहीं ॥
 हरिको आवत ग्वालनि जान्यो ❀ परममुदित अतिही सुख मान्यो ॥
 रही दबकि दुरि डीठिं लगाई ❀ हरिबैठे मथनी ढिग जाई ॥
 देखी माखन भरी कमोरी ❀ खान लगे करि अति मतिभोरी ॥

दोहा—चिते रहे मणि खम्भमें, हरि अपनी प्रति छाँह ॥

जानि दूसरो ग्वाल तिहि, प्रभु सकुचे मनमाहँ ॥

सो०—तासों करत सयान, कहत लेहु आधो तुमहुँ ॥

हम तुम एक समान, भलो बन्यो है संग अब ॥

प्रथम आज मैं चोरी आयो ❀ तुमको देखि बहुत सुख पायो ॥
 अब तुम मेरे सँग नित आवो ❀ यह काहूको मतिहि जनावो ॥
 सुनि सुनि हरिके मुखकी बानी ❀ उमँगि हँसी ब्रजयुवतिसयानी ॥
 श्याम चौंकि मुख तासु निहारी ❀ भाजि चले ब्रज खोरि मुरारी ॥
 अति आनंद ग्वालिन मनमाहीं ❀ पूँछत सखी परस्पर ताहीं ॥
 पायो आज परो कछु तैरी ❀ कहा तोहिं अति आनंद हैरी ॥

गदगद कंठ पुलक तनुतेरो ❀ सो किन कहै कहा सुखहैरो ॥
तनु न्यारो जिय एक हमारो ❀ हनै तुम्हैं कछु भेद न न्यारो ॥
सनहु सखी मैं तोहिं बताऊं ❀ जो सुख भयो सो तोहिं सुनाऊं ॥
यशुमति सुत सुन्दर सुनु गौरी ❀ आयो आजु हमारे चोरी ॥
खम्भ निकट मथनीको माखन ❀ लियो निकासि लग्यो सो चाखन
मैंदुरि भीतर देखन लागी ❀ वा मोहन छवि पर अनुरागी ॥

दोहा—देखि खम्भ प्रतिबिंबको, मन कछु सकुचे श्याम ॥

अर्द्ध भाग तेहि देन कहि, प्रगट करो जिन नाम ॥

सो०—तब न रट्यो मोहिं धीर, हँसी मनोहर वचन सुनि ॥

कहा कहौं तुम बीर, मन हरि लीन्हों सांवरे ॥

मोहिं देखि तब गयो पराई ❀ सखि सो छवि कछु वरणि न जाई ॥
सुनि हरि चरित सखी अनुरागी ❀ अति सुख पाय प्रेम रसपागी ॥
कहत कि मैं देखन नहिं पायो ❀ सोइ अभिलाष जासु उर छायो
हरि अन्तर्यामी सब जानैं ❀ सबके मनकी रुचि पहिचानैं ॥
इहिविधि माखन प्रथम चुरायो ❀ कीन्हों ग्वालिनिको मन भायो
भक्त बछल संतन सुखकारी ❀ पुनि मनमहँ यह बात विचारी ॥
अब सब ब्रज घर माखन खाऊं ❀ माखन चोर नाम कहवाऊं ॥
बालरूप मोहिं यशुमति जानैं ❀ ग्वालनि प्रेम भक्ति करि मानैं ॥
मित्रभाव करि ग्वाल बखानैं ❀ प्रीति रीति सब मोसों मानैं ॥
इनहींके हित गोकुल आयो ❀ करों सबनके मनको भायो ॥
यह विचार हरि निज उर ठाना ❀ भक्ति कृपा अम्बुधि भगवाना ॥
बाल सखा सब निकट बुलाई ❀ तिनसों हँसि हँसि कहत कन्हवाई ॥

दोहा—माखन खइये चोरिकै, सब ब्रज घर घर जाय ॥

कीजे बाल विहार्यों, मेरे मन यह आय ॥

सो०—सुनि हरषे सब ग्वाल, देत परस्पर तारि सब ॥

भली कही नंदलाल, तुम विन यह बुधिको करे ॥

चले सखन लै माखन चोरी * एक बयस सबहिन मति भोरी ॥
 देख्यो झांकि झरोखा ओरी * मथति एक ग्वालनि दधि गोरी ॥
 धरयो मठा मथनीमें जानो * ऊपर माखनहै लपटानो ॥
 ग्वालनि गई कमोरी मांगन * पाई घात तबहिं सुन्दर घन ॥
 सखन समेत ताहि घर आयै * दधिमाखन सबहिन मिलि खाये
 छूँछी मटुकी छाँडि सिधायै * हँसत हँसत सब बाहर आयै ॥
 आयगई द्वारे सोइ बाला * घरसो निकसत देखे ग्वाला ॥
 माखन कर मुखदधि लपटानो * ग्वालनि यह कछु भेद न जानो ॥
 देखिरही हँसि मुखकी शोभा * निरखि रूप लाग्यो मन लोभा ॥
 चमकि गये हरि सखन समेता * तबहीं ग्वालनि गई निकेता ॥
 देखी जाय मथनियां खाली * चकित विलोकत इत उत ग्वाली ॥
 मन हरि लीन्हों मदन गोपाला * जान्यो ग्वालनि हरिके ख्याला ॥

दोहा—घर घर प्रगटी बात यह, सखां वृन्दले साथ ॥

चोरी माखन खातहैं, नन्द सुवन ब्रजनाथ ॥

सो०—सबके मन अभिलाष, चोरी पकरन पाइये ॥

धारियो माखन राख, यहै ध्यान सबके हिये ॥

कहत परस्पर ग्वालि सयानी * सब मोहनके रूप लुभानी ॥
 माखन खान देहु गोपालहि * मत बरजो कोउ श्यामतमालहि ॥
 तुम जानत हरि कछु नजाने * वे मोहनहैं परम सयाने ॥
 कोऊ कहत पकर जो पाऊं * तो अपने गहिकंठ लगाऊं ॥

एक कहत जो मेरे आवैं * तौ माखन हम हरिहि खवावैं ॥
 कहत एक जो मैं गहिपाऊं * तौ हरिकौ बहु नाच नचाऊं ॥
 कोउ कहत जो हरिको पैये * तौ गहि यशुमतिपै लै जैये ॥
 इक कह आजु हमारे आये * द्वारहिते मोहिं देखि पराये ॥
 इहि विधि प्रेम मगन सब बाला * सबके हृदय ध्यान नँदलाला ॥
 निशिबासर नहिं नेक विसारैं * मिलिबे कारण बुद्धि विचारैं ॥
 गये श्याम सून ग्वालनि घर * सखा सबै ठाढ़े द्वारे पर ॥
 देख्यो भीतर जाय कन्हारै * दधि अरु माखन धर्यो मलाई ॥

दोहा—सदमाखन देख्यो धन्यो, हरषे श्यामसुजान ॥

सखा बुलाये सैनदे, लै लै लागे खान ॥

सो०—इत उत चितवत जात, कछु संशय मनमें किये ॥

बाँटत दधि अरु खात, उठि उठि झाँकत द्वारतन ॥

देखतसोग्वालनि अंतरकरि * मगनभई अति उर आनंद भरि ॥
 लीन्ही बोलि सखी ढिग बासी * तिन्है दिखावत हरि सुखरासी ॥
 देखि सखी शोभा अति बाढी * उठि अवलोकि ओटकै ठाढी ॥
 किहिविधिसों दधि लेत कन्हारै * सखन देत अरु आपन खाई ॥
 बदन समीप पाणि अति राजै * माखन सहित महाछवि छाजै ॥
 लै उपहार जलज मनुजाई * मिलत चन्द्रसो बैर बिहाई ॥
 गिरि गिरि परत बदनते ऊपर * दुइ दधिसुतके बुन्द सुभगतर ॥
 मनौ प्रलयजल आगम हरषत * इन्दुसुधाके कणका बरषत ॥
 मुखछवि देखि थकित बजनारी * कहत नबनै रही उरधारी ॥
 बालविनोद मोद मन फुलीं * भई शिथिल सबतनु सुधि भूलीं ॥
 बरजनको अस्फुरत नवानी * रही विचारि विचारि सयानी ॥

गये ठगोरी लाय कन्हई * रहींठगीसी सब सुखपाई ॥
 दोहा—विश्व भरण पोषण करण, कल्प तरोवर नाम ॥
 सो प्रभु दधि चोरी करत, प्रेम विवश सुख धाम ॥
 सो०—नित उठि करत विहार, ब्रजमें घरघर सांवरो ॥
 ब्रजजन प्राण आधार, माखन चोरी व्याजकरि ॥
 श्याम एक ग्वाल्लिनि घर आये * चोरी करत पकरि तिन पाये ॥
 कहत करी तुम बहुत छिठाई * अबतौ घात परेहौ आई ॥
 निशिबासरमोहिं बहुत खिझायो * दधि माखन सब मेरो खायो ॥
 दोउ भुज पकरिकह्यो कित जैहौ * दधि माखन दे छूटन पैहौ ॥
 तकि मुखतन चितै कन्हई * बोलेवचन मधुर मुसुकाई ॥
 तेरीसौं मैं छुयो नराई * सखा खाय सब गये पराई ॥
 चारु चितौनि चित्त उरझानो * उरते रोष जात नहिं जानो ॥
 सुनत मनोहर हरिकी बतियां * लिये लगाय ग्वाल्लिनी छतियां ॥
 बैठो श्याम जाउँ बलिहारी * मैं लाऊं दधि खाउँ विहारी ॥
 हरिको लेन चली दधि गोरी * हरिहँसि निकसि गये ब्रजखोरी ॥
 रही ठगीसी ग्वाल्लिनि भोरी * मन लैगयो सांवरो चोरी ॥
 हरिगये और ग्वाल्लिनीके घर * देख्यो जाय नकोऊ भीतर ॥

दोहा—माखन काढि निशंक है, लागे खान कन्हाय ॥

ग्वाल्लिनि आवत जानि घर, तब उठि रहे छिपाय ॥

सो०—ग्वाल्लिनि घरमें आय, मथनीढिग ठाढी भई ॥

भाजन रीतो पाय, चकित विलोकति चहूँदिशि ॥

अबहिं गई आई इन पावन * आयो माखन कौन चुरावन ॥
 भीतर गई तहां हरि पाये * पकरी भुजा भये मन भाये ॥

तब हरि कहि निज नाम लजाये ✽ नयन सरोज कछुक भरि आये
देखि बदन छवि आनंदहींक ✽ दीन्हें जान भावते जीके ॥
भयो ग्वालमन परमहुलांसा ✽ कहनि चली यशुमतिके पासा ॥
जो तुम सुनहु यशोमति माई ✽ हंसिहौ सुनि हरिकी लरिकाई ॥
आजगये हरि मो घर चोरी ✽ देखी माखन भरी कमोरी ॥
मैंगइ आन अचानक जबहीं ✽ रहे छिपाय सकुचिके तबहीं ॥
जब मैं कट्यों भवनमें कोरी ✽ तब मोहिं कहि निज नाम निहोरी ॥
लगे लेन लोचन भरि आंसू ✽ तब मैं कानन तोरी सांसू ॥
सुनत श्याम सब रोहिणि कनियां ✽ सकुचत हंसत मंदमुसुकनियां
ग्वाल विहंसि हरितन डरपायो ✽ माखनचोर पकरि मैं पायो ॥

दोहा—करौ नोयकी दामरी, बांधो अपने धाम ॥

लाय लिये उर रोहिणी, बांधि सकैको श्याम ॥

सो०—यशुमति उर आनन्द, बाल चरित सुनिश्यामके ॥

कहत सुनो नंदनन्द, ऐसो काम नकरहुसुत ॥

पुनि इक गृह गए नन्ददुलारे ✽ देखि फिरे तह ग्वाल दुआरे ॥
तब हरि ऐसी बुद्धि उपाई ✽ फांदि परे पिछवारे जाई ॥
सूनो भवन कहू कोउ नाहीं ✽ मानहुं इनको राज सदाहीं ॥
भांडे मंदत धरत उतारत ✽ दधिअरु माखनदूध निहारत ॥
रैनिजमायो गोरस पायो ✽ लगे खान मनु आप जमायो ॥
आहट सुनि युवती घर आई ✽ झलकत देखे कुंवर कन्हआई ॥
अँधियाँरे घर श्याम गये दूरि ✽ दधि मटुकी ढिग बैठि रहे मुरि ॥
सकल जीव उर अंतरवासी ✽ तहां कछुक चेटक परकासी ॥
ग्वालनि हरिको इत उत हेरे ✽ पावत नाहीं धाम अँधेरे ॥

कहति अबहिं देख्यो नंदनंदन * कितहि गयो पछतात मनहिं मन ॥
परिगये दीठि ओट मथनीके * सुन्दर श्याम प्राण गथनीके ॥
तबहीं ग्वालनि भुजगहिलीन्हों * कहत तुम्हें अबतो में चीन्हों ॥

दोहा—कहाँ कहा चाहत फिरत, धाम अँधेरे माहिं ॥

बूझे बदन दुरावते, सूधे चितवत नाहिं ॥

सो०—दधि मथनी में हाथ, अबका उतर बनाई हौ ॥

सखा नहीं कोउ साथ, कहिये अब कैसी बने ॥

मैं जान्यो यह घरहै मेरो * ता धोखे इत है गयो फेरो ॥

दृष्टिपरी चींटी दधि माहीं * काढनिलग्योतिन्है इहिं ठाहीं ॥

सुनि मृदुवचन ग्वाल मुसकानी * तुमहौ रतिनागर हम जानी ॥

उरलगाय मुख चुंबन कीन्हो * विधिहि मनाय बिदा करि दीन्हो ॥

हरि दर्शन बिन क्षण न सुहाई * उरहन मिस यशुमति पहुँ आई ॥

सुनहु महरि निज सुतकी करणी * करत अचगरी जात नवरणी ॥

नित प्रति करत दूध दधि हानी * कहँ लगि करैं कान नँदरानी ॥

मैं अपने मन्दिर अँधियारे * माखन धन्यो दुरायँ सँवारे ॥

सोई ठूँढि लियो हरि जाई * अति निशंक नहिं नेक डराई ॥

बूझे उत्तर तुरत बनावै * चींटी काढनको करनावै ॥

सुनि ग्वालनिके वचन सयानी * हँसिकै बोध कियो नँदरानी ॥

यशुमति कहत श्यामसों प्यारे * परघर काहे जात ललारे ॥

दोहा—मम लोचन आगे सदा, खेलहु सखन बुलाय ॥

तुम्हरे बाल विनोद लखि, मेरो हियो सिराय ॥

सो०—मो पै लीजै श्याम, दधि माखन मेवामधुर ॥

सब कछु तेरे धाम, परघर जाय बलाय तुव ॥

माखन मांग्यो कुँवरकन्हाई ❀ मुदित मातु तुरतहिलै आई ॥
 लगी खवावन हिय हरषानी ❀ श्याम कट्यो खेहौं निजपानी ॥
 दियो हाथ धरि भरिकै दोना ❀ चले खात खेलत हरि लोना ॥
 सखन संग खेलत वनमाली ❀ यमुना जाति सखी इक ग्वाली ॥
 आपचले ताके घर माहीं ❀ पूछत बात कौनहै काहीं ॥
 लंखे तहां शिशुंदोय अयाने ❀ भीर देखते रोय डराने ॥
 इत उत देख्यो गोरस नाहीं ❀ ऊंचे धन्यो सिकहरन माहीं ॥
 तब मनमोहन रच्यो उपाई ❀ आनितहां ऊखल औंधाई ॥
 तापर एक सखा बैठारी ❀ ताके कंध चढे बनवारी ॥
 ऐसी विधि करि गोरस पायो ❀ दधिमाखन सबही मिलिखायो ॥
 दूध डारि बछरू सब छोरे ❀ दिये निकासि बनहिंकी ओरे ॥
 मही छिरक लरकन डरपाई ❀ चले अग्रकरि सखा कन्हाई ॥

दोहा—ग्वालिन आवत देखिके, सखागये सब दौरि ॥

फाँसि भीतर मोहन परे, रोंकि लईतिन पौरि ॥

सो०—रोष भरी मुख बात, प्रेम भर्यो अन्तरहियो ॥

कहत महरके तात, जात कहां दधि चोर अब ॥

तब हरि ताके मुखतन देखी ❀ कीन्हे उरनख घात विशेषी ॥
 अतिरिस ग्वालिन मन उपजाई ❀ दोउ भुज पकरि महरिपै लाई ॥
 मानौ महरि कट्यो तुम मेरो ❀ अति उतपात करत सुत तेरो ॥
 राख्यो गोरस छिके चढाई ❀ ग्वाल कन्ध चढि लिये कन्हाई ॥
 माखन खाय दूध ढरकायो ❀ मही छिरक बालकन रुवायो ॥
 और कहत सकुचतहौं बाता ❀ कहा दिखाऊं तुमको गाता ॥
 हैं गुण बड़े श्यामके माई ❀ इहां सकुचि लरिका हैजाई ॥

बरजतक्योनहिं सुतहि अनरो * कहा कहीं नितप्रतिको झेरो ॥
 जोकछु राखै दूरि दुराई * तहीं तहीं ते लेत चुराई ॥
 तापर देत बछरुवन छोरी * वनवन फिरत वही चहुँ ओरी ॥
 चोरी अधिक चतुर बनवारी * सुनहु महारि हम इनते हारी ॥
 कहँलुगि इनके गुणन बखानों * तुम इनको सूधो मति जानों ॥

दोहा—सुनत भ्वालिनीके वचन, यशुमतिहरितन देखि ॥

भये सकुच युत मुख निरखि, कोमलललित विशेषि ॥

सो०—कहत लगावत लोग, झूठहि सब मेरे सुतहि ॥

कब भये चोरी योग, पांच वरषके तनिकसे ॥

इहिमिसि देखनको सब आवैं * चोरी मेरे सुतहि लगावैं ॥
 ऐसो तो मेरो न अन्याई * अतिही बालक कुँवर कन्हआई ॥
 छीके बँधे भवन अति ऊँचे * तहँ इनकी कैसे भुज पहुँचे ॥
 कौनवेग इतनो है आयो * तेरो गोरस कैसे खायो ॥
 हाथ नचावत आवत दौरी * जीभन करहि समुझिकै बौरी ॥
 घरही माखन भरी कमोरी * कबहूँ लेत न अँगुरिन बोरी ॥
 इतनी सुनतनिरखि धनधामैं * बिहँसि चली भ्वालिनिनिज धामैं ॥
 हरिसों कहति महारि समुझाई * मैंबलि कहूँ जिन जाहु कन्हआई ॥
 तुम्हरे कारण पटरस नाना * करिकरिराखैं विविध विधाना ॥
 इतो उपाय करत कितजाई * परघर दधि माखनहिं लगाई ॥
 ब्रजकी बाढी भ्वालि गँवारी * हाट बांट दधिबेचनहारी ॥
 नहिकछु लाज नकान विचारैं * बोलत वचन कटुक मुँह फारैं ॥

दोहा—झूठो दोष लगायके, नित उठ आवत प्रात ॥

सन्मुख वादिति शंक तजि, विकट बनावत बात ॥

सो०—नौलख दुहियत गाय, दूध दही तेरे घनो ॥

तूकित चोरी जाय, बुरो मानिहैं नन्दसुनि ॥

हरिमाखन चोरी रस गीधे * कैसे रहैं प्रेमके बीधे ॥

एक ग्वाल्लि घर माँझ अँधेरे * अति श्यामल तनपर तनहेरे ॥

कछुकधरो गोरस तहँ पायो * प्रथम सुरुचिकर भोगलगायो ॥

कियो प्रगट दीपक गृह ग्वाली * तहँ देखे भीतर वनमाली ॥

भुजा चारधरि दरश दिखायो * ग्वाल्लिनिलखि अति अचरज पायो ॥

दधि माखनके बूंद सुहाये * सुभग श्याम उर अति छबिछाये ॥

मानहु यमुना जलके माहीं * देखि परत उडगण परछाहीं ॥

इहि छवि निरखि रही छुकि ग्वाली * बहुरों भये द्विभुज वनमाली ॥

देखि चरित हरषीं ब्रजवाला * चकित विलोकति हर्ष विशाला ॥

मन मन कहति कहा मैं देख्यो * यह जाग्रतकै स्वप्न विशेष्यो ॥

प्रेम मगन तनुकी सुधि भूली * गदगद कंठ रोमावलिफूली ॥

मन हरि लीनो रूप दिखाई * चले वहांते कुँवर कन्हाई ॥

दोहा—देखि श्यामके चरित तब, ब्रज नारी सुख पाय ॥

होहिं हमारे पुरुष हरि, माँगत बिधिहिं मनाय ॥

सो०—घर घर करत विलास, नाना भेष दिखाय हरि ॥

ब्रज जन परमहुलास, देखि चरित गोपालके ॥

देखी श्याम ग्वाल्लि इक ठाढी * गोरस मथति प्रात छबिबाढी ॥

डोलत तनु उघर्यो शिर अंचल * बेणी चलत पीठपर चंचल ॥

जौवन मदमाती इठिलानी * करषत रजु दुहुँ करन मथानी ॥

इत उत अंग मोर झकझोरी * गोरे अंग दिननकी थोरी ॥

मढी उरोजन अँगिया गाढी * मनहुँ काम साँचे भरिकाढी ॥

रीझि रहे लखि नन्ददुलारे * लागे खेलन तासु दुआरे ॥
 फिरि चितई ग्वालनि द्वारेतन * परि गये दृष्टि श्याम सुन्दर घन ॥
 बोलि लिये हरुवे सूने घर * लिय लगाय उरसों सुन्दर बर ॥
 उमंग अंग अँगिया उर दरकी * तिहिं अवसर सुधिरही न घरकी ॥
 तबहीं सुन्दर श्याम सुजाना * भये बरस द्वादश अनुमाना ॥
 सो छवि देखि छकी ब्रजनारी * बहुरि भये शिशुरूप निहारी ॥
 हरिके कौतुक अति सुखदाई * देखिरही मति गति विसराई ॥

दोहा—माखन लै तब श्याम मुख, धरत आपने पान ॥

अति आनंद उमंग उर, विसरी ग्वाल सुजान ॥

सो ०—रसिक शिरोमणि श्याम, माखन खाय रिझायतिय ॥

आये अपने धाम, छवि सागर नागर नवल ॥

मन हरि लीन्हों कुँवर कन्हारै * बिन देखे क्षण रह्यो न जाई ॥
 उरहनके मिस ग्वालिसयानी * आई देखन हरि सुखदानी ॥
 सुनहुं महारि सुतके गुण जेसै * कहा कहों कहि जात न तैसे ॥
 माखन खाय मही ठरकायो * चोली फारि अबहिं भजि आयो ॥
 गोरस हानि सही लै माई * अब कैसे सहि जात खुटाई ॥
 बीचहिं बोलि उठे बनवारी * झूठहिं मोहिं लगावत ग्वारी ॥
 खेलत ते मोहिं लियो बुलाई * दोउ भुज भरि लीनो उरलाई ॥
 मेरे कर अपने उर धारी * आपु नहीं चोली पुनि फारी ॥
 माखन आपहिं मोहिं खवायो * मैं कब दही मही ठरकायो ॥
 अति भोरी सुनि हरिकी बानी * यशुमति ग्वालिन सों रिसियानी ॥
 जानति हूं जु कटाक्ष तिहारौ * अति भोरो सुत मेरो बारौ ॥
 दैदै दगा बुलावति ताही * सोइ सोइ करत जो भावत जाही ॥

दोहा—बोलि बोलि निज निज भवन, भेंटति भारि भारि अंक ॥

मोरे भोरे बालको, ग्वालनि निलज निशंक ॥

सो०—तापर उरनखलाय, फिरत दिखावति लाजतजि ॥

कान्हहिं दोष लगाय, आपुन अति भोरी भई ॥

नित उठि उरहन लै उठि धावैं ❀ बिना भीतंही चित्र बनावैं ॥

मिस करि करि मेरे गृह आई ❀ रहत श्याम तनु दीठि लगाई ॥

मेरो पाँच वर्षको कान्हा ❀ अजहुँ रोय पय माँगत नान्हा ॥

कहँ तू यौवनकी मदमाती ❀ हरिके संग फिरत अठिलाती ॥

ग्वालनिसुनतयशोमतिबैना ❀ मनहरि लीन्हो राजिव नैना ॥

आवत रोष प्रीति मनमाहीं ❀ उत्तरदेत बनत कछु नाहीं ॥

कछुअनउत्तर कहिरिसियाई ❀ चली भवन उर राखि कन्हाई ॥

यशुमतियहैसिखावतिश्यामहिं ❀ कितहो जात पराये धामहिं ॥

ये सब गोरसकी मदमाती ❀ फिरतढीठ ग्वालनि इतराती ॥

नित उठि उरहन देत बिहाने ❀ मुखसँभारि नहिं बात बखाने ॥

रुचि उपजै तुम्हरे मन जोई ❀ मोपै माँगिलेहु किन सोई ॥

कहिकहि मधुर वचन निज ताता ❀ सुख उपजावत मेरे गाता ॥

दोहा—अपनेहिं आँगन खेलिये, सखन सहित दोउभाय ॥

मोहिं सुख दीजै आपने, बाल विनोद दिखाय ॥

सो०—सुन्दर घन ब्रजनाथ, कोटि काम शोभा हरण ॥

गोप बाल लै साथ, करत बाल लीला ललित ॥

मथुरा जात लखी इक ग्वाली ❀ चराँचि लई ताको बनमाली ॥

बैठि रहे ताके पिछवारे ❀ सखा संगलै नंददुलारे ॥

कहति परोसिन सों समुझाई ❀ सुनि लीन्हों सो कुँवर कन्हाई ॥

१ छातीमें नौह मारिके । २ विनामीतके चित्र बननो असंभवहै ऐसेही मेरे छालाने तेरीछातीमें नौह मारनो असंभव है।

३ ठिकिठिकी लगाय देखेहैं । ४ कमलनेत्र । ५ प्रातःकाल । ६ जानलीनि ।

बेंचन जाति सखी हों दहियो * तौलौ मेरे घर तन चाहियो ॥
 सद माखन द्वैमाट धरोई * सौंपि जाति हों तोको सोई ॥
 डरतो और कछु ब्रज नाही * नंद सुवन सखि आय न जाहीं ॥
 योंकहि चली ग्वालिनी जबहीं * सखन सहित हरि पेठे तबहीं ॥
 कछु ग्वालनकी आहट पाई * सोपुनि फेरि घरहि फिरि आई ॥
 देखि सखा सब चले पराई * पकरे ग्वालनि धाय कन्हआई ॥
 औरन जानि जान मैं दीन्हें * तुम कित जात अचकरी कीन्हें ॥
 बाँह पकरि लै चली लिवाई * कहत यशोमति देखहु आई ॥
 उरहन देत सदा रिसमानों * अब अपनो सुत आय पिछानो ॥

दोहा—वहै उरहनो नित्यको, सत्य करनके काज ॥

मैं गहिल्याई श्यामको, बाँह पकरिकै आज ॥

सो०—हरि बैठे निज धाम, खेलत जननीके निकट ॥

कौतुक निधि घनश्याम, करत चरित संतन सुखद ॥

यशुमतिसुनि ग्वालिनिकी बानी * देखन चली सुतहि अकुलानी
 गये तहां है सुता पराई * देखि यशोमति अतिरिसियाई ॥
 तेरे आँखिन मतिहिंय नाही * बदन देखि पहिचानत नाही ॥
 देखहुरी याकी गति माई * या कन्याको कहत कन्हआई ॥
 तैं जो मेरे सुतको नामा * सुधो करि पायो है श्यामा ॥
 तूगहि बाँह कौनको ल्याई * खेलत मेरे धाम कन्हआई ॥
 रही बाल हरिको मुख चाही * समुझि समुझि मनमें पछिताही ॥
 बाँह पकरि मैं घरते ल्याई * कीन्हें कैसे चरित कन्हआई ॥
 जात बनैना कछु कहि जाई * रही ग्वालि ठगिसी सकुचाई ॥
 महरि कहत चलि जाहि इहांतैं * मैं जानत सब तुम्हरी बातें ॥

हरिके चरित कहा कोउ जाने ✽ ग्वालनि तन दुरि मुरि मुसकाने ॥

हरिते हारि चली गृह ग्वाली ✽ बुधि करि जीते श्याम तमाली ॥

दोहा—बहुरि गये इक ग्वालघर, मनमोहन घनश्याम ॥

सखन सहित हरषित भये, सुनो पायो धाम ॥

सो०—सब घर लियो ढँढोरि, माखन खायो चोरि हरि ॥

भाजन डारे फोरि, गोरस दियो लुटाय माहि ॥

सोवति लरिकन चुटकि जगाये ✽ मंही छिरकि डरपाय रुवाये ॥

बडो माट इक धीको पोखो ✽ बहुत दिननको चिकनो चोखो ॥

सोऊ फोरि कियो बहु टूका ✽ चले हंसत सब मिलिदैकूका ॥

आइ गई ग्वालनि तिहि काला ✽ निकसत धरि पाये नंदलाला ॥

देख्यो घर बासन सब फोरे ✽ रोवत बाल मही सों बेरे ॥

दोऊ भुज गाढेही लीन्हे ✽ जाय महिरुं ढिग ठाढे कीन्हे ॥

कहति सरोस यशोमति आगे ✽ अब पति रहिहै या ब्रज त्यागे ॥

ऐसे हाल किये गृह मेरे ✽ सुनो महारि लक्षण सुत केरे ॥

माखन खाय दही ढरकायो ✽ मही छिरकि बालकन रुवायो ॥

बासन फोरि धरे सब घरके ✽ उपज्यो पूत सपूत महिरिके ॥

धीको माट युगनको राख्यो ✽ सोऊ फोरि टूक करि नाख्यो ॥

चलौ दिखाऊं घरको हाला ✽ राखहु बांधि आपनो लाला ॥

दोहा—जननी खोजति काहको, करत फिरत उत्तात ॥

नित उठि उरहन सहतिहौं, तू नहिं मानत तात ॥

सो०—बडे बापके पूत, चोर नाम प्रगट्यो जगत ॥

उपज्यो पूत सपूत, नाम धरावत तातको ॥

जननीके स्वीज्ञत हरि रोये ✽ भरि आये नैननिके कोये ॥

झूठहिं मोहिं लगावत धगरी * मेरे ख्याल परी हैं सिगरी ॥
 यशुमति रोवति देखि कन्हाई * बदन पोंछि लीनो उरलाई ॥
 कहति सबै युवतिन यह भावै * नितही नित उठि भोरहि आवै ॥
 मेरे बारहिं दोष लगावैं * झूठहि उरहन मोहिं सुनावैं ॥
 कबहिं गयो तेरे दरवाजे * दूध दही माखनके काजे ॥
 धन माती इतराती डोलैं * सकुचति नाहिं सँभारि न बोलैं ॥
 मेरो काह्न तनक सोमाई * ताहि रुवावत झूठ लगाई ॥
 कब हरि तेरो माखन लीनो * मेरे बहुत दईका दीनो ॥
 कहा भयो घर गयो तिहारै * छियो तनक दधि बालकबारे ॥
 ग्वालिन सुनि यशुमतिकी बानी * कहति महिरितुम उलटिरिसानी
 तिन उठि होय जासु की हानी * सो क्यों कहे आन नँदरानी ॥

दोहा—तुम कछु लावत औरही, लेहु आपनो गाउँ ॥

जहां बसे नहिं पति रहै, तजनि कल्यो सो ठाउँ ॥

सो०—पूतहि देत पठाय, भडहाई घर घर करन ॥

उरहन देत रिसाय, को बसिहै ऐसे नगर ॥

सखा भीरलै पैठत धाई * आप खाइ तो सहिये माई ॥
 जो कछु गोरस घरमें पावै * कछु डारे कछु सखन लुटावै ॥
 कहँलौं सहैं नित्यकी हानी * कबलौं करैं नंदकी कानी ॥
 इकदिन मेरे मन्दिर आयो * मोको देखत बदन बिरायो ॥
 जब मैं सन्मुख पकरन धाई * तबके गुण कहा कहीं सुनाई ॥
 भाजि रत्यों दुरि देखत जाई * मैं पौढी अपने गृह आई ॥
 हरैं हरैं आये शिरहाने * चोटी पाटी बांधि पराने ॥
 सुनि मैया याके गुण मोसों * ये सब झूठ कहतिहैं तोसों ॥

खेलतते मोहिं लियो बुलाई ❀ मोपै दधिकी चींटे कढाई ॥
टहल करौं मैं याके घरकी ❀ यह सोवै पतिसंग निःधरकी ॥
सुनतवचनयशुमतिमुसुकानी ❀ ग्वालनि हँसिमुख मोरिलजानी
सुनहु महारि सुतके गुण काने ❀ समुझहु हैं भोरैकै स्याने ॥

दोहा—करत फिरत उतपात अति, सबबज घर घर जाय ॥

नित उठि खेलत फागसी, गरियावत न लजाय ॥

सो०—बाहर तरुण किशोर, बोलत वचन विचित्र बर ॥

इहां होत शिंशु भोर, तुम अचरज मानतनहीं ॥

यों कहिगई ग्वालिनी धामहिं ❀ यशुमति पुनि पुनि सिखवत श्यामहिं
घर गोरस जिनजाहु पराये ❀ तातरिसात उरहनो लाये ॥
लघु दीरघता कछु नहिं जानै ❀ झगरो आय झूठ तब ठानै ॥
नौ लख धेनु दूधकी तेरे ❀ और बहुत बन चरैं अनेरे ॥
तू कित माखन खात चुराई ❀ छांडि देहु अब यह लरिकाई ॥
यों कहि जननी कंठ लगायो ❀ सुन्दर श्यामहरष तब पायो ॥
खेलन गये बहुरि नँदलाला ❀ किये जाय पुनि सोई ख्याला ॥
अपर ग्वालि उरहनलै आई ❀ आई यशुमति पै रिसयाई ॥
तेरो कान्ह मेरो माखनखायो ❀ सखनसहित अबहीं भजिआयो ॥
मैं गइ यमुन भरनको पानी ❀ दुपहर द्यौस सून घर जानी ॥
गयो भवनमें खोल किवारी ❀ छीकनतें दधि लियो उतारी ॥
खाय लुटाय बहाय परानैं ❀ वारक द्वै बरजौ नहिं मानैं ॥

दोहा—कीन्हो अतिही लाडलो, लाड लडाय बहूत ॥

अबहिं ते ये ढंग करत, जायो नोखो पूत ॥

सो०—सुनि ग्वालिनिके बैन, कहत यशोमति कान्हसों ॥

सिखयो मानत नैन, लै सँटिया डाटति भई ॥

माखन खात पराये घरको * मेरे रहत जहाँ तहँ ठरको ॥
 नितप्रति मथियत सहसंमथानी * तेरे कौन वस्तुकी हानी ॥
 कितने अहिर जियत घर मेरे * बँचत खात मही बहु तेरे ॥
 पत कहावत नन्द महरिको * चोरी करत उधारत फरको ॥
 मैया मैं नहिँ माखन खायो * मेरे बदन सखन लपटायो ॥
 भाजन ऊंचे छिकन चढायो * समुझ देखि मैं कैसे पायो ॥
 मैं ये नान्हें हाथ पसारी * किहिविधि माखन लियो उतारी ॥
 मुख दधि पोंछत कहत कन्हारि * दोना पाछे पीठि दुराई ॥
 डारि साँटि यशुमति मुसुकानी * गहि उरलाय लिये सुखदानी ॥
 बाल विनोद मोद मन मोट्यो * निरखत बदन त्रास युत सोट्यो ॥
 भक्ताधीन वेद यश गावै * सो हरि भक्ति प्रताप दिखावै ॥
 यशुमतिको मुख निरखि अगाधा * बिसरी शिव मुनि ब्रह्म समाधा ॥

दोहा—धन ब्रजवासी धन्य ब्रज, धनि धनि ब्रजकी गाय ॥

जिनको माखन चोरि हरि, नित उठि घर घर खाय ॥

सो०—रहे सकल सुरभूल, ब्रजविलास हरिको निरखि ॥

हरषहिं बरषहिं फूल, धन्य धन्य ब्रज धन्य कहि ॥

आई कहत और इक ग्वाली * सुनहु यशोमति सुतकी चाली ॥
 भाज गये मेरे भाजन फोरी * माखन खाय मही महि ठोरी ॥
 हाँक देत पैठत घरमाहीं * काहू विधिकर मानत नाहीं ॥
 सखासंग कीन्हें इक ठोरी * नाचत फिरत साँकरी खोरी ॥
 बाट घाट कोउ चलन न पावै * गारी दै दै सबन बुलावै ॥
 गोरस हानि करत है सिंगरौ * कहँ लगि कीजै नित उठि झगरौ ॥

घर घर करत फिरत सुत चोरी ✽ ऐसीविधि बसिहै बजकोरी ॥
 सुनत गोपिकाकी रिसबानी ✽ कहत श्यामसों नंदकि रानी ॥
 तू नहिं मोहिं डरात मुरारी ✽ बकत बकत तोसों पचिहारी ॥
 षटरस भरे धरे घरमाहीं ✽ सो तू खात पियत क्यों नाहीं ॥
 परघर चोरीको नित जाई ✽ देत उरहनो ग्वालि सदाई ॥
 मोको कृपण कहत सब आई ✽ तेरे घर होटहु न अघाई ॥

दोहा—सुनि सुनि लाजनि मरति मैं, तू नहिं मानत बात ॥

अब तोहिं राखों बांधिकै, जानी तेरी घात ॥

सो०—सुनिरी ग्वालनि बात, कहेदेत अब तोहिं मैं ॥

जबहीं पावहु घात, मेरी सों याहे मारियौ ॥

अबते मोको बहुत खिजाई ✽ साँटिन मारि करौ पहुनाई ॥
 अजहूँ मानि कट्यौ करि मेरौ ✽ तू घरघर मति फिरै अनेरौ ॥
 जननी रिस लखि श्याम डराने ✽ अब नहिं जैहों धाम बिराने ॥
 यों कहि निकरि गये हरिद्वारे ✽ खेलत सखन संग गलियारे ॥
 तबहीं ग्वालि और इकआई ✽ सो यशुमति सों कहत सुनाई ॥
 नंदमहरिसुत भलौ पढायौ ✽ बजघर बीथि निसोर मचायौ ॥
 मारि भजत काहूके लरिका ✽ खोलतहैं काहूको फरका ॥
 काहूको दधि माखन खाई ✽ काहूके घर करत भँडाई ॥
 गारी देत सकुच नहिं मानै ✽ गैल चलत हठ झगरौ ठानै ॥
 कहा कहा हरिके गुणनि बतैयै ✽ तो सों उरहन देत लजैयै ॥
 कछु टोना सों पढिकरि आई ✽ जोइ भावत सोइ करत कन्हाई ॥
 पीताम्बर ओढत शिरनाई ✽ अंचल दै दै मुरि मुसुकाई ॥

दोहा—तेरीसों तोसों कहति, मैं सकुचति यह बात ॥

तेरो मुख हरि लखतिही, सकुचितनिकहै जात ॥
 सो०—नेक दिखावहु आँखि, नहिं अब ते यह ठँग भले ॥
 कब लगि कहिये राखि, करत अचकरी श्याम अति ॥

॥ अथ दावरीबन्धनलीला ॥

यशुमतिसुनि हरिके गुणगाथा * रिस करि उठी साँटि लै हाथा ॥
 कहति जो ऐसी रिसमें पाऊं * तो हरिकी गति तुमहिं दिखाऊं ॥
 कैसे हाल करौं हरि केरे * लागे तात आज है मेरे ॥
 छांदों नहीं आज बिन मारे * भये श्याम अब बहुत दुलारे ॥
 इहि अन्तर आई इक गोपी * बांह गहे हरिकी मुख कोपी ॥
 भलो महारि सूधो सुत जायो * चोली हार खोलि दिखरायो ॥
 किन नहिं सुतको लाड लड़ायो * कौने नहीं कठिन करि जायो ॥
 तेरो कछुक अधिकरी माई * बरजत नाहिं न नेक कन्हवाई ॥
 यशुमतिहरिको भुज गहिलीन्हो * कहति बहुरि अपनो ठँग कीन्हो
 हरखै सँटिया द्वैक लगाई * आज बांधि मेटौं लँगराई ॥
 गहे भुजा सुतकी बिततानी * इत उतर जुं खोजत नँदरानी ॥
 हरिजननी उर कोप निहारी * मन मन बिहँसत कौतुक करी ॥

दोहा—अग्नि प्रेरि त्रिभुवन धनी, दियो क्षीर उफनाय ॥

यशुमति लखि तजि हरि भुजा, लगि सँभारन जाय ॥
 सो०—इहि विधि भुजा छुडाय, दधि भाजन फोरन लगे ॥

माखन मुंहि लपटाय, गोरस दियो लुटाय सब ॥

रिसमें रिस औरै उपजाई * जानि जननि अभिलाष कन्हवाई ॥
 देखि यशोमति अतिरिसि पागी * पकरि श्यामकों बाँधन लागी ॥
 गर्व जानि नहिं दाम समाई * सब रजु द्वै आंगुरि घटिजाई ॥

पुनि पुनि यशुमति और मँगावै ❀ हरिके तनु सब ओछी आवै ॥
 देखि यशोमति अति रिस बाढी ❀ मन पछितात ग्वालिनी ठाढी ॥
 देखि सखी यशुमति बौरांनी ❀ हरिको बांधन चहत सयानी ॥
 हरिको त्रिभुवनपति नहिं जानै ❀ जिनते सकल कलेश नशानै ॥
 अखिल ब्रह्मांड उदरमें जाके ❀ बांधति महिर उदर रजुं ताके ॥
 ब्रह्मा शिव सनकादिक ज्ञानी ❀ इनहूँ जिनकी गति नहिं जानी ॥
 जलथलजिनकी ज्योतिसमानी ❀ कही गर्ग सब प्रकट बखानी ॥
 मुखमें त्रिभुवन दियो दिखाई ❀ ताहूँ पर परतीति न आई ॥
 तिनहिं देख बांधति नँदरानी ❀ अचरज कथा न जाति बखानी ॥

दोहा—आप बँधावत प्रेम वश, भक्तन छोरत फंद ॥

वदत वेद वाणी विदित, भक्तवछल नँदनंद ॥

सो०—जननिहिं अतिरिस जान, यमला अर्जुन सुरतिकरि ॥

दीनबंधु भगवान, जनहित गये बँधाय प्रभु ॥

जननीके मनकी रुँचि जानी ❀ आप बँधायो शारंगपानी ॥
 कहत यशोमति लै कर डोरी ❀ बांधों तोहिं सकै को छोरी ॥
 लै लै रजु ऊखलसों जोरै ❀ हरिलखि वदन नैन जल ढेरै ॥
 यह सुनि ब्रजयुवती उठि धाई ❀ देखि श्यामको सब मुसुकाई ॥
 कहति इन्हें कोऊ मत छोरो ❀ बहुरि श्याम अब माखन चोरो ॥
 ऊखल बांधि यशोमति डोरी ❀ मारनको सँटिया करतोरी ॥
 सांटी देखि ग्वाल पछितानी ❀ विकल भई मन अति अकुलानी ॥
 कहति यशोमतिसों सब गोपी ❀ ऐसी कहा पूतपै कोपी ॥
 कहा भयो जो बालक पाहीं ❀ ढरक गई मथनी महि माहीं ॥
 घर घर गोकुल दई दिवारी ❀ तू बांधत हरिकी भुजकारी ॥

ऐसी तोहिं बूझियत नाहीं * गोरस लगि बांधत सुत बाहीं ॥
चूक परी हमते इहि भोरें * उरहन दियो बकस करजोरें ॥

दोहा—बार बार जोवत वदन, हुचकिन रोवत श्याम ॥

वज्रहुते तेरो हियो, कठिन अहो नंद वाम ॥

सो०—कित रिस करति अचेत, छोर उदरते दाँवरी ॥

डार कठिन करबेत, लोचन भरि भरि लेत हरि ॥

जाहु चली अपने अपने घर * तुमहिं सबै मिल ढीठ कियो बर ॥

बन्धन छोरनको अब आई * मोको मतिबरजो कोउ माई ॥

मोहिं आपने बाबाकी सों * अब न पत्याउँ श्यामको बीसों ॥

देखि चुकी मैं इनके ख्याला * उपजे बडे नंदके लाला ॥

मैंदेवन हित पय औटायौ * कोरी मटुकी दही जमायौ ॥

जावन दियो न पूजन पायौ * सो सब फोरि भूमि ढरिकायौ ॥

तिहि घर देव पितर कहु काके * भयो कान्हसों सुत घर जाके ॥

कहत एक सुन यशुमति बौरी * दधि कारण सुत बांधत दौरी ॥

तैं यह सीख कौनपै लीन्ही * इतनी रिस बालकपै कीन्ही ॥

जो अतिही अचकरो कन्हआई * तऊ कोखको जायो माई ॥

नेक देखि धौं हरिहि निहारी * कैसे डरत लुकुटि डरभारी ॥

शोभित सजल सांवरे लोचन * नीरंजदल अति ओस भरेजन ॥

दोहा—नमित वदन सूखत अधर, कलुक सकुचमें रोस ॥

सांझ होत जिमि बात वश, शोभित पंकज कोस ॥

सो०—निरखि नयन सुख देत, हरिपै सर्वसवारिये ॥

प्रकटे नंदनिकेत, को जानै किहि पुण्य वश ॥

एक कहति जो आयसु पाऊं * तौ माखन निज घरते लाऊं ॥

जिहि कारण कीनी रिस हरिते * अजहुं न डारत सँटिया करते ॥
 देखि डरात तोहिं हरि कैसे * सकुचत जलजशीत भय जैसे ॥
 बेगि छोरि बंधनपट त्यागी * ले लगाय उर श्याम सभागी ॥
 कहन लगीं अब बढि बढि बानी * माखन मोहिं देतिहैं आनी ॥
 मानों मेरे घर कछु नाहीं * तब नहिं उरहन देत लजाहीं ॥
 ढोटा मेरो तुमहिं बंधायो * उरहन दे दे मडु पिरायो ॥
 रिसहीमें मोको गहि दीनो * सबको ज्ञान जानि मैं लीनो ॥
 बोली अपर एक बजनारी * देखहु यशुमति सुतहि निहारी ॥
 मुख छवि कोटि चन्द्र बलिहारी * यह हैं साह कि चोर विहारी ॥
 नाहिन तरुण किशोर कन्हारि * कितहिं करत इनसों रिस माई ॥
 कहा भयो जो उरहन आने * बालक हरि अबहीं कहा जाने ॥

दोहा—श्रमित भ्रमित जो त्रासते, चपल सजलदृग कोर ॥

मनहुँ मीन वंसी विधे, करत सलिल झकझोर ॥

सो०—लैउठाय उरधारि, छोरि उदरते दांवरी ॥

प्राण दीजिये वारि, मोहन मदन गोपालपर ॥

तेरो कठिन हियो है माई * कहत एक ग्वालनि समुझाई ॥
 ऐसो माखन दधि बहि जाई * बांधे कमलनयन जेहिलाई ॥
 जो मूरति शिव ध्यान लगावैं * सपनेहुँ सुर नहिं देखन पावैं ॥
 निगमनहुँ खोजत नहिं पाई * सोतैं दे करतार नचाई ॥
 याही ते तू गर्व भुलाई * घर बैठे तेरे निधि आई ॥
 काहूको सुत रोवत देषी * लेत धाय उरलाय विशेषी ॥
 अब यह कित सीखी चतुराई * निज सुतसों इतनी कठिनाई ॥
 कहत एक देखहु नंदनारी * कबके ऊखल बंधे मुरारी ॥

गयो क्षुधाते मुखकुम्हलाई * अतिकोमल तनु श्याम कन्हआई ॥
 भई बेर बीते युग यामा * हरिके निकट आय गई धामा ॥
 तू लागी गृहकारज माहीं * है निरदयी दया कछु नाहीं ॥
 घरको काज इनहुँते प्यारो * यशुमति नेक न हृदय बिचारो ॥
 दोहा—जलजलोल लोचन सजल, भये त्रास ते दीन ॥

चितवत तेरे बदन तन, मन मोहन आधीन ॥

सो०—केतिक गोरस हान, जाको तोरत कान तू ॥

वारि दीजिये प्रान, रोम रोम पर श्यामके ॥

हरिको देखि सखा इक धायो * तिन हलधरसों जाय सुनायो ॥
 अहो राम तुम्हरो लघु भैया * बांध्यो आज यशोदा भैया ॥
 काहूके लरिकहिं हरि मान्यो * यशुमति पै तिन जाय पुकार्यो ॥
 तबते हरिहि बांधि बैठायो * छोडति नाहिंन सबहिं छुडायो ॥
 सो हम तुमहिं जनावन आये * हलधर सुनत तुरत उठि धाये ॥
 माता डरतन अतिहि त्रसाये * हरिहि देखि लोचन भरि आये ॥
 कहत भले दोउ भुजा बँधाये * ऊखलसों बांधे हरि पाये ॥
 मैं बरजे कइ बार कन्हआई * आजहुं छोडि देहु लँगराई ॥
 दोउ कर जोरि कहतरी भैया * काहेको बांध्यो मेरो भैया ॥
 श्यामहिं छोडि बांधि बरमोहीं * और कहा कहिये अब तोहीं ॥
 मेरो प्राण अधार कन्हआई * ताकी भुज मोहिं बँधी दिखाई ॥
 कौन काज गोरस धन धामा * जिहि कारण बांध्यो घनश्यामा ॥

दोहा—छुवतौ और जो तन कोऊ, आज देखतौ सोय ॥

तू जननी कछु वश नहीं, जो कछु करे सो होय ॥

सो०—तेरे वश हरि आहिं, को जानै किहि पुण्यते ॥

तू पहिचानत नाहिं, गोरस हित बांधत हरिहि ॥
 सुनहु बात हलधर तुम मेरी ❀ करन देहु सेवा इनकेरी ॥
 माखन खात परायो जाई ❀ प्रगटत चोरी नाम कन्हाई ॥
 तुमहीं कहो कमी किहि केरी ❀ नवविधिकी मेरे घरदेरी ॥
 हौं हारी बरजत दिनराता ❀ मानत नाहिं मेरी बाता ॥
 कहा करौं हरि अतिहि खिझाई ❀ भयो बहुतही ठीठ कन्हाई ॥
 मेरो कट्यो तनक नहिं मानै ❀ नित उठि टेक आपनी ठानै ॥
 भोर होत उरहन लै आवै ❀ ब्रजयुवतिनते मोहिं लजावै ॥
 जहँतहँ धूम मचावत जाई ❀ घर नहिं रहते क्षणक कन्हाई ॥
 तुमहँ दोष देत हौ मोहीं ❀ कान्हरते प्यारो दधितोहीं ॥
 तोहिं तजि और कहो किहि मैया ❀ औरको मेरो मान रखैया ॥
 तेरी सों जननी सुन मोहीं ❀ उरहन देत झूठ सब तोहीं ॥
 है सब ब्रजको श्याम पियारो ❀ श्याम सकल ब्रजको रखवारो ॥

दोहा—दधि माखन पय कान्हको, कान्हाकी सब गाय ॥

मोहूँको बल कान्हको, तू नहिं जानत माय ॥

सो०—बलदाऊकी बात, सुनि हँसिकै यशुमति कट्यो ॥

तुम यकंमति दोउ भ्रात, जानत मैं तुम्हरे चरित ॥

हरिहि देखि हलधर मुसकाने ❀ यह तुम गति तुम विनको जाने ॥
 को तुम छोरत बांधन हारा ❀ तुम छोरत बांधत संसारा ॥
 कारन करन करत मन माने ❀ अतिहित यशुमति हाथ विकाने ॥
 असुर सँहारन जन दुख मोचन ❀ कमलापति राजीव विलोचन ॥
 भक्तनके वश रहत सदाई ❀ ताहीते कछुओ न बसाई ॥
 हरि यमलार्जुन तरुतन हेरे ❀ मनमें कहत दास ये मेरे ॥

अवहीं आजु इन्हें उद्धारों * दुसह शाप मुनिबरको टारों ॥
 इनहींके हित भुजा बँधाई * परसि विटप अब देहुं गिराई ॥
 दारुण दुख इनको सप टारों * इहि मिसिकरि बंधन निरवारों ॥
 भक्तवछल हरि दीनदयाला * करुणासिन्धु अगाध कृपाला ॥
 भक्ताधीन वेद यश गावैं * पावन पतितनाम कहवावैं ॥
 भक्तहेतु नाना तनुधारी * करत चरित भक्तन सुखकारी ॥

दोहा—ब्रजवासी प्रभु भक्ति हित, आप बँधायो दाम ॥

ताही दिन ते प्रकटहै, दामोदर सो नाम ॥

सो०—नँदनंदन धनश्याम, जनरंजन भंजन विपति ॥

मेटति जिनको नाम, पाप शाप त्रय ताप दुख ॥

यशुदा बाहेर छांड़ि कन्हआई * लगी मथन दधि भीतर जाई ॥
 कहत वचन रसरिस लपटाने * खात फिरत दधि धाम बिराने ॥
 षटरस छांड़ि आपने धामा * चोरी प्रकट करतहैं श्यामा ॥
 मारि भजत ब्रजलरिकन जाई * जहां तहां ब्रज धूम मचाई ॥
 रहौ तुमहुं हलधर चुपसाधी * इनकी मेटन देहु उपाधी ॥
 ऊखलसों बांधे वनवारी * कहत यशोमति सों ब्रजनारी ॥
 कान्हहुं ते तोहिं माखन प्यारो * अरी देखि तरसत हरिबारो ॥
 डारिदेहि मथनी नँदरानी * हैहैं हरिकी भुजां पिरानी ॥
 दूध दही हरिपै सब वारो * मोहन जीवन प्राण हमारो ॥
 हरुवे बोलि उठी नँदरानी * जाहु सबै तुम युवति सयानी ॥
 मैं खीझत लरिकहि गुण काजे * तुम कित झुरत दई बिनकाजे ॥
 लरिकहि त्रास दिखावत रहिये * अबहींते अवगुण नहिं चाहिये ॥

दोहा—युवति चलीं बिरुझाय सब, कहत यशोदहिं पोच ॥

मूरखसों कहिये कहा, करत प्रेम वश शोच ॥

सो०—कहा करैं बलिजाउँ, कहत चलीं सब श्यामसों ॥

धरत यशोदहिनाउँ, अति कठोर मानत नहीं ॥

तबहिं श्यामसुंदर यह ठानी ❀ युवती धाम गई सब जानी ॥

गृहकारज जननी अटकायो ❀ आप यमल अर्जुन पहुँ आयो ॥

परसत पात उठे झहराई ❀ परे शब्द आघात सुहाई ॥

उखरे मूल सहित अरराई ❀ दिये धरणि दोउ तरुन गिराई ॥

भये चकित सब ब्रजके बासी ❀ रहे सकुचि तन सुधि बुधि नासी ॥

कोइ भूमि कोइ तकत अकासा ❀ रहे घड़ी इक लौं जकि चासा ॥

याही अन्तर युगल कुमारा ❀ प्रगटे धनद तनय सुकुमारा ॥

नारद शाप पाय दोउ भाई ❀ भये हुते ब्रजमें तरुआई ॥

हरिके परशत निजगति पाई ❀ भये पुनीत मिठी जडताई ॥

तिन्हैं कृपालु अनुग्रह कीन्हों ❀ चारि भुजाकरि दरशन दीन्हों ॥

देखि दरश अति पुलक शरीरा ❀ परे चरण दोउ बंधु अधीरा ॥

बारबार पदरज शिरधारी ❀ जोरि पाणि अस्तुति अनुसारी ॥

छं०—अनुसारि अस्तुति युगुल प्रेमानंद मगन सन्मुखखरे ॥

जै जै भगत हित सगुण सुंदर देह धारि ध्यावत हरे ॥

जो रूप निगमन नेति गायो बुद्धि मन वाणी परे ॥

सो धन्य गोकुल आय प्रगटे धन्य यशुमति उरधरे ॥

धनि धन्य ब्रज धन गोप गोपी गायदधि माखन मही ॥

धन्य गोविंद बाल लीला करत माखन चोरही ॥

धनि धनि उरहनो देत नित उठि धन्य अनख बढावही ॥

धन्य जननी बाँधि राखति जाहि वेद न पावही ॥

धन्य सो तरुजासुकोरंजु श्याम भुजन बँधाइयौ ॥
 धन्यसो तूण जासु ऊखल धनि सुजन गढिलाइयौ ॥
 धन्य ऋषि धनि शाप दीन्त्यो अतिअनुग्रहसो कियो ॥
 जासु शिव ब्रह्मादि दुर्लभ नाथ तुम दरशन दियो ॥
 अब कृपा करि देहु बर प्रभु चरणपंकज मति रहै ॥
 जहां जन्महिं कर्म वश तहँ एक तुम्हरी रति रहै ॥
 दीनबन्धु कृपालु सुन्दर श्याम श्रीब्रजनाथजू ॥
 राखिये निज शरण अब प्रभु करिय हमहिं सनाथजू ॥
 दोहा—बार बार पद नाय शिर, विनती प्रभुहिं सुनाय ॥

प्रेम मगन निरखत वदन, हर्षसहित दोउ भाय ॥

सो०—साधु साधु कहि नाम, भक्तिदान तिनको दियो ॥

विदाकिये घनश्याम, हर्षिगये निज पुरयुगुल ॥

वृक्ष शब्द सुनि यशुमति धाई * देखे अजिर न कुँवर कन्हाइ ॥
 परे बिटपमहिलखिअकुलानी * श्याम दवे तरुतर यह जानी ॥
 आरत महारि पुकारन लागी * बांधे हरि मैं परम अभागी ॥
 सुनत शोर ब्रज जन उठि धाये * नन्दद्वार सब आतुर आये ॥
 देखि गिरे तरु मनहिं डराने * ठूठत श्यामहिं अतिहि सकाने ॥
 बारबार सब करहिं विचारा * गिरे कौन विधि बिटप अपारा ॥
 देखे दुहुँतर बीच कन्हाइ * रहे त्रसित ऊखल लपटाई ॥
 धाय लिये भुज छोरि उठाई * ब्रज युवतिन उर लीन्हे लाई ॥
 कहत सबै नन्दहि बडभागी * बचे श्याम कहूँ चोट न लागी ॥
 कबहूँ बांधत मारत कबहूँ * देत दोष यशुमतिको सबहूँ ॥
 नयननीर भरि दौरि यशोदा * लियो लगाय कंठ भरि गोदा ॥

जरहु सोरिस जिन तुमको बाँध्यो ❀ जरहु हाथ जिन जेवरि साँध्यो
दोहा—नन्द मोहिं कहिहैं कहा, देखत तरुवर आय ॥

कुशल रहौ अब भ्रात दोउ, मैं लै मरहुं बलाय ॥
सो०—श्याम रहे लपटाय, अति समीत उर मातुके ॥

बार बार बलि जाय, यशुमति मन पछितात अति ॥
ब्रज युवती लै लै उर लावैं ❀ निरखि बदन तनमन सुख पावैं ॥
मुख चूमत यह कहि पछिताहीं ❀ कैसे बचे अगम तरुमाहीं ॥
बडी आयु हरिकी है माई ❀ जहां तहां विधि होत सहाई ॥
प्रथम पतना मारन आई ❀ पय पीवत वह तहां नशाई ॥
तृणावर्त्त लै गयो उडाई ❀ आपहि गिन्यो शिलापर आई ॥
कागासुर आवत नहिं जान्यो ❀ सुनी कहति जिय लेत परान्यो ॥
शकटासुर पलना ढिग आयो ❀ को जानै तिहि काहि गिरायो ॥
कौन कौन करवर विधि टारी ❀ ऊखलसों बाँधे महतारी ॥
तहँतेउँ उबन्यो आजु कन्हाई ❀ ऊपर वृक्ष परे भहराई ॥
सबहिन पेलि करत मनभाई ❀ पुण्य नन्दके बच्यो कन्हाई ॥
भुजपर बन्धन चिह्न निहारी ❀ कहत यशोमति सों ब्रजनारी ॥
येगुण यशुमति अहहिं तिहारे ❀ सकुची महरि निरखि हरि प्यारे ॥
दोहा—तबहिं नन्द आये घरहिं, दोउ तरु गिरे निहारि ॥

श्याम चपल बाँध सुने, देत महरिको गारि ॥
सो०—बाँधति बिन काज, मेरे हरि बारे सुतहिं ॥

कुशल करि विधि आज, शोचत नन्द लखि तरुवरन ॥
तबहिं तात कहि धाय कन्हाई ❀ लिये नन्द कनियां सुखपाई ॥
चूमि बदन उरसों लपटाये ❀ प्रेम पुलकि लोचन भरि आये ॥

मेरे लाल मैं तुम पर वारी * काहेको बांधे महतारी ॥
 कैसे गिरे वृक्ष अति भारी * चली नाहिं कहूँ तनक बयारी ॥
 बार बार शोचत नँदराई * पूछत तैं कछु लख्यो कन्हारै ॥
 श्याम कही मैं कछु न जानो * ऊखल ढिग मैं रथो छिपानो ॥
 कहत नन्द हरि बदन निहारी * बडी आज विधि करवर टारी ॥
 बहुत दान हरि हाथ दिवायो * द्विज चरणन लै लै सुत नायो ॥
 देहिं अशीश विप्र सुखमानी * भये प्रसन्न नन्द सुनि बानी ॥
 तबहीं श्याम जननि पहुँ आये * हर्षि यशोमति कण्ठ लगाये ॥
 भूखो भयो आज मेरो बारो * काको मुखधौं प्रात निहारो ॥
 लाई उरहन ग्वालनि भिनहीं * यह सब कियो पसारो तिनहीं ॥

दोहा—पहिले रोहिणि सों कह्यो, तुरत करो जिवनार ॥

ग्वाल बाल सब बोलिकै, बैठे नन्दकुमार ॥

सो०—वेगि लाउरी मात, भूख लगी मोको बहुत ॥

आज नखायों प्रात, सुनत वचन यशुमति हँसी ॥

रोहिणि चितै रही यशुमतितन * शिरधुनि २ पछिताति मनहिंमन
 परसहु हरिहि विलम्बन लावहु * भूखे हरि किन बेगि जिमावहु ॥
 बहु व्यंजन बहु भाँति रसोई * कहँ लगि वरणि कहै कबिकोई ॥
 परसत जाति यशोमति मैया * जेंवत श्याम सखा बल मैया ॥
 जो जो व्यंजन यशुमति राखे * तनक तनक मोहन सब चाखे ॥
 श्याम कही अब मात अधाँनो * अब मोको शीतल जल आनो ॥
 अँचवन करि अँचय दोउ मैया * अति सुख पायो लखि दोउ मैया
 सहित सुगंधि पान कर लीन्हे * बाँटि सकल ग्वालनको दीन्हे ॥
 भ्राता सहित आप हरि खाये * अधिकै अधर अरुण तू आये ॥

निरखत बदन मुकुरके माहीं * ब्रजवासी जन बालि बलि जाहीं ॥
भोजन करत भयो सुख जेतो * बरणि सकै नहिं शारद तेतो ॥
जो सुख नन्द भवनके माहीं * सो सुख तीनि लोकमें नाहीं ॥
दोहा—सुख यशुमति अरु नंदको, को करि सकै बखान ॥

सकल सुखनकी खानि हरि, जहाँ रहे सुख मान ॥
सो०—कोटिकोटि ब्रह्मण्ड, इकइक रोम विराटतन ॥

सो अपने भुजदंड, लिये उछंग यशुमति हरषि ॥
यशुमति कहत श्यामसों प्यारे * सुनहु बात मेरि नन्ददुलारे ॥
अपनेही आँगन तुम खेलो * मेरो कह्यो कबहुं नहिं पेलो ॥
कहत चोर ब्रज बनिता तोहीं * सुनि सुनि लाज लगत है माहीं ॥
ताते रोष होत मन मेरे * तब बाँधत मारत जिमि चेरे ॥
हलधर आज कहत है मोहीं * झूठहिं नाम धरत सब तोहीं ॥
ग्वालिनि हँसत कहत इक ऐसे * चोरी नाम फिरत अब कैसे ॥
चोर कहत युवती सब मोको * झूठहिं आय कहत सब तोको ॥
मैं खेलो बाहर जहाँ जाई * चितै रहत सब मेरी घाई ॥
अपने घर सब मोहिं बुलावैं * मुख चूमति गहि गहि उरँलावैं ॥
माखन मोहिं निज करन खवावैं * हाथ जोरिकै विधिहि मनावैं ॥
देखत जबहिं लेत मोहिं टेरी * मैं नहिं जाउँ सोह मोहिं तेरी ॥
यशुमति निरखि बदन मुसकानी * उनकी बात सबै मैं जानी ॥

॥ अथ आँखमिचौनीलीला ॥

दोहा—टेरि लेहु सब निज सखन, अरु भैया बलराम ॥

सुख दीजै मेरे दृगन, चलहु आपने धाम ॥

सो०—यह सुनि हर्ष बढ़ाय, बोलि लिये हलधर सखा ॥

खेलहिं आँख मुँदाय, कहत सबनसों मुदित हरि ॥
 हलधर कह्यो आँखको मुँदै * हरषि कह्यो हरिजननि यशोदै ॥
 हरि अपनी तब आँख मुदाई * जहाँ तहाँ सब रहे लुकाई ॥
 कान लागि जननी समुझाये * हैं घरमें बलराम छिपाये ॥
 बलदाऊको आवन देहों * श्री दामाको चोर बनैहों ॥
 इत उत में सब बालक आई * यशुमति गात छुवन सब धाई ॥
 श्याम छुवनके कारण धावत * अति अकुलात छुवन नहिं पावत
 धाये सुबल छुवत तव श्यामा * गह्यो जाय तिरछे श्रीदामा ॥
 कहत नन्दकी सोंह जनाये * जननी ढिग भुजगहिलै आये ॥
 हँसि हँसि कहत सखासों रामा * अब तो चोर भयो श्रीदामा ॥
 हर्षित कहत यशोदा मैया * जीत्यो है मेरो पूत कन्हैया ॥
 जाकीं माया जगत खिलावै * ब्रह्मा जाको अंत न पावै ॥
 ताहि यशोदा खेल खिलावै * बालक जिमि बचनन फुसलावै ॥

दोहा—जाके उर त्रैलोक थल, पंच तत्त्व चौखान ॥

सो बालक है खेलई, यशुदाके गृह आन ॥

सो०—दुर्लभ जप तप योग, ज्योतिरूप जग धाम हरि ॥

धन्य सो ब्रजके लोग, बालक करि मानत तिन्हें ॥

कहत भई यशुमति महतारी * भई रात अब सुनहु मुरारी ॥
 करहु बियारू अब कछु प्यारे * बहुरि खेलिये होत सवारे ॥
 मोको तो कछु रुचि नहिं आवै * तू कहि भोजन कहा बतावै ॥
 बेसन मिली कनककी पूरी * कोमल उज्ज्वल है अति रूरी ॥
 अबहीं ताती तुरत बनाई * रोहिणि तुम्हरे हेत कन्हाई ॥
 निबुआ आम करील सँधानो * जासों तुम अतिही रुचि मानो ॥

बलके संग बियारू कीजै ✽ मेरे नयननको सुख दीजै ॥
 तनक तनक धरि कंचन थारी ✽ लै आई रोहिणी महतारी ॥
 श्याम राम मिलिकरत बियारी ✽ अति अनंद दोउ जननि निहारी ॥
 खात खात दोऊ अलसाने ✽ मुख जँभात जननी पहिचाने ॥
 जल अँचवाय कमल मुख धोये ✽ बांह पकरि पलका पौढाये ॥
 सोवत राम श्याम दोउ भैया ✽ हरुवे पाँय पलोटति भैया ॥

दोहा—सोये श्याम सुजान हरि, सुखसों बीती रात ॥

बहुरि कलेऊके लिये, जननि जगाये प्रात ॥

सो०—दियो कलेऊ प्रात, माखन प्यारे श्यामको ॥

मुदित निरखि दिन रात, यशुमति हरिके चरितको ॥

॥ अथ वृन्दावनगमनलीला ॥

महर महरि यह मनहिं विचारी ✽ गोकुल होत उपद्रव भारी ॥
 जब ते जन्म भयो हरि केरो ✽ नितहिं होत उतपात घनेरो ॥
 आकस्मांत गिरे तरु भारी ✽ बच्यो बडेनके पुण्य मुरारी ॥
 ताते अब तजिये यह गाऊं ✽ बसिये चलि कहूँ उत्तम ठाऊं ॥
 नन्दराय तब गोप बुलाये ✽ समाचार ये सबनि सुनाये ॥
 सबहिनके मनमें यह आई ✽ बसिये अनत कहूँ अब जाई ॥
 नितहिं उपाधि नई जिहि ठाहीं ✽ बसिबो भलो तहांको नाहीं ॥
 नंद कही मैं मनहिं विचारी ✽ है इकठाउँ बहुत सुखकारी ॥
 वृन्दावन गोवर्द्धन पासा ✽ तहँ सबको सब भांति सुवासा ॥
 तहां गोपगण सब सुखपै हैं ✽ बनमें गोधन वृन्द चरै हैं ॥
 यह विचार सबके मन भायो ✽ चलिबेको शुभ दिवस धरायो ॥
 वृन्दावन सब चले गुवाला ✽ पांच बरषके मदन गोपाला ॥

दोहा—शकट सौज सब साजिकै, गोधन दिये हँकाय ॥

चले गोप गोपी हरषि, वृन्दावन समुदाय ॥

सो०—निरखि अनूपम ठाम, शकट दिये सब छोरिकै ॥

सबके मन वश श्याम, बसे सकल वृन्दा विपिन ॥

बसे सकल वृन्दावन माहीं * अति आनंद गोप मनमाहीं ॥

गाय वच्छ सबही सुखपायो * चरत निकट तृण हरित सुहायो ॥

हलधर धेनु चरावन जाहीं * मन मोहन लखि मनहिं सिहाहीं ॥

प्रात चले सब गाय चरावन * जननी सों बोले मन भावन ॥

मैं हूं गाय चरावन जैं हों * बडो भयो अब नाहिं डरैहों ॥

संग सखा अरु हलधर भैया * इनके संग चरैहों गैया ॥

बालन संग यमुन तट माहीं * खेलहिंगे सब बटकी छाहीं ॥

अपनी रुचि मनके फल खैहों * तेरी सों यमुना नहिं न्हैहों ॥

ऐसी अबहिं कहौ जिनबारे * देखहु अपनी भांति ललारे ॥

तनक पायँ चलिहौ किहि भांती * गेयन आवत हैहै राती ॥

प्रात जात गेयन लै चारन * आवत सांझ लखौ सब ग्वालन ॥

तुम्हरो कमल वदन मुरझैहै * रंगत घाम मांझ दुखपैहै ॥

दोहा—तेरी सों मोहिं घाम नहिं, लागत भूख ननेक ॥

कल्यो कान्ह मानत नहीं, करै आपनी टेक ॥

सो०—चले चरावन गाय, ग्वाल बाल बलदेव बन ॥

हेरी टेर सुनाय, गोधन करि आगे लिये ॥

हरी टेर सुनत लरिकनकी * गये दौरि हरि अति रुचि मनकी ॥

इत उत यशुमति जबहिं निहारी * दृष्टि न परे श्याम बनवारी ॥

बनतन जान्यो जात कन्हाई * टेरति यशुमति पीछे धाई ॥

जात चले गैयन संग धावत * बलदाऊ को ढेरि बुलावत ॥
 पीछे जननी आवत जानी * फेरि फेरि चितवत भय मानी ॥
 हलधर आवत देखि कन्हार्ई * ठाढ़े किये सखा समुदाई ॥
 पहुँची जननी भये सब ठाढ़े * रिस करि दोउ भुज पकरे गाढ़े ॥
 बल कहै जान देहु संग मेरे * बनते ऐहैं आज सबेरे ॥
 कद्यो यशोमति बलहि निहारी * देखत रहियो मैं बलिहारी ॥
 भ्राता संग गये बनहिं कन्हार्ई * यशुमति यहै कहत घर आई ॥
 देखो हरि कैसो ढंग लीन्हों * अपनी टेक पन्यो सोइ कीन्हों ॥
 आज जाय देखहु बनमाहीं * कहां परोस धन्यो तिहि ठाहीं ॥

दोहा—माखन रोटी और जल, शीतल छाक बनाय ॥

दई वेगही ग्वाल संग, यशुमति बनहिं पठाय ॥

सो०—चिन्तामणि सुर भेक, पंच सुधारस कल्पतरु ॥

अनुदिन जाके एक, खात छाक सो ग्वाल संग ॥

वृन्दावन खेलत नंदलाला * भयो हिये आनन्द विशाला ॥
 जहँजहँ ग्वाल गाय संग जाहीं * तहँतहँ आप फिरत बनमाहीं ॥
 बलदाऊ सो कहत कन्हार्ई * नित ल्यावहु मोहिं संग लिवाई ॥
 आज मरुं करि आवन पायो * जननी तुम्हरे कहे पठायो ॥
 कालिहकौ निविधिकरीवन ऐहों * यशुमति पै आवन नहिं पैहों ॥
 सोवत बोलि लीजियो मोकों * सोहैं नंदबवाकी तोकों ॥
 पुनि पुनि विनय करत सुखदाई * बलसों सखन समेत सुनाई ॥
 संध्या समय निकट जब आई * घर कहँ चलौ कद्यो बलभाई ॥
 गैयन घेरि करी यकठौरी * चले सदन सब गावत गौरी ॥
 आवत बनते धेनु चराई * ग्वालन मध्य श्याम सुखदाई ॥

जिहि जिहि भांति ग्वाल मुख भाखैं * सुनि सुनि मन मोहन उर राखैं
नान्हैं सुर पुनि आपुनि गावैं * तारी देत हंसत सुख पावैं ॥

दोहा—मोर मुकुट बनमाल उर, पीताम्बर पहराय ॥

गोपदरज छवि बदन पर, आवत गाय चराय ॥

सो०—छुटी अलक छवि देत, जलंज वदन पर मधुप जनु ॥

आवत सखन समेत, नंदसुवन ब्रज प्राण धनु ॥

देखत नन्द यशोदा ठाढ़े * रोहिणि अरु ब्रजजन सुख बाढ़े ॥

गायन संग श्याम जब आये * लैबलाय जननी उर लाये ॥

आज गयो हरि गाय चरावन * मैं बलि जाउँ तनकसें पावन ॥

मो कारण कछु बनते लाये * तुमको मिलि मैं अति सुख पाये ॥

आचर सों सब अंग अंग झारे * बदन पोंछि मुख चूमि दुलारे ॥

स्वाउ कछुक जो भावै मोहन * देरी माखन रोटी सोहन ॥

दिये जिमाय तुरत दोउ भैया * अति आनन्द मगन मन मैया ॥

कहत जननिसों श्रीब्रजनाथा * प्रात नितहि जैहों बलसाथा ॥

मैं अपनी अब गाय चरैहों * तेरे कहे घरहि नहि रैहों ॥

ग्वाल बाल गायनके माहीं * नेकहु डर लागत मोहिं नाहीं ॥

आज न सोवों नन्द दुहाई * रहिहों जागत कहत कन्हाई ॥

सब मिलि गाय जरावन जाहीं * मैं क्यों रहों बैठि घर माहीं ॥

दोहा—सोय रहौ अब श्याम तुम, जननी कहै चुचकारि ॥

प्रात जान कहिहों तुम्हें, वनको मैं बलिहारि ॥

सो०—ज्यों त्यों राखे स्वाय, प्रात देन वन जान कहि ॥

जननी दाबत पांय, श्रमिit जानि वन गमनके ॥

बहुते दुख हरि सोय गयोहै * ज्यों त्यों करि मन बोध लयोहै ॥

सांझहि ते लाग्यो इहि बातै ❀ जान कहत बन उठि पुनि प्रातै ॥
 यह तो संग लागि बलरामहिं ❀ गये लिवाय आज बन श्यामहिं ॥
 अब तो सोयरह्यो करिऐसे ❀ प्रात विचार करै धौं कैसे ॥
 कहत नंद बलके संग जाई ❀ इतउत आवन दे फिरि धाई ॥
 भोर भयो यशुमति कह्यारे ❀ जागहु मोहन नन्द दुलारे ॥
 बीतीनिशि रंवि किरण प्रकाशी ❀ शंशि मलीन उडगण धुतिनाशी ॥
 सुनहु शब्द बोलत खगमाला ❀ खोलहु अम्बुजनयन विशाला ॥
 सुनत श्याम जननीकी बानी ❀ जागि उठे सन्तन सुखदानी ॥
 लाई तुरत कलेऊ मैया ❀ माखन रोटी खान कन्हैया ॥
 टेरत ग्वाल सखा सब द्वारे ❀ आये तबके होत सकारे ॥
 खेलहु बज भीतरही प्यारे ❀ दूर कहूं मति जाहु ललारे ॥

दोहा—टेरि उठे बलराम तब, आवहु धाय कन्हाय ॥

जात ग्वाल बनको सबै, चलहु चरावन गाय ॥

सो०—श्याम जोरि दोउ हात, जननी सों हाहाकरत ॥

जै हौं ग्वालन साथ, गोचारन वृन्दा विपिन ॥

टेरत मोहिं दाऊरी मैया ❀ जैहौं बनहिं चरावन गैया ॥
 बन फल तोरी देत मोहि जाई ❀ आपुन घेरत गैयन धाई ॥
 जैहौं अरु ग्वालन संग नाहीं ❀ मोहिं खिझावत वे बनमाहीं ॥
 मैं अपने दाऊ संग रहैं ❀ देखत वृन्दावन सुख पैहैं ॥
 आगे दै लावत मगमाहीं ❀ तू क्यों जान देत मोहिं नाहीं ॥
 लीन्हो यशुमति बलहि बुलाई ❀ सुनहु लाल हरिके गुण आई ॥
 कहत यशोमति सों बल भैया ❀ जान देहु मोसंग कन्हैया ॥
 अपने ढिग ते नेकु नटारैं ❀ जिय परतीत नेक नहिं धारैं ॥

तू काहे डरपति मन माहीं * जानदेत हरिको क्यों नाहीं ॥
 हँसी महरि सुनि बल की बानी * जाहु लिवाय कहत नँदरानी ॥
 मैं बलिहारी तुम्हरे मुखकी * तुमहूँ कहत श्यामके रुखकी ॥
 अति आनंद भयो हरिधाये * दोऊ संग खरकमें आये ॥

दोहा—धाय धाय भेंटन सखन, उर अति हर्ष बढाय ॥

पठयो मैया मोहि बन, चलहिं चरावन गाय ॥

सो०—कहत सखा सुख पाय, चलहु श्याम देखौ बनहिं ॥

बनमाला पहिराय, करत चित्रं बन धातु तन ॥

चले बनहिं सब गाय चरावन * सखा संग सोहत मनभावन ॥
 ग्वाल बाल सब कछुक सयान्हे * नंदसुवन तिनमें कछुनान्हे ॥
 गाय गोप गोसुत बन जाई * तिनके मध्य श्याम सुखदाई ॥
 हरिसों सखा कहत समझाई * छोडि कहूँ जिन जाहु कन्हाई ॥
 वृंदावन अति सघन विशाला * जैहौ भूलि कहूँ नंदलाला ॥
 सुनत श्याम घन तिनकी बाता * मनमन हँसत कहत जगत्राता ॥
 तुम्हरो संग न छाँडतराई * बनहिं डरात बहुत मैं भाई ॥
 जात चले सब हर्ष बढाये * खेलत श्याम संग सुखपाये ॥
 कोउगावत कोउ वेणु बजावै * कोउ नाचत कोउ कूदत आवै ॥
 देखि देखि हरि अति हर्षाहीं * हँसत सखन सों दै गलबाहीं ॥
 भली करी तुम मोको लाये * आज यशोमति हर्ष बढाये ॥
 इहि विधि गोधन लै सब ग्वाला * यमुना तट पहुँचे नंदलाला ॥

दोहा—दई धेनु बगराय सब, चरन आपने रंग ॥

गाय चरावत नंदसुत, मिलि ग्वालनके संग ॥

सो०—उर मुक्तनकी माल, शीश मुकुट कटि पीत पट ॥

हाथ लकुटिया लाल, डोलत ग्वालन संग प्रभु ॥

॥ अथ वत्सासुरवधलीला ॥

खेलत श्याम सखनके माहीं ❀ यमुनाके तट तरुकी छाहीं ॥
 वत्सासुर तिहिं अवसर आयो ❀ पठयो कंस काल नियरायो ॥
 वत्स रूप धरि आय समान्यो ❀ कृष्ण ताहि आवतही जान्यो ॥
 बल तन चितै कह्यो मुसकाई ❀ तुम याको जानत हौ भाई ॥
 यह तो असुर वत्स है आयो ❀ हमको मारन कंस पठायो ॥
 हलधरहूं देख्यो धरि ध्याना ❀ कहत सांच तुम श्याम सुजाना ॥
 ग्वालनहूं सों कहत कन्हार्ई ❀ बछरा घेरि करो इकठार्ई ॥
 लाये घेरि वत्स सब ग्वाला ❀ वह नहिं धिरहि चपल विकराला ॥
 बारबार हरि ओर निहारै ❀ दांव घात मन माहिं विचारै ॥
 तब हरि कह्यो याहि मै ल्यावत ❀ तुम तो याको छुवन न पावत ॥
 हाथ लकुटिया लै हरि धाये ❀ वत्सासुरके सन्मुख आये ॥
 हरिको जबहिं जुदो करि पायो ❀ असुर कोप करि मारन आयो ॥
 छंद—धायो असुर करि क्रोध मारन श्यामके सन्मुख गयो ॥
 है गयो निष्पाप तबहीं योग्य सुरपुरके भयो ॥
 धायकै हरिचपरिताको पकरि पाँय फिराइयो ॥
 पटक्यो धरणि तनु असुर प्रगट्यो फेरि श्वास न आइयो ॥
 दोहा—वत्सासुर सुरपुर गयो, अधम असुर तनु त्याग ॥
 सुर हर्षत वर्षत सुमन, गगन सहित अनुराग ॥
 सो०—धाय परे सब ग्वाल, चकित कृष्ण बल देखिकै ॥
 धन्य धन्य नंदलाल, कहत परम आनंदभरे ॥
 असुर देखि सब अचरज पायो ❀ कहत हमैं हरि आज बचायो ॥

बछरा करि हम जान्यो याही * यहतो असुर भयानक आही ॥
 आज सबनि धरिकै यह खातो * और कौन पै जात निपातो ॥
 हरषि हरषि हरिको उर लायो * असुर निकन्दन नाम सुनायो ॥
 कहत ग्वाल धनि धन्य कन्हार्ई * धन्य धन्य ब्रज प्रगटे आई ॥
 यह ऐसो तुम अति सुकुमारा * किहि विधि भुजन फिराय पछारा
 सबहीके देखत पलमाहीं * मान्यो असुर डरे तुम नाहीं ॥
 अबलौं हम न तुमहिं पहिचान्यौं * हौ तुम बडे सबनते जान्यौं ॥
 कोउ वनमाल आनि पहिरावैं * कोउ वन धातु रगारि तनुलावैं ॥
 कोउ कुण्डल शिरमुकुट सँवारैं * अलिकावलिकोउ तिलक सुधारैं
 जात भुजनपर कोउ बलिहारैं * तनु देखत कोउ वदन निहारैं ॥
 वनफल तोरि धरत कोउ आगे * कहत खाउ मीठे अति लागे ॥

दोहा—इहि विधि हरिको पूजिकै, ग्वाल बाल हरषाय ॥

सांझ निकट आवत चले, घरको धेनु चराय ॥

सो०—परम मुदित सब ग्वाल, असुर मारि आवत घरहिं ॥

गावैं शब्द रसाल, ब्रजवासी प्रभुके गुणन ॥

सखन मध्य सोहत नँदनंदन * जलद श्यामतनु चित्रित चंदन ॥
 मोर मुकुट पट पीत सुहावन * इंद्र धनुष दामिनिहि लजावन ॥
 मुक्तमाल वनमाल विराजै * बकं शुकं अवलि मनहुँ छबिछाजै ॥
 हाथ लकुट कल कुण्डल कानन * कोटिकाम छवि शोभित आनन
 कुटिल अलक भ्रुव नैन विशाला * गोपदरज कन द्युति छबिजाला
 बल मोहन वनतेवनि आवैं * निरखि निरखि ब्रजजन सुखपावैं ॥
 सखन सहित हरि धामहिं आये * हरषि यशोमति कण्ठ लगाये ॥
 कहत ग्वाल सुनु यशुमति मैया * है तेरो रणवीर कन्हैया ॥

वत्सरूप एक दानव वनमें * आय समान्यो बछरागनमें ॥
हम ताको कछु जानि न पायो * सो वह हरिको मारन धायो ॥
क्षणहीं माहिं ताहि हरि मान्यो * हम देखत महिपटकि पछान्यो ॥
यह कोउ बडो पूत तैं जायो * भाग हमारे ब्रजमें आयो ॥

दोहा—सुनि ग्वालनके वचन ते, वत्सासुर को घात ॥

यशुमति सबके पांय परि, बार बार पछितात ॥

सो०—भयो महारि उर त्रास, बचे आज हरि असुरते ॥

मैं न बिगान्यो कासु, भयो सहायक आनि हरि ॥

यशुदा शोच करत तू जाये * यह तो ख्याल कान्हके भाये ॥
परबत तुल्य विकट तनु जाहो * कियो प्राण बिन क्षणमें ताही ॥
तुम्हरी रक्षाको यह नाहीं हम सबको रक्षक यह आहीं ॥
याके चरणकमल चित लैये * बारबार याकी बलि जैये ॥
ग्वालन यों हरिके गुण गाने * ब्रजजन सब आश्चर्य भुलाने ॥
लीलासागर हरि सुखदानी * मोहे सब नरनारि सुबानी ॥
हँसि जननी सों कहत कन्हार्ई * देख्यों मैं वृन्दावन जाई ॥
अति रमणीक भूमि द्रुम नीके * कुंज सघन निरखत सुख जीके ॥
अति कोमल तृण हरित सुहाये * यमुनाके तट बच्छ चराये ॥
वनफल मधुर मिष्ट अति नीके * भूख मिटी खाये तिनहींके ॥
सखन संग खेलत बटछाहीं * वनमें मोहिं लगत डर नाहीं ॥
रोहिणि सहित यशोदा माता * मुदित सुनत हरिकी मृदु बाता ॥

दोहा—मोहि लियो मन जननिको, मधुरे वचन सुनाय ॥

वत्सासुरको शोच उर, क्षणमें दियो मिटाय ॥

सो०—लेगे दुहन सब गाय, जहँ तहँ हर्षित गोप गण ॥

गये तहां हरि धाय, गाय दुहन चाहत सिखन ॥

॥ अथ धेनुदुहनकी लीला ॥

धेनुदुहत हरि देखत ग्वालन * कहत मोहिं सिखवो गोपालन ॥
 मैं दुहिहों मोहिं देहु सिखाई * बैठि गये तिनसङ्ग कन्हाई ॥
 कैसे गया थनहिं लगावत * कैसे नोय पगन अटकावत ॥
 घुटरुन गहत दोहनी कैसे * मोहिं बताय देउ तुम तैसे ॥
 कैसे धार दूधकी होई * देहु दिखाय मोहिं सब कोई ॥
 कहत ग्वाल तुम सुनौ कन्हाई * भई अवार आज अति भाई ॥
 तुमको सिखवैं दुहन सबारे * अब कहुं लगिहै चोट तुम्हारे ॥
 श्याम कट्यो सबही समुझाई * भोर दुहों निजनन्द दुहाई ॥
 मेरी सों मोहिं लीजो टेरी * मैं दुहिहों निज गाय सबेरी ॥
 दुष्ट दलन सन्तन सुखदाई * ठाढ़े गैयन मांझ कन्हाई ॥
 आवहु कान्ह सांझकी बेरिया * कहत जननियहबडी कुबिरिया ॥
 लरिकाई कछु छांडत नाहीं * सोवहु लाल आय घर माहीं ॥
 दोहा—आये हरि यह सुनतही, जननि लिये अँकवार ॥

लै पौढाये सेजपर, अजिरं चांदनी चार ॥

सो०—कहत कहत कछु बात, सोय गये वश नींदके ॥

कहत यशोमति मात, सोय गयो हरि अजिरहीं ॥
 दोउ जननी हरुवैके हरिको * सेज सहित लीन्हे भीतरको ॥
 बहुत आज हरि सोय गयो है * अतिहि नींदके वशहि भयो है ॥
 नेकन बैठत थिर घर माहीं * खेलनमें मन रहत सदाहीं ॥
 रोहिणि कहत देउ किन सोवन * खेलत हारि गयो मनमोहन ॥
 माता हरुवै पवन दुरावति * निरखि वदन सुंदर सुखपावति ॥

प्रात जगावत नंदकी रानी ❀ उठहु श्याम सुन्दर सुखदानी ॥
 नाहिनइतो सोइयत लाला ❀ सुनु सुत प्रात समय शुचि काला ॥
 उग्योतरणि कुमुदिनि सकुचानी ❀ घरघरग्वालिनिमथत मथानी
 बारबार टेस्त सब ग्वाला ❀ सांझ कद्यो तुम दुहन गोपाला ॥
 होत अबार गाय सब ठाढी ❀ भरि भरि क्षीर भारथनबाढी ॥
 वत्सपुकारत आरत ताई ❀ दुहत नाहिं तुम सोंह दिवाई ॥
 तुम्हरे लिये ग्वाल सब ठाढे ❀ देखत वाट प्रेम उरबाढे ॥

दोहा—यह सुनतहि तुरतहि उठे, शशि मुख ते पटटार ॥

धेनु दुहन सीखन चले, मोहन नन्दकुमार ॥

सो०—लाउ रोहिणी मात, वेगि तनकसी दोहनी ॥

कद्यो सिखावन तात, आज मोहिं गैया दुहन ॥

रोहिणि तुरत दोहनी लाई ❀ घर घरते देखन सब आई ॥
 अटपट आसन बैठि कन्हआई ❀ गोथन कर लीन्हो सुखदाई ॥
 धार अनतहीं जात निहारी ❀ हँसे नन्द यशुमति महतारी ॥
 चितै चोर चित हरि हँसिदीन्हो ❀ ब्रजवासी जनबलिबलिकीन्हो
 किये यशोमति आनंद भारी ❀ दियो दान विप्रनाहिं हँकारी ॥
 गावत मङ्गल ब्रजकी नारी ❀ दुही गाय सन्तन हितकारी ॥
 अति आनंद मगन नँदराई ❀ बैठे प्रमुदित गोप अथाई ॥
 लिये गोप सुन्दर धनश्यामहिं ❀ ब्रजके जीवन जन सुख धामहिं ॥
 आयो तहाँ एक बनजारो ❀ मूंगा मोती बेचन हारो ॥
 तिहिं लखि अटके नंदकुमारा ❀ देहि देहि कहि बारम्बारा ॥
 दीरघ मोल कद्यो व्यापारी ❀ रहे ठगे सब गोपनिहारी ॥
 करपर राखि रहे हरि मोतो ❀ देत नहीं लखि सुन्दर जोती ॥

॥ अथ मोतीबोनेकी लीला ॥

दोहा—मुक्तलै हरि घर गये, बये अजिर बलबीर ॥

आलं बाल थल रोपिकै, पुनि पुनि सींचत नीर ॥

सो०—हंसत यशोमति मात, कहत करत मोहन कहा ॥

यह नहिं जानत बात, ये करता सब जगतके ॥

भये तुरत शाखाँ दल तामें * यशुमति अजिर मुक्त फल जामें ॥

फूलत फलत न लागी वारा * ब्रह्मादिक नित करत विचारा ॥

सुर नर मुनि कोउ मरमन जानैं * देखि देखि अति अचरज मानैं ॥

नन्द भवन हरि मुक्त जमाये * ब्रजवनितन गुहिहार बनाये ॥

ब्रजवासी यह प्रभुकी लीला * सब गुण समरथ सब गुणशीला ॥

क्षणमहँ जासु रजायसुमाया * प्रकट करत ब्रह्मांड निकाया ॥

ब्रह्मादिक जेहि पार न पावैं * नन्द अजिर सो ख्याल बनावैं ॥

जाकी महिमा लखै न कोई * निरगुण सगुण धरे वपुसोई ॥

लोक रचै नाशै प्रतिपारैं * सो ग्वाल संग लीला धारैं ॥

शिवविरंचिमुनि ध्यानन आवैं * ताहि यशोमति गोद खिलावैं ॥

अगम अगोचर लीला धारी * सो इन्दावन कुंज विहारी ॥

बड़े भाग्य सब ब्रजके बासी * जिनके संग बिहरत अविनासी ॥

दोहा—धनि धनि ब्रजके नारिनर, धनि यशुदा धनि नन्द ॥

बिहरत जिनके सदनमें, ब्रह्म सच्चिदानन्द ॥

सो०—कहिकहि देवसिहांय, धन्य धन्य ब्रजबाग बन ॥

जहां चरावत गाय, सकल सुरन शिर मुकुटमणि ॥

॥ अथ बकासुरवधलीला ॥

प्रात चले उठि गाय चरावन * हलधर सुंदर श्याम सुहावन ॥

देखत छवि ब्रज सुन्दरि ठाढी * करत परस्पर आनंद बाढी ॥
 देखु सखी ब्रज ते बन जाहीं * बल मोहन ग्वालनके माहीं ॥
 रोहिणिसुत छविगौर सुहाई * यशुमति सुवन श्याम सुख दाई ॥
 ओढे नील पीतपट सोहैं * सो छवि निरखि वदन मन मोहैं ॥
 युगलजलदधन दामिनि जानौं * जो रति नाथ परस्पर मानौं ॥
 शीश मुकुट कलं कुंडल कानन * झलकैं बिम्बकपोलन आनन ॥
 सखन मध्य सोहत नंदलाला * मंद हँसनि दृग कमल विशाला ॥
 कंठि किंकिणि कर लकुट सुहाये * जात चले वन मनहिं चुराये ॥
 रहीं थकित लखि सब ब्रजनारी * गये वनहिं विहरत वनवारी ॥
 वन वन फिरत चरावत गैया * हलधर श्यामसखाइकठैया ॥
 करत विहर विविध बनमाहीं * बाल केलि रस वरणि न जाहीं ॥

दोहा—कबहुं गावत सखन संग, कबहुं बजावत बेनु ॥

धौरी धूमरि नामलै, कबहुं बुलावत धेनु ॥

सो०—कबहुं नचावत मोर, सुन्दर श्यामलजलदजन ॥

गरज मुरालि घन घोर, बरषत परमानंदतन ॥

खेलत विविध खेल मनभावन * श्रीवृन्दावन परम सुहावन ॥
 तृषित जानि गैयन नंदलाला * कट्यो चलहु जनदेन गुपाला ॥
 लेहु बुलाय सुरभिगण टेरी * सुनत ग्वाल सब लाये घेरी ॥
 गोधन वृंद हांकि सब लीन्हो * ग्वालन गमन यमुनतट कीन्हो ॥
 तहां बकासुर छलकरि आयो * माया रचित स्वरूप बनायो ॥
 एक चोंच भूतल महुँ लाई * एकरही आकाश समाई ॥
 मगमें बैठ्यो वदन पसारी * ग्वालन देखि भयो भय भारी ॥
 बालक जातहते जे आगे * ताहि देखि सो पाछे भागे ॥

कहत भये सब हरिसों आई * आगे एक बलाय कन्हाई ॥
 आवत नितहि ग्वाल इहिठाहीं * ऐसो कबहुं देख्यो हम नाहीं ॥
 तबहिं कृष्ण ताको पहिचान्यो * यहै बकासुर मैं यह जान्यो ॥
 पलमें आज याहि मैं मारैं * असुर चोंच धरि वदन विदारैं ॥

दोहा—निडर श्याम आगे भये, चले बकासुर पास ॥

कहत सखा सब श्याम सों, नहिं जीवनकी आस ॥

सो०—अबहूँ नहीं डरात, बचे किते उतपातते ॥

चले कहां हरि जात, हम बरजत मानत नहीं ॥

तब हरिकृत्यो चलहु तेहि पासा * सब मिलि मारि करहिं बकनाशा
 जब हरि संग चले सब ग्वाला * देख्यो जाय बकहि विकराला ॥
 ताके निकट गये सब जबहीं * लियो लीलिं हरिको बक तबहीं ॥
 जान्यो असुर काज मैं कीन्हों * तबहीं वदन मूँदि कै लीन्ह्यों ॥
 ग्वाल पुकारत आरत भागे * बलसों आय कहन सब लागे ॥
 हम बरजत हठि गये कन्हाई * लीन्हे लीलि असुर बक धाई ॥
 हरि चरित्र कछु जानि न जाहीं * उपजी आगि असुर तनुमाहीं ॥
 लाग्यो जरन भयो अति व्याकुल * हरिको उगिल दियो अति आकुल
 बहुरो पकरनको मुख बायो * चोंच पकरि हरि चीरि बहायो ॥
 मरत चिकार असुर अति मारी * व्याकुल भये ग्वाल भय भारी ॥
 ग्वालन विकल देखि बलरामा * कहत असुर मान्यो घन श्यामा ॥
 टेरि उठे उत कुँवर कन्हाई * आवहु सखा वृन्द सब धाई ॥

दोहा—बक विदारि हरि सखनको, टेरत आवहु धाय ॥

चोंच फारि मारेउँ असुर, तुमहूँ करौ सहाय ॥

सो०—गये सखा सब धाय, सुनत श्यामके वचन बर ॥

निरखि नयन सुख पाय, पुनि पुनि भेंटत पुलकतन ॥
 कहत परस्पर सखा सयाने ❀ ये कोउ ब्रज प्रगटे हम जाने ॥
 इन्हें नाहिं कोउ घात करैया ❀ ये हैं असुरनके दलवैया ॥
 जब ते इन्हें यशोमति जाये ❀ तब ते असुर कितेकउ आये ॥
 तृणा पूतना शकटा मारे ❀ तब वे रहे बहुत ही बारे ॥
 हम देखत वत्सासुर मान्यो ❀ कितक बात यह बका विदान्यो ॥
 इनके गुण कछु जानि न जाहीं ❀ हम अपने जिय डरे वृथाहीं ॥
 धनि यशुमति जिन इनको जाये ❀ धनि हम इनके सखा कहाये ॥
 बकहि मारि सुन्दर धनश्यामा ❀ यमुना तट आये सुखधामा ॥
 सुरभीगण सब नीर पियाये ❀ सखन समेत आप प्रभु आये ॥
 घसि बन धातु चित्र तन कीन्हो ❀ मोरमुकुट माथे धरि लीन्हो ॥
 वनमाला रचि सखन बनाई ❀ प्रेम सहित हरिको पहिराई ॥
 वनफल मधुर गोप लै आये ❀ सखन सहित हरि भोग लगाये ॥

दोहा—बल मोहन घरको चले, जानि साँझ की बेर ॥

लीनी गैया घेरि सब, मुरली की धुनि टेर ॥

सो०—चले बजावत बेन, ग्वाल वृन्दके मध्य हरि ॥

अँग अँग छबिको ऐन, ब्रज जन मोहन साँवरो ॥

सुनि मुरली की टेर रसाला ❀ देखन को धाई ब्रजबाला ॥
 कहत परस्पर अति सुख पावत ❀ देखु सखी बनते हरि आवत ॥
 नाना रंग सुमनकी माला ❀ श्यामहिये छबि देत विशाला ॥
 मोरपक्ष शिर मुकुट विराजै ❀ मधुर मधुर मुख मुरली बाजै ॥
 भ्रुकुटी बिकट निकट सुखदाई ❀ तिलक रेख छबि वरणि न जाई ॥
 कुण्डल लोल अलक घुंघरारी ❀ निरखु सखी लागत अति प्यारी ॥

नाशानिकट अंधर अरुणाई * जनुशुक बिम्बहिं चोंच चलाई ॥
 मन्दहँसनि घन दामिनि जैसे * दुरि दुरि प्रगट होत हैं तैसे ॥
 तनु घनश्याम कमल दलनैना * बोलत मधुर मनोहर बैना ॥
 मुख अरविन्द मन्द सुर गावत * नटवर रूप सखन मनभावत ॥
 सब अँग चन्दन खौरि बनाये * गुंजमाल मन लेत चुराये ॥
 या मोहन छवि पर वलि जैये * नन्द नंदन देखत सुखपैये ॥

दोहा—ग्वाल बाल गोधन लिये, हरि हलधर दोउ भाय ॥

साँझ समय बनते चले, आये धेनु चराय ॥

सो०—राँभति धाई गाय, बत्स सुरति कर पयँ श्रवत ॥

हरषि यशोदा माय, कहति श्याम आवत घरहि

इतनी कहत श्याम घर आये * जननी दौरि हरषि उरलाये ॥
 ब्रज लरिका सब तुरतहि धाये * महारि महर पद शीश नवाये ॥
 ऐसो पूत धन्य तुम जायो * इनको गुण कछु जात न गायो ॥
 आज गये वनगाय चरावन * चले यमुनतट जलहि पियावन ॥
 तहां असुर इक खगंतनुधारी * रथो यमुनतट बदन पसारी ॥
 एक चोंच महि सों लपटाई * एक रथो आकाश लगाई ॥
 हम बरजत पहिले हरि धायो * ताके मुख में जाय समायो ॥
 हम सब डरपि भजे बल पासा * अति व्याकुल तनु भयो निरासा ॥
 कैसे धौं हरि बाहर आयो * चोंच फारि तेहि मारि गिरायो ॥
 सुनत नन्द यशुमति ब्रजनारी * चकित चित्तरहे हरिहि निहारी ॥
 यशुदा कहति कहा कोउ जानै * नित प्रति होत आनकी आनै ॥
 भयो आज कोउ सुकृत सुहाई * विधिकी गति कछु जानि न जाई ॥
 दोहा—जन्म भयो है श्यामको, तबते यहै उपाधि ॥

कह्या सन्यो हमरे यतन, विधि गति अगम अगाधि ॥

सो०—किन धौं करी सहाय, को जानै भावी प्रबल ॥

को मेरे पछिताय, करी अयानी बूझविन ॥

लै बलाय छतियाँ हरिलाये * प्रेम संलिल लोचन भरिआये ॥

मैं बलि जाऊँ कहत कछु खाहू * तुम कित गाय चरावन जाहू ॥

नन्द महर सों पिता तुम्हारे * मोसी मात जाय बलिहारे ॥

खेलत खात रहौ अपने घर * दधि माखन पकवान विविधवर ॥

निरखिवदन सुनिवचन तुम्हारे * लोचन श्रवण सिरात हमारे ॥

दुष्टदलन भक्तन सुखदानी * बोले मधुर मातु सों बानी ॥

मैया मैं न चरैहों गया * अब वन मेरि जात बलैया ॥

मोसों सबै ग्वाल वन जाई * गाय घिरावत हैं बरिआई ॥

दौरत मेरे पाँय पिराहीं * जब मैं बैठि रहों तरुछांहीं ॥

जो न पत्याय बूझ बल भाई * देहिं आपनी सौंह दिवाई ॥

यह सुनतहि यशुमति रिसियानी * गारि देत ग्वालन दुखमानी ॥

मैं पठवत लरिकहि वन जाई * आवहिं तनिक मनहिं वहलाई ॥

दोहा—जानहिं कहा चरायकै, अबहीं मोहन गाय ॥

अति बारो मेरो सुवन, मारत ताहि रिंगाय ॥

सो०—हरि जनके सुखदाय, को जानै हरिके चरित ॥

मधुरे वचन सुनाय, मोहिलियो मन मातको ॥

॥ अथ चकई भवँराखेलनलीला ॥

कछुकखाय हरि निशिको सोये * प्रातजगाय जननि मुख धोये ॥

कियो कलेऊ कछु सुखदाई * जननी सों बोले हर्षाई ॥

दे मैया भँवरा चक डोरी * खेलत रहिहों ब्रजकी खोरी ॥

हर्षि जननी आरे पर भाखे ❀ तुमहि तनये मोल लै राखे ॥
 लै आये हरि तुरत निकारी ❀ भये मगन अति रङ्ग निहारी ॥
 बार बार हर्षित मुख भाखै ❀ मैया विन अरुको लै राखै ॥
 बिहँसि चले फेरत चक डोरी ❀ खेलन सखन संग ब्रज खोरी ॥
 जैसे आप सखा सब तैसे ❀ सुन्दर कोटि मनोभव जैसे ॥
 निरखि २ छवि गोप किशोरी ❀ बार बार डारत तृण तोरी ॥
 सबहिन को मन मोहन भावैं ❀ सब ब्रजतिय हरिसों मन लावैं ॥
 यह वासना करैं ब्रजवाला ❀ होहिं हमारे पति नँदलाला ॥
 हरि अन्तर्ग्यामी सब जानैं ❀ सबके मनकी रुचि पहिचानैं ॥
 दोहा—चित दै जो हरिको भजै, कोऊ कौनहु भाव ॥

ताको तैसेई सदा, प्रकटत त्रिभुवन राव ॥

सो०—भक्तनके सुखदान, भक्त बछल भगवान हरि ॥

नारि पुरुष नहिं मान, प्रेम भावके वश सदा ॥

गोपिनके यह ध्यान सदाई ❀ नेक न अन्तर होहिं कन्हवाई ॥
 हरि उनके मनकी रुचि जानी ❀ करहिं बात उनके मनमानी ॥
 मारग चलत तिन्हैं हठि रोके ❀ खेलत माँझ जहाँ तहँ टोके ॥
 चकई भँवरा डोरि फिरावैं ❀ तिनके भूषण सों अरुझावैं ॥
 काहू सों हरि वदन सकोरैं ❀ काहू सों दृग वदन मरोरैं ॥
 काहू सों अँखियां मटकावैं ❀ आप हँसैं अरु उन्हें हँसावैं ॥
 युवतिनके मन बसैं कन्हवाई ❀ देखे विन इक पल न सुहाई ॥
 हरिको खेलत माँझ खिझावैं ❀ खट कौरी दै गारी गावैं ॥
 गेंद उरोजन माहिं दुरावैं ❀ इहि विधि हरिसों अंग लुआवैं ॥
 कंचुकि फारि आपुही लेहीं ❀ यशुदहि जाय उरहनो देहीं ॥

अन्तर भुज गहि हरिहि दुरावैं * कहैं चलो नँदरानि बुलावैं ॥
यशुमति पै तुमको लै जैहैं * कुटिल भौंह किय हम न डेरैहैं ॥

दोहा—यों बज बनितन नेहवश, आनंद छवि घनरास ॥

रसिक पुरंदर सांवरो, बजमें करत विलास ॥

सो०—अब वरणों सुखखानि, हरि वृषभानु कुमारिको ॥

प्राण एकही जानि, प्रथम मिलन दोउ देहको ॥

॥ अथ राधाजूके प्रथमामिलनकी लीला ॥

खेलन हरि निकसे बजखोरी * मेघश्याम तनु पीत पिछोरी ॥
श्रवणनकुण्डलकी छवि छाजै * मोर पँखन को मुकुट विराजै ॥
दशन दमक दामिनि द्युतिथोरी * हाथ लिये फेरैं चकडोरी ॥
गये यमुनके तट मनमोहन * नाहीं तहां सखा कोउ गोहन ॥
औचक दृष्टि परी तहँ राधा * प्रेमराशि गुणरूप अगाधा ॥
नयन विशाल भाल दिय रोरी * नील बसन तनुकी छवि गोरी ॥
वेनी पीठ करत झक झोरी * अति छवि पुंज दिननिकी थोरी ॥
संग लरिकिनी आवत देखी * चितै रहे मुख रोक निमेखी ॥
रीझि रहे घनश्याम कन्हारै * अनुपम छवि लखि रहे लुभाई ॥
नयन वयन मिलि परी ठगोरी * बूझत श्याम कौन तैं गोरी ॥
रहत कहाँ कारीहै बेटी * अबलों नहीं कहूं बजभेटी ॥
काहेको हम बजतन आवैं * खेलत रहत आपने गावैं ॥

दोहा—सुनत रहत श्रवणनसदा, नँदढोटा बज माहिं ॥

घर घरते नित चोरिकै, माखन दधिलै खाहिं ॥

सो०—विहँसि कथ्यो घनश्याम, तुम्हरो कहा चुराय हैं ॥

आवहु किन बज धाम, नितहि खेलिये संग मिलि ॥

रसिक शिरोमणि नागर दोऊ * प्रीति पुरातन जान न कोऊ ॥
 ब्रजवासी प्रभु कुंजविहारी * बातन भुरे लई हरिप्यारी ॥
 प्रथम सनेह दुहुन मन जान्यो * गुप्त प्रेम शिशुता प्रकटान्यो ॥
 कहत श्याम मन कत सकुचावहु * खेलन कबहुँ हमारे आवहु ॥
 दूर नहीं कछु सदन हमारो * श्रवणन सुनियत बोल पुकारो ॥
 लीजो मोहिं टेरे नंदपोरी * काह नाम मेरो सुनु गोरी ॥
 सूधी बहुत देखियत तुमहूं * ताते साथ कीजियत हमहूं ॥
 तुम्हें बबा वृषभानु दुहाई * घरी पहर खेलहु इत आई ॥
 गैयां गिनन नंद जब जैहें * तिनके संग हमहुँ उत ऐहें ॥
 जो तुम गाय दुहावन ऐहौ * खरक माँझ तौ मोको पैहौ ॥
 रसिक शिरोमणि जान न राई * इमि प्यारी संकेत बुलाई ॥
 सुनत गूढ हरिकी मृदुबानी * मनहीं मन प्यारी मुसुकानी ॥

दोहा—गुप्त प्रीति प्रकटी नहीं, दोउ अन हृदय छिपाय ॥

मनमोहन प्यारी चली, घरको नयन चलाय ॥

सो०—चली सदन सुकुमारि, मनमें उरझो साँवरो ॥

जानी बड़ी अवारि, मात त्रास उर आनिकै ॥

कहत सखिन सों चली कुँवरिवर * को जैहै खेलन इनके घर ॥
 चलो बेग अपने घर जाहीं * भई अवार यमुनतट माहीं ॥
 वचन कहत ऊपर मुख माहीं * हृदय प्रेम दुख मन हरिपाहीं ॥
 गई भवन वृषभानु कुमारी * जननी कहति कहां हुति प्यारी ॥
 अबलों कहां अवार लगाई * गैया खरक देख मैं आई ॥
 ऐसे कहि मातहिं बहराई * अन्तरगति वश रहे कन्हाई ॥
 विरह विकल तनु गृह न सुहाई * सुंदर श्याम मोहनी लाई ॥

खान पान कछु नेक न भावै * चंचल चित्त पुलकिततु आवै ॥
मात पिताको मानत चासां * नयनन हरिदर्शनकी आसा ॥
कहत दोहनी दै मोहिं मैया * जैहों खरक दुहावन गैया ॥
अहिर दुहत तब गाय हमारी * जब अपनी दुहिलेत सवारी ॥
घरी एक मोहिं लगितहं जाई * तूमति आउ खरक अतुराई ॥

दोहा—लई मात सों दोहनी, चली दुहावन गाय ॥

मन अटक्यो नँदलालसों, गई खरक समुहाय ॥

सो०—मगं मग शोचत जाय, कब देखों वह सांवरो ॥

जिन मन लियो चुराय, खरक मिलन मोसों कट्यो ॥
देखे जाय तहां हरि नाही * भई चकित प्यारी मन माहीं ॥
कबहुँ इत कबहुँ उत डोलै * प्रेम बिकल कछु मुख नहिं बोलै ॥
देखे नन्द सङ्ग हरि आवत * ललकिलगे लोचन सुख पावत ॥
देखी श्याम राधिका ठाढी * लई बुलाय प्रीति अति बाढी ॥
कट्यो महर लखि खेलहु दोऊ * दूरि कहूं मति जैयो कोऊ ॥
सुनि वृषभानुसुता इत आई * अपने साथ खेलाउ कन्हआई ॥
हरि तन रहियो नेक निहारै * कोई कहूं गाय जिनमोरै ॥
नन्द बबाकी बात सुनो हरि * जाहु न मोढिगते कतहूँटारि ॥
महर सौं पिहमको तुम दीन्हों * राधे हरिहवाँहगाहि लीन्हों ॥
तुमको कहूं जान नहिं दैहों * जो जैहौतौ पकरि लै ऐहों ॥
मेरी बाहँ छोड़दे राधा * कहत श्याम ऊपर मन साधा ॥
तुम्हरी बाँह न तजों कन्हआई * महर खीझिहैं हमको आई ॥

दोहा—परम नागरी राधिका, अति नागर ब्रजचन्द ॥

करत आपनी घात दोउ, बँधे प्रेमके फन्द ॥

सो०—समुझि पुरातन नेह, ब्रजविलास हित तनु धरे ॥

चलन चहत वन गेह, युगल विहारी कुंजके ॥

तबहिं श्याम घन घटा उठाई * गरज मेघ महिचहुँ दिशि छाई ॥

पवन झकोर चली झकझोरी * चपला चपल चमक चहुँ ओरी ॥

हैगइ भुमि सकल अँधियारी * तैसिय तरु तमाल द्युतिकारी ॥

डरे देखिकै कुँवर कन्हाई * कट्यो राधिका सों नँदराई ॥

कान्है संगलिये घरजारी * भई अकाश घटा अति भारी ॥

लिये बाँहगहि कुँवर कन्हाई * चले युगल बन घर हरषाई ॥

नवल राधिका नवल विहारी * पुलक अंग मन आनंद भारी ॥

नवलनेह नवरंग मन भायो * नवल कुंजवन शुभग सुहायो ॥

नवल सुगन्ध नवल तरु फूले * गुंजत भ्रमर मत्तरस भूले ॥

शुभगयमुन जल पवन झकोरे * उठत श्याम छवि कुंज हिँडोरै ॥

बनज विपुल बहुरंग सुहावन * चारुविचित्र पुलिन अति पावन ॥

गये युगल तहँ रसिक रसीले * नागर नवल प्रेम रसगीले ॥

दोहा—विहरत विविध विलास वन, युगल रूपकी रास ॥

गुणगावत मुनि वेद विधि, अहिपति पति कैलास ॥

सो०—अति रहस्य सुखदाय, वनविहार नंदलालको ॥

क्यों सुकहै कवि गाय, वेद भेद पावै नहीं ॥

॥ श्लोक गीतगोविन्द ॥

मेघैर्मैदुरमम्बरंवनभुवःश्यामास्तमालद्रुमैर्नक्तम्भी

रुरयंत्वमेवतदिमंराधेगृहम्प्रापय ॥ इत्थंनन्दनिदेशत

श्चलितयोःप्रत्यध्वकुंजद्रुमं राधामाधवयोज्जयंतियमु-

नाकूलेरहःकेलयः ॥ १ ॥

चले सदन प्रभु कुंजविहारी ❀ गृह पठई अंकमंदै प्यारी ॥
 प्यारीकी सारी हरि लीन्ही ❀ पीत पिछौरी प्यारिहि दीन्ही ॥
 बादर जहँ तहँ दिये उडाई ❀ आये सदन श्याम सुखदाई ॥
 रही यशोमति हरिहि निहारी ❀ ओढे देखि शीशपर सारी ॥
 मन धौं कहत कहां यह पाई ❀ पीत पिछौरी कहाँ गँवाई ॥
 यशुमतितुरत आँखि पहिचानी ❀ ब्रजयुवतिन भुरये यह जानी ॥
 पूछत हरिहि बिहँसि नँदरानी ❀ तरुणिनकी सिखई बुधि ठानी ॥
 पीत पिछौरी कितहिं बिसारी ❀ यह तौ लाल तियनकी सारी ॥
 जानि लई जननी हरि जानी ❀ तब इक बुद्धि तुरत उर आनी ॥
 मैं लै गाय गयो यमुनारी ❀ तहँ वह भरति हती पनिहारी ॥
 बिडरी गाय भजीं सब नारी ❀ बची बँसुरिया बहुत सवारी ॥
 हौलै भजो औरकी सारी ❀ सो लै चादर गई हमारी ॥

दोहा—पीत पिछौरी लै भजी, मैं पहिँचानत वाहि ॥

मैयारी मैं जायकै, घर लै आवत ताहि ॥

सो०—हरि माया को जानि, पीताम्बर ताको कियो ॥

जननि देखायो आनि, कहत लै आयो ताहिसों ॥

राधा गई सदन समुहाई ❀ हाथ दोहनी दूध भराई ॥
 परम प्रीति हरि वसन दुरायो ❀ जननी द्वारहिते गुहरायो ॥
 औरकी और कहत मुख बानी ❀ जननी दौरि देखि भय मानी ॥
 कहत दीठि लागी कहु बारी ❀ उर लगाय पछितात निहारी ॥
 बूझत नेह विकल महतारी ❀ कहा भयो राधा तोहिं प्यारी ॥
 अबहीं खरक गई तूनीके ❀ आवत कौन व्यथा भइ जीके ॥
 इक लरिकिनी संगही मेरे ❀ कोरेडसी आय तिहि नेरे ॥

मूर्च्छिछ परी वह धरणि मझारी * मैं डरपी अपने जिय भारी ॥
 श्याम बरन इक ढोटा आयो * कहत सुनो वह नंदको जायो ॥
 कछु पढिकै उन तुरतहि झारी * जानत नहीं कौनकी बारी ॥
 मेरे मन भरि त्रास गयोरी * अब कछु नीको नेक भयोरी ॥
 अति प्रवीण वृषभानु दुलारी * यह कहि समुझाई महतारी ॥

दोहा—सुनि जननी राधावचन, उरसों लीन्ही लाय ॥

कहत टरी करिवर बडी, बार बार पछिताय ॥

सो०—एक सुता द्वै तात, पायो देवन द्वारपारि ॥

भई आज कुशलात, बची सर्पते लाडिली ॥

खीझी कछुक कुँवरि पै जननी * घर नहि रहत फिरत भई हरनी ॥
 कितनो कहत ताहि मैं हारी * दूरकहूं बाहर जिनजारी ॥
 हैं लरिकिनी सबन धरमाहीं * तौसी निडर कहूं कोउ नाहीं ॥
 कबहुँ स्वरिक कबहुँ बन जाई * कबहुँ फिरत यमुनतट धाई ॥
 चितै अकाश धरत पग धरनी * बात कहत लागत तोहिं जरनी ॥
 सात वरषकी भई कुमारी * बहुत महर वृषभानु दुलारी ॥
 आज कुशल कुलदेवनकीन्ही * विधि बचाय विषधरते लीन्ही ॥
 शीतल जल लै तुरत न्हवाई * अङ्ग अङ्गोछ बसन पहिराई ॥
 बारहि बार कहत कछु खारी * अब कहूं खेलन दूरि न जारी ॥
 यह सुनि हँसी मनहि मन प्यारी * हृदय ध्यान हरि कुंजविहारी ॥
 कहत दूर अब कतहुँ न जैहौं * गाँम घरहि खेलत नित रहिहौं ॥
 जिनके गुणन विरंचि भुलाने * तिनके चरित कहा कोउ जाने ॥

दोहा—जनरञ्जन भञ्जन कलुष, राधा नन्दकुमार ॥

गुप्त प्रकट लीला करत, ब्रजमें युगुल विहार ॥

सो०—देखि अनूपम बाल, मात पिता गुरु जन हारेहि ॥

असुर लखत बिकराल, नव किशोर चित चोर तिय ॥

सर्व रूप सब घटके वासी * सब विधि करन सकल सुखरासी ॥

सर्व भाव सब फलके दायक * सर्वोपरि सब गुणके लायक ॥

सर्व आदि सब अन्तर्यामी * सबते परे सकलके स्वामी ॥

माया ब्रह्म कृष्ण अरु राधा * प्रेम प्रीति दोउ परम अगाधा ॥

छंवि शृंगार मनहुँ इक जोरी * करत विहार श्याम अरुगोरी ॥

वसे श्याम श्यामा उर माहीं * देखे विन भावत क्षण नाहीं ॥

खेलन मिसु वृषभानु किशोरी * आई नन्द महरिकी पौरी ॥

टेरत मधुर वचन सकुचाई * घर भीतर हैं कुँवर कन्हाई ॥

सुनत श्यामकोकिल समबानी * अति आतुर राधा पहिचानी ॥

मातासों कछु कलह करत घरि * तुरतहिसो बिसराय दियोहरि ॥

तू पहिंचानति इनको मैया * कहत बारही बार कन्हैया ॥

मैं यमुना तट कालिह भुलान्यों * बाँहपकरि मोको इन आन्यों ॥

दोहा—तू सकुचति आवति इहां, मैं दै सोंह बुलाय ॥

अति नागर जननी हृदय, दियो प्रेम उपजाय ॥

सो०—भीतर लेहु बुलाय, कहत मात हरिसों निरखि ॥

चले श्याम सुखदाय, लखि प्यारी आनंद भयो ॥

नैन सैन लखि दोउ सुखपायो * विरह ताप दुख द्वंद्व नशायो ॥

मनहीं मन आनंद अति भारी * भये मगन दोउ रूप निहारी ॥

कहत श्याम राधा किन आवै * तुमको यशुमति माय बुलावै ॥

बाँह पकरि लाये वनवारी * यशुमति बोलि निकट बैठारी ॥

देखि रूप मनमाँझ सिहानी * बृझत नन्द महरिकी रानी ॥

ब्रजमें तोहिं न कबहुँ निहारी * कौन गाँव है तेरो प्यारी ॥
 को तेरो तात कौन महतारी * कहा नाम तेरो है प्यारी ॥
 भूलि गयो है काल्हि कन्हाई * भली करी तू कर गहिल्याई ॥
 धन्यकोखि जिन तो कहँ धारी * धन्य घरी तू जिहि अवतारी ॥
 देखिरूप यशुदा अभिलाषी * सबितासों विनती करि भाषी ॥
 नयन विशाल वदन शुभ छोटी * भली बनी है सुन्दर जोटी ॥
 बार बार बूझत हरषाई * है तू कौन महरकी जाई ॥

दोहा—मैं बेटी वृषभानुकी, तुमको जानत माय ॥

बहुत बार मिलनो भयो, यमुनाके तट आय ॥

सो०—अब मैं लीन्ही जान, वेतो कुलटाँ हैं बडी ॥

हैं लाँगर वृषभान, गारि देत हँसि नँद घराणि ॥

राधा बोलि उठी इत आई * करी कछू बाबा लँगराई ॥
 ऐसो समरथ कबउ न पायो * हँसि यशुमति राधा उरलायो ॥
 कहति महरि कीरति हम जोटी * अब कीजत है तेरी चोटी ॥
 यशुमति राधा कुँवारि सँवारी * प्रेम सहित बारनि निरवारी ॥
 बडे बार कोमल अतिकारे * लै सुमनांसुत औँछ सँवारे ॥
 माँग पारि वेनी रचि गूथी * मानहुँ सुन्दर छबिकी यूथी ॥
 गोरे वदन बिन्दु करि वन्दन * मानों इन्दु मध्य भुवनन्दन ॥
 सारी नई सुरंग निकारी * यशुमति अपने हाथ सँवारी ॥
 वदन पोछि अञ्चर सो दीन्हो * उर आनन्द निरखि छबि कीन्हो ॥
 तिल चावरी बतासे मेवा * कुँवारि गोदभरि विनवति देवा ॥
 कट्यो काह्न सँग खेलहु जाई * यह सुनि कुँवारि मनहिं हरषाई ॥
 सुन्दर श्याम सुन्दरी राधा * खेलत दोउ छविसिन्धु अगाधा ॥

छं०—छवि सिंधु परम अगाध दोऊ नंद सदन बिराजहीं ॥

लखि रूपकोटिकामरति घनदामिनीद्युति लाजहीं ॥

यशुमति विलोकति चकित देखति रूप मन आनंदभरी ॥

सोइ भाव देख्यो दुहुनके उर जोइ अभिलाषा करी ॥

दोहा—खेलत दोउ झगरनलगे, भरे परम अहलाद ॥

मानो घन अरु दामिनी, करत परस्पर वाद ॥

सो०—अमिय वचन रसमूल, अकथनीयछवि अमितगुण ॥

रही यशोमति भूल, युगुलकिशोर विहार लखि ॥

चली महारि सों कहि सुकुमारी* सदन आपने जानि अवारी ॥

यशुमति निरखि कट्यो हरषाई* खेल्यो करि हरि सँग नित आई ॥

बोलि उठे मोहन सुनराधा * तूकत सकुच करै जियबाधा ॥

मैं बोलत तू आवत नहीं* जननी सों डरपाति मनमाहीं ॥

तोको लखि मैया सुख पावै* देखि कितौ करि छोह बुलावै ॥

सुनि मोहनके वचन सयानी * चितै रही मुखमन मुसकानी ॥

बिहँसि चली वृषभानु दुलारी * हरि मूरति उर टरत नटारी ॥

गई सदन बूझत महतारी * कहाहुती अबलौरी प्यारी ॥

बेनी गूँथि माँग किन कीन्ही * बेंदी भाल लाल किन दीन्ही ॥

खेलत रही नंदके द्वारी * यशुमति बोलि निकट बैठारी ॥

बूझन नाम लगीपुनि मेरो * बाबाको पूछेउ अरु तेरो ॥

मोहिं चितै पुनि सुतहि निहारी* कछु सबितासों गोदपसारी ॥

दोहा—मेरी शिर वेनी गुही, बेंदी लाल बनाय ॥

पहिराई निज हाथसों, सारी नई मँगाय ॥

सो०—तिल चावरि दै गोद, विधनासों विनती करी ॥

उर करिके अति मोद, तोहिं विहँसि गारी दई ॥
 बिहँसि कट्यो तोको नँदरानी * वह जैसी तैसी हमजानी ॥
 तोहि नाम धरि धर्यो बबाको * कट्यो धूत वृषभानु सदाको ॥
 तबमें कट्यो ठग्यो कब तुमहीं * हँसिलपटानि लगी तबहमहीं ॥
 सुनि कीरति राधाकी बातें * सरल स्वभाव भरी शिशुताते ॥
 कहत ज्वाब तैं नीको दीन्हो * बेटी दाँव आपनो लीन्हो ॥
 जो कछु मोहिं कट्यो नँद घरणी * सो सबहै उनही की करणी ॥
 हँसि हँसि कीरति कहत सुभाये * मनमें अति आनंद बढाये ॥
 फेरि फेरि यशुदाकी बातें * बूझत है जननी राधातैं ॥
 सुनि सुनि बरसाने की नारी * गावत यशुमति को हितगारी ॥
 सुनि बातें कीरति मुसकानी * नँदरानीके जियकी जानी ॥
 मेरी सुता विमल चपलांसी * वेहरि मेघ श्याम छबिरासी ॥
 बाढ्यो उर आनंद हुलासी * कीरति गई समुझि पति पासी ॥

छंद—समुझि पतिके पास कीरति गई अति आनंदभरी ॥

प्रीति रीति जनाय हित सों बात सब परघट करी ॥

भयो अति उत्साह दंपति हरषि मन आनंद भरे ॥

नित्य दूलह श्याम श्यामा वेद गुण गावत खरे ॥

दोहा—युगल किशोर स्वरूप वर, वृन्दावन रसखान ॥

नव दुलहिन दूलह सदा, राधाश्याम सुजान ॥

सो०—दूलह दुलहिन चार, मांडव वृन्दा विपिनके ॥

गावत नित्य विहार, शेष महेश गणेश विंधि ॥

कहत यशोमति सों हरि प्यारे * जहँतहँ रहत खिलौना डारे ॥

राधा जिन लै जाय चुराई * आवत सांझ सकार सदाई ॥

चितै रहत मुरलीकी घाहीं ❀ मेरो प्राण बसत इहि माहीं ॥
 तेरे भाये नेक न माता ❀ राखु उठाय मान माँ बाता ॥
 बलहूको पतियाय न राई ❀ राखु खिलौना सबहिं छिपाई ॥
 कहत जननि हँसि लालन मेरे ❀ कोले जाय खेलौना तेरे ॥
 नेक सुनत ताको जो पाऊं ❀ वाको बजते बास नशाऊं ॥
 बिन देखे तू काको कहिहै ❀ सो कहु कैसेकै प्रगटैहै ॥
 आवतही राधा लै जैहै ❀ फिरतू पाछेते पछितैहै ॥
 अजहूँ राखु उठाय सबारी ❀ माँगेते पुनि देहै गारी ॥
 जननी हरिकी बतियां भोरी ❀ श्रवण सुनत रुचि होत न थोरी ॥
 तेव आपने सुतकी जानैं ❀ बिरझाने क्योंहूँ नहिं मानै ॥

दोहा—सैंततिहै हरिके हरषि, महारि खिलौना जान ॥

भौरा चकई मुरलिका, गेंद बटा चौगान ॥

सो०—यशुमति सुखकी रास, नंद भवन भूषणपरम ॥

बजमें करत बिलास, बजबासी जन जाहिं बलि ॥

कहत श्यामसों यशुमति मैया ❀ पियहु दूध कल्लु लेहुं बलैया ॥
 आज सवार दुही मैं गैया ❀ सोई दूध प्याव मोहिं मैया ॥
 और दूध रुचि मोहिं न आवै ❀ जोतू कोटि यतन करि प्यावै ॥
 जननी तवहिं सौंह करि ल्याई ❀ यह धौरीको दूध कन्हाई ॥
 तुमते और कौन मोहिं प्यारो ❀ औट धन्यो तुम्हरे हित न्यारो ॥
 तातो जानि वदन नहिं ल्यावै ❀ फूँकि फूँकि जननी पयं प्यावै ॥
 पय पीवत मोहन अलसाये ❀ सुन्दरसैज जननि पौढाये ॥
 प्रात जगावत नन्दकिरानी ❀ उठहुलाडिले शारंगपानी ॥
 भोर भयो जागहु मेरे प्यारे ❀ ठाढे ग्वाल बाल सब द्वारे ॥

हरहुताप मुख कमल दिखाई * करौ कलेऊ मिलि दोउ भाई ॥
 सद्माखन दधि रैनजमायो * माँगिलेहु अरु जो मन भायो ॥
 सखा वृन्द सब लेहु बुलाई * उठहुलाल जननी बलिजाई ॥

दोहा—तब हँसि चितये सेजते, उठे श्याम सुखदान ॥

यशुमति जलझारी लिये, मुख धोयो निजपान ॥

सो०—बोलि उठे बलराम, उठे सबारे आज हरि ॥

हरषि मिले घनश्याम, दाऊजू कहि भ्रातसों ॥

द्वारे सों सब सखन बुलायो * देखि वदन सबहिन सुख पायो ॥
 सखन सहित सुन्दर सुखदाई * कियो कलेऊ कछु दोउ भाई ॥
 गैयन लै वन चले गुवाला * संग चले मोहन नंदलाला ॥
 टेर सुनत बालक सब धाये * घर घरके बछरनलै आये ॥
 सखा कहत सब सुनहु कन्हैया * चलहु आज वृन्दावन भैया ॥
 यमुना तट सब वच्छ चोरैहैं * वंशीवट खेलत सुख पैहैं ॥
 भली कही हँसि कट्यो गोपाला * चले सकल वृन्दावन ग्वाला ॥
 कोउटेरतकोउ घेरलै आवैं * कोउसुरभीगण जोर चलावैं ॥
 कोउ शृंगी कोउ वेणु बजावैं * कोउ परस्पर होरी गावैं ॥
 हेरीटेर सुनत मनमोहन * कहत मोहिंसिखवहुनिजगोहन ॥
 हरि ग्वालन सँग टेर उठाई * हँसे सकल पूरी नहिं आई ॥
 कहत श्याम अबकै फिरिलीजो * अबकै जाय तबै हँसि दीजो ॥

दोहा—गावत खेलत हँसत सब, सखा वृन्द गोसाथ ॥

पहुँचे वृन्दावन सघन, वृन्दावनके नाथ ॥

सो०—फिरत चरावत धेन, दीनबंधु दुष्टनदलन ॥

कृष्ण कमल दल नैन, सबै अंग सुन्दर सुखद ॥

॥ अथ अघासुरवधलीला ॥

तहां अघासुर वनमें आयो ❀ कंस राज करि कोप पठायो ॥
 ताके एक बहिन है भैया ❀ मारे प्रथमहिं कुँवर कन्हैया ॥
 एक पुतना जो ब्रज आई ❀ बत्सासुर अरु बक दोउ भाई ॥
 तिनको बैर असुर उर धारी ❀ कियो गर्व मनमें अति भारी ॥
 आज राजको कारज कीजै ❀ और बैर भाइनको लीजै ॥
 गिरि समान अजंगरतनु धारी ❀ पन्यो असुर मगं बदन पसारी ॥
 बन घन नदी रची मुख माहीं ❀ मायाकृत पहिचानत नाहीं ॥
 वाही मग निकसे नंदलाला ❀ गाय बच्छ लीन्हे सब ग्वाला ॥
 हरि अंतर्ध्यामी जिय जानी ❀ कपट रूप यह लखि अभिमानी ॥
 याको आज तुरत संहारों ❀ असुर मारि भूभार उतारों ॥
 ग्वालन अहि पर्वत करि जान्यो ❀ तासु बदन गिरि कंदर मान्यो ॥
 देखि सुहावन तृण हरियाई ❀ गाय बच्छ बैठे सब धाई ॥

दोहा—गाय बच्छ ग्वालन सहित, सब मुख गये समाय ॥

कहत परस्पर आज वन, सुरभी चरहिं अघाय ॥

सो०—सब मुख गये समाय, असुर सकोख्यो बदन तब ॥

अंधकार गयो छाय, मानों घन घेरो निशा ॥

अति अकुलाय उठे तहँ ग्वाला ❀ गाय बच्छ सब विकल विहाला
 कहत परे धों हम कहँ आई ❀ त्राहि त्राहि घनश्याम कन्हाई ॥
 सबके प्राण गये इहि बारा ❀ तुमबिन कौन उबारन हारा ॥
 श्रवण सुनत प्रभु आरत बानी ❀ भये दुखित चिन्ता उर आनी ॥
 दीनबंधु भक्तन सुखदाई ❀ पैठे आप अघा मुख आई ॥
 अघा असुर उर अति हरषाई ❀ लियो ओंठसों ओंठ लगाई ॥

विद्याधर मुनिवर गंधर्वा * अति भय विकल मगन सुर सर्वा ॥
 तबहिं कृष्ण मन बुद्धि उपाई * अविगत गति भक्तन सुखदाई ॥
 मुखते देह दुगुण विस्तारी * रुंधी श्वास भौत्रास देवारी ॥
 सकयो नहीं तब असुर संहारी * कियो शब्द आघात पुकारी ॥
 फूटि गये शिर दशन दुवारी * निकसी प्राण ज्योति उजियारी ॥
 सो वह ज्योति स्वर्गको धाई * बहुरि आय हरि मांझ समाई ॥
 दोहा—वाही मग अध वदनते, निकसे गोकुलराय ॥

कहत सखन आवहु निकसि, मैं करि लई सहाय ॥

सो०—अतिहिसकाने ग्वाल, गाय वच्छव्याकुल सकल ॥

मिट्यो तिमिर तिहि काल, जहँ तहँ हर्षे वचन सुनि ॥
 वच्छ सहित बाहर सब आये * हरिको देखि परम सुख पाये ॥
 हम अज्ञान वृथा भय भाई * श्याम हमारे साथ सहाई ॥
 धन्यकाह धनिधनिपितु माता * जिन जायो सुतको ब्रजत्राता ॥
 गिरिसम असुर सर्प तनुधारी * ताहि हन्यो तुमहौ असुरारी ॥
 कहत काह तुम करी सहाई * तब मान्यो मैं असुर अन्याई ॥
 जो तुम मेरे संग न होते * तौ यह मान्यो जात न मोते ॥
 देखि अवासुर वध सुरज्ञानी * वर्षि सुमन कहि जै जै बानी ॥
 विद्याधर किन्नर गन्धर्वा * अति आनंद गुण गावत सर्वा ॥
 अघा असुरकी करत बडाई * हरि मधि जाकी ज्योति समाई ॥
 करत अनेक यत्न मुनिग्रामा * अंतकाल दुर्लभ हरिनामा ॥
 सो हरि अंतकाल जगपावन * बसे आप अधमुख दुखदावन ॥
 इहि सम और कौनके भागा * कहत देव सब अति अनुरागा ॥
 दोहा—जै जै जै प्रभु जगत हित, जगत्राता जगदीश ॥

जाको मारन हूं प्रगट, तारन विश्वा बीश ॥

सो०—हरषि सुमन वरषाय, जय जय धुनि नभं करत सुरं ॥

गाय ग्वाल सुख पाय, अति आनंद निरखत हरिहि ॥

तबहिं सखन सों बिहसि कृपाला * बोले करुणासिंधु गोपाला ॥

चलहु सकल वंशीवट छाहीं * आई है है छाक तहांहीं ॥

भोजन करिये सब मिलिजाई * बछरा हांकि लेहु अगुवाई ॥

हरषि चले तहँते बलबीरा * आये सब वंशीवटतीरा ॥

वंशीवट अति सुभग सुहावन * और चहूं दिशि बहु द्रुम पावन ॥

चरत बच्छ सब वनके माहीं * बैठे आय श्याम वटछाहीं ॥

आस पास गोपनके बालक * मध्य श्याम सुंदर जगपालक ॥

मोर मुकुट कल कुण्डल कानन * कोटि कामछवि मोहन आनन ॥

गेरुकादि चित्रित तनु श्यामा * पीतवसन वन मालललामा ॥

बहुविशाल लकुटीकर लीन्हें * गुंजनके आभूषण कीन्हें ॥

सखा वृन्द सब सुन्दर सोहैं * निरखत रूप मदन मन मोहैं ॥

प्रेम मगन मन परमहुलासा * करत परस्पर हास विलासा ॥

दोहा—तहां छाक घर घरनते, आई भरि भरि भार ॥

यशुमति पठये कान्हको, व्यंजन बहुत प्रकार ॥

सो०—छाक पठाई मात, हरषि कहत हरि सखनसों ॥

दधिलवनी बहुभांत, सब मिलि भोजन कीजिये ॥

वन भोजन विधि करत कन्हवाई * छाक सबै इकठावँ रखाई ॥

जलते पुरइन पात मँगायो * दोना बहु पलाशके लायो ॥

कछु फल वृन्दावनके नीके * लिये मँगाय भावते जीके ॥

बैठे मंडल जोरि गोपाला * मध्य श्याम सुंदर नंदलाला ॥

भांति भांति व्यंजन रस पागे * परसि धरे सबहिनके आगे ॥
 कछुकहथेरिन पर धरि लीन्हो, शाकखोलि अँगुरिन बिच कीन्हो
 मुरली मुकुट कांख तर लीने * भोजन करन लगे रस भीने ॥
 मधु मंगल पर सैन्य सुदामा * सुबल सुखमना अरु श्रीदामा ॥
 अपर अनेक गोप सुत लीने * जैवत सब मिलि श्याम प्रबीने ॥
 लेत परस्पर कौर छुडाई * कबहुं कितनको देत कन्हाई ॥
 कबहुं काहू देन बुलावैं * डहँकि ताहि अपने मुखनावैं ॥
 मीठे खाटे स्वाद बखानैं * हास विलास करत सुखसानैं ॥

दोहा—देखत सुरगण सिद्ध मुनि, चढे विमान अकाश ॥

लखि कौतुक चकित सबै, गये कमलभवं पास ॥

सो०—कह्यो ब्रह्मसों जाय, कहत जाहि बर ब्रह्म तुम ॥

सो ग्वालन संग खाय, छोरि छोरि करते कवर ॥

॥ अथ ब्रह्माके मोहकी लीला ॥

हरि माया मोहे सब प्रानी * कह ब्रह्मा कह सुर मुनि ज्ञानी ॥
 सुनि विरंचि सुरगणकी बानी * भयो मोह उरमें यह आनी ॥
 गोकुल जन्म कौन यह आयो * मैं कछु वाको भेव न पायो ॥
 परचौलै देखौं प्रभुताई * बाल बच्छ हरि ल्यावों जाई ॥
 जो सर्वज्ञ ईश भगवाना * लेहैं तुरत मँगाय सुजाना ॥
 यह विचार विधि मन ठहरायो * चल्यो तुरत वृन्दावन आयो ॥
 देखि सरित वनमें अतिपावन * पुहुँपलता द्रुम परम सुहावन ॥
 अति रमणीक कदम चहुँपासा * वंशीबट मधि सुखद निवासा ॥
 गोप मण्डली मण्डन मोहन * भोजन करत सखन संग गोहन ॥
 देखि विरंचि चकित भ्रम भारी * बछरा हरि लीन्हे वनझारी ॥

हरि अन्तर्यामी सब जानी ❀ विधिके मनकी रुचि पहिचानी ॥
तब पठये द्वे ग्वाल कन्हारै ❀ लावहु वत्सं घेरि सब जाई ॥

दोहा—ग्वाल सकल वन ठुंढिकै, फिरि आये हरि पाहिं ॥

कहत बच्छगे दूरि कहूँ, खोज पाइयत नाहिं ॥

सो०—तब हँसि कट्यो कन्हाय, तुम सब यहँ बैठे रहौ ॥

मैं धौं देखौं जाय, चले आप बहराय तब ॥

जबगे दूर बनहीं जनत्राता ❀ तबहीं बालक हरे विधाता ॥

प्रभुलीलाकी गम कछु नाहीं ❀ गर्वित गयो लोक निजपाहीं ॥

निजमाया सों करि मति भोरी ❀ राखे बाल बच्छ इकठोरी ॥

गुणसागर नागर नंदनन्दन ❀ बंशीबट आये जगबन्दन ॥

दीनबन्धु भक्तन हितकारी ❀ यह अपने मन मांझ विचारी ॥

बाल बच्छ जो ब्रज नहिं जैहैं ❀ मात पिता इनके दुख पैहैं ॥

ताते रूप सबनको धारों ❀ या विधि तिनको दुःख निवारों ॥

बाल बच्छ विधि लै गये जेते ❀ भये श्याम तब आपुन तेते ॥

वैसोइ रूप वैसगुणशीला ❀ वैसिय बुद्धि पराक्रम लीला ॥

रङ्ग रेख जैसो जिहि माहीं ❀ अंग चिह्न अंतर कछु नाहीं ॥

बोलन हँसन चलन चतुराई ❀ हेरन टेहन फेरन राई ॥

भूषण बसन लकुटकर जैसै ❀ भये श्याम तब आपुन तैसे ॥

दोहा—मारन उद्धारन यदपि, हैं समर्थ भगवान ॥

तदपि जान निज दास विधि, करी तासुकी कान ॥

सो०—अपनो करि विधि जान, अनजानत ठीठो करी ॥

ताते कीन्हे आन, मन भायो विधिको कियो ॥

कट्यो श्याम सब सखन बुलाई ❀ लावहु घेरि वत्स सब जाई ॥

ब्रजको चलहु सांझ नियंरई * हर्षि चले बालक समुदाई ॥
 चहूँपास सब सखा सुहाये * मध्य श्याम बछुरन अगुवाये ॥
 वेणु विशाल रसाल बजावत * अपने अपने रंग सब गावत ॥
 राँभति गाय बच्छ हित लागीं * देखत ब्रज युवती अनुरागीं ॥
 मोर मुकुट कुंडल बनमाला * हँसन मनोहर नयन विशाला ॥
 गोपँदरज मुखपर छविछाई * मनहुँ चंदकन अमिय निकाई ॥
 ब्रज वनिता सब तन मन वारत * निरखि रूप भेंटत चित वारत ॥
 पहुंचे ब्रजहिं श्यामसुंदर वर * गये बच्छ बालक निज निज घर ॥
 गोसुत ग्वाल बाल हर्षाई * लीन्हे तात मात उरलाई ॥
 परम प्रीति करि भोजन दीन्हों * कृष्ण चरित काहू नहिं चीन्हों ॥
 यशुमति कहत सुतहि मिलि प्यारे * वनाहिरातकत करत ललारे ॥

दोहा—मैं सबेर घरको चल्या, सखा करत सब रात ॥

देखि अगम वनमें डर्यो, वे डरपावत जात ॥

सो०—बारबार पछिताय, लै बलाय यशुमति कहत ॥

ल्यावाहिं गाय चराय, काल्हि जायँ वेई सबै ॥

यह सुनिकै हँसि कहत कन्हई * काल्हि चरावन जात बलाई ॥
 लागी भूख बहुत मोहिं हैरी * भोजनको तुरतहिं कछु दैरी ॥
 सुनत तुरत माखन लै आई * तब लौं खाहु जननि बलि जाई ॥
 है जल तप्त घामको प्यारे * तेलपरस तन न्हाहु ललारे ॥
 जाते वनको श्रम मिटि जाई * भोजन करहु बहुरि दोउ भाई ॥
 तब जननी गहि बांह न्हावाये * जेवनको बलराम बुलाये ॥
 अति रुचिसों जेवत दोउ भाई * परम प्रीति परसतहैं माई ॥
 जेई उठे अचमन तब कीन्हों * बीरा दुहँन रोहिणी दीन्हों ॥

जानि उनींदे सेज बिछाई ❀ जननी पौढाये दोउ भाई ॥
श्याम राम सोवत दोउ भैया ❀ सुख पावत निरखत दोउ मैया ॥
अधम रत्नो विधि गर्व नवायो ❀ ब्रज बासिन कछु भेद न पायो ॥
बाल वत्स हरि नये उपाये ❀ सब जानत वेईहैं आये ॥

दोहा—बाल वत्स नव कृत तिन्हैं, ब्रज बनिता अरु धेन ॥

पूरब प्रीति हुते अधिक, करत रहत उर चैन ॥

सो०—ब्रज मंगल भगवान, ब्रह्म सच्चिदानंद प्रभु ॥

भक्तनके सुखदान, लगे देन सुख घरन घर ॥

तब विरंचिके मन यह आई ❀ ब्रजके लोगन देखौं जाई ॥
हैंहैं करत विलाप कलापा ❀ बिन बच्छन गैयन सन्तापा ॥
आय विरंचि तुरत तहँ देख्यो ❀ घरही घर सब कौतुक पेर्यो ॥
जहँ तहँ दुहत गाय पशुपालक ❀ खेलत निज निज घर सब बालक ॥
देखि विरंचि चकित मनमाहीं ❀ हैं यह ब्रज कै धौं वहनाहीं ॥
मैं बिधना सब सृष्टि उपाई ❀ यह रचना धौं किनहिं बनाई ॥
कैधौंहौं यहि भ्रमहि भुलाना ❀ हैं हरि अबिनाशी नहिं जाना ॥
अन्तर्यामी जानत सबहीं ❀ बालबच्छ धौं ल्याये तबहीं ॥
अति संभ्रम विधिज्ञान भुलायो ❀ गयो फेरि निज लोकहि धायो ॥
देखे वत्स बाल जहँ राखे ❀ चकित बहुरि ब्रजको अभिलाखे ॥
क्षण भूतल क्षण लोक सिधारो ❀ बालवत्स दुहुँ ठौर निहारो ॥
वर्ष दिवस इहि भांति बिताई ❀ भयो थकित अति उर भ्रम छाई ॥

दोहा—मोहविकल अति देखिकै, सुंदर श्याम सुजान ॥

प्रकट कियो जन जानि निज, विधिके उरमें ज्ञान ॥

सो०—हृदय भयो तब शुद्धि, ये पूरण अवतार प्रभु ॥

धिक धिक मेरी बुद्धि, बैर बढ़ायो कृष्णसों ॥
 मैं मतिहीन भेवं नहिं जान्यो * मोह विवश प्रभुसों छल ठान्यो ॥
 यह अपराध बहुत मैं कीन्द्यो * निज अज्ञान न प्रभुको चीन्द्यो ॥
 भई गिलानि बहुत मनमाहीं * सन्मुख होय सकत विधि नाहीं ॥
 भयो शोच उरमाँझ विशेषा * प्रभु प्रभाव तब परघट देशा ॥
 बालक वत्स सहित सब साजू * कृष्णरूप सब लख्यो समाजू ॥
 शिव ब्रह्मादिक देव अनेका * देखे अधिक एकते एका ॥
 चरण कमल वन्दन प्रभु केरे * गावत गुण गन्धर्व घनेरे ॥
 देखि चकित चित भर्म नशान्यो * पूरण ब्रह्म कृष्ण पहिंचान्यो ॥
 शरण शरण कहि अति अतुराई * परयो चरण कमलन परजाई ॥
 अनजानत मैं करी छिटाई * क्षमा करहु त्रिभुवनके राई ॥
 मैं प्रभु तुम प्रताप नहिं जान्यो * तुम्हरी माया माँझ भुलान्यो ॥
 चूक परी मोते निज भोरे * नाथ न बनै तुम्हें मुख मोरे ॥

दोहा—मैं अपराधी हीनमति, परयो मोहके जाल ॥

ममकृत दोष न मानिये, तुम प्रभु दीनदयाल ॥

सो०—कह जानो तुव भेव, मैं ब्रह्मा तुम्हरो कियो ॥

तुम देवनके देव, आदि सनातन अजित अज ॥

जो जनते बिगैरे बिनजाने * सो अपराध न प्रभु कछु माने ॥
 जो शिंशु अज्ञ दोष उरमाहीं * माता कबहूँ मानत नाहीं ॥
 तोष पोष ताको वह करई * बिकसत चित्त अंकलै भरई ॥
 रदरसनादल जौरिस होई * कहौ कौन परकीजै सोई ॥
 निज तनु व्याधि पीर जन पावै * यदपि यत्न करि नहीं बचावै ॥
 तैसेही प्रभु मोको कीजै * क्षमि मम दोष शरण गहि लीजै ॥

तुम जाने बिन जीव सदाहीं ❀ उत्पति परलय मांझ समाहीं ॥
 तुम करि कृपा जनावहुजाको ❀ सो जानै तुम्हरी प्रभुताको ॥
 मैं विधि एक लोकको साईं ❀ जिमि कृमि गूलर मांझ गोसाईं ॥
 तुम्हरे रोम रोम प्रति गाता ❀ कोटि कोटि ब्रह्माण्ड विधाता ॥
 कोटि खद्योत प्रकाश कराहीं ❀ रवि सम क्योंहूं होहिं सुनाहीं ॥
 अब प्रभु बनै सँभारे तोहीं ❀ राखिय चरण शरण निज मोहीं ॥
 दोहा—अतिही अगम अगाध हरि, अविगति गतिको जान ॥

तासु पार चाहौं लख्यो, मैं विधि अति अज्ञान ॥
 सो०—करिय विरदकी लाज, मम कृत दोष न मानिये ॥

दीनबन्धु बजराज, शरणागत पालन हरे ॥
 जब विधि कही दीन बहु बानी ❀ शरण शरण कहि अति भयमानी
 तब नहिं बाल बच्छ कछु देखे ❀ एकै रूप कृष्ण विधि पेखे ॥
 कृपा करी तब श्रीब्रजनाथा ❀ हस्त कमलपरस्यो विधिमाथा ॥
 अभय कियो विधि शोच मिटायो ❀ चरण कमलते शीश उठायो
 बार बार पद कमल निहोरी ❀ अस्तुति करत दुहं कर जोरी ॥
 जो जग धाम श्याम सुखराशी ❀ ज्योति स्वरूप सबै उरबासी ॥
 गुणगण अगम निगम नहिं पावैं ❀ ताहि यशोदा गोद खिलावैं ॥
 धरंजल अनल अनिल न भँछाया ❀ पाँचतत्त्व मिलि जगत उपाया
 काल डैर जाके भय भारी ❀ सो ऊखल बांधे महतारी ॥
 जग करता पालन संहरता ❀ विश्वम्भर सब जगके भरता ॥
 ते गैयन सँग ग्वालन माहीं ❀ ब्रजमें हँसि हँसि जूठनिखाहीं ॥
 बड़े भाग्य ब्रजवासिन केरे ❀ तिनके प्रेम रहत तुम घेरे ॥
 छंद०—रहत जिनके प्रेम घेरे, धन्य ब्रज वासी सबै ॥

ब्रह्म एक अनीह अविगति, घरन घर जिनके फबै ॥
 धन्य श्रीवसुदेव देवकि, पुत्र करि जिन पाइयो ॥
 धन्य यशुमति नन्दजिन, पय प्याय गोद खिलाइयो ॥
 धन्य ब्रजके गोप जिन सँग, धन्य गाय चरावहीं ॥
 चार मुख मैं कहा वरणों, सहस्र मुख नित गावहीं ॥
 धन्य बालक वच्छ तिनते, नाथ यह दर्शन लियो ॥
 परसि चरण सरोज मस्तक, पाप तजि पावन भयो ॥
 अब देहु ब्रजको बास मुहिं, प्रभु आश यह मेरे हिये ॥
 रेणु तृण द्रुम लता खंग मृग, होहिं जो तुम्हरे किये ॥
 यह नित्य ब्रज लीला तुम्हारी, तुम अनुग्रह ते लही ॥
 महत श्रीवृन्दाविपिनको, अमित मित सकको कही ॥
 लोक मोहिं न सुहात अब प्रभु, आन विधि कोउ कीजिये ॥
 मोहिं ग्वालनको करौ भ्रत, खाय जूठनि दीजिये ॥
 बार बार मनाय युग पद, नाथ पद बर मांगहूं ॥
 हैरहौ वृन्दा विपिन रज, चरण पंकज लागहूं ॥
 दोहा—करि अस्तुति गद्गद वचन, दृगजल पुलक शरीर ॥
 परयो चरण पंकज बहुरि, विधि अति प्रेम अधीर ॥
 सो०—तव हँसि बोले श्याम, गर्व प्रहारी भक्त हित ॥
 जाहु आपने धाम, वचन हमारे मानि अब ॥
 और काहि अब करौं विधाता ❀ तुमहौ कर्म धर्मके दाता ॥
 तुमते है यह सब संसारा ❀ मम मायाको नाहिंन पारा ॥
 ताते अब मम आयसु कीजै ❀ ब्रजकी जाय प्रदक्षिण दीजै ॥
 जाते तनुके पाप नशाहीं ❀ बहुरि जाहु लोकहि सुख माहीं ॥

हरि उरहार विविध पहिरायो ❀ बिदाकियो सब शोच नशायो॥
 प्रभु आयसु माथेपर धारी ❀ पाय प्रसाद हरषि मुखचारी ॥
 ब्रज दाहिन फिर पाप नशाये ❀ बाल बत्स प्रभु पहुँ पहुँचाये ॥
 बार बार चरणन शिर नाई ❀ विधि निज लोक गये सुखपाई॥
 ग्वालन यह कछु मर्म न जान्यो ❀ वाहि समय सबहिन मनमान्यो
 हरिसों कहत विलंब कहलाई ❀ हम तुम विना छाकनहिं खाई ॥
 तुम सब भोजन माँझ भुलाने ❀ बच्छ जाय बन दूर हिराने ॥
 खोजत खोजत क्योंहू पाये ❀ सो मैं लै तुम पहुँ पहुँचाये ॥

दोहा—अब राखौ सब घेरिकै, दूर निकसि नहिं जाहिं ॥

तब सुचिते हैके सबै, रुचि सों भोजन खाहिं ॥

सो०—ऐसे कहि ब्रजराय, सखन सहित भोजन कियो ॥

बहुरि यमुन तट जाय, जल अँचंयो धोयो बदन ॥

सन्ध्या समय चले घर ग्वाला ❀ मध्यश्याम सुन्दर नँदलाला ॥

बच्छ घेरि आगे करिनीके ❀ काँधनपर धर लीन्हे छीके ॥

जन जन शृङ्ग बजावत गावत ❀ बनते बने ब्रजहि हरि आवत ॥

घर आये ब्रज मोहन लाला ❀ कहत यशोमति सों सब ग्वाला

अहो महरि बन आज कन्हआई ❀ महा दुष्ट इक मान्यो जाई ॥

उरग रूप निगले शिशु बच्छा ❀ करी आज सबकी हरिरच्छा॥

गिरि कन्दर समतिन मुखवायो ❀ पै ठिथ्याम तिहि तुरत नशाँयो

याके बल हम बहत नकाहू ❀ फिरत सकल बन सहित उछाहू

जीते सबै असुर बन माहीं ❀ यह काहू ते हान्यो नाहीं ॥

बीते वर्ष कहत सब ग्वाला ❀ आज अघा मान्यो नँदलाला ॥

यह प्रभु लीला अपरम्पारा ❀ कौन कौन को भुरै न पारा ॥

यशुमतिसुनिचक्रितपछिताई❀ मैं बरजत वन जात कन्हआई॥

दोहा—केती करवरते बच्यो, तऊ न नेकडरात ॥

अति विचित्र गति ईशकी, जानी जात न बात ॥

सो०—खीझति यशुमति मात, मानत नहिं मेरो कट्यो ॥

श्याम मनहिं मुसकात, अब वनमें नहिं जाइहौं ॥

हरिकी लीला कहत न आवै❀ सुरनर असुर सबहिं भरमावै॥

पय पीवत पूतना नशाई❀ पटक्यो तृणा शिलापर जाई ॥

तीन लोक मुखमें दिखराये❀ यमला अर्जुन वृक्ष ढहाये ॥

वत्सासुर बक बहुरि नशायो❀ अघा मारि विधि गर्वनवायो॥

यशुमति यह पुरुषारथ देखी❀ तापरखिझपछितात विशेषी॥

अघा मारि आये नँदलाला❀ घरघर कहत फिरत सब ग्वाला॥

सुनिसुनिब्रज युवती उठि धाई❀ चक्रित बिलोकत हरि मुख आई

मन मन करत यहै अनुमाना❀ इनकी सर कोऊ नहिं आना ॥

येई हैं ब्रजके रखवारे❀ येई हैं पति प्राण हमारे ॥

कहत परस्पर सुनहुं सयानी❀ हैं ये जगपति हम यह जानी॥

प्रेम मगन ब्रजके नरनारी❀ लहत परम सुख हरिहि निहारी॥

ब्रज मोहन सुन्दर सुखरासा❀ भोजन मांगत यशुमति पासा ॥

दोहा—खाहु लाल जो भावई, रुचि सों सखन समेत ॥

सद माखन व्यंजन सरस, करि राखे तुम हेत ॥

सो०—दे रोटी नवनीत, और मोहिं भावै नहीं ॥

दियो मात अति प्रीत, खात हँसत मिलि सखनसँग ॥

॥ गोदोहनलीला ॥

हँसि जननी सों कहत कन्हैया❀ दोहनि दे दुहिहौं मैं गैया ॥

नंद बवा मोहिं दुहन सिखायो ❀ ग्वालन की सर दुहन चढायो ॥
 धौरी धूमरि काजरि गैया ❀ तुरताहि दुहिल्यावों दे मैया ॥
 भयो मोहिं बल माखन खाई ❀ अब न डरात बूझ बल भाई ॥
 तोहिं नहीं पतियारो आवै ❀ बैठि ऊठकर भाव बतावै ॥
 अँगुरी भाव देखि हँसि माता ❀ उर लगायलिये सांवलगाता ॥
 कहत कहाँ इतनी बुधि पाई ❀ हर्षिनिरखि मुख बलि बलि जाई ॥
 लै दोहनी दई करमाता ❀ हर्षित चले दुहन सुखदाता ॥
 बछरा छोरि तुरत थन लायो ❀ मात दुहत लखि हर्ष बढायो ॥
 सखा परस्पर कहत कन्हाई ❀ हमहूँ ते तुम करत बढाई ॥
 दुहन देहु कछु दिन मोहिं गैया ❀ तब करियो मेरी सर मैया ॥
 जबलगि एक दुहौ तबताई ❀ दश न दुहौं तौ नन्द दुहाई ॥

दोहा—सखा कहत सब झूठही, नंद दुहाई खात ॥

प्रात साथ हम दुहहिंगे, देखहिंको अधिकात ॥

सो०—कद्यो काह हर्षाय, भली कही तुम बात यह ॥

प्रात दुहहिंगे गाय, हम तुम होड लगायके ॥

श्रीवृषभानु कुँवरि मनमाहीं ❀ श्याम सुरतक्षण विसरत नाहीं ॥
 दरश लालसा दृगन न थोरी ❀ देखोइ चहत बहोरि बहोरी ॥
 उठे प्रभात दोहनी लीन्ही ❀ सुरत श्याम दर्शनकी कीन्ही ॥
 जननी देखि कद्यो दुलराई ❀ जातिकितै राधा अतुराई ॥
 खरकहिं जात दुहावन मैया ❀ दुहत सबेर ग्वाल सब गैया ॥
 कालिह तनक मै बिलंब लगाई ❀ उठे अहिर सब मोहिं रिसाई ॥
 गई गाय सब बच्छ पिपाई ❀ रीती दोहनि लै फिरि आई ॥
 तुमहूँ खीझन लगितब मोहीं ❀ जातसवार आज कहि तोहीं ॥

ऐसे कहि जननी समुझाई * घरते चलि ब्रजहि समुहाई ॥
 नंद सदन आई हरिप्यारी * दुहत गाय गृह द्वार विहारी ॥
 दुहत परस्पर अति सुख पायो * निरखि बदन छवि हर्ष बढ़ायो ॥
 राधहि देखि महारि नंदरानी * लई बुलाय निकट हर्षानी ॥

दोहा—दंपतिको मुख देखिकै, मुदित यशोमति माय ॥

वार वार लखि युगल छवि, मनहीं मन बलिजाय ॥

सो०—महारिमुदित मुसकाय, मथन कद्यो दधिकुँवरिसों ॥

भान दुहाइ दिवाय, आयसुते ठाढी भई ॥

नेतिपाणि मन अति अनुरागी * रीतोइमाट बिलोवनलागी ॥
 तैसइ भई श्याम गति भोरी * मनलाग्यो जहँ कुँवरि किशोरी
 वृषभहिंसों लोई लै लैया * बिसरि गई ठाढी कित गैया ॥
 दम्पति दशा देखि नंदरानी * रही चकित नहिं जात बखानी ॥
 राधा सों कहिं प्रगट जनायो * किन यह तोको मथन सिखायो
 निज घर मथति ऐसही जानी * कै मेरे घर आय भुलानी ॥
 मैं नहिं मथन कबहुँ दधि कीनी * तुम मोहिं सोंह बबाकी दीनी ॥
 ताते मथन करन मैं लागी * तुम्हरो वचन सकी नहिं त्यागी ॥
 तब नंद घरनी मथन बतायो * राधे हरि तन ध्यान लगायो ॥
 दुहन श्याम गैया बिसराई * लैया वृषभ पाव अटकाई ॥
 दोहनी श्याम माँग तब लीन्ही * तुरत सखा इक लै कर दीन्ही ॥
 कहत दुहौ हरि करो चडाई * हँसत गोप बालक समुदाई ॥

दोहा—हँसत कहत हरि सों सबै, कह तुमरहे लुभाय ॥

सुनत सखनकी बात नहिं, प्यारी सों चितलाय ॥

सो०—प्रिया बदन दृग लाय, रहे श्याम इकटक निरखि ॥

देह दशा बिसराय, भूलि गये सब चतुरता ॥
 यशुमति कहत राधिकहिटेरे ❀ ये ढँग हैंरी प्यारी तेरे ॥
 ऐसो हाल मथत दधि तेरो ❀ हरि भयो मानहुं चित्र चितेरो ॥
 तेरो मुख सम शंशिनहिं भ्राजै ❀ नयन नलखिखंजन गतिलाजै ॥
 चपलाहूँते चमकत हैरी ❀ करिहै कहा श्यामको तैरी ॥
 मेरो कट्यो सुनत कछु नाहीं ❀ है धौं कहा गुणत मनमाहीं ॥
 इकटक दीठि तबहिं ते ल्याई ❀ तनकी सुरति सबै बिसराई ॥
 अबहीं ते ऐसे ढँग योहीं ❀ अबहीं बहुत होनहै तोहीं ॥
 ऐसे ढँगहि लगायो श्यामहिं ❀ काज नहीं कछु तेरे धामहिं ॥
 चितयो मतिहि करै टकलाई ❀ हिलिमिलि खेल श्याम संग आई
 कैरहो बैठि आपने धामहिं ❀ धेनु दुहनदे मेरे श्यामहिं ॥
 देखत तोहिं श्याम सुधि जाई ❀ तू चितवति तनु सुधि बिसराई
 सूधेरहि जो इहां तु आवै ❀ ऐसो ढँग मोको नहिं भावै ॥

दोहा—करत अंचकरी आयतू, यह नहिं मोहिं सुहाय ॥

सूधे खेलहि श्याम संग, कैतू इत मति आय ॥

सो०—ऐसे महरि रिसाय, सीख दई हरि भाव तेहिं ॥

तब कछु मन सुधि पाय, बोली अति भोरे वचन ॥

मोहिं खीझति बरजत सुत नाहीं ❀ नित उठि मोहिं बुलावन जाहीं
 मोहिं कहत बिन तोहिं निहारे ❀ रहत न मेरे प्राण सुखारे ॥
 छोह लगत मोको सुनि बानी ❀ तब आवत मैं त्यां घरजानी ॥
 मुख पावति आवति मैं तारें ❀ तुम कछु लावत औरहिं बाते ॥
 यशुमति सुनि प्यारीकी बानी ❀ भोरे भाय समुझि सकुचानी ॥
 बांह पकरि उरसों लै लावति ❀ प्यारी मनसों रोष मिटावति ॥

हँसत कहत मैं तोसों प्यारी * मनमें कछू बिलगजनिलारी ॥
 सिखवत तोहिं सीख गुणकारी * मैं तेरी जैसे महतारी ॥
 सुनियत महारि सुघर अधिकारि * गृह कारज कछु तोहिं सिखाई ॥
 सुनि यशुमतिके वचन सप्रीती * बोली अति नागरि शिशुरीती ॥
 मैया मोसों टहल करावै * खीझत जात देखि जो पावै ॥
 सुनि यशुमति राधाकी बानी * श्री वृषभानु लाडिली जानी ॥

दोहा—अति सप्रेम दुलरायकै, लई बहुरि उर लाय ॥

श्रीराधाके चित्तते, दीनो क्षोभ मिटाय ॥

सो०—कापै बरणी जाय, हरि प्यारीकी चतुरता ॥

लीनी सहज सुभाय, बातनहीं यशुमति भुरै ॥

कहत सखा हरिसों मुसकाई * दुहत कहा तुम आज कन्हाई ॥
 कालिह दुहत रहे होडलगाई * विसर गई सब आज बडाई ॥
 गिरति दोहनी कम्पित हाथा * नोवत वृषभ वत्सलै साथी ॥
 सुनि ग्वालनके वचन गोपाला * कछुक सकुचि बिहँसे नँदलाला
 बच्छ छोरदियो खरिक चलाई * आप जननिसों कहत कन्हाई ॥
 मुरली मुकुट देहि पट मेरो * सुनि आऊं दाऊ मोंहिं टेरो ॥
 जननी हरषि तुरत सब दीनो * लै हरि मुकुट शीश धरिलीनो ॥
 चारु पीत पट कटि लपटाई * कर मुरली लै मधुर बजाई ॥
 मुरलीमें कहि प्यारी प्यारी * गये बुलाय खरिक सुखकारी ॥
 लखि प्यारी हरिकी चतुराई * कहति यशोमति सों अतुराई ॥
 जाति घरहि प्रातहि मैं आई * खरिक दुहावनको निजगाई ॥
 पायो ग्वाल खरिक कोउ नाहीं * खोजत मैं आई इत माहीं ॥

दोहा—इहां अजिर गैया दुहत, देखे आय कन्हाय ॥

तेनेंके दोहनि तनक कर, देख रही चित लाय ॥

सो०—सुनि अति सरस सुभाय, सने प्रेम प्यारी वचन ॥

यशुमति मन सुखपाय, कहत कुँवरि सों जान घर ॥

जा प्यारी घर आवत रहियो ✽ हमरो मिलन महारिसों कहियो ॥

यह सुनि कुँवरि चली हर्षाई ✽ मन हरि लीन्हो कुँवर कन्हाई ॥

गई खरिक कंर दोहनि लीने ✽ चितवत मग जहँ श्याम प्रवीने ॥

तहां मिलीं बहु सखी सहेली ✽ बूझति राधहि कहा अकेली ॥

प्रात दुहावन मात पठायो ✽ तहां खरिक कोउ अहिर न पायो ॥

इत आई मैं ग्वाल बुलावन ✽ जात खरिक अब गाय दुहावन ॥

बोलि उठे हरि तब इत आवो ✽ हम दुहि देई दोहनी लावो ॥

दुहन देन कहि श्याम बुलाई ✽ सुनत गई प्यारी सुखपाई ॥

कहति सखी सब मन मुसुकाई ✽ कहां प्रीति इन आय लगाई ॥

बरसाने यह बजहि कन्हैया ✽ आई कहां दुहावन गैया ॥

हरि मुख लखि वृषभानुकिशोरी प्रेम विवश भइ तन सुधि भोरी ॥

मोहन लई दोहनी करते ✽ प्रिया प्रीति रस वश भइ वरते ॥

दोहा—धेनु दुहावत लाडिली, दुहत नन्दको लाल ॥

सो सुख कापै जाय कहि, देखत ब्रजकी बाल ॥

सो०—बछरा पद अटकाय, गोथन लीन्हों हाथ हरि ॥

प्रिया बदन दृग लाय, दूध धार छांडत छलन ॥

दुहत धेनु अतिही छवि बाढी ✽ प्यारी पास दुहावन ठाढी ॥

एक धार दुहनीमें डारे ✽ प्यारी तन इक धार पखारे ॥

हरि करते पय धार छुटाहीं ✽ लसत छोट प्यारी मुख माहीं ॥

मनहुं मयङ्क कलङ्क पखारी ✽ शोभित जहँ तहँ चन्द्र सुधारी ॥

कै धौं पै निधि खोरि मयङ्का * लसत सुंधासह खोय कलङ्का ॥
 लसत नीलपट कनक किनारी * मोरत मुखहिं मुदित मनप्यारी ॥
 मनहुं शरद शशि सुधा उदारा * घनदामिनि घेन्यो इक बारा ॥
 इहि विधि रहसत बिलसत दोऊ * हेत हिये थोरै नहिं कोऊ ॥
 मनहुं उभय आनंद सरं भारी * मिलत चहत मर्याद बिसारी ॥
 हाव भाव रस दम्पति पूरे * निरखत ललितादिक दूर दूरे ॥
 इहि विधि श्रीरूपभानु दुलारी * हरिपै धेनु दुहावत प्यारी ॥
 बिलसत ब्रजविलास ब्रजप्यारे * ये सुख तीन भुवनते न्यारे ॥

दोहा—दुही कुवँर नंद लाडिले, श्रीराधाकी गाय ॥

दोहनि देत न हँसि प्रिया, माँगत हाहाखाय ॥

सो ०—त्योँ त्योँ हँसत कन्हाय, ज्योँ ज्योँ प्रिय हाहाकरत ॥

सो सुख वरणि न जाय, अरझे दोऊ प्रेम रस ॥

फिर हाहाकर कहत कन्हाई * अकबैदेहों नन्द दुहाई ॥
 फेरि करी हाहा हँसि प्यारी * दई दोहनी बिहँसि बिहारी ॥
 हाव भाव करि मन हरि लीन्हों * कुवँरिहि कान्ह बिदा तब कीन्हों ॥
 यह छवि निरखि सखी हर्षानी * चली अग्रद्वै कछुक सयानी ॥
 प्यारी निरखि श्याम सुन्दरको * चलन चहत पग चलत न घरको ॥
 अंतरनेक न हरिसों भावै * पुरजन सकुच बहुरि सकुचावै ॥
 धिक यह लाज कहत मन माहीं * निरखन देत श्याम जो नाहीं ॥
 कछु दिन ज्योँ त्योँ और बिताई * दूर करौं पुनि इहि दुखदाई ॥
 यह विचार मनमें ठहराई * चली सदन उर राखि कन्हाई ॥
 मुरि मुरि नंदनंदन तन हेरे * आवति विरह बिथा तन घेरे ॥
 आगे धरत परत पग नाहीं * मन फेरत मन मोहन पाहीं ॥

चितवत श्याम खरिकमहँठाढे ✽ प्यारी तन मन आनंद वाढे ॥

दोहा—भये दृगनते ओट दोउ, गये सदन सुखरास ॥

विरह विकल प्यारी गई, ज्यों त्यों सखियन पास ॥

सो०—सखियन आवत देषि, श्रीचषभानु कुमारिको ॥

उर आनंद विशेषि, हर्षि सबै ठाढी भई ॥

बझति सबै सखी मुसकानी ✽ कहहु राधिका कुँवरि सयानी ॥

और अहिर तुम्हरे कित प्यारी ✽ हरि दुहि दीन्ही गाय तुम्हारी ॥

यह सुनि चकित भई मति भोरी ✽ गिरी धरणि मुरझाय किशोरी ॥

देखि सखी सब आतुर धाई ✽ लई उठाय कुँवरि उरलाई ॥

क्यों नागरी गिरी मुरझाई ✽ दूध दोहनी दई गिराई ॥

यह वाणी कहि सखिन सुनाई ✽ कारे मोहिं डसीरी माई ॥

भई विकल कछु तनु सुधि नाही ✽ कहत सखी सब आपसमाहीं ॥

अबहीं देखत नीके आई ✽ कहा भयो कारे कित खाई ॥

यहतो कारो कुँवर कन्हाई ✽ हमहूँ को जिन फूंक लगाई ॥

जाकी मुर मुसकन विष बांको ✽ याके रोम रोम विष ताको ॥

तन मन दृगन सांवरोँ छायो ✽ देह गेह सब नेह भुलायो ॥

सब सखियन मन यह ठहराई ✽ लैराधिकहिं सदन पहुँचाई ॥

दोहा—लेहु महरि कीरति सुता, अपनी देखहु आय ॥

कहुंकारे याको डसी, गिरी धरणि मुरझाय ॥

सो०—ल्यावहु गुणी बुलाय, वेग यत्न याको करहु ॥

गयो बदन कुम्हिलाय, ज्यों त्यों हमलाई इहां ॥

जनैनी सुनत उठी अकुलाई ✽ रोवति धाय कंठ लपटाई ॥

प्रात गई नीके उठि घरते ✽ मैबरजीमान्यो नहिं अरते ॥

अतिहि हठीली कद्यो न मानै * सोई करतिजु मनमें आनै ॥
 डरी मात लखि अँग सब जूडे * अतिही शिथिल स्वेदंजल बूडे ॥
 महारि नगर ते गुनी बुलाये * सुनत सकल आतुर उठि धाये ॥
 मंत्र यंत्र बहु भांति जगावैं * थके सकल कछु भेद न पावैं ॥
 गारुड हरिजो रहे मन माहीं * महारि विकल अति मन पछिताहीं ॥
 फिर फिर बूझत सखिन बुलाई * कह प्यारी कहि तुमहिं सुनाई ॥
 कहत सखी सब परम सयानी * सुनहु महारि इतनी हम जानी ॥
 हम आगे यह पाछे आई * गिरी धरणि दुहनी ढरकाई ॥
 यही कद्यो कोरे मोहिं खाई * तब हम आतुर लई उठाई ॥
 सो कारो हमहूँ पुनि देख्यो * लग्यो सबन विषयाहि विशेष्यो
 दोहा—सो अब हम तुम सों कहैं, मानिलेहु यह बात ॥

बडो गारुडू रायहै, नंदमहरको तात ॥

सौ०—ल्यावहु ताहि बुलाय, देखतही विष जायगो ॥

तुरतहि लेहिं जिवाय, हमनीके यह जानहीं ॥

देखहु धौं यह बात हमारी * एकहि मंत्र जियावहिं झारी ॥
 त्रिभुवन गुनी और नहिं ऐसो * है वह नंद महारिको जैसो ॥
 कीरति महारि सुनी यह बानी * अपने मनहिं सांचकर मानी ॥
 इकदिन राधा हू यहवानी * मोंसों कही हती यह जानी ॥
 कीरति चली नंदके धामहिं * बोलन आतुर गारुड श्यामहिं ॥
 महारि यशोदहि जाय पुकारो * अहो गारुडू सुवन तुम्हारो ॥
 मेरी सुता लाडिली गोरी * बिहल विकल परीमति भोरी ॥
 प्रातहि खरिक दुहावन आई * तहां कहुं कोरे डसिखाई ॥
 नेक पठै सुत काज विचारै * यह यश हैहै बडो तुम्हारो ॥

सुनियशुमतिकीरतिकी बानी * कहत महारि तुम भई अयांनी ॥
मंत्र यंत्र कह जानै मेरो * अतिही बाल वर्ष पट केरो ॥
किन तुमको दीनो बहँकाई * यह तुम बूझो गुणिन बुलाई ॥
दोहा—मैं चक्रित तुम वचन सुनि, यह अचरजकी बात ॥

श्याम भयो कब गारुडू, तुम आई अतुरात ॥

सो०—अबलों सुनी न कान, भयो श्याम कब गारुडू ॥

बालक अति अज्ञान, यंत्र मंत्र जानै कहा ॥

महारि गारुडू कुँवर कन्हाई * इक दिन राधा मोहिं सुनाई ॥
एक लरकिनी कोरे खाई * जाको तुरतहि श्याम जियाई ॥
ताते मैं आई अतुरानी * पठवहु सुतहि नेक नँदरानी ॥
है मम कुँवरि बिकल अधिकारि * प्रातःखरिक कोरे कहं खाई ॥
बडो धर्म यशुमति यह लीजै * बेगि बुलाय कान्हको दीजै ॥
यह सुनिकै यशुमति मुसकाई * अबहिं हती मेरे घर आई ॥
है राधा मोहन कछु कारन * चुप है मनमें लगी विचारन ॥
वहां सखी ललतादि सयानी * प्यारिहि देखि हृदय अनुमानी ॥
याहि डसी बंशीधर कोरे * चितवन फण मुसकन बिषधारे ॥
प्रेम प्रीति दौंडारत जारे * लगेन मंत्र गुणी सब हारे ॥
थके सकल करि विविध उपाई * यह बिष मोहन बिन नहिं जाई ॥
सखी एक हरि पास पठाई * तिन मोहन सों जाय जनाई ॥

दोहा—अहो महारिके लाडिले, मोहन श्याम सुजान ॥

कित सीखे यह गौदुहन, हम सों कहौ बखान ॥

सो०—दुहि दीनी जिहि गाय, आज भोरही खरिकमें ॥

वेग विलोकौ जाय, निज नयनन ताकी दशा ॥

जबते दुहि दीन्ही तुम गैया * अहो अनोखे गाय दुहैया ॥
 घर लौं कुँवरि जान नहिं पाई * बीचहि धरणि गिरी मुरझाई ॥
 देखत संग सखी सब धाई * जैसे तैसे गृह पहुँचाई ॥
 सो अब तनुकी सुधिनसम्हारै * परी विकल नहिं दृगन उधारै ॥
 सकसकात तनु स्वेद बहाई * उलटि पलटि भरिलेत जँभाई ॥
 कहति मोहिं कोरे अहिखाई * कियो यत्न बहु गारुड आई ॥
 ताहि कछु उपचार न लागै * तुमरो नाम लेत कछु जागै ॥
 हों पठई इक सखी सयानी * यह विष तुम्हरो निहचै जानी ॥
 यह कारो अहि रूप तुम्हारो * मुसकनि विष ता ऊपर डारो ॥
 अब जो चाहौ ताहि जियावो * वेगि चलो जिन गहर लगावो ॥
 अतिहिविकलवहविरहअधीरा * दरश दिखाय हरौ तनु पीरा ॥
 तुम अश्विनी कुमार कन्हाई * वेगि चलो हरि लेहु जिवाई ॥

दोहा—नजर दीठ इकरावरी, टेर कहतहमकान्ह ॥

नहिं जागति तो देहिङ्गी, नन्दद्वार सब प्रान ॥

सो०—व्याकुल जननी तास, धरनि महर वृषभानुकी ॥

गई यशोमति पास, वेगि जाय सुधि लीजिये ॥

कीरति आगम सुनत कन्हाई * कीनी बिदा सखी मुसुकाई ॥
 जो कहूँ डसी भुजङ्गम प्यारी * तौ हम आय देहिङ्गे झारी ॥
 ऐसे कहि हरि सदनहि आये * देखि यशोमति निकट बुलाये ॥
 तू कछु जानत मंत्र कन्हैया * बूझति बिहँसियशोमति मैया ॥
 कीरति महरि बुलावन आई * कुँवरि राधिका कोरे खाई ॥
 आनहुँ झारि वेगि संग जाई * कुँवरि जिवाये अतिहि भलाई ॥
 गारुड भयो भले सुत जानी * आज सुनी श्रवणन यह बानी ॥

मैया एक मंत्र मैं जागौ ✽ तेरी सों कहि सत्य बखानौ ॥
अहि काट्यो मो दृष्टि जु आवै ✽ मो पै क्योंहं मरण न पावै ॥
जननि कट्यो सुत जाहु कन्हारै ✽ देहुराधिकहि जाय जिवाइ ॥
जननी वचन सुनत बजनाथा ✽ चल हर्षि कीरतिके साथ ॥
चलीमहरि हरि संगलिवाइ ✽ गइ वृषभानु पूरा समुहाइ ॥

दोहा—रुदितमहरि लखि कुँवरिको, अतिहिगई कुम्हिलाय ॥

शिथिल अंग बानी निरखि, लीनी कण्ठ लगाय ॥

सो०—तबहिं श्यामके पांय, परी कुँवरि लैके महरि ॥

मोहन देहु जियाय, अति व्याकुल मेरी सुता ॥

आये गारुड कुँवर कन्हारै ✽ कुँवरि कान्हने यह सुनि पाइ ॥
धन्य धन्य आपनको जानी ✽ हृदय हर्ष दृग आनंदपानी ॥
प्रगट रोम तनु स्वेद बढाई ✽ विह्वल देखि जननि अकुलाई ॥
अन्तर भाव भेद हरि जाने ✽ रसिक शिरोमणि मन मुसकाने ॥
तब कछु पढिकै कुँवर कन्हारै ✽ मुरलि अंगसों दई छुवाइ ॥
ततक्षण लोचन कुँवरि उघारे ✽ सन्मुख सुंदर श्याम निहारे ॥
निरखत दृगन परम सुख लीनो ✽ सकुच सँभारि बसन सम कीनो ॥
बुझत बात जननी सों प्यारी ✽ आज कहा यह है महतारी ॥
जननी कहति हरषि उरलाई ✽ तोहिं मरतते कान्हजिवाइ ॥
करत लाज तूकारी प्यारी ✽ करिवर बडी आज बिधि टारी ॥
यों कहि महरि हृदय अनुरागी ✽ नंदसुवनके पांयन लागी ॥
बडो मंत्र तुम कियो कन्हारै ✽ सुता हमारी मरतजिवाइ ॥

दोहा—उर लगाय मुख चूमिकै, पुनि पुनि लेत बलाय ॥

धन्यकोखि यशुमति महरि, जहां अवतरे आय ॥

सो०—कछु मेवा पकवान, कछो खान घनश्यामसों ॥

विदा किये दै पान, कीरति श्याम सुजानको ॥

महरि मनहिं मनमें अनुमानी * जोरी भली विधाता बानी ॥
 ब्रज घर घर यह बात चलाई * बडो गारुडू कुँवर कन्हारै ॥
 सखी कहत हरिसों मुसकाई * भले भले हो गारुडराई ॥
 प्रगट्यो गारुड नाम तुम्हारो * भले आज तुम विषहिं उतारो ॥
 जननि कहति मेरो अति बारो * अबधौं कौन करै निखारो ॥
 जान्यों कठिन बसन ब्रजकारो * अब यह मंत्रहिं मतिहिं बिसारो ॥
 फिरकारो कहूँ करहिं पसारो * हम तब लैहैं नाम तुम्हारो ॥
 यह गारुडी कहां तुम पाई * प्यारी एकहि टेर जिवाई ॥
 अब हम जानी बात तुम्हारी * जाहु आपने सदन बिहारी ॥
 रसिक मुकुटमणि कुंज बिहारी * हँसिबशकीनी घोष कुमारी ॥
 बिबश भई सब ब्रजकी बाला * गये सदन मोहन नँदलाला ॥
 ब्रजविलास बिलसत ब्रज प्यारो * ब्रजवासी जनको रखवारो ॥

दोहा—कारो सुत नँदराय को, जाकी लीला नित ॥

तिनहींको हरि डसतहैं, जिनको उज्ज्वलचित्त ॥

सो०—धन्य धन्य ब्रज बाल, धनि धनि ब्रजके ग्वाल सब ॥

जिनके सँग नँदलाल, दुहत चरावत गाय नित ॥

प्रात होत बल मोहन लाला * गाय बच्छ सबलै सँग ग्वाला ॥
 चले चरावन ब्रज वन माहीं * क्रीडा करत सकल मग जाहीं ॥
 देखि मुदित सब ब्रजकी बाला * वृन्दावन गये मदनगुपाला ॥
 गैया बगर गई वन माहीं * बैठे काह कदमकी छाहीं ॥
 सखालिये सँग सुबल सुदामा * क्रीडा करत सहित बलरामा ॥

ग्वाल जहाँ तहँ गाय चरावैं ❀ आनंद भरे कृष्ण गुण गावैं ॥
 करत विहार विविध सब ग्वाला ❀ गये दूरि बन सघन विशाला ॥
 कोऊ गैयन घेरन धायो ❀ कोऊ बछरनलै बिलगायो ॥
 हलधर रहे कहूं बन जाई ❀ आप अकेले रहे कन्हाई ॥
 मन मन कहत श्याम सुखदाई ❀ सखा रहे कत बन बिरझाई ॥
 गोराँभन कहूं सुनियत नाहीं ❀ गये निकसि धौं कितवन माहीं ॥
 आलस गात जानि मन माहीं ❀ बैठे बंशीबटकी छाहीं ॥

दोहा—सखा वृन्द हलधर सहित, लिये बच्छ अरु गाय ॥

वृन्दावन घन छांडिकै, रहे ताल बन जाय ॥

सो०—मन हरषे सब ग्वाल, देखि भूमि सुन्दर परम ॥

फरे विपुल तरु ताल, अति रस मय मीठे मधुर ॥

॥ अथ धेनुकवधलीला ॥

गोधन वृन्द दिये बगराई ❀ लगे खान फल मन हरषाई ॥
 अचयो बलरस ताल रसाला ❀ बाढ्यो उर आनंद विशाला ॥
 सुरत नन्दनन्दनकी आई ❀ कह्यो सखनसों कहां कन्हाई ॥
 ल्यावहु घेरि जाय सब गैया ❀ चलौ वेगि जहँ कुवँर कन्हैया ॥
 सुनत सखा हलधरकी बानी ❀ बनमें श्याम अकेले जानी ॥
 आतुर गैयन घेरन धाये ❀ टेर दई सब ग्वाल बुलाये ॥
 तहां असुर इक धेनुकनामा ❀ खरके रूप रहै वनधामा ॥
 सोयों हुतो विटपकी छाया ❀ सुनत शोरकर तामस धाया ॥
 अति बलवान विशाल कराला ❀ परम भयंकर मानहुं काला ॥
 दाऊ कहि सब ग्वाल पुकारे ❀ भाजे जित तित भयके मारे ॥
 असुर महाबल गर्व बढाई ❀ बलके सन्मुख गरजो आई ॥

मत्त तालके रस बलराई ❀ देखि असुर मन रिस उपजाई ॥

दोहा—बल सँभारि उठि कोपकरि, असुर प्रचान्योजाय ॥

अग्रज माता श्यामको, तिहुँपुर जासु बडाय ॥

सो०—बलको आवत जानि, असुर जोरि दोऊ चरण ॥

चपर चलाई आनि, बहुरोहठठाहो भयो ॥

बहुरो फिर मारनको धायो ❀ बल जूको तामस तब आयो ॥

जबहिं असुर फिर चरण चलायो ❀ गहि लीनो करिकोप फिरायो

पटक्यो लै तरुताल हिलाई ❀ भयो प्राण विन तरुहिं गिराई ॥

तरुसों तरु टूटे भहराई ❀ उठयो सकल वन घन घहराई ॥

और बहुत धेनुक परिवारा ❀ कीन्हों बल सबको संहारा ॥

मान्यो असुर महा दुखदाई ❀ ग्वाल बाल सब करत बडाई ॥

आये सब रुन्दावन माहीं ❀ जहँ तहँ श्यामहिं टेरेत जाहीं ॥

चढिचढि द्रुमन पुकारत ग्वाला ❀ आवहुहो मोहन नँदलाला ॥

ल्याये घेरि मिली सब धेनू ❀ आवहु मधुर बजावहु वेनू ॥

कोमल चरण कहूँ मति धावहु ❀ कंटक कठिन मही इत आवहु ॥

ऐसे हरिको टेरेत जाहीं ❀ तृपित भये सब वनके माहीं ॥

ग्वाल बाल सब यमुनहिं आये ❀ बलरस मत्त न पहुँचन पाये ॥

दोहा—गोप गाय अचवत भये, कालीदहको नीर ॥

निकसत सब अकुलायकै, बैठ गये जल तीर ॥

सो०—परे सकल मुरझाय, जहां तहां विष झारते ॥

ग्वाल बच्छ अरु गाय, मये मनोँ विन प्राण सब ॥

हरि ठाढे बंशीवट छाहीं ❀ बारहिं बार कहत मन माहीं ॥

अबहिं रहे सब संग चरावत ❀ निकसि गये धौंकितवन धावत ॥

गौरांभन ग्वालनके बैना * अनकतकछु न सुनत बन ऐना ॥
 तरु चढि इत उत गैयन हेरत * लै लै नाम सखन को टेरत ॥
 कालीदह तन आहट पाई * सोधलेत उत चले कन्हआई ॥
 बन घन ढूँढत हरि तहँ आये * गाय ग्वाल सब मूर्च्छित पाये ॥
 मनमें ध्यान करतही जान्यो * काली अहि त्यां आय समान्यो ॥
 रहत इहां खगपति भयमानी * अँचयो इन ताको विषपानी ॥
 अमीदृष्टि प्रभु सकल निहारी * तुरत उठे सब भये सुखारी ॥
 देखि कृष्णको अति सुखपाई * मिले सकल प्रेमातुर धाई ॥
 बोले हरि मृदुवचन सुहाये * तुम सब मोहिं छोड़ि कै आये ॥
 कितते कित इतनिकसे आई * मैं बन ढूँढि रथो पछिताई ॥

दोहा—खोज लेत आयो इहां, देखे सब बेहाल ॥

मुरछि परे काहे धरणि, भयो कहा जंजाल ॥

सो०—गाय वच्छ अरु ग्वाल, उठे एकही बार पुनि ॥

कहा कियो इह ख्याल, देखि मोहिं अचरज भयो ॥

सुनि हरि वचन परम सुखदाई * कहत सखा सब सुनहुँ कन्हआई ॥
 अचयो तृषित यमुन जल आई * तबहिं गिरे सब तट अकुलाई ॥
 कारण हम कछु जान्यो नाहीं * भये प्राण बिन सब क्षण माहीं ॥
 इह हम जानी कुँवर कन्हआई * तुमहीं हमहिं जिवायो आई ॥
 हौ तुम ब्रज जनके रखवारे * तहां तहां तुम हमहिं उबारे ॥
 तबहारि बलदाऊको हेरो * कथ्यो चलहु वन होत अँधेरो ॥
 सखा बोलि ल्याये बलरामहिं * हँसे देखि सुन्दर घनश्यामहिं ॥
 बडीदेर भइ तुम्हें कन्हैया * रहे अकेले वनमें भैया ॥
 चलहु वेगि अब घरको जाहीं * लेहु लिवाहि गाय वन माहीं ॥

हेरी देत चले सब ग्वाला ❀ गावत गुण सुन्दर गोपाला ॥
 गोधन आगे दये चलाई ❀ सखन मध्य मोहन बलभाई ॥
 चले ब्रजहि ब्रन जन सुखदाई ❀ निरखि बदन छवि मदन लजाई ॥

दोहा—सुनि ब्रज सुन्दरि परस्पर, कहत मुरलि सुर घोर ॥

आवत वन वसि अहर निशि, आगम नंदकिशोर ॥

सो०—धाई गृहतजि काज, निरखनको मन भावतो ॥

सुन्दर सुत ब्रजराज, लाज साज सब छोंडिकै ॥

वेदेखो आवत बल मोहन ❀ सुबल सुदाम सुदामा गोहन ॥
 मेघश्याम तनु गैयन पाछे ❀ शीश मुकुट कटि कछनी काछे ॥
 कमल बदन कर वेणु बजावैं ❀ गौरी राग मिले सुरगावैं ॥
 नयन विशाल कमल ते आछे ❀ कोटि मदन कीछविको बाछे ॥
 कुंडल श्रवण बदन छवि छाई ❀ गोरज छवि कहूँ चंद्र छिपाई ॥
 निरखि मुदित सब ब्रजकी बाला ❀ पहुँचे आय सदन नंदलाला ॥
 ब्रज जीवन बल मोहन भैया ❀ निरखि जननि दोउ लेत बलैया ॥
 ग्वाल कहत धनि यशुदा माता, धनि धनि बल मोहन दोउ भ्राता ॥
 नरतनु धरे देव ये कोऊ ❀ ब्रज अवतार लियो इन दोऊ ॥
 येहैं सब ब्रजके रखवारे ❀ गाय गोपके राखन हारे ॥
 गर्दभ रूप असुर इक भारो ❀ ताहि आज हलधर वन मारो ॥
 हम सब यमुनातट मुरझाई ❀ तहां कान्ह सब मरत जिवाई ॥

दोहा—अब हम काहू डरत नहिं, येहैं हमैं सहाय ॥

बल मोहनके बल फिरत, वन वन चारत गाय ॥

सो०—परत गाढ जब आय, तब तब होत सहाय हरि ॥

चिरजीवैं दोउ भाय, यशुमति ये तेरे कुँवर ॥

यशुमतिसुनिग्वालनकीबानी ❀ कद्यो गर्ग सब सत्य बखानी ॥
 नितनव चरित सुनत हरि केरे ❀ हैं कोऊ ये बडन बडेरे ॥
 धन्य धन्य ये ब्रजमें आये ❀ धन्य धन्य हम सुत करि पाये ॥
 अतुलित कर्म दुहुनके जानी ❀ दोउ जननी मन मांझ सिहानी ॥
 श्याम राम दोऊ नँदरानी ❀ लिये लाय छाती हरषानी ॥
 भूखं जान तुरत अन्हवाये ❀ पटरस व्यंजन सरस जिमाये ॥
 भोजन करि अचये दोउ भाई ❀ लीन्हे पान संत सुखदाई ॥
 पौढे सेज दास हितकारी ❀ ब्रज जनवासी हैं बलिहारी ॥
 चिन्तामणि हरिजन सुखदानी ❀ कालीकी चिन्ता उर आनी ॥
 ग्वाल गाय नित वनको जाहीं ❀ दुखपावत कालीदह माहीं ॥
 विषधरको रहबो जलमाहीं ❀ चंदावन ढिग नीकोनाहीं ॥
 कालिहिकाढि इहां ते दीजै ❀ यमुनाको जल निर्मल कीजै ॥

दोहा—यह विचार मनमें करत, भये नींद वश श्याम ॥

यशुमति हरि पौढायकै, आपलगी गृह काम ॥

सो०—खरै न बोलन देत, घरमें काहूको महरि ॥

बल मोहनके हेत, जागि परै मति नींदते ॥

शिव सनकादि दिवसनिशिध्यावैं ❀ कबहूँ जाको अन्त न पावैं ॥
 ब्रह्म सनातन आनँदखानी ❀ सो नँदसदन सोवत सुखदानी ॥
 देखो नंद कान्ह अति सोवत ❀ श्रमित जानि वनके सुख जोवत
 मानत नाहिं कहो किन कोऊ ❀ आप हठीले भैया दोऊ ॥
 करसों पौछत शुभग शरीरा ❀ कहियत यहै प्रेमकी पीरा ॥
 निजपलका तहँ लियो मँगाई ❀ सोये हरिके ढिग नँदराई ॥
 यशुमति हूँ पौढी तहँ आई ❀ निशिबीते अधिकी अधिकाई ॥

जाग उठे तब कुवैर कन्हैया * कहां गई मोढिगते मैया ॥
 संग सोवत जान्यो बल भाई * अतिही श्याम उठे अकुलाई ॥
 जागेनँद अरु महरि यशोदा * हरिको ऐंचिलियो नँद गोदा ॥
 काहे झिझकि उठ्यो अनियासा * तुरतहि दीपक कियो प्रकाशा ॥
 सपने गिरो यमुन जल जाई * काहू मोको दियो गिराई ॥

दोहा—नित प्रति मैं बरजतरहों, तूहठि यमुना जाय ॥

सुधिरह गई अन्हानकी, जिन हो लाल डराय ॥

सो०—कौरैलै नँदराय, पौढाये निज संग तब ॥

चुन्दावन तू जाय, किहि कारण जित तित फिरत ॥

अबतू चुन्दावन जनि जाई * तहां कौनधों रहत बलाई ॥
 सोये दंपति बीच कन्हवाई * तुरतहिगई नींद फिर आई ॥
 सपनौ सुनि जननी अकुलानी * कहत नँद सो यशुदारानी ॥
 देख्यो धों कह सुपन कन्हवाई * या ब्रजके जीवन दोउ भाई ॥
 यहै यत्न इनकोअब कीजै * गाय चरावन जान नदीजै ॥
 गृहसंपति द्वै तनक दुठौना * इनहीं लौं बल भोग ठठौना ॥
 येवन जात चरावन गैयां * हँसी करत ब्रज लोग लुगैयां ॥
 दंपति आपसमें इहि भांती * करत विचार बीति गइ राती ॥
 तारागण सब गगनछिपाने * गयोतिमिर अम्बुज बिकसाने ॥
 उठि यशुमतिलागी गृह काजा * भूलिगयो निशि शोच समाजा ॥
 प्रात स्नान यमुन नित जाई * नंदहि तुरतहि दियो उठाई ॥
 मथनहारि ग्वालनि सब जागीं * जित तित दही बिलोवन लागीं ॥

दोहा—हरि प्यारी सुरभीनको, जम्यौ जुदाधि बिलगाय ॥

सो हरि हित माखन लिये, मथति यशोदा माय ॥

सो०—सदमाखन निज पानि, मथत तुरत मथनी धन्यो ॥

बड भागिनि नँदरानि, माखन प्यारे लाल हित ॥

लगी जगावन हरिको जाई ❀ उठहु तात माता बलि जाई ॥
 प्रगट्यो तरणिकिरणि महिछाई ❀ खोलि देहु मुख कमल कन्हाई
 सखा द्वार सब तुमहिं बुलावैं ❀ तुम कारण सब धाये आवैं ॥
 उठि तिनको मिलिकै सुख दीजै ❀ होत अबार कलेऊ कीजै ॥
 तब हरि उठिकै दरशन दीनो ❀ माता निरख मुदित मन कीनो ॥
 दाऊ जू कहि श्याम पुकाच्यो ❀ नीलांबर गहि मुख ते टाच्यो ॥
 मनु घनते शशि भयो नियारो ❀ प्रगट्यो सुन्दर मुख उजियारो ॥
 हँसत उठे सुन्दर दोउ वीर ❀ गोर श्याम अति सुभग शरीर ॥
 शयन भवन ते बाहर आये ❀ लखि दोउ जननि परम सुख पाये ॥
 दँत वनलै दोउ वन कर दीनी ❀ चौकी बैठि मुखारी कीनी ॥
 मातन निज निज कर मुख धोयो ❀ नयन नको आरस सब खोयो ॥
 अँचरन सों मुख कमल अँगोछे ❀ उर लगाय सब अंगन पोछे ॥

दोहा—करहु कलेऊ लाल दोउ, तब कहँ बाहर जाउ ॥

मथ्यो तुरत मीठो मधुर, माखन रोटी खाउ ॥

सो०—दर्ई दुहुन को मात, रोटी अरु माखन मधुर ॥

हरषि परस्पर खात, माता अंतर हेतु लखि ॥

॥ अथ कालीदमनलीला ॥

ऋषि नारद हरि भक्त सयाने ❀ प्रभुके मनकी रुचि पहिचाने ॥
 गावत गुण हरि परम हुलासा ❀ गये तुरत मथुरा नृप पासा ॥
 देखि कंस आदर अतिकीनो ❀ करि दंडवत बरासन दीनो ॥
 नारद कह्यो कुशल नृपराई ❀ कछुक शोचवश परत लखाई ॥

तुम प्रताप मुनि कुशल सदाई * एक शोच मोहिं बडो गुसाई ॥
 ये दोउ ब्रजमें नंद कुमारा * जानि परत मोहिं कोउ अवतारा ॥
 कहत जिन्हें बलराम कन्हाई * तिनकी गति मति जानि न पाई ॥
 तृणावर्त्तसे दैत्य पठाये * सो उन पलइक माहिं नशाये ॥
 बकी पठायदई पहिलेहीं * ऐसनको बल सब लैलेहीं ॥
 उनते भयो नहीं कछु काजा * यह सुनि समुझि होत मोहिं लाजा ॥
 अब मुनि तुम कछु कहहु विचारा * जिहि विधि मारहुं नंदकुमारा ॥
 मुनि हरिके गुण नीके जाने * सुनि नृप वचन मनहिं मुसकाने ॥

दोहा—तब बोले मुनि नृपति सों, सत्य कही तुम तात ॥

वे दोऊ अवतारहैं, इन गति जानि नजात ॥

सो०—हैंये तुम्हरे काल, प्रगट भये ब्रज आयकै ॥

नंद गोपके बाल, तुम इनको राखो मतिहि ॥

एक बात मेरे मन आवै * करहु कंस तुमको जो भावै ॥
 काली अहि रथो यमुना आई * तहां कमल फूले विपुलाई ॥
 फूल तहां ते मांगि पठावहु * दूत पठै नंदाहि डरपावहु ॥
 यह सुनि ब्रजके लोग डरैहैं * यह बात बेऊ सुनि पैहैं ॥
 जैहैं अवशि फूलके काजा * तहां घात करिहैं अहिराजा ॥
 यह सुनि कंस बहुत सुखपायो * भलो मंत्र मुनि मोहिं बतायो ॥
 धनि धनि कहिपुनि शिरनावत ॥ हरषि चले मुनि हरि गुण गावत ॥
 तबहिं कंस इकदूत बुलायो * ब्रजहि नंदके पास पठायो ॥
 दीनों ताको पत्र लिखाई * कहियो यहै नंदको जाई ॥
 कोटि कमल कालीदह केरे * पहुँचावहु लै काल्हि सबेरे ॥
 कंसराज अति काज मँगाये * बनिहै तुमको तुरत पठाये ॥

चल्यो दूत आतुर ब्रज धाई ❀ जानि लई सब कुँवर कन्हाई ॥

दोहा—आप रहे ता दिन घरहिं, बनहि पठाये ग्वाल ॥

ब्रजबासी जनके सुखद, ब्रज जीवन नंदलाल ॥

सो०—दूतहि आवत जान, आप गये बहराय हरि ॥

सुन्दर श्याम सुजान, खेलत ग्वालन संग मिलि ॥

आये नन्द यमुन जल न्हाये ❀ पैठत सदन छीक भइ बांये ॥

महरमलिनमनअशकुनजान्यो❀आजकहा उर शोच समान्यो

तबहीं चल्यो दूत जब आयो ❀ नंद महर घरही में पायो ॥

बोललिये पांती करराखी ❀ नृपकी कही मुखागर भाखी ॥

कालीदहके फूल मँगाये ❀ ता कारण अति डाट पठाये ॥

जो नहिं मोको फूल पठावहु❀ तौकोउ ब्रजमें रहन न पावहु ॥

गोप नन्द उपनन्दजितेका ❀ डारों मार न राखों एका ॥

जो नहिं कालिह कमल में पाऊं❀ तो सुत तेरे बाँधि मँगाऊं ॥

यह सुनि नन्द गये मुरझाई ❀ और गोप सब लिये बुलाई ॥

तिन सबको सब बात सुनाई ❀ परी आय यह अति कठिनाई ॥

कोटि कमल कालीदह माहीं ❀ कहौ कौन धौं काढन जाहीं ॥

कह्यो फूल जो कालिह नपाऊं ❀ तो सुत तेरे बाँधि मगाऊं ॥

दोहा—मेरे सुत दोउ नृपति उर, खटकत हैं दिनरात ॥

आज कही यह बातसो, बल मोहन पर घात ॥

सो०—चढ़िहै ब्रजपर धाय, कालिह कंस अति कोप कर ॥

बन्यो मरण अब आय, को राखै कित जाइये ॥

मुहिं अपने जियको डर नाहीं ❀ शोच श्याम बलको उर माहीं ॥

अब उबार देखियत नहिं कोई ❀ बल मोहनहिं राखि को गोई ॥

वरुमोहिं राखै बाँधि नृपाला * रहैं सदन बल मोहन लाला ॥
 नन्द वचन सुनि सब ब्रजवासी * भये दुखित मन परम उदासी ॥
 काहू पै कछु बात न आई * अति भय त्रसित गये मुरझाई ॥
 चकित महा ब्रजवासी ठाढ़े * मानहुं चित्र चिह्न लिखि काढ़े ॥
 नन्दघरन ब्रजनारि विचारैं * अति व्याकुल नयनन जल ढारैं ॥
 ब्रजहिं बसत सब जन्म सिरान्यो * इहिविधिकंसन कबहुँ रिसान्यो ॥
 कालीदहके फूल मँगाये * कहौ कौन विधि जातसो पाये ॥
 अतिहि शोचवश सब नरनारी * भये कंस भय बहुत दुखारी ॥
 कोउ कह शरण चलो सब जाहीं * शरण गये कहिये कछु नाहीं ॥
 कोउ कह देहु जितो धन चाहैं * ऐसे सब मिलि बुद्धि उपाहैं ॥

दोहा—यहै शोच सब मिलि पंगे, नहीं कहूं निरवार ॥

ब्रज भीतर नंद भवनमें, घर घर यही विचार ॥

सो०—अन्तर्यामी जानि, खेलत ते आये घरहिं ॥

देखतही नंदरानि, दृग भर लिये लगाय उर ॥

चितवत माता कुँवर कन्हारि * बूझत कत रोवत दुख पाई ॥
 बूझहु जाय तात सों बाता * मैं बलि जाउँ बदन जलजाता ॥
 तुमहीं काज कंस अकुलाई * बाहर मत कहूँ जाहु कन्हारि ॥
 जाय तातको शोच मिटावो * अपने मंधुरे बचन सुनावो ॥
 आयो श्याम नंद पै धायो * जान्यो मात पिता दुख पायो ॥
 बूझत नंदहि कुँवर कन्हैया * तात दुखित कत तुम अरु मैया ॥
 मोसों बात कहौ किन सोई * कहा शोचवश हो सब कोई ॥
 नंदलाल कनियां बैठारे * कहा कहौ तुम सों मैं प्यारे ॥
 जबते जन्म भयो सुत तेरो * करत कंस तुमसों अरझेरो ॥

केतीकरवर टरीं तुम्हारी ❀ कुलदेवन कीन्हीं रखवारी ॥
प्रथमहिं अधम पूतना आई ❀ शकट तृणा पुनि आयो धाई ॥
वत्सवका अघ पुनि दुख दीन्हों ❀ सबते तोहिं राखि विधिलीन्हों ॥

दोहा—कालीदहके फूल अब, पठये भूप मँगाय ॥

सबते यह गाढी परी, कोकरि लेय सहाय ॥

सो०—जो नहिं आवैं फूल, लिख्यो कंस मोहिं डाटिकै ॥

करौं ब्रजहिं निर्मूल, बांधि मँगाऊं तव सुतन ॥

बाबा तुम काहे दुख पाई ❀ कहत कौन धौं करै सहाई ॥

सो देवता ब्रजहिंके माहीं ❀ रहत हमारे संग सदाहीं ॥

लीन्हों जिन सब ठोर बचाई ❀ करिलेहैं सोई देव सहाई ॥

सोई कंसहि फूल पठैहै ❀ ब्रजवासिनको शोच मिटैहै ॥

कंस केशं गहि सोई मारै ❀ असुर मारि भूभार उतारै ॥

सब मिलि सोई देव मनावो ❀ अपने मनते शोच मिटावो ॥

सुनत महरहरिमुखकी बानी ❀ भये सुखी धीरज उर आनी ॥

इष्ट देवको शीश नवायो ❀ जहां तहां तुम श्याम बचायो ॥

शरण शरण प्रभुशरण तुम्हारी ❀ अबहूँ करहु सहाय हमारी ॥

जाते कंस त्रास मिटि जाई ❀ रहैं सुखी बलराम कन्हाई ॥

मात पितहि हरि इहि ढँगलाई ❀ आप चले खेलन हरषाई ॥

सखन मध्यं गये कुँवर कन्हाई ❀ कट्यो खेलिये गेंद मँगाई ॥

दोहा—श्रीदामा यह सुनतही, गयो धामनिज धाय ॥

अपनी गेंदल आयके, दीन्हों हरिको आय ॥

सो०—चलो खेलिये धाय, बाहर घोष निकासिकै ॥

जहँ कोउ आयन जाय, गेंद खेल बनिहै तहाँ ॥

सखन संगलै बाहर जाई * रच्यो गेंदको खेल कन्हआई ॥
 इक मारत इक भाजत जाहीं * रोकलेत इक बीचहि माहीं ॥
 आपस मांझ परस्पर मारैं * नाना रंग करिकै किलकारैं ॥
 भाजत मारत दूजो जाहीं * मारत धाय बहुरि सो ताहीं ॥
 श्याम सखनको खेलत माहीं * यमुना तट तन लीन्हें जाहीं ॥
 आपन जात कमलके लालन * सखा संग लीन्हें सब ख्यालन ॥
 को जानहिं यह हरिके ख्याला * यमुना निकट गये सब ग्वाल ॥
 श्याम सखाको गेंद चलाई * अंगमोर सो गयो बचाई ॥
 परी गेंद यमुना जल माहीं * है गयो खेल भंग तिहि ठाहीं ॥
 पकरी धाय फेंट श्रीदामा * मेरी गेंद देहु तुम श्यामा ॥
 जान बूझ तुम गेंद गिराई * बनिहै दीन्हें गेंद मँगाई ॥
 और सखा मोको मति जानों * मोसों मतिहिं ढिठाई ठानों ॥

दोहा—सखा हंसत सब तारिदे, भली करी तुम कान्ह ॥

दीन्ही गेंद बहाय जल, देहु श्रीदामहिं आन्ह ॥

सो०—सकल लोक शिरताज, पार न पावैं ब्रह्मशिव ॥

ताहि गेंदके काज, फेंट पकरि झगरत सखा ॥

छांडि देहु मेरि फेंट सुदामा * रांरि बढावत थोरहि कामा ॥
 बदले गेंद लेहु तुम मोसों * फेटन गहौं कहौं मैं तोसों ॥
 छोटी बडो न जानत काहू * करत बराबर पकरत बाहू ॥
 हम काहेको तुमहिं बराबर * तुम उपजे अब बडे नंदघर ॥
 ऐसे हम अब गये बिलाई * तुमहुं बराबर नाहिं कन्हआई ॥
 सुनहु श्याम हम तुम इकजोटा * कहा भयो तुम नंदके ढोटा ॥
 गेंद दियेही बनै मँगाई * मोसों चलि है नाहिं ढिठाई ॥

मुँह सँभारिबोलत नहिं मोसों ॥ करिहों कहा धुताई तोसों ॥
 पुनि पुनि करत बराबर आई ❀ तैं नहिं जातन मोरि धुताई ॥
 प्रथम पूतना शकटा मान्यो ❀ कागासुर अरु तृणा पछान्यो ॥
 बत्स बकासुर बनके माहीं ❀ मान्यो सो कह जातन नाहीं ॥
 अघ मान्यो पुनि देखत तोहीं ❀ ऐसो धूत न जानत मोहीं ॥

दोहा—तुम मारे सो सांच सब, कतही लाल डराहु ॥

कंस कमल अब देहु तब, हमहिं मारियो जाहु ॥

सो०—कालिहिपरिहै जानि, पकरि मँगैहै कंस जब ॥

देत फूल किन आनि, बहुत अचकरी करि रहे ॥

सांच कहों मैं सुनु श्रीदामा ❀ आयो इहां फूलके कामा ॥
 कितक बापुरो कंस बतायो ❀ जाके भय तुम मोहिं डरायो ॥
 केश पकरि गहि ताहि पछारों ❀ देखहुगे तुम देखत मारों ॥
 कोटिकमलतिहि आज पठाऊं ❀ ब्रजते ताको त्रास नशाऊं ॥
 कालीदह जल पियत मेरे सब ❀ गहिल्याऊं सोई काली अब ॥
 लीन्हीं रिस करि फेंटं छुडाई ❀ चढे कदम पर धाय कन्हवाई ॥
 नीचे सखा हँसन सब लागे ❀ श्रीदामाके डर हरि भागे ॥
 रोय चले श्रीदामा घरको ❀ जाय कहत मैं महरि महरको ॥
 टेरैत कहि कहि सखा कन्हवाई ❀ लेहु गेंद मैं ल्यावत जाई ॥
 यह कहिनटवर मदन गोपाला ❀ कूदि परे जलमें नँदलाला ॥
 हाय हाय करि सखा पुकारे ❀ भयेश्यामबिन बहुत दुखारे ॥
 रोवत चले ब्रजहिं सब धाई ❀ श्रीदामाको दोष लगाई ॥

दोहा—कोमल तनु अतिसाँवरो, साजे नटवर साज ॥

जलमें पैठि गये तहां, जहँ सोवत अहिराज ॥

सो०—यहि अंतर हरिमाय, भूखेहैं हैं जानि हरि ॥

खेलत ते अब आय, मोसों भोजनमांगिहैं ॥

यशुमति चली रसोई कारन * तबहीं छींक उठी इक ग्वालन ॥
 ठिठकिरही उर शोचत ठाढ़ी * भली नहीं कछु चिंता बाढ़ी ॥
 आईअजिग निकसि पछिताई * चली बहुरि सो दोष मिटाई ॥
 माँजारी तब पंथ कटाई * बहुरो यशुमति बाहर आई ॥
 व्याकुल भई निकरि गइ द्वारे * कह धौं खेलत मेरे बारे ॥
 बायें काग दाहिने स्वर स्वर * सुनिआई अतिव्याकुल फिर घर ॥
 क्षण बाहर क्षण आंगनमाहीं * टेरत हरिहि शांतमन नाहीं ॥
 तबहीं नंद चले घर आवत * देख्यो श्वान श्रवणं फट कारत ॥
 दाहिने काहूरोय सुनायो * माथेपर है काग उड़ायो ॥
 सन्मुख गररी करत लराई * डरे नंद अशकुन बहु पाई ॥
 आये घरमन मलिन विशेषी * व्याकुल मलिन वदन तिय देखी ॥
 बूझत यशुदाहि नंद डराई * काहे तब मुख गयो झुराई ॥

दोहा—चली रसोई करन हों, छींक भई मुहिं आज ॥

आगे है माँजारी पुनि, गई दूसरे भाज ॥

सो०—तब ते मोजिय शोच, हरिधौं खेलत है कहां ॥

समुझ कंस कृत पोच, मेरे मनमें त्रास अति ॥

नंद कहत पैठत घर माहीं * मोहिं शकुन नाके भय नाहीं ॥
 आज कहा यह समुझि न जाई * हैं धौं कित बलराम कन्हवाई ॥
 महारि महर मन त्रास जनाई * खोजत हरिहि चले अकुलाई ॥
 सखा सकल इहि अंतर धाये * रोवत ब्रजहि पुकारत आये ॥
 महारि महर सों आय जनाई * यमुना बूडे कुँवर कन्हवाई ॥

सुनि दम्पति बूझत अकुलाई ❀ कैसे कहीं कहो समुझाई ॥
 खेलत कदम चढे हरि धाई ❀ कूँदि परे कालीदह जाई ॥
 सुनतहि परी धरणि महँ मैया ❀ कीनों सपनों सत्य कन्हैया ॥
 रोवत नंद यमुन तट आयै ❀ बालक सब नंदहि संग धायै ॥
 ब्रज घर जहां तहां यह बाता ❀ ब्रजबासी धायै बिलखांता ॥
 कहां पन्यो गिरि कुँवर कन्हैया ❀ दई बालकन ठौर वताई ॥
 चाहि चाहि करि नंद पुकारे ❀ गिरे धरणि नहिं अंग सँभारे ॥

दोहा—लोटत अतिव्याकुल धरणि, परन चलत जल धाय ॥

कहत श्याम तुम दियो दुख, मोको बैस बुढाय ॥

सो०—लोग उठे सब रोय, दीन वचन सुनि नंदके ॥

कहत विकल सब कोय, हरि तुम ब्रजसूनो कियो ॥

नंदहि गिरत सबहि गँहिराख्यो ❀ ताक्षणको दुख जात न भाख्यो ॥
 कहत गोप नंदहि समुझाई ❀ बन्यो मरण सबही को आई ॥
 हरि बिनको जीवै ब्रजमाहीं ❀ कहौ काह किहि जीवन नाही ॥
 मोहमगन अतियशुमति मैया ❀ टेरत मेरे लाल कन्हैया ॥
 आज कहां तुम बेर लगाई ❀ माखन धन्यो खाउ किन आई ॥
 अति कोमल तुम्हरे मुख योगू ❀ जेवहु लाल लेहुँ मैं रोगू ॥
 धौरी दूध धन्यो ओटाई ❀ तुम निजकर दुहि गये अन्हवाई ॥
 सदमाखन अतिहित मैं राख्यो ❀ आज नहीं तुमने कछु चाख्यो ॥
 प्रातहिते मैं दियो जगाई ❀ दंतवन करि जु गये दोउ भाई ॥
 मैं चितवत तव पंथ कन्हवाई ❀ देखत आज अबार लगाई ॥
 बैठो आय संग दोउ मैया ❀ तुम जेवहु मैं लेहु बलैया ॥
 शोकसिंधु बूझत नंदरानी ❀ तनुकी सुधि बुधि सबै भुलानी ॥

दोहा—ब्रज युवती सुनि महरिके, वचन प्रेम आधीर ॥

अकुलानीं रोवत सबै, बढी कठिन उर पीर ॥

सो०—बरजत यशुदहिं ज्वाल, यह कहि कहि हरि हैं भले ॥

सुतं बियोग विकराल, जात नहीं कहि मातको ॥

चौंक परी तनुकी सुधि आई * रोवत देखे लोग लुगाई ॥

तब जानी दहगिरे कन्हाई * पुत्र पुत्र कहिकै उठि धाई ॥

ब्रज वनिता सब संगहि लागीं * श्याम वियोग बिथा सब पागीं ॥

कान्हकान्ह कहि सकल पुकारैं * तोरतलट उरसों कर मारैं ॥

अति व्याकुल यमुनातट जाई * गिरी धरणि यशुमति अकुलाई ॥

मुरझि परी तनुदशा भुलाई * प्राण रत्यो हरि सुरतिसमाई ॥

ब्रजवासी सब उठे पुकारी * जल भीतर कहँ करत मुरारी ॥

शंकटमें तुम करत सहाई * अबक्यों नाहिं बचावत आई ॥

मात पिता अतिही दुख पावैं * रोय रोय सब कृष्ण बुलावैं ॥

आय गये हलधर तेहि काला * देखी जननी विकल बिहाला ॥

नाक मूँदि जल सींचि जगाई * जननी कहि कहि टेर लगाई ॥

बार बार जब हलधर देख्यो * भयो चेत कछु बलतनु हेन्यो ॥

दोहा—कहत उठी बलरामसों, बनहि तज्यो लघु भ्रात ॥

काहू तुमहिं बिन रहत नहिं, तुमसों क्यों रहि जात ॥

सो०—मगन शोच सर मांझ, कहत लै आवहु कान्ह कोउ ॥

भूखे है गइ सांझ, आज कछु खायो नहीं ॥

कबहुँ कहत बनगयो कन्हाई * कबहुँ बतावत घर समुहाई ॥

कान्ह कान्ह कहि टेर लगावै * कित खेलत कहि लाल बुलावै ॥

अतिही मोह विकल नंदरानी * करत बोध हलधर मृदुबानी ॥

कत रोवत तू यशुमति मैया * नीके हैं धरु धीर कन्हैया ॥
 श्यामहिं नेक कहूं डर नाहीं * तू कत डरपत है मनमाहीं ॥
 तेरी सों मैं कहत पुकारे * वह काहूके मारे न मारे ॥
 जिन काली भयहोहु दुखारी * तू अपने मन देखु विचारी ॥
 पहिले बकी कपट करि आई * तब दिन दश के हते कन्हाई ॥
 शकटा तृणावर्त्त पुनि आयो * तू देखत हरि तिन्हें नशांयो ॥
 वत्स बका अघ बनमें मारे * विष जलते सब सखा उबारै ॥
 अब वे कालीनाथ लैएहैं * कमल पठाय कंसको दैहैं ॥
 मोहिं भरोसो कान्हर केरो * मानों सत्य कथो सुनु मेरो ॥

दोहा—मोहिं दुहाई नंदकी, अबहीं आवत श्याम ॥

नाग नाथ लै आवहीं, तौ कहियो बलराम ॥

सो०—सुनि हलधरके बैन, अति उदार हरिके चरित ॥

भयो कछुक उर चैन, जो कछु करहिं सु सोह सब ॥

बांह पकरि बलको बैठाई * लै बलाय उर रही लगाई ॥
 अति कोमल तनुधरे कन्हाई * पहुंचे कालीके ढिग जाई ॥
 हरिको देखि उरंगकी नारी * रही चारुमुख चिह्न निहारी ॥
 कहत कौन तू इत कित आयो * अति कोमल तनुकाको जायो ॥
 बारहि बार कहति अकुलाई * वेगि भाज इतते कित जाई ॥
 देखै नाग जागै जबहीं * है है भस्म क्षणकमें तबहीं ॥
 सुनत नाग नारीकी वाणी * बोले हंसि हरि सारंगपाणी ॥
 पठयो माहिं कंस नृपराई * तू याको अब देहु जगाई ॥
 कंस कहा तू इनहिं बतैहै * एक फूंकमें तू जरिजैहै ॥
 अजहूं भाजि कथो करि मेरो * लगत छोह देखत तनु तेरो ॥

मरहु कंस जिन तोहिं पठायो * तूकत इहां मरणको आयो ॥
बालक जानि दया अति मेरे * दुख पैहैं पितु माता तेरे ॥

दोहा—अरी बावरी सर्पसों, कहा डरावत मोहिं ॥

जैसो मैं बालक प्रकट, अबहिं दिखावहुं तोहिं ॥

सो०—तू किन देत जगाय, देखौं मैं याके बलहि ॥

यापै कमल लदाय, लै जैहौं इहि नाथ बज ॥

सुनत वचन अहिनारि रिसानी * छोटे वदन कहत वडिवानी ॥

खगपतिसों सरवर जिनठानी * ताहि कहत नाथन अज्ञानी ॥

देखतहि हैहै जर छारा * केतिक तू बंपुरो सुकुमारा ॥

बपुरो मोहिं कहत अहिनारी * बोलत नाहिन बात सभारी ॥

अबहीं तोहिं बपुरि करि डारौं * एकहिलात खसम तुव मारौं ॥

सोवत काहु मारिय नाहीं * चलि आई है बात सदाहीं ॥

ताते तु पति देहि जगाई * देखौं मैं याकी मनसाई ॥

जो पै तोहिं मरन बुधि आई * तौ तूही किन लेत जगाई ॥

तब हरि झटकि ताहि देगारी * दाबी चरण पूछ अहिकारी ॥

मसकी नेक धराणि सो लाई * काली उरग उठ्यो अकुलाई ॥

आयो जानि गरुड भय बाढ्यो * देख्यो बालक आगे ठाढ्यो ॥

तबहिं क्रोध करि गर्व बढायो * झटकि पूछ अति रिस करि धायो ॥

दोहा—दांव घात लाग्यो करन, सहसौ फन फटकार ॥

बार बार फुंकार कर, डारत विषकी झार ॥

सो०—जरत यमुनको नीर, जात फेन उतरात विष ॥

परसत नाहीं शरीर, अरि मद मोचन श्यामके ॥

कियो युद्ध बहु उरग अघाई * मुरे नहीं नेकहु यदुराई ॥

कहत परस्पर अहि की नारी * देखहु यह बालक अति भारी ॥
 विषज्वाला जल जरत यमुनको * याके तनु परसत नहिं तनको ॥
 यह कछु मंत्र यंत्र धौं जानै * अतिकोमल विष नेक नमानै ॥
 सहसौ फनन करत अहि घाता * अबलों बच्यो पुण्य पितु माता ॥
 तब अहिराज श्याम तन हेरी * कहत पूछ दाबी इन मेरी ॥
 अतिहि क्रोधकरि आंतुर धाई * हरिके अंग गयो लपटाई ॥
 नखते शिखलौं अहिलपटाई * कहत करी इन बहुत ढिठाई ॥
 कौतुकनिवि हरि सब गुण स्वार्ना * दियो दांव इहि अहिको जानी ॥
 तिहि अवसर सुर मुनि गन्धर्वा * अति व्याकुल आये ब्रजसर्वा ॥
 उरग नारि मन मन पछिताहीं * हरिको रूप समुझि मनमाहीं ॥
 कहैं गर्वकरि अति यह आयो * काल विवश पगइतहिं चलायो ॥

दोहा—काली हरिसों लिपटकै, गर्व कियो मनमांह ॥

कहत मोहिं जानत नहीं, मैं सर्पनको नांह ॥

सो०—भंजन गर्व गोपाल, गर्व भरे सुनि अहिवचन ॥

कीन्हो वपुष विशाल, बिकल भयो अहिराजतन ॥
 जबहिं श्यामतन अति विस्तारो * टूटन लग्यो अंग सब सारो ॥
 शरण शरण तब उरग पुकारो * मैं नहिं जान्यो रूप तिहारो ॥
 जीवदान प्रभु मोंको दीजै * अपनी शरण राखि मोहिं लीजै ॥
 यह वाणी सुनतहि भगवाना * सकुचि गये हरि कृपानिधाना ॥
 यहै वचन गजराज सुनायो * गरुड छांड़ि ताके हित आयो ॥
 यहै वचन सुनि द्रुपदसुताको * बंसन बढाय दियो पुनि वाको ॥
 यहै वचन सुनि लक्षा गृहते * लीने राखि पाण्डवन जरते ॥
 यह वाणी सहिजात न श्यामहिं * दीनबन्धु करुणाके धामहिं ॥

लीनो अंगसंकोच कृपाला * देख्यो विकल शिथिल जब व्याला ॥
 पगसो चापि नाक धरि फोरी * लीनो नाथ हाथ गहि डोरी ॥
 कूदि चढे हरि ताके शीशा * मनमन करत विचार अहीशा ॥
 मैं यह सुन्यो हतो विधि पाहीं * कृष्ण अवतार होहि ब्रजमाहीं ॥
 दोहा—ते गोकुलमें अवतरे, मैं जान्यो निरधार ॥

ये अविनाशी ब्रह्म है, ब्रज कृष्णा अवतार ॥
 सो०—किये बहुत फन घात, बार बार पछितात मन ॥

अस्तुति करत लजात, रक्ष्यो दीन है सकुचि अति ॥
 देख्यो ब्याल बिहाल कृपाला * दियो दरश निज दीन दयाला ॥
 देखि दरश मनहर्ष बढाई * बोल्यो दीन वचन अहिराई ॥
 मैं अपराध कियो बिन जाना * क्षमौ नाथ तुम क्षमानिधाना ॥
 तामस योनि कीट विष जानों * कौन भांति तुमको पहिचानों ॥
 अब कीन्हों प्रभु मोहिं सनाथा * दीनों दरश जगतके नाथा ॥
 अशरण शरण नाथ तव बाना * कहत सन्त सब वेद पुराना ॥
 ते अपराध क्षमा सब कीजै * अब प्रभु शरण राखि मोहिं लीजै ॥
 आज धन्य यह मेरो माथा * जापर चरण दिये मम नाथा ॥
 अब ये चरण परसि प्रभु तेरे * मिटे दोष दुख अघ सब मेरे ॥
 जो पद कमल पुनीत तुम्हारे * निशिदिन रहत रमा उर धारे ॥
 शिवविरञ्चिसनकादिक ध्यावैं * जे पद योगी ध्यान लगावैं ॥
 जे पदपद्म सलिल सुर सरितां * तीन लोक की पावन करता ॥
 दोहा—जिन पर्दपंकज परसते, गति पाई ऋषि नारि ॥

सुर नर मुनि वन्दित तिन्हैं, सन्तत प्राण अधारि ॥
 सो०—फिरत चरावत गाय, श्रीवृन्दावन जे चरण ॥

भक्तनके सुखदाय, ब्रजबासी जन दुख हरण ॥

जे पद पंकज परम सुहाये ❀ प्रभु मैं आज सुलभ करि पाये ॥
 गरुड त्रास ते इत भजि आयो ❀ भलो कियो मोहें गरुड सतायो ॥
 जाते दरश भयो प्रभु तेरो ❀ अब भय ताप मिट्यो सब मेरो ॥
 आज भयो मैं नाथ सनाथा ❀ गत्यो नाथ मम प्रभु निज हाथा ॥
 सुनत दीन कालीकी बानी ❀ दीनबन्धु अतिशय सुख मानी ॥
 फनप्रति चरण सरोज छुवाये ❀ ताके सब संताप नशाये ॥
 तब ब्रजनाथ भक्तहितकारी ❀ यह अपने मनमाहिं विचारी ॥
 कालीको ब्रज देश दिखैये ❀ कमल भार या पैलै जैये ॥
 हैं हैं ब्रजके लोग दुखारी ❀ करैं जाय अब तिनहिं सुखारी ॥
 कमल कंसको देउँ पठाई ❀ कालिह चढै गो ब्रजपर आई ॥
 लीन्हे अहिपर कमल लदाई ❀ चल ब्रजहि ब्रजजन सुखदाई ॥
 लियो नाथ गहि अहि उचकाई ❀ फनपर ठाढे कुँवर कन्हाई ॥

दोहा—उरंगनारि कर जोरि कै, प्रभुके सन्मुख आय ॥

करत विनय अति दीन है, पति हित हरिहि सुनाय ॥

सो०—इत यशुमति उर माहिं, उठा लहर अति प्रेमकी ॥

कान्हर आयो नाहिं, कहत रोय बलराम सों ॥

कहत राम सुनु यशुमति मैया ❀ अबहीं आवत कुँवर कन्हैया ॥
 नेक धीर धरुमति अकुलाई ❀ यह सनि कै बलकी बलिजाई ॥
 पुनि यह कहत काह नाहिन अब ❀ झूठाहिं मोहिं प्रबोध करत सब ॥
 भई बिना सुत व्याकुल मैया ❀ कहत कहां मेरो बाल कन्हैया ॥
 गिरी धरणि व्याकुल मुरझाई ❀ रोय उठे सब लोग लुगाई ॥
 ब्रजबासी सब भये विहाला ❀ कहत कहां मोहन नंदलाला ॥

तुम बिन यह गति भई हमारी * आवत नहीं धाय बनवारी ॥
 प्रातहिते जल माझँ समाने * तुमहि बिना युग याम बिहाने ॥
 अबको बसै जाय ब्रजमाहीं * धृगं धृग जीवन तुमहिं बिनाहीं ॥
 अति व्याकुल रोवत नंदरा कल मनहुँ फणि मणी गँवाई ॥
 यशमति धाय चलत जलमा ज यवती गहि बाहीं ॥
 हलधर सबहिनको समझावैं * बिना श्याम कोउ धीर न पावैं ॥

दोहा—कहत यशोदा नंदसों, धृग धृग बारहिं बार ॥

और किते दिन जियहुगे, मरत नहीं मोहिं मार ॥

सो०—कर देखहु मन ज्ञान, ऐसे दुखमें मरण सुख ॥

नंद भये बिन प्रान, मूछि परे सुनि तिय वचन ॥

तबहिं धाय बल पिता जगायो * बार बार कहि कहि समुझायो ॥
 वृथा मरत काहे सब कोई * कान्हँर मारनहार न कोई ॥
 हलधर कहत सुनहु ब्रजबासी * वे अन्तर्गामी अविनाशी ॥
 सब गुणसागर आनंद राशी * रमा सहित जलहीके बासी ॥
 मेरो कट्यो सत्य करि मानो * आवत श्याम धीर उर आनो ॥
 यमुनाके भीतर तिहि काला * उठयो सलिल झकझोर विशाला ॥
 बोलि उठे आतुर बलरामा * वे देखो आवत घनश्यामा ॥
 सुनत वचन लखि कै उठि धाये * यमुना नीर तीर सब आये ॥
 कोउ जलमें कोउ बाहर ठाढे * दरशातुर विरहानल वाढे ॥
 प्रगट भये जलते तेहिं काला * ब्रज जन जीवन नंदके लाला ॥
 कमल भार काली पर लीन्हे * नटवर भेष मनोहर कीन्हे ॥
 भये सुखी सब ब्रजके बासी * लखि हरि वदन परम सुखराशी ॥
 छं०—हरि वदन लखि कै राशि सुखकी, मुंदित ब्रजबासी भये ॥

मनहुँ बूडत नाव पाई, परम उर आनंद छये ॥
 मात पितु लखि जो भयो सुख, जात सो कापै कत्यो ॥
 पुलकतनमन हरषि गदगद, प्रेम जल लोचन बह्यो ॥
 चकित हरितन लखत इकटक, मिलनको आतुरहियो ॥
 श्याम निरतत अहिफनन पर, खौर चन्दनतनु कियो ॥
 श्रवण कुण्डल लाल लोचन, चारु मुकुट बिराजहीं ॥
 मनहुँ मरकत गिरि शिखर मणि, मोर तापर राजहीं ॥
 पीतपट कटिकाछनी उर, माल मणि भूषण सजे ॥
 नृत्य ताण्डव करत फण प्रति, व्योमदिव दुन्दुभि बजे ॥
 भई जय ध्वनि गगन वर्षाहिं, सुमन सुर आनंद भरे ॥
 गन्धर्व गुण गण गगन गावत, तान तालन अनुसरे ॥
 उरगनारी श्याम सन्मुख, करत अस्तुति आवहीं ॥
 नाथ अब अपराध क्षमि करि, करि कृपा पति पावहीं ॥
 राखे चरण निज शीश याके, अति बडाई इन लई ॥
 ऐसी बडाई औरको प्रभु, नाहिं तुम कबहुं दई ॥
 शेष इक ब्रह्माण्ड भरि शिर, राखि मन गर्वित कियो ॥
 कोटि कोटि ब्रह्माण्ड तव तन, अधिक इन यह भरिलियो ॥
 सुर असुर नर नाग खग मृग, कीट जन सब रावरे ॥
 क्षमिय अब अपराध अहि के, शुभग सुन्दर सांवरे ॥
 दोहा—सुनि अहि नारिनके वचन, करुणामय यदुराय ॥
 उतरि परे अहिशीशते, यमुनाके तट आय ॥
 सो०—तट पर कमल धराय, कालीको आयसु दियो ॥
 उरग द्वीप अब जाय, करहु बास निर्भय सदा ॥

तब काला

धनि ऋषि शाप दियौ है ताहा । त आय सकत ह्या नाहीं ॥

तब मैं भागि बच २ हिं सो खाई ॥

चरण चिह्न लखित व फण भरे परिहै गरुड आय पग तेरे ॥

तू अब मति खगपतिहि डराई अपने द्वीप करहु सुख जाई ॥

वाते बडो कौन सुख नाथा । अभयदान पद परस्या माथा ॥

जे पद कमल भजन परतापा । जन प्रहलाद मिटे सन्तापा ॥

ते पद चिह्न शीश पर धारी । जन्म जन्म को भयो सुखारी ॥

उरगिन सहित नाइ पद माथा * गयो उरग द्वीपहि अहिनाथा ॥

जैजै ध्वनि नभ सुरन बखानी * धन्य धन्य जनके सुखदानी ॥

शरण राखि काली अहिलीन्हों * जलते काठि कृपा करि दीन्हों ॥

फन पर चरण चिह्न प्रगटाई * कठिन गरुड की त्रास मिटाई ॥

दोहा—धन्य धन्य प्रभु धन्य कहि, मुदित सुमन बर्षाय ॥

गये देव निज निज सदन, हृदय परम सुख पाय ॥

सो०—द्वीप पठायो ब्याल, सुरगण सुर लोकहिं पठै ॥

आयो निकसि गोपाल, ब्रजबासी जन सुख करन ॥

धाय मिले सगरे ब्रजबासी * विरह ताप तन की सब नाशी ॥

माता दौरि कण्ठ लपटानी * पुलकरोम तन गदगद बानी ॥

नयन नीर अति प्रेम अधीरा * उर लगाय मेटत उर पीरा ॥

कहि कहि मेरो बाल कन्हैया * दुहुं करन सों लेत बलैया ॥

धाय नन्द उर सों लै लाये । गये प्राण मानहुं फिरि आये ॥

गदगद बैन नयन जल दारो * कहत जन्म फिरि भयो तुम्हारो ॥

बार बार उर सा लपटावत * दारुण उर की ताप नशावत ॥

प्रेमाकुल देखी बल माता * मिले रोहिणी सों सुखदाता ॥
 निरखिवदन कहय शुमति मैया * मैं बरजों नित तुमहिं कन्हैया ॥
 यमुना तीर न्हान मति जाहू * तुम बरजो मानत नहिं काहू ॥
 मैं निशि सपने मांझ डरान्यो * सोई कछू आय प्रकटान्यो ॥
 कंस कमलके फूल मँगाये * ब्रजवासी सब अतिहि डराये ॥

दोहा—मैं गेंदाहि खेलत यहां, आयों यमुना तीर ॥

मोहिं डारि काहू दियो, कालीदहके नीर ॥

सो०—देख्यो उरग विशाल, जाय तहां मैं डरो अति ॥

तब पूंछ्यो मोहिं ब्याल, किन पठ्यो तोको इहां ॥

जब ऐसे मैं ताहि बतायो * कमल काज मोहिं कंस पठायो ॥
 यह सुनतहिं अहि उठ्यो डराई * मोको फनपर लियो चढाई ॥
 कमल लियो निज पीठ लदाई * आपुहि आय गयो पहुँचाई ॥
 ऐसे जननी बोध कृपाला * सुनत वचन सब ब्रजकी बाला ॥
 लै लै हरिको उरसों लावैं * कठिन विरहकी शूल मिटावैं ॥
 श्याम बिना बहुतै दुख पायो * सो हरि तिनको ताप नशायो ॥
 लखे सखा सब आरत बाढे * प्रेमातुर मिलवेको ठाढे ॥
 गये दौरि तिन पास कन्हवाई * मिले धाय सब कण्ठ लगाई ॥
 कहत सखा धनि धन्य कन्हैया * जो तुम कह्यो कियो सोइ भैया ॥
 तुम हौ सब ब्रजके सुखदानी * कंस मारिहौ तुम हम जानी ॥
 कहा भयो जो तुमहौ बारि * हैं तुम्हरे गुण सब ते न्यारे ॥
 भलो यदपि सिंहनको छोटे * कौन काज गज लम्बो मोटो ॥

दोहा—तुम हम पर रिस करि गये, सो अब देहु भुलाय ॥

यह सुनतहिं हरि हँसि उठे, मिले बहुरि हरषाय ॥

सो०—जब हलधर अरु श्याम, मिले बिहँसि दोउ मन हिं मन ॥

निरखि मगन नरवांम, भेद न कोऊ जानहीं ॥

सब कोऊ कहत धन्य बलरामा * तुम जो कही करी सोइ श्यामा ॥

तब हरि कट्यो नंदसों जाई * मेरे मनहिं बात यह आई ॥

आज बसैं सब यमुना तीरा * अति रमणीक सुगन्ध समीरा ॥

इहां कीजिये भोग विलासा * होत प्रात सब चलहिं अबांसा ॥

कमल पठाय कंसको दीजै * सुनहु तात अब विलंब न कीजै ॥

गोप जाय आवैं पहुँचाई * कालिह चढै नतु ब्रजपर धाई ॥

यह सुनि नन्द बहुत सुख पायो * सब ब्रजवासिनके मन भायो ॥

तुरत ग्वाल बहु घरन पठाये * पटरस भोजन बहुत मँगाये ॥

यमुनातीर गोप समुदाई * भोजन कियो बहुत सुख पाई ॥

नंदराय तब शकट मँगाये * कोटि कमल तिनपर लदवाये ॥

बहुत भार दधि घृतके कीन्हे * ते अहिरन कांधे धर लीन्हे ॥

अपनी सरजे गोप सुहाये * तिनहिं संग करि नृपहिं पठाये ॥

देहा—बहुत विनय करि कंसको, दीन्हों पत्र लिखाय ॥

कहियो मेरी ओरते, नृपसों ऐसी जाय ॥

सो०—गयो कमलके काज, कालीदह मेरो सुबंन ॥

तुव प्रताप ते राज, आप गयो पहुँचाय अहिं ॥

कोटि कमल नृप मांगि पठाये * तीनि कोटि तहँते हैं पाये ॥

सो राखे जल मांझ सजाई * आयसु होय तो देउँ पठाई ॥

तब गोपन सों कुवँर कन्हाई * ऐसे बोलि उठे मुसकाई ॥

नृपसों लीजो नाम हमारो * यह कारज हम कियो तुम्हारो ॥

कमल शकट दधि घृतके भारा * चले गोप ले नृपके द्वारा ॥

राजद्वार शकटन पहुँचाई ❀ जाय पौरियन खबरि जनाई ॥
 तुरत पौरिया भीतर धाई ❀ समाचार सब नृपहि सुनाई ॥
 सुनत बात यह मनहिं डरान्यो ❀ आपनिकसि आयो अतुरान्यो ॥
 देखी शकट भीर अति भारी ❀ भयो चकित सुधि बुद्धि बिसारी ॥
 कमलदेखि भय भयो विशाला ❀ लगे ताहि मनो व्यालकराला ॥
 नंद विनय तब गोपन भाषी ❀ दीनों पत्र भेंट सब राषी ॥
 गोपन बहुरि कट्यो नृपराई ❀ नंदसुवन यह कट्यो कन्हाई ॥

दोहा—हम कालीदह जाय यह, कियो राजको काम ॥

नृप हमको जानत नहीं, कहियो मेरो नाम ॥

सो०—सुनत श्याम सन्देश, देखि कमल अति भय विकल ॥

भीतर गयो नरेश, मन बाढी चिन्ता विपुल ॥

मनहीं मन यह करत विचारा ❀ यासों मेरो नाहिं उबारा ॥
 दैत्य गये ते सबहि नशाये ❀ काली ते ऐसे बचि आये ॥
 ताहीपर कमलन लै आये ❀ सहस शकट भरि मोहिं पठाये ॥
 कबहुं कहत गोपनको मारों ❀ इनको व्हांते तुरत निकारों ॥
 फेर कछु मनमें भय पावै ❀ करत विचारन कछु बनि आवै ॥
 पुनि सँभारि धीरज उन कीन्हो ❀ गोपन बोलि भीतरहि लीन्हो ॥
 हृदय दुखित ऊपर सुख मानी ❀ पहिराये दीने मनमानी ॥
 सरोपाव नन्दहुको दीन्हो ❀ कहियो काज बडो तुम कीन्हो ॥
 तेरे सुत बलराम कन्हाई ❀ एक दिवस देखिहौं बुलाई ॥
 यह सुनि अति पुरुषार्थ कीन्हो ❀ कालीदहके फूलन लीन्हो ॥
 यह कहि बिदा किये सब ग्वाला ❀ भयो कंस उर शोच विशाला ॥
 मनहीं मन शोचत हरिके गुन ❀ रट्यो काठ ज्यों भीतरही घुन ॥

दाहा—तब दावानल बोलि त्यों ताहि ॥

देखों मैं तेरे बलहि, तू अब ब्रजको जाहि ॥

सो०—जाय कीजियो छारं, ब्रज सब ब्रज वासिन सहित ॥

बचहिं न नन्दकुमार, ऐसो यत्न विचारि उर ॥

दावानल नृपकी सुनि बानी * चलयो रिसाय गर्ब उर आनी ॥
करा भस्म इक पल मह जाइ * सहित गोप नन्द सुवन कन्हारि ॥
नृपको काज आज करि आऊं जो कहूँ एक ठौर सब पाऊं ॥
इहां गोप कमलन पहुँचाई * आये यमुन तीर हरषाई ॥
नन्द तुरत सब निकट बुलाये * सुनत सकल ब्रज जन जुरि आये ॥
गोपन कही नन्द सों आई * लिये कमल नृप अति सुख पाई
दियो हर्ष तुमको पहिरायो * मुँदित नन्द लै शीश चढायो ॥
अपने सब पहिराव दिखाये * लखि सब ब्रज वासिन सुख पाये
हरिको नाम सुन्यो जब राजा * हरषि कत्यो कीनो उन काजा ॥
इक दिन बल मोहन दुइ भाई * देखहुं गो मैं इहां बुलाई ॥
यह सुनि नन्द बहुत सुख पायो * हरषि भूप मो सुतन बुलायो
करी कृपा अति नृप हरि पाहीं * सब नर नारि हरषि मन माहीं ॥

दोहा—कहत श्याम बलराम सों, हँसि हँसि कै यह बात ॥

नृप हम तुम देखन लिये, कत्यो बुलावन तांत ॥

सो०—ब्रज जन परम हुलास, इक सुख हरि अहिते बचे ॥

मिट्यो कंसको त्रास, दुतिय कमल पठये नृपाहिं ॥

॥ अथ दावानलवर्णनलीला ॥

यहि विधि ब्रज जन अति सुख पायो, खान पान करि दिवस बितायो
सोये सब मिलि यमुना तीरा * राखि हृदय सुन्दर बलबीरा ॥

वहां असुर दावानल आयो ❀ चाहत है सब ब्रजहि जरायो ॥
 देखे सब ब्रजजन इकठाहीं ❀ कियो हर्ष अपने मन माहीं ॥
 प्रकटी दावानल चहुँ ओर ❀ अतिहि प्रचण्ड पवन झकझोरा ॥
 दशहुँ दिशिते घेरत आवै ❀ तृण तरु खग मृग जीव जरावै ॥
 जागि परे सब ब्रज नर नारी ❀ कहैं चहुँ दिशि लगी दवाँरी ॥
 भये चकित सब अति मन माहीं ❀ काहुँ दिशि मृग दीखत नाही ॥
 चाहत चलन भजि नहीं निकासू ❀ लेत सबै भरि शोच उसासू ॥
 आयगई दव अतिहि निकटहीं ❀ चले कहत सब यमुना तटहीं ॥
 अब न देखियत कहूँ उबारा ❀ बठी अनल पहुँची नभझारा ॥
 ब्रजके लोग अतिहि अकुलाने ❀ जरे सकल मनमाँझ डराने ॥

छं०—अति विकल सब डरे ब्रज जन, देखि अनल भयावनो ॥

भई धरं नभज्वाल पूरण, धूम धुंध डरावनो ॥

लपट झपटत जरत तरुवर, गिरत महि भहरायकै ॥

उठत शब्द अघात चहुँ दिशि, बढत झर झहरायकै ॥

फटत फल फूटत पटकदल, जरत बरत लताधनी ॥

काँस चटकत बाँस पटकत, अँगार उचटत नभतनी ॥

हरिण मोर बराह वन पशु, विकल पन्थ न पावहीं ॥

जरत जहँ तहँ जीव खग मृग, विपुल जित तित धावहीं ॥

दोहा—दावानल अति क्रोध करि, लियो दशहुँ दिशि घेरा ॥

उठी अनलज्वाला प्रबल, मानहुँ अचल सुमेर ॥

सो०—धूम धुन्ध विकराल, भयो अँधेरो गगन सब ॥

बिच बिच चमकत ज्वाल, तडित माल जनु सघनघन

भये देखि ब्रजलोग दुखारे ❀ तब सब हरिकी शरण पुकारे ॥

कहत श्याम तुम करो सहाई * जरत सकल ब्रज लेहु बचाई ॥
 तृणा शकट बक अघ तुम मारे * कंस त्रासते तुमहिं उबारे ॥
 जहँ जहँ परी गाढ हम आई * तहां तहां तुम करी सहाई ॥
 अब हरि यत्न कछू सो कीजै * हमहिं बचाय अग्निसे लीजै ॥
 व्याकुल गोप नन्द मन माहीं * करत विचार बनत कछु नाहीं ॥
 यशुमति सबहिन कहत पुकारे * दई पर्योहै ख्याल हमारे ॥
 नाना रूप असुर बहु आये * कोउ खग कोउ पशु रूप बनाये ॥
 कोऊ पवन रूप है आयो * भयो तहां कोउ पुण्य सहायो ॥
 आज उरगं सों बच्यो कन्हाई * मरु करमन नृप त्रास नशाई ॥
 अब यह बाढी अग्नि अपारा * होत सकल ब्रजको संहारा ॥
 किमि बचिहैं यह बालक दोऊ * मोहिं लखि परत उपाय न कोऊ ॥

दोहा—सुनि जननीके वचन प्रभु, लखि सब ब्रज वेहाल ॥

कह्यो सबन धीरज धरो, मति डरपौ लखि ज्वाल ॥

सो०—कौतुक निधि गोपाल, को जानै तिनके गुणनि ॥

दुख सुख जिनके ख्याल, जनके हित कारक सदा
 तब हरि कह्यो डरो मति कोई * विनवहु देव बहुरि सब सोई ॥
 जिन सहाय कीनी अबताई * सोई करै सहाय सदाई ॥
 हरि हँसि सब सों आंखि मुँदाई * करिगये अग्निपान सुखदाई ॥
 है गइ चहुँ दिशि शीतलताई * रद्यो न अग्निलेश कहूँ राई ॥
 खोलि देहु दृग सब हरि बोले * सुनतहि तुरत सबन दृग खोले ॥
 देखि चकित सब ब्रज नर नारी * कहत धन्य धनि तुम बनवारी ॥
 धरणि अकाश बराबर ज्वाला * लपट झपट अतिही विकराला ॥
 नाहिं बरस्यो नाहिं सींच्यो काहू * गयो बिलाय कहां धौं दाहू ॥

कैसे यह सब अग्नि बुझानी ❀ हम यह कछु न काहू जानी ॥
तब हँसि बोले कुवँर कन्हाई ❀ वह करनी यह कहि न सुहाई ॥
तृणकी आग प्रथम बहु जागै ❀ फिरि तिहि बुझत विलंब न लागै ॥
सुनत श्यामकी कोमल बानी ❀ भये सुखी सब त्रास नशानी ॥

दोहा—जीव जन्तु खग मृग जिते, भये सुखी ततकाल ॥

द्रुम बेली तृण हरित सब, प्रफुलित वन सुख माल ॥

सो०—श्याम सहायक जाहि, ताहि कहौ डर कौनको ॥

यह न बडाई वाहि, पांच तत्त्व उनके किये ॥

कहत परस्पर ब्रजकी नारी ❀ हैं सखि बडे वीर बनवारी ॥

देखत कोमल श्याम सलोना ❀ यह सखि जानत है कछु टोना ॥

नाथ्यो नाग पतालहि जाई ❀ लायो तापर कमल लदाई ॥

मांगे कमल कंस नृपराई ❀ कोटि कमल तिहि दिये पठाई ॥

दावानल नभ धरणि बराबर ❀ घेर लिये ब्रजके नारी नर ॥

नयन मुँदाय कहा धौं कीन्हों ❀ रख्यो नहीं कछु ताको चीन्हों ॥

ये उत्पात मिटै उनहीपै ❀ और न होय सकै किनहींपै ॥

यह कोउ सखी बडो अवतारा ❀ है यहही कर्त्ता संसारा ॥

लखि हरि चरित यशोदा मैया ❀ चकित निरखि मुख लेत बलैया ॥

लखि सुत चरित मुदित नंदराई ❀ करत गोप गण सकल बडाई ॥

कहत देव मुनि अति अनुरागा ❀ हैं ब्रजवासिनके बडभागा ॥

जिनके संग श्याम सुख शीला ❀ करत रहत नित नव रस लीला ॥

दोहा—एक दिवस निशि यमुन तट, बस सब गोपी ग्वाल ॥

होत प्रात निज निज सदन, आये सहित गोपाल ॥

सो०—हरि जनके सुखकार, विलसत विविध विलास ब्रज ॥

सन्तन प्राण अधार, ब्रजबासी जन जाहिं बलि ॥

हरि ब्रजजनके दुख विसरावन * करत चरित सुर मुनिमन भावन
तुरत सकल ब्रज लोग भुलाये * कौन कंस कब कमल मँगाये ॥
कब हरि यमुना जलहि समाये * कालिनाग नाथि कब लाये ॥
कब दावानल जारन आयो * एक दिवस निशि कहां बितायो ॥
नहिं जानत कछु नंद यशोदा * करत श्याम सोइ बाल विनोदा ॥
माखन मांगत कुवँर कन्हारि * बार बार जननी सों जाई ॥
आतुर दधिहि मथन नँदरानी * सद माखन हरिको रुचि जानी ॥
कहत तनक तुम रहत ललारे * तुम्हें देउँ नवनीत पियारे ॥
मैं बलि भूख लगीं तुम भागे * बात बनावत सुतहि दुलारी ॥
बूझत बात काहुकी कन्हहिं * कहत श्याम सों सुनतन कानहिं ॥
झूठहि देत हुँकारी जननी * भूल गई सब हरिकी करनी ॥
तब लौं मथिदधि माखन कीन्हो * तुरतहि लै सुतके कर दीन्हो ॥

दोहा—लैलै अधरन परसि करि, माखन रोटी खात ॥

कहत प्रशंसा मधुर कहि, सुनत प्रफुलित मात ॥

सो०—जो प्रभु अलख अपार, दुर्लभ शिव सनकादिकहुँ ॥

धन्य नन्दकी नार, ताको सुत कर मानई ॥

॥ अथ प्रलम्बासुरवधलीला ॥

नित नव लीला करत कन्हारि * तात मात ब्रज जन सुखदाई ॥
मुदित सकल ब्रजके नर नारी * निशिदिन मुख हरिचंद निहारी ॥
इक दिन श्याम राम दोउ भाई * खेलत सखन संग बन जाई ॥
नाना विधि सब करत कलोलैं * भांति भांतिकी वाणी बोलैं ॥
कबहुं मोर हंसकी नाई * बोलत हंसत श्याम सुखदाई ॥

कबहूँ मधुरे स्वर सब गावैं * मध्य श्याम घन वेणु बजावैं ॥
 कबहूँ चढत तरुन पर जाई * कूँद परत गहि डार नवाई ॥
 नाना विधिके खेलन खेलैं * बाल विनोदमोदरस केलैं ॥
 तहां प्रलम्ब असुर इक आयो * कंस ताहि दै पान पठायो ॥
 सो छल रूप गोप वपु धारी * मिल्यो आय सब सखन मँझारी ॥
 ताको ग्वालन काहू जान्यो * यह तो असुर श्याम पहिचान्यो ॥
 बलदाऊको दियो जनाई * ताहि हतन को रच्यो उपाई ॥

दोहा—सखा बुलाये निकट सब, तिनहिं कथ्यो नँदलाल ॥

फल बुझाय अब खेलिये, भये मुदित सुनि ग्वाल ॥

सो०—द्वै बालक करि राय, सखा लिये तब बाँटि सब ॥

आधे इक दिशि आय, आधे एक दिशा भये ॥

निज निज जोट सखन जुरि लीन्हो * हलधर जोट दनुज संग कीन्हो
 आपसमें यह होड लगाई * जो हारै सो पीठि चढाई ॥
 भांडीर वनलों लै जाही * फेर इहां पहुँचावै ताही ॥
 फलको नाम बुझावन लागे * बूझ दियो बल सब ते आगे ॥
 चले सखा चढि चढि निज जोरी * चढे दनुज बल घाँच मरोरी ॥
 भांडीर वन पहुँचे जाई * फिरे सखा सब ठाँव छुवाई ॥
 असुर चलयो लै बलको आगे * प्रकट्यो दनुज शरीर अभागे ॥
 तब बलदेव कोप करि भारी * मुष्टि एक ताके शिरमारी ॥
 बिकसि गयो शिर गिन्यो अधीरा * उतरि परे तब श्रीबलवीरा ॥
 भयो पलकमें सो बिन प्राना * देखत सुर मुनि चढे विमाना ॥
 भई गगन ते जय जय बानी * फूलन की वर्षा वरषानी ॥
 बहुविधि अस्तुति बलहिं सुनाई * मुदित सकल सुर मुनि समुदाई ॥

दोहा—ग्वाल बाल चकित सबै, दौरि गये बल पास ॥

मृतक असुर तनु देखिकै, तब मन कियो हुलास ॥

सो०—धन्य धन्य बलराम, धन्य तुम्हारे मात पितु ॥

बडो कियो यह काम, कपट रूप माख्यो असुर ॥

यह शठ गोप भेष बन आयो * हम काहू इहि जान न पायो ॥

जो यह शठ नहिं जात निपांतो * तो काहू लरिक हिलै जातो ॥

हौ तुम वीर बडे दोउ भाई * जहँ तहँ हमको होत सहाई ॥

वनके दुष्ट सकल तुम मारे * हौ तुम हम सबके रखवारे ॥

ताहिकहो काको डर भैया * जासु मीत बलराम कन्हैया ॥

देत ग्वाल सब बलहि बडाई * धन्य धन्य ब्रज जन सुखदाई ॥

दुष्ट मारि बल मोहन लाला * आये सदन सहित सब ग्वाला ॥

ग्वालन कही आय सब बाता * सुनत चकित ब्रज जन पितु माता ॥

करत सकल बलराम बडाई * जननी मुदित लिये उरलाई ॥

बल मोहन दोउ वीर निहारी * दोऊ जननि जात बलिहारी ॥

भूखे जान बनहिंते आयो * दोउ भइयन भोजन करवायो ॥

जो सुख लहत नंदकी रानी * सो शारद नहिं सके बखानी ॥

दोहा—सुत सनेह्य शुमति मगन, निशि दिन जात न जान ॥

करत चरित सन्तन सुखद, भक्त बछल भगवान ॥

सो०—नित नव परम हुलास, ब्रजवासी हरि संग लहत ॥

बिलसत विविध विलास, बाट घाट गृहबनसघन ॥

॥ अथ पनिघटलीला ॥

पनिघट यमुनाके तटमाहीं * ठाढ़े श्याम कदमकी छाहीं ॥

सखा वृन्द चहुँ ओर बिराजैं * कोटि काम छवि निरखत लाजैं ॥

शीश मुकुट की लटक सुहाई ❀ सुरंग खौर केसर छबिछाई ॥
 कुंडल झलक अकल घुघरारी ❀ कंठ कनक कंठी द्युतिकारी ॥
 चटकीली लटकी बनमाला ❀ परसति चरण सरोज विशाला ॥
 मुक्तमाल मणि माल सुहाई ❀ उर विशाल पै अति छबिछाई ॥
 अरुण अधर दशनन द्युति नीकी ❀ मुर मुसकान मोहनी जीकी ॥
 चटकीलो पट पीत बिराजै ❀ कटि तटि क्षुद्र घंटिका राजै ॥
 भुज विशाल भूषण युत सोहै ❀ कर मुद्रिका मुदित मनमोहै ॥
 तनु घनश्याम रसीले नैना ❀ हँसि हँसि कहत सखन सों बैना ॥
 कनक लकुटि सों पग लपटान्यो ❀ भूषण सहित न जात बखान्यो
 गहि द्रुम डार तिरीछे ठाढ़े ❀ अंग अंग अनुपम छबि बाढ़े ॥

दोहा—कबहुँ बजावत अधर धरि, करि मुरली ध्वनि घोर ॥

निकट बुलावत वन मृगन, कबहुँ नचावत मोर ॥

सो०—रहे गगन घन छाये, सुखद छांह शीतल किये ॥

वर्षा ऋतु को पाय, निरखत सुत नंदरायको ॥

हरित भूमि चहुँ ओर सुहाई ❀ मनहुँ काम मंसनंद बिछाई ॥
 वहत समीर धीर सुखदाई ❀ शीतल अधिक सुगंध सुहाई ॥
 वहत यमुन बाहुलते पूरी ❀ परत भँवर जहँ तहँ छबिरूरी ॥
 उठत श्याम जल शुभगत रंगा ❀ छवितरंग जिमि हरिके अंगा ॥
 या छबि सों पनिघट हरि ठाढ़े ❀ संग गोप बालकहित बाढ़े ॥
 यमुना जल तिय भरन न जाहीं ❀ ग्वाल भीर देखत सकुचार्हीं ॥
 हरिके गुण मनमें सब जानैं ❀ रोकत टोकत शंक न मानैं ॥
 ताँते जाय सकत कोउ नाहीं ❀ दरश लालसा अति मनमाहीं ॥
 सबके अन्तर्ग्यामि कन्हाई ❀ युवतिनके मनकी गति पाई ॥

तब इक बुद्धि रची नँदलाला * रसिक शिरोमणि मदनगुपाला ॥
 सखन एक तरुंतल बैठाई * पनिघटते सब भीर मिटाई ॥
 आप रहे द्रुम ओट छपाई * हेरत युवतिन मग चितलाई ॥

दोहा—इहि अन्तर आवत लखी, युवती इक घनश्याम ॥

आप रहे द्रुम ओट हरि, यमुना तट गइ बाम ॥

सो०—नागरि जलाहिं हिलोर, भरि गागरि शिर धर चली ॥

पाछेते चित चोर, घट लै दियो लुठाय महि ॥

गही चतुर ग्वाल्लिनि भुज हरिकी * पाई कनक लकुटिया करकी ॥
 सब सों तुम करि रहे ठिठाई * तैसेहिं मोसों लगत कन्हाई ॥
 देन लगे तब हरि हँसि गागरि * लेत नहीं ग्वाल्लिनि अति नागरि ॥
 कहत कि रीतो घट नहिं लेहौं * जल भर देहु लकुटि तब देहौं ॥
 कहा जो तुम नँद सुवन कन्हाई * हम हूँ बड़े बापकी जाई ॥
 एक गांव बस बास हमारो * मैं नहिं सहिहौं कट्यो तुम्हारो ॥
 एक कहौ तो दश मैं कहिहौं * मैं कछु तुम सों डरपि न जैहौं ॥
 यह सुनि हँसि दीन्हे नँदलाला * लियो चोरि चित मदनगोगुला ॥
 कहत लकुटिया देरी मेरी * मैं भरि देहौं गागरि तेरी ॥
 देखत रूप सुनत मृदुबानी * ग्वाल्लिनि तनुकी दशा भुलानी ॥
 लागी हृदय मदनकी सांटी * मन पर गयो प्रेमकी घांटी ॥
 करते लकुटि गिरत नहिं जान्यो * बिबश भई चित चेत हिरान्यो ॥

दोहा—तब घट भरि हरि भावते, दीन्हो शीश उठाय ॥

नेकहुँ सुधि ता तननहीं, चली ब्रजहिं समुहाय ॥

सो०—कियो दृगन में धाम, सुन्दर नट नागर सुखद ॥

जित देखे तित श्याम, पंथ ताहि दीखै नहीं ॥

उतै अपर ग्वालनि इक आई * कहत कहा तरही भुलाई ॥
 सूधे पंथ चलतहै नाहीं * कहा शोच तैरे मनमाहीं ॥
 अबहीं हँसति भरन जल आई * कहाचली इत आप गँवाई ॥
 ताको देखि कहत सुनु आली * मोपै श्याम मोहनी घाली ॥
 मैं जल भरन अकेली आई * मेरी गागारि कृष्ण लुटाई ॥
 तब मैं कनक लकुटि गहिलीन्हों * उन मोतन लखिकै हँसि दीन्हों ॥
 वहै हँसनि मोहिं पारि ठगौरी * तबहीं ते मैं हैगइ बौरी ॥
 कहा कहौं तोसों अब आली * मेरेचित वह चितवन शाली ॥
 बस्यो श्याम मेरे दृग माहीं * और कछु मोहिं दीसत नाहीं ॥
 सुनत बात वह ग्वाल सयानी * आप विलोकन को अतुरानी ॥
 ताहि बाहँगहि घर पहुँचाई * आप गई जलको अतुराई ॥
 देख्यो जाय श्याम तहँ नाहीं * इतउत लखिशोचति मन माहीं ॥

दोहा—हरि देखत तरु ओटहै, ग्वालनिमन दुख पाय ॥

चली नीर भरि गागरी, बार बार पछिताय ॥

सो०—मनके जाननहार, देखि ग्वालनी बिकल अति ॥

प्रकटे नंदकुमार, आय अचानक निकटही ॥

गहिलीन्हों अंकम भरिग्वारी * ताँके तनुकी तपनि निवारी ॥
 तातन चितै कल्यो तू कोरी * तोहिं कबहुँ देख्यों नहिं गोरी ॥
 मन हरिलीन्हों रूप दिखाई * बहुरि भये तरु ओट कन्हाई ॥
 मिलि हरिसों सुखपायो ग्वाली * छुकी प्रेमरस लखि बनमाली ॥
 नहिं जानत मैं कोकिल आई * भई मगन मन तनु बिसराई ॥
 घरको पंथ भूलिगइ नागारि * इतउत फिरत शीशलियेगागारि ॥
 और सखी इक उतते आई * देखि दशा तिन निकट बुलाई ॥

कहा फिरै भूली मगमाहीं * बूझत सखी सुनत कछु नाहीं ॥
 चौंकपडी सपने ज्योंजागी * तासों बचन कहन तब लागी ॥
 श्याम बदन एकमिल्यो दुटौना * तिनमोको कछु कीनों टोना ॥
 मैं भरि गागारि शीश चढ़ाई * औचक मोहिं अंक भरिलाई ॥
 मोसों कट्यो कौन तू गोरी * देखी नाहिं कबहुं ब्रजखोरी ॥

दोहा—ऐसे कहि चितयो बिहँसि, मैं लखि रही भुलाय ॥

तबहिं भयो अंतर कहूं, मेरो चित्त चुराय ॥

सो०—कही सखी सों बात, ग्वालिनिलाज बिसारिकै ॥

निरखि नंदको तात, भई जलधिकी बूंद जिमि ॥

सोसखि सावधान करिताको * चली आप आतुर यमुनाको ॥
 देखी श्याम युवति ढिग आई * ठाढ़े तरुकी ओट कन्हाई ॥
 तासु अंग छबि रहे निहारी * गोरे बदन चूनरी कारी ॥
 छूटी अलक बदन छबिछाई * मनहुं जलज अलि अवलि सुहाई ॥
 हाथन चूरी चारु बिराजै * कनक मुँदरियन अति छबिछाजै ॥
 सहज शृंगार उरोज उठोहैं * अंग अंग सुठि सुंदर सोहैं ॥
 ग्वालनि हरिको देख्यो नाहीं * जाने कहूं गये बनमाहीं ॥
 जल भरिचली मनहिं पछिताई * गागारि नागारि शीश उठाई ॥
 औचक श्याम गही लट आई * यह कहि कहां चली अतुराई ॥
 चिबुक परस उरसों करलायो * ग्वालनि मनहिं हर्ष अतिपायो ॥
 ऊपर कहत वंककर मोहन * छाँडि देहु मेरी लट मोहन ॥
 उर परसत कछु सकुच न मानत * और ग्वालिसी मोको जानत ॥

दोहा—छाँडि देहु लट देखिहै, ब्रज युवती कोउ आय ॥

हाहा मैं पांयन परति, तुमको नंद दुहाय ॥

सो०—इतने हीको मोहिं, सोंह दिवावत बावरी ॥

पहिंचान्यों नहिं तोहिं, ताते मुख देखत तनक ॥

यों कहि श्याम छांडिलट दीन्हीं ❀ मुरि मुसकनि नागरिवश कीन्हीं
चली भवन मन हरि हर लीनों ❀ जिय यह कहति कहा हरि कीनों
पगढ़ै चलत ठिठकि रहि जाई ❀ भूलगई मारग जिहि आई ॥
प्रेम मगन तनु सुधि बिसराई ❀ रहे दृगनमें श्याम समाई ॥
गृह गुरुजनकी सुधि जब आई ❀ तब कछु जियमें गई लजाई ॥
ज्यों त्यों करि पहुँची गृह माहीं ❀ उरते श्याम टरत क्षण नाहीं ॥
सखी संगकी बूझत आई ❀ कहां यमुन तट बेर लगाई ॥
और दशा भइ है कछु तेरी ❀ कहति नहीं हमसों सखि हेरी ॥
कहा कहों तुमसों री आली ❀ मोट्यो मोहिं श्याम वनमाली ॥
सुनहु सखीरी वा यमुना तट ❀ मैं जल भन्यो अकेली पनिघट ॥
लै गगरी शिर मारग डगरी ❀ कितहुं ते आयो मो ढिगरी ॥
औचक आनि गही लट मेरी ❀ कट्यो नेक मुख देखन देरी ॥

दोहा—मैं मृदु बचन अमोल सुनि, देखि वदन जलजात ॥

जकी चकी सीहै रही, उन परस्यो मो गात ॥

सो०—प्रफुलित हिये गुवारि, मनमोहनके रस विवश ॥

कुलकी लाज बिसारि, कही सखिन सों बात सब ॥

सुनत बात सब सखी सयानी ❀ श्याम विलोकनको अतुरानी ॥
इक क्षण श्यामन विसरत काहू ❀ सुनत भयो यह अधिक उछाहू ॥
घर घरते धाँई सब नागरि ❀ लैलै आई जलकी गागरि ॥
चलीं यमुन तट अति अतुराई ❀ देख्यो कुँवर नंदको जाई ॥
मोर मुकुट कटिकछनी सो है ❀ कुंडल चटक लटक मन मोहै ॥

पीत बसन लखि तडितं लजाई ❀ नयन विशाल अधर अरुणाई ॥
 देखत कट्यो सखिन ढिग जाई ❀ ठगत फिरत हौ नारि पराई ॥
 काहि ठग्यो कैसे ठग चीन्ध्यों ❀ तुमरो कहो कहा ठग लीन्हों ॥
 कौन ठग्यो कहि कहा बखानै ❀ औरहिंके ठग तुमको जानै ॥
 कहा ठग्यो सो हम नहिं मानै ❀ कहौ नाम धरि तब हम जानै ॥
 सर्वस ठगत पलकके माहीं ❀ कहा ठग्यो सो जानत नाहीं ॥
 ठगके लक्षण मोहिं बतावहु ❀ कैसे मोको ठग ठहरावहु ॥

दोहा—ठगलक्षण हमपै सुनहु, फाँसी मृदु मुसकान ॥

रूप ठगौरीते ठगत, ब्रज तिय मन धन प्रान ॥

सो०—फिरत विकल बेहाल, लोक लाज कुल कान तजि ॥

ठगी नंदके लाल, भई विदित तिहुँ लोक तिय ॥

अपने लक्षण मोहिं लगावहु ❀ जैसे तुम सब चितहि चुरावहु ॥
 कहति कि प्रकटी तिहुँ पुर बाता ❀ ब्रजतिय ठगत नंदको ताता ॥
 यह अति कहति कहत सब कोई ❀ सुर नर मुनि वेदहु नहिं गोई ॥
 तीन लोकको ठाकुर जोई ❀ ब्रज बनितनवश कीन्हों सोई ॥
 यों सुनि सब ग्वालनि मुसुकानी ❀ कहो सखी सुनि हरिकी बानी ॥
 हरि तुम बात उलटि यह ठानत ❀ तुम्हरी नागरता हम जानत ॥
 अति हि काह तुम करत ढिठाई ❀ छाँडि देहु अब यह लँगराई ॥
 काहूकी ठारतहौ गगरी ❀ काहू लट गहि करत अचगरी ॥
 काहूको अंकम भरि लावत ❀ ब्रज लोगनपै सबन हँसावत ॥
 तुमते मग कोउ चलन नपावत ❀ बाट घाट डरपत सब आवत ॥
 यमुना भरन देत नहिं पानी ❀ बहुत अचगरी अब तुम ठानी ॥
 कहौ तो यशुदहि जाय सुनावैं ❀ फेरि तुम्है ऊखल बँधवावैं ॥

दोहा—यह सुनि हरि रिस करि उठे, ईंदुरी लई छुडाय ॥

कहो जाय सब मातसों, लीजो मोहिं बँधाय ॥

सो०—मोहिं कहत ठग चोर, आप भई साहुनि सबै ॥

डारी गागरि फोर, कहत जाहु चुगली करन ॥

तब युवती सब हरि ढिग आई❀ कहत ईंदुरी देहु कन्हआई ॥

नहिं तो तुमको गहिलै जैहैं❀ यशुमति पास न नेक डरेहैं ॥

बाट घाट तुम करत ढिठाई❀ काहु न नेक डरात कन्हआई ॥

ईंदुरी लै फोरी सब गागरि❀ आज मिटावैं तुम्हरी लांगरि ॥

तब हरि चढे कदम पर जाई❀ ईंदुरी दीन्ही जलहि बहाई ॥

बदन सकोरत भौंह मरोरत❀ मुरि मुसकनि सबके चित चोरत ॥

कहत कहौ भैयासों जाई❀ सब मिलि लीजो मोहिं बुलाई ॥

तुम सब जुरि मोहिं मारन धाई❀ तब मैं ईंदुरी जलहि बहाई ॥

ऐसो करि तुम मोको पायो❀ मानहुं मोको मोल मँगायो ॥

यह सुनियुवति कहत मुसुकाई❀ कहति यशोमति सों हम जाई ॥

वेदिन बिसर गये मन मोहन❀ बाँधे मात ऊखली गोहन ॥

ह्याई रहो तौ बदाहिं कन्हआई❀ जाउ कहूं तो नन्द दुहाई ॥

दोहा—कान्हहिं सौंह दिवायकै, लै उरहन सब वाम ॥

ऊपर रिस अंतर सुखी, चलीं नंदके धाम ॥

सो०—मथति महरि निज धाम, दधि माखन हरिके लिये ॥

तिहि अंतर ब्रज वाम, आवत देखी भीर अति ॥

मैं जानति हरि इनहिं खिझाई❀ ताते सब उरहन लै आई ॥

कहत युवति सब रिस भरि आई❀ ऐसो ढीठ कियो सुत माई ॥

भरन देत नहिं यमुना पानी❀ शेकत आँय करत कुलकानी ॥

काहूकी गागारि ठरकावै * इँदुरी लै जलमाहिं बहावै ॥
 काहूको घट डारत फोरी * गारी देत सहे नित खोरी ॥
 महरि कहत तुमसों सकुचाहीं * हरिके गुण तुम जानत नाहीं ॥
 अब नाहीं ब्रजबास हमारो * करत अचकरी सुवन तुम्हारो ॥
 नेक नहीं सकुचत मन माहीं * महरिसुतहितुम बरजत नाहीं ॥
 यशुमतिसबहिन कहत निहोरी * कहा करों सो तुमहिं कहोरी ॥
 जो हरिको मैं त्यां गहि पाऊं * तो तुम सबको अबहि दिखाऊं ॥
 तुमहूँ जानति हौ गुण हरिके * ऊखल सों बाँधे मैं धरिके ॥
 मारन लगी सांठि लै जबहीं * वज्र्यो मोहिं तुमहिं तब सबहीं ॥

दोहा—अब घर आवहिं जबहिं हरि, तबहिं करों सोइ हाल ॥

लरिकाईते अचकरो, मैं जानत गोपाल ॥

सो०—अब जो पकरन जाऊँ, ताहि गहन पाऊं कहां ॥

सुनतहिं मेरो नाउँ, को जानै भजि जाय कित ॥

यह अपराधक्षमो सब हमको * यहै कहत हौं मैं अब तुमको ॥
 इहि विधि युवतिन बोध कराई * महरि सबनको घरन पठाई ॥
 इतते घरन चलीं सब ग्वाली * उतते घर आवत वनमाली ॥
 हैगइ भेंट बीच मग आई * तुरत नयन हरि गये लजाई ॥
 मात बुलावत जाहु कन्हआई * बहुत बडाई करि हम आई ॥
 निरखिबदन हँसिकद्यो कन्हआई * मैं समुझाय लेउँ गो माई ॥
 सकुचतही आये घर मोहन * द्वारहिते लागे हरि जोहन ॥
 देखि जननि घरकारज लागी * गोपिन उरहनके रिस पागी ॥
 भीतर रोहिणि पाक बनावै * कहि कहि तिन सों बात सुनावै ॥
 हरुवै हरुवै तब हरि जाई * सुनत आप पाछे चित लाई ॥

यहै कहति यशुमति रिसि आई * गयो कहाधौं भाजि कन्हआई ॥
पनिघट रेंकत धूम मचावत * यमुना जल कोउ भरन न पावत ॥

दोहा—गारि देत बेटिन बहुन, वै आवत त्यां धाय ॥

हाहा मैं सबको करति, क्योंहू खोट छुटाय ॥

सो०—इंदुरी देत बहाय, सबकी गागरि फोरिकै ॥

कित धौं गयो पराय, यह कहि कहि धिरवत सुतहिं ॥

जाति पांतिसों कह लँगराई * मारेहु मानत नाहिं कन्हआई ॥
तब पाछेते हरि उठि बोले * मधुर वचन कोमल अति भोले ॥
तू मोहीं को मारन जानै * उनके गुणन नाहिं पहिंचानै ॥
कहति जुवै मानत तू सोई * तिनके चरित न जानत कोई ॥
कदमतीरते मोहिं बुलावैं * बाते गढि गढि आप बनावैं ॥
मटकन गिरै शीशते गगरी * नाम लगावत मेरे सिगरी ॥
फिरि चितई देखे हरि पाछे * सुन्दर श्याम पीतपट काछे ॥
कह तू कहां रह्यो मो पाहीं * मैं कह तोको जानत नाहीं ॥
हरि मुख देखतही नँदनारी * तुरतहिं भूलिगई रिस भारी ॥
कहतकि उरहन सब लै आवैं * झूठहि खौर कान्हको लावैं ॥
मैं जानत गुण उन सबहीके * बातन जोरि बनावत नीके ॥
वे सब योबनकी मदमाती * फिरत सदा हरिसों अठिलाती ॥

दोहा—कहां श्याम मेरो तनक, वे सब योबन जोर ॥

अब उरहन जो आवहीं, तौ पठऊं मुख मोर ॥

सो०—तू कित उनढिगजात, मैं बरजत मानत नहीं ॥

लावत झूठी बात, वे सब ढीठ गुवालिनी ॥

यह कहि चूम सुतहिं उरलायो * मन मोहन मन हर्ष बढ़ायो ॥

ब्रज घर घर यह बात जनाई * पनिघट रोकत कुँवर कन्हआई ॥
 श्याम वरण नटवर वपु काछे * मुरली मधुर बजावत पाछे ॥
 करत अचकरी जो मन भावै * यमुना जल कोउ भरन न पावै ॥
 बैठत आप कदमकी डारी * सबन बुलावत दै दै गारी ॥
 काहूकी गागारि गहि फोरै * काहूकी इँदुरी गहि बोरै ॥
 काहूको अंकमगाहि लावै * काहूको घट भूमि लुटावै ॥
 नयन सैनदै चितहि चुरावत * काहूसों मन अपनो लावत ॥
 ब्रज युवती सुनि सुनि उठि धावैं * बिनहरि दरशन क्षण कल पावैं ॥
 कोउ बरजै कोउ कहै कोटि विधि * सबके ध्यान श्याम सुन्दरनिधि ॥
 मन क्रम वचन तिन्हैं रति हरि सों * नातो नेह न मानत घरसों ॥
 निशिदिन जागत सोवत माहीं * नंद नँदन क्षण विसरत नाहीं ॥

दोहा—यह लीला सब करत हरि, ब्रज युवतिनके हेत ॥

कृष्ण भजै जो भाब जिहि, तेहितेसो फलदेत ॥

सो०—चिन्तामणि जेहि नाम, चिंतत फलदायक जनन ॥

सबहींको सब वाम, जैसो को वैसो सदा ॥

सुनि यह श्रीवृषभानु दुलारी * पनिघट ठाढे कुंज बिहारी ॥
 देखनको चित अति अतुराई * कद्यो सखिन सों कुँवीर बुलाई ॥
 चलहु यमुनतट ल्यावहिं पानी * सुनत बात यह सब हरपानी ॥
 इक इक कलश सबन गहिलीनों * तुरत गमन यमुना तट कीनों ॥
 देखे तहां कुँवर नँदलाला * सुन्दर श्यामल नयन विशाला ॥
 प्यारी मन अति हर्ष बढ़ायो * प्यारिहि देखि श्याम सुख पायो ॥
 रहे रीझि हरि दीठि लगाई * भन्यो नीर प्यारी मुसकाई ॥
 चली घराहि यमुना जल भरिकै * सखिन मध्य गागारि शिर धरिकै

मंद मंदगति चलति मुहाई * मोहन मनहिं मोहनी लाई ॥
चलेश्याम संगहि उठि लागे * विवश भये प्यारी रस पागे ॥
सखियन बीच नागरी सोहै * गागरि शिर पै हरिमन मोहै ॥
दुलत ग्रीव लटकत नकवेसर * वंदन विन्दुं आड दिये केसर ॥

दोहा—लोचन लोलविशाल अति, मुरि मुरि चितवत जाय ॥

भुकुटी धनुष कटाक्ष शर, हरि दृग मृगन लगाय ॥

सो०—अंग अंग छबि समुदाय, मानहुं सेना कामकी ॥

अंचल ध्वज फहराय, ठटकि चलत हरि मन हरत ॥

रीझे श्याम निरखि छबि प्यारी * संगहि चले लागि बनवारी ॥
कबहुँक आगे जात कन्हाई * कबहुँ रहत पीछे चित लाई ॥
नाना भांतिन भाव बतावैं * प्यारिहि निज अभिलाष जनावैं ॥
कनक लकुटलै करके माहीं * आगे पंथ सँवारत जाहीं ॥
देखत जहां प्रिया परछाहीं * तहां मिलावत निजतनु छाहीं ॥
छबि निरखत तनुवारि जनावैं * पीतांबर लै शीश फिरावैं ॥
कबहुँ श्याम पाछे रहि जाहीं * निरखत कुवँरी छबि ललचाहीं ॥
गागरि ताकि कांकरी मारैं * उचटि उचटि तिय अंगन पारैं ॥
ओट पीतपट शीश नवाई * इहि मिस निकसत ढिगहै आई ॥
प्यारी अपने जिय अनुमाने * मेरे हित हरि भावन ठाने ॥
सखियन मध्य नागरी जाई * नहिं पावत लग लगन कन्हाई ॥
कियो चरिततबरसिक बिहारी * सखिन सहित मोही सुकुमारी ॥

दोहा—मिसकरि निकसे निकट है, निरखि वदन मुसकाय ॥

मन हरिलीनो सबनको, दियो काम उपजाय ॥

सो०—भई विवश सुकुमार, अंग उँमग आँगी दरकि ॥

मांहे नंदकुमार, सुधि बुधि बिसरी देहकी ॥

सखिन संग पहुँची घर आई * अटकि रथो मनहरि सँग जाई ॥
 पुनि पुनि उर यह करत विचारा * कैसे मिलहिं श्याम सुकुमारा ॥
 गागरि निज निज गृह पहुँचाई * बहुरि सखी प्यारी ढिग आई ॥
 बार बार सब कहत निहोरी * चलिये यमुना जलहि बहोरी ॥
 तिनको उत्तर देत न प्यारी * चित उरझो चितवन परवारी ॥
 ठग सी रही मनहि मन शोचै * प्रेम विवशदृग बारि विमोचै ॥
 देखि दशा बूझत सब ग्वारी * कहा भयो तो कोरी प्यारी ॥
 शोचति कहा कहै किन सोरी * काहू लयो चोर कछु चोरी ॥
 उत्तर हमैं देत क्यों नाहीं * कहा ठगी सीहै मन माहीं ॥
 गहिगहि भुजा कहति सब गोरी * चलहि नयमुना आवहि खोरी ॥
 तब सखिय न वृषभानु दुलारी * लीन्हीं सबन निकट बैठारी ॥
 जलजंनयन जलभरि अनुरागी * हरिके चरित कहन सब लागी ॥

दोहा—कहौ सखी कैसे चलैं, वा यमुनाकी ओर ॥

गैल न छांडत सांवरो, रसिया नंदकिशोर ॥

सो०—धरै न कौऊ नांव, इह शंकनि डरपत हियो ॥

एक भांतिको गांव, वह चंचल मानै नहीं ॥

मोको देखत जहां कन्हाई * मेरे संग लगत उठि धाई ॥
 इत उत नयन चुराय निहारै * मोको मगमें आनि जुहारै ॥
 आगे चलत लकुट करलाई * मेरो पंथ सँवारत जाई ॥
 सो बहु मोहिं निहोरो लाई * फिर चितवै मोतन मुसकाई ॥
 जब मैं यमुनाको जल भरि कै * चलति गागरी शिरपर धरि कै ॥
 तब घट में वह कांकरि मारै * उचटि लगत तब अंग निहारै ॥

मेरे उर अंचर फहराई * सो वह देखि देखि ललचाई ॥
 कबहुं पीताम्बर शिर फेरै * बार बार करि मोतन हेरै ॥
 कबहुं आपनि छवि दरशावै * मेरे चितको आनि चुरावै ॥
 जब देखौं तब मोतनु हेरै * नेक नहीं दृग इत उत फेरै ॥
 जहां जाति मेरी परछाई * तहां मिलाय रहत निज छाई ॥
 जब लग लागन पावत नार्हां * तब वाको जिय अति अकुलाहीं ॥

दोहा—मोतनु छूवै हरि चले, ताहि भरत है अंक ॥

हैं सकुचत बोलों नहीं, लोक लाजकी शंक ॥

सो०—ब्रज घर २ यह शोर, को जानै कहियत कहा ॥

चितवत यह चितचोर, विवश होत साखि प्राण तब ॥
 कहिये कहा सखी जिय जैसी * भइ गति सांप छछूंदर कैसी ॥
 घरते निकसत बन नहिं आवै * लोक लाज कुल कानि मिटावै ॥
 जो घर रहौं रख्यो नहिं जाई * तनु घरमें भन जहां कन्हाई ॥
 कितो करों आवत इत नार्हां * बँध्यो पीत पट आंचर माहीं ॥
 अब तो मेरे मन यह रांची * करि हौं प्रीति श्याम संग सांची ॥
 ब्रजके लोग हँसौ किन कोई * कुल मर्याद जाउ किन सोई ॥
 कहा लाभ सो कहहु सयानी * जामें होय जीवकी हानी ॥
 सोनो कहा कान जिहि टूटै * अंजन कहा आंखि जिहि फूटै ॥
 कहा कांच संग्रहते होई * जो अमोल मणि करते खोई ॥
 विष सुमेर कहु कौने काजा * सुखद बूंद इक ओषधि राजा ॥
 कुलकी कानि कांच किरचाई * चिन्तामणिकी खानि कन्हाई ॥
 कहा लेहु कह तजौं सयानी * सिखवहु मोहिं सखी जिय जानी ॥

दोहा—मोको अब सूझै नहीं, विनु वह मृदु मुसुकान ॥

कापै न्यारो होतरी, चूनो हरदी सान ॥

सो०—मेटि लोककी कानि, पतिव्रत राखौं श्याम सों ॥

यहै बनी अब आनि, भलोबुरो कोऊ कहौ ॥

सुनत गोपिका राधा बानी * हरि अनुराग सिंधु मन मानी ॥

गदगद कंठ पुलकतनु आये * लोचन जलज प्रेम तनु छाये ॥

भई प्रेमवश गोप कुमारी * लोक सकुच कुल कानि बिसारी ॥

बारहिं बार कहत ब्रज नारी * धन्य धन्य वृषभानु दुलारी ॥

हम सब तोसों सत्य बखानै * तैं हरि भली भांति पहिचानै ॥

यह मोहन सबको मन मोहै * तिय लखि विवश न होय सुकोहै ॥

अंग २ प्रति अति छबि छाजै * समता काम कोटि द्युति लाजै ॥

सुवन श्याम दोउ पाणि पकरिकै * करत वेणु धुनि अधरन धरिकै ॥

तब यह दशा सबनकी होई * जड़ चेतन मोहत सब कोई ॥

वन मृग निकट धाय सब आवैं * खगहै मौन न अंग डुलावैं ॥

तृण गहि दंत धेनु रहि जाहीं * थनते क्षीर पियत बछ नाहीं ॥

यमुना बहिबे ते रहि जाई * जलचर प्रकटत बाहर आई ॥

दोहा—जड़ चेतन चेतन जड़हि, सुनत होत कल बैन ॥

कै विष कै मद कै अमी, किधौं भन्यो रस मैन ॥

सो०—गृहवन कछुन सुहाय, सुनत श्रवण वह मधुरधुनि ॥

गृहकारज विसराय, चकित थकित रहियत सबै ॥

बाट घाट जहँ मिलत कन्हवाई * मोहत सुन्दर रूप दिखाई ॥

नई २ छबि क्षण २ माहीं * झलकावत सब अंगन माहीं ॥

ऐसी को जु देखि नहिं मोहै * नंदसुवन सम सुन्दर को है ॥

वह सखि सबहीके मन भावै * सब कोउ बाहि देखि सुख पावै ॥

लोक लाज कुल कौने कामहिं ❀ जो पावैं सुन्दर बर श्यामहिं ॥
 पै यह मोहिं अगम अति लागै ❀ यह सुख मिलै नहीं बिन भागै ॥
 इनको गर्ग कट्यो नँदपाहीं ❀ बिना सुकृत ये प्रापत नाहीं ॥
 तुमहू इनको तप करि पायो ❀ ऐसे नंदहि गर्ग सुनायो ॥
 कहँ सखि इतनो भाग हमारो ❀ जो बर पावहिं नंददुलारो ॥
 ताते मो मनमें यह आवै ❀ कीजे जो सबके मन भावै ॥
 तप कीजै हरिके हितलागी ❀ पूजि गौरिपतिसों बर मांगी ॥
 नंदसुवन सुन्दर बर पावैं ❀ और सकल कामना नशावैं ॥

दोहा—जप तप संयमनेमते, प्रभु प्रकटत पाषाँन ॥

ताते अब तप कीजिये, और उपाय न आन ॥

सो०—कीजै यह दृढ नेम, प्रात जाय यमुना नदी ॥

पूजहिं सब करि प्रेम, तौ पावहिं पतिकरि हरिहि ॥

तपकरि योगी जन हरि ध्यावैं ❀ मन बांछित फल तपकरि पावैं ॥
 सकल कामनाके शिव दाता ❀ कहत वेद बिधि पंडित ज्ञाता ॥
 हमको मन बांछित सखि एहा ❀ नंदसुवन पदकमल सनेहा ॥
 सुनत सप्रेम सखी की बानी ❀ श्रीवृषभानुसुता हर्षानी ॥
 यहै मंत्र सबके मन मान्यो ❀ धन्य २ कहि ताहि बखान्यो ॥
 कहत सबै कीजै सखि सोई ❀ जाविधि नंदनंदन हित होई ॥
 वृथा जन्म जग जान न दीजै ❀ यशुमति सुतसों हितकरि लीजै ॥
 यहै मंत्र सबहिन दृढ कीन्हों ❀ नंदनंदनसों पतिव्रत लीन्हों ॥
 धन्य धन्य ब्रज गोप कुमारी ❀ जिनके हित पति कृष्णमुरारी ॥
 मन वच क्रम हरिसों मन मानी ❀ लोक लाज तिनका समजानी ॥
 इक क्षण श्याम न उरते टरहीं ❀ नेम धर्म ब्रत हरि हित करहीं ॥

जिनको यश शारद श्रुति गावैं * ब्रजवासी जन कहा बतावैं ॥

दोहा—जाग्रत स्वप्न सुषुप्तिहू, ब्रज युवतिन मन माहिं ॥

सदा एक तुरिया रहत, और अवस्था नाहिं ॥

सो०—ऐसो कौन प्रवीन, चहै प्रेम ब्रज तियनको ॥

हरि छवि जल मन मीन, विद्युरि सकत नाहिं एकपल ॥

अथ चौरहरणलीला ॥

भवेन रवन सबहिन बिसरायो * ब्रज युवतिन हरिसों मन लायो

यहै बासना सब उर जामी * होय गुपाल हमारो स्वामी ॥

कामबासना करि उर धायो * हरिके हेत तपहि मन लायो ॥

षट्दशसहस गोपकी कन्या * करन लगीं तप हरि हित धन्या ॥

रहत क्रिया युत तप को साधे * छांड दई सब भोग उपाधे ॥

प्रातकाल यमुनाजल न्हाहीं * प्रहर प्रयन्त रहैं जल माहीं ॥

जपहिं उमापति हर वृषकेतु * सुन्दर श्याम कृष्णपति हेतु ॥

शीत भीत मनमें नाहिं ल्यावैं * नयन मूँदिके ध्यान लगावैं ॥

बार बार यह कहैं मनाई * हम बर पावहिं कुँवर कन्हाई ॥

जलते बहुरि निकसि सब आई * पूजहिं गोपेश्वर शिव जाई ॥

चन्दन विल्वपत्र जल धारा * अक्षत सुमन सुगंध अपारा ॥

प्रीति सहित सब शिवहि चढावैं * धूप दीपकरि अस्तुति गावैं ॥

छंद—करहिं अस्तुति गानबहुविधि, पाणि पंकज जोरहीं ॥

बारबार नवाय मस्तक, प्रेम सहित निहोरहीं ॥

जय महेश कृपालु शिव, आनन्दनिधि गिरिजापते ॥

कैलासपति कल्याण अगजग, नाथ सर्व नमामि ते ॥

जटाजूट त्रिपुण्ड शशि कल, गंगयुत शोभित शिरे ॥

कमलनयनविशाल सुन्दर, चारुकुण्डलश्रुतिधरे ॥
नीलकंठ भुजंग भूषण, भस्म अंग दिगम्बरे ॥
अर्द्धंग गौरि विशाल उर, शिरमालधर करुणाकरे ॥
कर्पूर गौरि प्रसन्न आनन, पंचवक्त्र त्रिलोचने ॥
काम प्रद सुखधाम पूरण, काम शोच विमोचने ॥
भगवान भौ भव भय हरण, भूतादि पति शंभुहरे ॥
प्रणत जन पूरण मनोरथ, जगत पति मन्मथ अरे ॥
वृषभ बाहन त्रिपुरं अरि, मृगराज वरछालाम्बरे ॥
शूलपाणि त्रिशूल मूलन, मूलकर शिवशंकरे ॥
सुर असुर नर नाग तव पद, वन्दि मनवांछित लहैं ॥
पूजते पदकमल प्रभु हम, कृष्णपति चाहति अहैं ॥
दोहा—तुम सर्वज्ञ सुजान शिव, जानत जनमन पीर ॥

परम दान दीजै हमैं, सुन्दर बर बलबीर ॥

सो०—यह बरदान न आन, शिव तुमसों चाहत अहैं ॥

कृष्ण कमल पद ध्यान, रहै हमारे उर सदा ॥

यहिविधिब्रजतिय नेमनिबाहैं ❀ शिवको पूजि कृष्ण पति चाहैं ॥
नित प्रति प्रात यमुन जल खोरैं ❀ प्रीति रीति सों मन नहिं मोरैं ॥
संबिता सों बहु भांति निहोरैं ❀ गोद पसारि युगल कर जोरैं ॥
तेजराशि दिनमणि जगस्वामी ❀ जगत चक्षु सब अन्तर्प्यामी ॥
प्रणत मनोरथ पूरण कारी ❀ हम पर होहु दयालु मुरारी ॥
काम हमारे तनुहिं जरावै ❀ नन्द सुवन बर हमको भावै ॥
होय हमारे पति नंदलाला ❀ करहु कृपा सो दीनदयाला ॥
ऐसे हरि हित गोप कुमारी ❀ करैं नेम ब्रत तप तनुधारी ॥

गेह देहकी सुरति विसारी * कृशतन भई परम सुकुमारी॥
 वर्ष दिवस यों कहत बिहान्यो * प्रभु अन्तर्ग्यामी सब जान्यो ॥
 मोहित शिव पूजत ब्रज नारी * और कामना सकल निवारी॥
 सकल भावके हरि हैं ज्ञाता * सकल देव द्वारा फल दाता ॥

दोहा—देखि नेम यह प्रेममय, गोपिनको गोपाल ॥

भये प्रसन्न कृपालु चित, जनहित दीनदयाल ॥

सो०—मो कारण जल न्हात, भये जलहिमें प्रकट हरि ॥

सुन्दर श्यामल गात, नव किशोर वरवपु धरे ॥

न्हात जहां युवती सब आछे * मीजत पीठि सबनके पाछे ॥
 चकित सबन पाछे हरि हेरो * देख्यो काह कुँवर नँदकेरो ॥
 मनमें हर्षित भई सब नारी * ब्रत फल प्रकटे कुंजबिहारी ॥
 नवल किशोर ध्यान मन लायो * सोई प्रगट रूप दर्शायो ॥
 दृष्टि परतही सकल लजानी * लागीं अंग दुरावन पानी ॥
 एक एकको भेद न जानैं * हरिको सब अपने ढिग मानैं ॥
 कहत लाज लागत नहिं तुमको * बिना बसन देखतहौ हमको ॥
 हाँसि निकसे तब कुँवर कन्हारै * चीर हारलै चले पराई ॥
 हांक देत सब शपथ दिवावैं * फिरहु बसन भूषण हम पावैं ॥
 डारि बसन भूषण तब दीन्हे * गोपिन तुरत दौरिकै लीन्हे ॥
 चीर फटे भूषण सब टूटे * लेत न बनै तहां नहिं छूटे ॥
 एक एककी लाज लजाहीं * बसन अभूषण पहिरत जाहीं ॥

दोहा—लगे श्याम ढीठी करन, यह कहि २ पछितात ॥

अन्तर गति आनन्द अति, झूठहि खीझत जात ॥

सो०—लोगन कहत सुनाय, काह करत लँगराइ अति ॥

यशुमतिके ढिगजाय, कहत चलो कहिये सबै ॥
 चलीं यशोमति पै सब ग्वारी * प्रेम विवश तनुदशा विसारी ॥
 पुलक अंग अँगिया दरकानी * टूटे हार लिये निज पाणी ॥
 चीर चीर नख घात बनाई * यह मिसकरि उरहन ले आई ॥
 देखो महारि श्यामके ये गुन * ऐसे हाल किये सबके उन ॥
 चोली चीर हार दिखराये * टेर करत इतको भजि आये ॥
 और बात इक सुनहु न माई * ढीठ भयो अति कुँवर कन्हाई ॥
 बिनावसनहमन्हाति जहां सब * मींजत पीठ जाय पाछे तब ॥
 और कहत तुमसों सकुचावैं * उर उधारिके तुमहिं दिखावैं ॥
 महारि विचारत कहत कहा सब, भयो श्याम यहि लायक धौं कब
 सुनि युवतिनके मुख यह बानी * बोली बिहँसि नंदकी रानी ॥
 बात कहौ सो जो निबहैरी * विनाभीत नहिं चित्र लहैरी ॥
 तुमको कहत लाज नहिं आवति * चोरी रही छिनारो लावति ॥

दोहा—तुम चाहति हो गगनते, गहन तोरैया वाम ॥

सौ कैसे करि पाइहौ, तुम लायक नहिं श्याम ॥

सो०—मैं बूझी सब बात, तुमसों हों कहिहौं कहा ॥

वृथा फिरत अठिलात, मुष्ट करौ सुनिहै जगत ॥

यहि अन्तर हरि आय गये घर * शीश मुकुट लीन्हें मुरलीकर ॥
 अति कोमल तनु भूषण सोहैं * बाल भेद देखत मनमोहैं ॥
 जननी बोलि बांह गहि लीनी * कहत सबनिसों रसरिसभीनी ॥
 देखहुरी तुम सब इत आवो * इनहींको अपराध लगावो ॥
 देखहु समुझि लाज नहिं आवत * इनहींके नख उर न दिखावत ॥
 मेरो कान्ह अबहिं सुत बारो * तुम कोउ औरहि जाय निहारो ॥

देखत हरिहि युवति भई भोरी * कहत महारि कछु तुमहिं न खोरी
 देन उरहनो तुमको आई * नीकी पहिरावन हम पाई ॥
 आपसमें सब कहत सुनाई * देखहुरी यह भाव कन्हाई ॥
 यमुना तीर मिले जब आई * कहां गई तबकी तरुणाई ॥
 इनके गुण ऐसेको जानै * और करत औरही ठानै ॥
 घर आवतही भये नन्हाई * ऐसे मनके चोर कन्हाई ॥

दोहा—देखि चरित नँदलालके, भई वाल मति भोर ॥

सुधि बुधि मन कछु थिर नहीं, कहत औरकी और ॥

सो०—सकुचीं बहुरि सँभारि, विवश देखि अपनी दशा ॥

चलीं घरन बजनारि, हरि मुखकमल निहारिकै ॥

गई घरन बज गोप कुमारी * चित हरिलीनो मदन मुरारी ॥
 नेक न मन लागत घर माहीं * धाम कामकी सुधि कछु नाहीं ॥
 मात पिताको डर नहीं मानो * गारि देत कोउ सुनत न कानो ॥
 प्रात होतही गोप कुमारी * गई यमुन तट सब सुकुमारी ॥
 देखत जहां जाय नँदनंदन * मोर मुकुट शोभित तनु चंदन ॥
 मकराकृत कुण्डल उर माला * पीत वसन दृग कमल विशाला ॥
 दरश देखि अँखियां तृपतानी * भई सुखी उरतपन बुझानी ॥
 कहत परस्पर मिलि सब ग्वाली * यमुना निकट गये वनमाली ॥
 कौन भांति करि आज अन्हैबो * बनत नाहिं अब यमुना ऐबो ॥
 कैसे करि हम वसन उतारैं * काह्न हमारी ओर निहारैं ॥
 मिजत पीठ औचकही आई * वसन अभूषण लै भजिजाई ॥
 कहौ फेरि कैसे तब पावैं * अब नहिं काह्न घाट पै आवैं ॥

दोहा—कहत सकुचकी बात सब, ऊपर मन आनंद ॥

अन्तरगतिके वृत्तको, जानत सब नँदनंद ॥

सो०—जानी जान नराय, लाजान्तर युवती करत ॥

सो अब देउँ मिटाय, अन्तर भलो न प्रेममें ॥

और बात यक श्याम विचारी ❀ येजल भीतर न्हात उचारी ॥
जोतिय जलमें नांगी न्हाई ❀ ताको दोष होत अधिकाई ॥
ताको दोष नाश तब पावै ❀ नांगी परपति सम्मुख आवै ॥
सो इनको यह दूषण टारौं ❀ और लाज अन्तर निवारौं ॥
करौं आज इनसों विधिसोई ❀ इनको हित मम कौतुकहोई ॥
जो कछु चूक दासते होई ❀ आप सुधारि लेत हरि सोई ॥
अन्तर प्रभुकोनेक न भावै ❀ भजै निरंतर जब हरि पावै ॥
अन्तर रहित भक्ति हरिप्यारी ❀ कहत वेद सब सन्त पुकारी ॥
तब हरि मन यह कियो विचारा ❀ इनके बसंन हरौं इक बारा ॥
प्रभु सबकी तब दृष्टि बचाई ❀ कदमवृक्ष चढि रहे लुकाई ॥
जब गोपिन हरि देख्यो नाहीं ❀ चकित विलोकी इत उत माहीं ॥
जाने सदन गये नँदलाला ❀ न्हान चलीं तब सब बजबाला ॥

दोहा—धरे उतारि उतारि सब, तटपर भूषण चीर ॥

नग्न होय अस्नान हित, पैठीं यमुना नीर ॥

सो०—ग्रीवालौं जलमाहिं, पैठि करति स्नान सब ॥

मुख छवि कही न जाहिं, कनककंज फूले मनहुँ ॥

बार बार बूझत जलमाहीं ❀ प्रेम सहित मन मुदित नहांहीं ॥
शिवसों विनती करत निहोरी ❀ कबहुं रवि वन्दै कर जोरी ॥
यहै कामनाकरि सब ध्यावैं ❀ नँदनंदनको पति करि पावैं ॥
कामातुर सब गोपकुमारी ❀ धरैं ध्यान उर कुंजविहारी ॥

मूंदहिं नयन दरश चितलावैं * शब्द विचार श्रवण सुख पावैं॥
 भुज जोरत अंकम हितलागी * मगन प्रेमरस तिय बडभागी ॥
 प्रभु अन्तर्ग्यामी सब जानैं * देखैं कदम चढे सुख मानैं ॥
 कहत धन्यधनि ब्रजकी बाला * मेरे हित तप करत विशाला ॥
 प्रीति रीति सबकी पहिचानी * क्षणक्षणकी सेवा हरि मानी॥
 काहू भाव मोहिं कोउ ध्यावै * मोहिं विरद राखे बनिआवै॥
 कियो बहुत श्रम मम हित कारण * अब इनको दुखकरों निवारण॥
 उपजी कृपा समुझि जनपीरा * उतरे तरुंते श्रीबलबीरा ॥

दोहा—प्रेम मगन युवती सबै, रहीं ध्यान मन लाय ॥

हरि सब भूषण वसन लै, चढे कदमपर जाय ॥

सो०—भूषण वसन अपार, सोरह सहस वधूनके ॥

हरै एकही वार, लै राखे तरुनीपपर ॥

कन्यो नीपतरु अति विस्तारा * फूले सुमन सुगंध अपारा ॥
 लैलै बसन डार अटकाये * जहां तहां भूषण लटकाये॥
 नीलाम्बर पाटाम्बर सारी * श्वेत पीत चूनरि अरुणारी ॥
 जहां तहां शाखन प्रतिसोहैं * देखत छवि बसन्त मनमोहैं॥
 सो तरुशाखा परम सुहाई * बैठे छविकी राशि कन्हाइ ॥
 युवतीसुकृति तरुण धरि मानो * पन्यो सुकृति पूरण फल जानो॥
 देखत कदम चढे नँदलाला * बसन बिना जलमें सब बाला ॥
 ध्यान करतते जब सब जागीं * तब जल बाहर निकसन लागीं॥
 जलते निकरि आय तट देख्यो * भूषण वसन तहां नहिं पेख्यो
 इत उत चितै चकित भइभारी * सकुचिगई फिर जल सुकुमारी॥
 नाभि प्रयन्त नीरमें ठाढी * भुजलगाय उरचिन्ता बाढी ॥

कँपत शीतमें अति अकुलानी * बार बार कहि कहि पछितानी ॥

दोहा—ऐसो को भूषण बसन, सबके एकहि बार ॥

तटते लये चुरायके, लगी न नेक अबार ॥

सो०—हम जानत यह बात, अम्बर हरि हर लेगये ॥

और कौनको गात, जो बजमें ढीठो करै ॥

दीन होय तब युवति पुकारी * हौ कहूँ श्याम जाहिं बलिहारी ॥

दरश दिखाय विनय सुनि लीजे * अम्बर देहु कृपा अब कीजे ॥

थरथर काँपत अँग सुकुमारी * देखि श्याम नहिं सके सँभारी ॥

बोलि उठे तब मदनगोपाला * कहा कहत मोसों बजबाला ॥

कतहौ जलमें मरत जडाई * लेहु बसन भूषण इत आई ॥

तुम पट भूषण सुरति बिसारी * तब मैं लै कीन्ही रखवारी ॥

अब अपने पट भूषण लीजे * रखवारी कछु हमको दीजे ॥

जब ऐसे हरि बोल सुनायो * तब सबके मन धीरज आयो ॥

सुनि हरि वचन सकल हरषानी * लखे कदम ऊपर सुखदानी ॥

कहत सुनो सखि हरिकी बातें * बसन चुराय करें ये घातें ॥

हम सब जलके बीच उधारी * माँगत हैं हम सों रखवारी ॥

तब हँसि बोलीं बजकी बाला * सुनहु श्याम सुन्दर नँदलाला ॥

दोहा—तन मन धन अपौं तुम्हैं, है जु तुम्हारे पास ॥

अब अम्बर दीजे हमें, जानि आपनी दास ॥

सो०—तब हँसि कट्यो कन्हाय, जो तन मन मोको दियो ॥

लेहु बसन त्यां आय, तौ मानो मेरो कट्यो ॥

सुनहु श्याम धन बात हमारी * नग्न कौन बिधि आवैं नारी ॥

हम तरुणी तुम तरुण कन्हाई * बिना बसन क्यों देह दिखाई ॥

यह मति आप कहां धों पाई * आज सुनी यह बात नवाई ॥
 पुरुष जात यह कहत न जानहु * हाहा ऐसो मन जनि आनहु ॥
 कहत श्याम जो नग्न न ऐहौ * तौ तुम पट भूषण नहिं पैहौ ॥
 जो तन मन दीन्हो तुम मोही * तौ राखत कित लज्जा दोही ॥
 यह अन्तर मोसों जनि राखौ * मानि लेहु तुम मेरो भाषौ ॥
 शीत सहत कत नवल किशोरी * लाज देहु जलहीमें बोरी ॥
 जलते निकसि बेग इत आवो * हाथ जोरि मोहि विनय सुनावो ॥
 ज्यों जलमें रविंते कर जोरो * त्यों है सन्मुख मोहिं निहोरो ॥
 यह सुनि हैंसीं सकल ब्रजनारी * ऐसी बात न कहौ मुरारी ॥
 हाहा लागहिं पाँय तिहारे * पाप होत हैं जाडन मारे ॥

दोहा—छाँडि देहु यह टेक हरि, वरु भूषण तुम लेहु ॥

शीत मरत हम नीरमें, बसन हमारे देहु ॥

सो०—दूषण होत अपार, जो तिय अँग देखाहि पुरुष ॥

ताते नंदकुमार, नारी नग्न न देखिये ॥

तुमको छोह होत नहिं राई * बडे निठुरहौ कुँवर कन्हारै ॥
 ऐसो करौ जो तुमको सोहै * आज तुम्हारी पटतर कोहै ॥
 आजहिते हम दासि तिहारी * कैसे अँग दिखावहिं नारी ॥
 अँग दिखाये भूषण पैहौ * नातर जलमें बैठी रहौ ॥
 मेरे कहे निकसि सब आवो * थोरे में मो भलो मनावो ॥
 कत अंतर राखत हौ हम सों * बार बार मैं भाषत तुमसों ॥
 लेहु आय अपने पट भूषण * यह लागै हमको सब दूषण ॥
 मो हित तुम कीन्हो तप भारी * अब कत लज्जा करत हमारी ॥
 मैं अन्तर्ग्यामी सब जानी * करिहौं तुम्हरे मनकी मानी ॥

अब पूरण तप भयो तुम्हारो * अन्तर इतो दूरि करि डारो ॥
सुनि यह मोहनके मुख बानी * सब युवती मनमें हरषानी ॥
तब सबहिन यह बात विचारी * अब तो टेक परे बनवारी ॥

दोहा—कहत परस्पर मिलि सबै, हरि हठ छांडत नाहिं ॥

बसन बिना कैसे बने, कौन भांति घर जाहिं ॥

सो०—चलौ लीजिये चीर, इनहीं को हठ राखिकै ॥

मनमोहन बलबीर, जो कछु कहैं सो कीजिये ॥

यह विचार जल बाहर आई * बैठि गई तट अतिहि लजाई ॥
बार बार हरि निकट बुलावै * त्यों त्यों अधिक लाज को पावै ॥
कहत श्याम अम्बर अब दीजे * हाहा इतनो हठ नहिं कीजे ॥
बहत समीर शीत अति भारो * मानेंगी उपकार तुम्हारो ॥
हम दासी तुम नाथ हमारे * हम सबकी पति हाथ तुम्हारे ॥
कहत श्याम यह तजौ सयानी * छोडहु लाज करहु मम बानी ॥
अपने बसन लेहु त्यां आई * देहों तुमको नन्ददुहाई ॥
आवहु सकल लाजको त्यागे * करहु शृंगार आय मो आगे ॥
तब सबहिन यह मनमें जानी * करिहैं श्याम आपनी ठानी ॥
कर कुच अंग ठांकि भई ठाढी * बदन नवाय लाज अति बाढी ॥
गई कदमतर हरिके पासा * कहति देहु अब हमको बासा ॥
हरि बोले यों बसन न पावो * हाथ जोरि मोहिं विनय सुनावो ॥

दोहा—जो कहिहौ करिहैं सबैं, हँसि बोलीं ब्रजवाम ॥

लहैं दांव हमहूँ कबहुं, सुनो श्याम अभिराम ॥

सो०—उभय कमल कर जोरि, सलज सहास निहारि हरि ॥

मांगत सकल निहोरि, कहत देहु अब बसन प्रभु ॥

लखि युवतिन की प्रीति कन्हाई * रीझे भक्तन के सुखदाई ॥
 धन्य धन्य बोले गोपाला * निश्चय प्रीति करी तुम बाला ॥
 देखि निरन्तर गोपकुमारी * दीन्हे बसन अभूषण डारी ॥
 अति आतुर सब पहिरन लागीं * प्रेम प्रीतिके रस मति पागीं ॥
 तब हँसि बोले कुंजबिहारी * मैं पति तुम मेरी सब प्यारी ॥
 अन्तर शोच दूरि करि डारो * मेरो कट्यो सत्य उर धारो ॥
 शरद रात तुम आश पुरैहाँ * अंकन भरि सबको उर लैहाँ ॥
 अब तप करि तुम मत तनुगारो * मैं तुमते क्षण होत न न्यारो ॥
 करसों परश सबन सुख दीन्हो * विरह ताप तनुको हरि लीन्हो ॥
 बिदा करी हँसि नँदके लाला * निज निजसदन गई ब्रजबाला ॥
 गोपिन उर अति हर्ष बढायो * मन मन कहति कृष्ण वर पायो ॥
 ब्रजवासी जनके सुखदाई * आये अपने सदन कन्हाई ॥

दोहा—इहि विधि ब्रज सुन्दरिनको, हित करि सुंदरश्याम ॥

ब्रज विलास बिलसत विविध, सकल लोक अभिराम ॥

सो०—सुंदर घन सुखरास, सब विधि करि सबके सुखद ॥

नित नव करत विलास, भुदित सकल ब्रज लोग लखि ॥

॥ अथ वृन्दावन वर्णनलीला ॥

हरि लखि मात पिता सुख पावैं * बाल भाव बहु लाड लडावैं ॥
 नवल किशोर सुभगतनुश्यामा, निरखत मुदित सकल ब्रजबामा ॥
 ग्वाल बाल सब समं करि जानैं * सखा प्राण प्रीतम करि मानैं ॥
 नित उठि गाय चरावन जाहीं * क्रीडा करें विविध ब्रजमाहीं ॥
 इकदिन सोवत सदन कृपाला * आये द्वार बुलावन ग्वाला ॥
 चलहु श्याम बन धेनु चरावन * यह सुनि जननी लगी जगावन ॥

उठहु तात मैया बलि जाई * टेरत ग्वाल बाल बल भाई ॥
 बदन दिखाय सबन सुख देऊ * दँतवन करि कछु करहु कलेऊ ॥
 भई बेर बनको नंदलाला * अब मति सोवहु मदनगोपाला ॥
 देखनको छबि अति अतुराई * सखा द्वार सब टेर लगाई ॥
 सोवत ते हरि जागत नाहीं * सुनत बात आलस मन माहीं ॥
 कबहुं बसन ढांपि मुख सोवैं * कबहुं उधारि जननि तनु जोवैं ॥
 खोलत नयन पलक झुकि आवैं, सोछबि निरखि मातु सुख पावैं ॥

दोहा—उठो लाल जननी कद्यो, तब चितये हँसि मन्द ॥

पटगहि पुनि पुनि फेर मुख, तबहिं उठे बजचन्द ॥

सो०—कबके टेरत ग्वाल, बलदाऊ यह कहि उठे ॥

बनको भई अबार, गई गाय आगे निकसि ॥

यह सुनि तुरतहि उठे कन्हाई * यशुमति जल झारी भरिलाई ॥
 दुहुं भैयन करवाय मुखारी * पोंछे मुख जननी निज सारी ॥
 करहु कलेऊ अब कछु प्यारे * एक थार दोउ सुत बैठारे ॥
 दधि माखन रोटी अरु मेवा * करत प्रात दोउ भ्रात कलेवा ॥
 करत निकट बैठे मनमोदा * दृग सुख लूटत महरि यशोदा ॥
 मात प्रेमते अति तृपताई * अँचवन करजु उठे दोउ भाई ॥
 द्वारे टेर उठ्यो इक ग्वाला * बन कहँ बेगि चलहु नंदलाला ॥
 बल मोहन आवहु दोउ भैया * आगे निकसि गई हँगैया ॥
 ग्वाल वचन सुनि अति अतुराई * कछु अँचयो कछु नहिं दोउ भाई ॥
 मुरली मुकुट लकुट पट लीन्हो * निकसि दौरि बनहीं मन दीन्हो ॥
 केतिक दूरि गईं चलि गैया * ग्वालहि बूझत जात कन्हैया ॥
 कछु बन पहुंची हैहैं जाई * कछु मग मिलिहैं कुवँर कन्हैया ॥

दोहा—वन पहुँचत सुरभी लई, बल मोहन दोउ धाय ॥

कहत सबन सों जात कित, हमहूँ पहुँचे आय ॥

सो०—तुम आये अतुराय, जेवत पर लखिके हमैं ॥

तुम संग रहत बलाय, अब हम दूरि जरायहैं ॥

यह सुनि सखा धाय सब आये * हरिको अंकम भरि उर लाये ॥
 तुमहौ सबहिनके सुखदाई * हमको तजि मति जाहु कन्हाई ॥
 आजकुमुदबन चलहु चरावन शीतल सुखदस घन अति पावन
 सुनत कद्यो अति हर्ष कन्हाई * नीकी कही बात यह भाई ॥
 अपनी अपनी गाय बुलावो * एक ठौर करि सबन चरावो ॥
 यह सुनि ग्वाल सुरभि गण घेरत * लैलै नाम गाय सब ढेरत ॥
 धौरी धूमरि राती कबरी * पियरी गोरी गैनी कजरी ॥
 खैरी फुलही रौची चौरी धूरी हमरी मुंडी भौरी ॥
 लीली कपिली सुवरन जेती लाखी निकही रतनीतेती ॥
 ऐसे सुरभी ढेरि बुला सब मिलि चले कुमुदबन धाई ॥
 तब बल कद्यो दूरि मति जाहु नंद रिसैहैं अरु यशुदाहू ॥
 बलको कद्यो मानि सुखदाई * बोलि लिये सब सखा कन्हाई ॥

दोहा—कहत सबन समुझाय हरि, कौन कुमुद बन जाय ॥

बुरो मानि हैं नंद सुनि, और यशोदा माय ॥

सो०—लावहु गाय फिराय, चलिये वृन्दावन सुखद ॥

सुरभी चरत अघाय, वंशीवट यमुना निकट ॥

यह कहि श्याम चले अगुवाई * फेरी गाय ग्वाल सब धाई ॥
 वृन्दावनहिं चले मनमोहन * हर्षित सखा वृन्द तब गोहन ॥
 करत कुलाहल आनंद भारी * पहुँचे वृन्दावन वनवारी ॥

सुरभी गण चहुँदिशि बगराई * कहत सखा सब हर्ष बढाई ॥
जादिन अघ हति श्यामसिधाये * ता दिनते या वन अब आये ॥
देखत वन सब भये सुखारी * बहत मनोहर त्रिविध बयारी ॥
विटपनकी शोभा चित दीन्हे * देखत श्याम सखन सँग लीन्हे ॥
नव किशलयदलसुमन सुहाये * मनहुँ बसन्त शृंगार बनाये ॥
मधुर मिष्ट सुन्दर सुखकारी * फलके भार रहीं नव डारी ॥
मनहुँ देखि श्यामहिँ सुखपाई * देत भेंट तरु शीशनवाई ॥
सुमन भँवर गुंजत छबि पावैं * अस्तुति मनहुँ मधुर सुर गावैं ॥
एक पांव ठाढे सब आगे * जहँ तहँ थकित मनहुँ अनुरागे ॥

दोहा—बेलि विविध लपटीं ललित, फूलि रहीं बहुरंग ॥

शोभितसहित शृंगारजिमि, नारि पतिनके संग ॥

सो०—हालि उठत सब पात, मन्द पवन लागत कबहुँ ॥

आनँद उर न समात, बार बार पुलकत मनहुँ ॥

कुंज पुंज मंजुल सुखदाई * शीतल सुमन सुगंध सुहाई ॥
हरि विश्राम हेत बन जानो * रचे विचित्र सदन बहु मानो ॥
बोलत हैं कल खग बहुरङ्गा * कीर कपोतकोकिला भूङ्गा ॥
मनहुँ भेरि सब आनँद गावैं * जहँ तहँ बरही नृत्य दिखावैं ॥
तरुदल खरक पवन गति साजै * मधुर सुरन बाजन ज्यों बाजै ॥
क्रीडत मरकट शुभगतिलीने * करत कला ज्यों नट परवीने ॥
मृग गण चितवत आनँद बाढे * मनहुँ तमाशगीर सब ठाढे ॥
पाय श्याम घनहित वनराई * करी मनहु आनँद बधाई ॥
वनशोभा कछु वरणि न जाई * ऋतु वसंत जहँ रहत सदाई ॥
जहां स्वभाव काल गुण नाहीं * वैरभाव नहिँ खग मृग माहीं ॥

सदा एकरस परम प्रकाशी * परम सुखद आनंदकी राशी ॥
चिन्तामणिसबभूमिसुहावन।कोमलविमलसुभग अति पावन
दोहा—शोभा वृन्दाविपिनकी, वरणि सकै असकौन ॥

शेष महेश गणेश विधि, पार न पावत तौन ॥

सो०—महिमा अमित अपार, श्रीवृन्दावन धामकी ॥

जहँ नित रहत बिहार, परब्रह्म भगवान हरि ॥

देखि श्याम वन भये सुखारी * बैठे तरुंतर विपिनविहारी ॥
वृन्दावनकी करत बडाई * बलदाऊ सों कहत कन्हाई ॥
मैं यह वन देखत सुख पावत * वृन्दावन मोको अति भावत ॥
कामधेनु सुरतरु विसरावत * रमाँ सहित वैकुण्ठ भुलावत ॥
यह यमुना तट यह वन यावत * ये सुरभी अति सुखद सुहावत ॥
यह सुखविभुवन कितहुँन पावत * ताते मैं तनु धरि इत आवत ॥
दाऊजू तुम सच कर मानों * यह वृन्दावन जड मति जानों ॥
चितवनमें आनंद की रासा * प्रेम भक्तिको यहां निवासा ॥
परमधाममम परम सुहावन * पावनहूँते पावन पावन ॥
जे तरु वृन्दावनके माहीं * कल्पवृक्ष तिनकी सरि नाहीं ॥
कल्पवृक्षके तर जब जाई * तब माँगेवाछिछ फल पाई ॥
वृन्दावन तरु चिंतत जोई * प्रेम भक्तिमम पावत सोई ॥

दोहा—जाके वश मैं रहत हौं, अपनी प्रभुता त्याग ॥

प्रेम भक्तिसो लहत नर, वृन्दावन अनुराग ॥

सो०—श्रीमुख वरण्यो श्याम, श्रीवृन्दावनकोमहत ॥

सुख पायो बलराम, सुनत कान्हके वचन वर ॥

सखा वृन्द सुनि श्रीमुख बानी * प्रेम मगन तनु दशा भुलानी ॥

चितवत हरिमुख पलक बिसारी, जिमि चकोर गण शशिहि निहारी
 कहत चकित सब अति सुख पावत, निजलीला हरिप्रगट जनावत
 पुनि पुनि पुलक कहत शिर नाई * सुनहु श्यामघन कुँवर कन्हैया ॥
 वार वार तुमको कर जोरैं * हमहिं काह तुम तजहु न भोरैं ॥
 जहां जहां तुम तनु धारि आवो * तहां तहां जनि चरण छुडावो ॥
 तब हँसि बोले कुँवर कन्हैया * बजते तुम्हें नटारैं भैया ॥
 तुम मेरे मनको अति भावत * तुमते मैं बहुतै सुख पावत ॥
 या ब्रजसम त्रिभुवन कहूँ नाहीं * तुम्हरे ढिग मैं रहत सदाहीं ॥
 मैं तुम हेत देह यह धारी * तुमते ब्रजलीला विस्तारी ॥
 है यह ब्रज मोको अति प्यारो * ताते कबहूँ होत न न्यारो ॥
 ऐसे हरि ग्वालनके माहीं * गुप्त बात कहि कहि समुझाहीं ॥

दोहा—मधुर बचन सुनि श्यामके, सखा वृन्द सुख पाय ॥

प्रेम पुलकि तनु मुदित मन, रहे सबै गहि पाय ॥

सो०—धनि धनि धनि तुम श्याम, धनि ब्रज धनि वृन्दा विपिन ॥

तुम्हरे गुण अभिराम, हम सब अंज न जानहीं ॥

सुनहु श्याम घन नंददुलारे * तुम प्रभु हम सब दास तुम्हारे ॥
 दुर्लभ यह हरि संग तुम्हारो * कबधौं फेरि गोप तनु धारो ॥
 ना जानिये बहुरि ब्रजनाथा * कब तुम फिरिहौ सुर मुनि साथ ॥
 कब तुम छाक छीनिकै खैहौ * कबधौं फिरि ऐसे सुख दैहौ ॥
 बलि बलि जइये श्याम तुम्हारी * अब इक विनती सुनहु हमारी ॥
 सुन्दर मुरली नेक बजावो * अधरसुधारस श्रवणन प्यावो ॥
 तुम्हें नन्दकी सोंह दिवावैं * मुरली धुनि सुनि हम सुख पावैं ॥
 तुम्हरे मुख यह बाजत नीकी * हम सबकी जीवन है जीकी ॥

सुनत सखनकी कोमल बानी ❀ प्रेम सुधारस सों लपटानी ॥
 गुण गम्भीर गुपाल कृपाला ❀ भक्त वश्य प्रभु दीनदयाला ॥
 भये प्रसन्न भक्त सुखदाई ❀ चितये कमल नयन समुदाई ॥
 करते लकुट निकट धरि दीनो ❀ पाछे मुरलीको गहिलीनो ॥

दोहा—पकरि दुहं कर अधर धर, मधुर मुरलि धुनिगान ॥

मोहिलियो चर अचरनभं, जल थल श्याम सुजान ॥

सो०—भई थकितं गति पौन, यमुना जल लीन्ही शयनं ॥

है गये खग मृग मौन, रहे जहां तहँ चित्रसे ॥

उपजावत गावत गति सुंदर ❀ राग रागिनी ताल विविधवर ॥
 सखावृन्द सुनि तनमन वारैं ❀ निरखत मुखछवि पलक बिसारैं ॥
 चलत नयन भ्रुकुटी पुट नासा ❀ करपल्लव मुरली सुरश्वासा ॥
 मानहुं निरतक भाव बतावैं ❀ शुभगति नायक सैन सिखावैं ॥
 कुंचित अलंक वदन छवि देई ❀ मनहुं कमल रस अलिङ्गण लेई ॥
 कुंडल झलक कपोलन माहीं ❀ मनहु सुधारस मंकर भ्रमाहीं ॥
 दशनदमक मोतिन लर ग्रीवां ❀ मनहु सकल शोभाकी सीवां ॥
 तिलक विचित्र भालछवि छाजै ❀ मनहु महा छवि दशन बिराजै ॥
 चमकत मोर चंद्रिका चारू ❀ मनहु सकल शृंगार शृंगारू ॥
 श्याम गात उर गजमणि माला ❀ संग शोभित वनमाल विशाला ॥
 मरकतगिरि मनो सुरसरिधारा ❀ बैठी पंगति कीरें किनारा ॥
 कटि पटपीत तंडित दुति हारी ❀ पदपंकजनूपुर रुचिकारी ॥

दोहा—ग्रीवा लटकन मुरकि पर, शोभित छविसमुदाय ॥

प्रेम मगन निरखत मुदित, गोप बाल सुख पाय ॥

सो०—सुन्दर श्याम सुजान, देत परम सुख सखनको ॥

वारत तन मन प्रान, धन्य धन्य कहि ग्वाल सब ॥

रीझत ग्वाल रिझावत श्यामा * लेत मुरलिमें सबको नामा ॥
 हँसत ग्वाल सब दैकर ताला * लेत हमारो नाम गुपाला ॥
 कहत श्याम अब तुमहुं बजावो * ऐसे हमको गाय सुनावो ॥
 हँसि मुरली तिनके कर दीन्हो * अधरनधर अमृतरस लीन्हो ॥
 लैलै निज कर सकल बजावत * हरिके स्वरको रूप न पावत ॥
 आस पास सोहत सब बालक * मधि प्रभु प्रीति रीतिके पालक ॥
 हँसि हँसि सबके चित्त चुरावैं * सब मिलि प्रेमानंद बढावैं ॥
 जैसे श्री मुरलीधर गायो * काहू पै सो रूप न आयो ॥
 हँसि हँसि कहत परस्पर भाई * हरिकी समको सकै बजाई ॥
 चतुरानन पंचानन ध्यावैं * सहस्रानन नवनित गुण गावैं ॥
 सुर नर मुनि कोउ पार न पावैं * सो ग्वालन संग वेणु बजावैं ॥
 बजबासी जनको प्रतिपाला * भक्त वश्य प्रभु दीनदयाला ॥

दोहा—कारण करण अनंत गुण, निर्गम नेत जिहि गाव ॥

सो ग्वालन संग गावहीं, देखहु भक्ति प्रभाव ॥

सो०—वृन्दावन की रेनु, ब्रह्मादिक बांछित सदा ॥

जहां श्याम सुख देनु, ग्वालन संग चारत सुरभि ॥

॥ अथ द्विजपत्नीयाचनलीलावर्णन ॥

बिहरत वृन्दावन वनवारी * विविध भांति लीला अनुसारी ॥
 कबहुं सखन संग मिलि गावैं * कबहुं मुरली मधुर बजावैं ॥
 कबहुं गैयन घेरत धाई * कबहुं यमुनाके तट जाई ॥
 करत कुलाहल आनंद भारी * देत दिवावत रसकी गारी ॥
 ऐसे लीला करत अपारा * भये क्षुधारत गोपकुमारा ॥

कहत भये तब हरिसों जाई * हमको क्षुधा लगी अधिकारि ॥
 यह सुनि प्रभु भक्तन हितकारी * अपने मन यह बात विचारी ॥
 सुनि सुनि मेरे गुण गण गाना * करत रहत द्विज तिय मन ध्याना ॥
 तिनको दर्शन आज दिखाऊं * तिनके मनकी ताप नशाऊं ॥
 तब हरि ग्वालन कट्यो बुझाई * यज्ञ करत त्यां द्विज समुदाई ॥
 तिनके निकट जाउ तुम भाई * प्रथम प्रणाम कीजियो जाई ॥
 कहियो हमको कृष्ण पठायो * तुमपै भोजन मांगन आयो ॥

दोहा—यह सुनि ग्वाल गये तहां, जहां विप्र समुदाय ॥

यज्ञ करत अहमित लिये, विद्याको बल पाय ॥

सो०—ग्वालन करी प्रणाम, कट्यो तिन्हें कर जोरिकै ॥

हमैं पठाये श्याम, मांग्यो है भोजन कछू ॥

वनमें राम कृष्ण दोउ भैया * आये इतहि चरावन गैया ॥
 वे कछु आज भये हैं भूखे * यह सुनि विप्र है गये रूखे ॥
 कट्यो यज्ञ हित करी रसोई * अहिरन पहिले देय न कोई ॥
 यह सुनि ग्वाल सकल फिरि आये * हरिसों तिनके वचन सुनाये ॥
 सुनि हलधर तनचितै कन्हाई * बोले वचन मन्द मुसुकाई ॥
 ये द्विज धर्म कर्म लपटाने * बिना भक्ति मोको नहिं जाने ॥
 तब ग्वालनसों कट्यो मुरारी * जाउ जहां इनकी सब नारी ॥
 उनको है दृढ भक्ति हमारी * वे मानैंगी कहो तुम्हारी ॥
 उनसों भोजन मांगहु जाई * कहियो भूखे भये कन्हाई ॥
 तब द्विज नारिन ढिगये आये * हाथ जोरि तिनके शिर नाये ॥
 कट्यो राम अरु कुँवर कन्हैया * वनमें भूखे हैं दोउ भैया ॥
 मांग्यो है कछु भोजन तुमसों * आज्ञा देहु सो कहिये उनसों ॥

दोहा—ग्वालनके सुनि वचन सब, हर्षि उठीं द्विज वाम ॥

कहत हमारो भाग्य धनि, भोजन मांग्यो श्याम ॥

सो०—करत रहीं नित ध्यान, सुनि सुनि जिनके गुण श्रवण ॥

सफल जन्म निज जान, तिनको भोजन लै चलीं ॥

षट रस के व्यंजन विधि नाना * कोमल भांति अमित पकवाना ॥

खीर खांड सिखरन दधि न्यारो * माखन लियो श्यामको प्यारो ॥

कहँलग वरणों कहों प्रकारा * प्रेम सहित लीन्हे भरि थारा ॥

बहुते ग्वालनके कर दीने * बहुते अपने शिर धरि लीने ॥

नयननदरश लालसा बाढी * उपजी चाह हृदय अति गाढी ॥

चलीं पतिनकी कानि बिसारी * देखनको प्रभु गोप विहारी ॥

ग्वालन सों पूछत यह बाता * कित हैं हरि जनके सुखदाता ॥

जिनके पुरुष हते घरमाहीं * तिनको जान देत सो नाहीं ॥

कहत जात तुम कित अतुराई * लोकलाज तनु दशा भुलाई ॥

तिनसों कहत भई ते नारी * हमको श्रीगोपाल हँकारी ॥

भोजन मांग्यो है हम पाहीं * तिनहिं देन ग्वालन सँग जाहीं ॥

तिनको दरशदेखि सुख पैहैं * बहुरि तिहारे घर हम ऐहैं ॥

दोहा—यह सुनि पति अति क्रोध करि, तिनहिं दिखायो त्रास ॥

कहत भई तुम बावरी, बैठति नाहिं अबास ॥

सो०—जिनके उर नंदलाल, बसे लकुट मुरली लिये ॥

तिनहिं न भय यम काल, कौन भांति रोके रुकहिं ॥

हरिपै हमें जान पिय देह * कहारोंकि अपयश शिर लेहू ॥

देखन देहु नंदके लालहि * त्रिभुवन पति प्रभु मदन गुपालहि ॥

इतनी बात मानि पिय लीजै * हा हा हमें दान यह दीजै ॥

वे हैं यज्ञपुरुष भगवाना * अन्तरयामी कृपानिधाना ॥
 करत यज्ञ विधि तिन्हें विसारी * कहा सैरैगी बात तिहारी ॥
 कहँ लगि कहों बात समुझाई * जात दरशकी अंवधि बिहाई ॥
 जो तुम स्वामी जानत नाहीं * तो हम सत्य कहें तुम पाहीं ॥
 मनतो मिल्यो जाय नँदलालहि * करिहौ कहा रोंकिकै खालहि ॥
 लेहु सँभारि देह यह सारी * जासों पिय तुम कहत हमारी ॥
 को राखै इतने जंजालहि * मिलि हैं प्राण यशोदा लालहि ॥
 जो निश्चय नहिं श्याम सनेहा * तौ यह कौन काज की देहा ॥
 सब सखियनके आगे जाई * देखोंगी छबि कुँवर कन्हवाई ॥
 दोहा—ऐसे देह अरु गेह तजि, पतिकी कानि निवारी ॥

पहुँची सबते प्रथमही, जो रोकी ब्रजनारी ॥

सो०—कठिण प्रेमको पंथ, तहां नेमकी गम नहीं ॥

कहत सकल सदग्रंथ, जहां नेम तहँ प्रेम नहिं ॥

ऐसे भोजन लै द्विजबाला * पहुँची वन जहँ मोहन लाला ॥
 नटवर भेष चित्र तन कीने * ठाढे सखा संग भुज दीने ॥
 मोर मुकुट बैजन्ती माला * कर मुरली दृग नयन विशाला ॥
 कुण्डल अलक तिलक झलकाहीं * कोटिकामछबि पटतर नाहीं ॥
 मुख मृदुहँसनिलसनिपटपीरो * निरखत नयन ताप भयो सीरो ॥
 भोजन लै हरि आगे राखे * अपने भाग्य धन्य करि भाषे ॥
 तिन्हें देखि हरि मन सुख मान्यो, वचनन करि तिनको सन्मान्यो ॥
 तिन सों बहुरो कट्यो कन्हवाई * गृह पति तजि तुम कित इत आई ॥
 कहियत विप्रवेद अधिकारी * हौ तिनकी तुम पतिव्रत नारी ॥
 वे सब यज्ञ करत वन माहीं * तुमबिन यज्ञ होय है नाहीं ॥

यह तुम कलू भलो नहिं कीन्हो * पतिको कल्यो मानि नहिं लीन्हो
पति आयसु तिय पालै जोई * चारि पदारथ पावै सोई ॥

दोहा—पति देवता सुतीय कहँ, वेद वचन परमान ॥

जाहु वेगि तुम पतिन पहुँ, ताते यह जिय जान ॥

सो०—सुनि हरि वचन प्रमान, कर्म धर्म मानो सुखद ॥

द्विज तिय परम सुजान, बोलीं सब कर जोरिकै ॥

सुनहु श्यामघन अन्तर्यामी * तुमहीं सकल जगतके स्वामी ॥

यज्ञ पुरुष तुमहीं सुखधामा * तुमहीं सबके पूरण कामा ॥

विविध यज्ञ करि तुमको ध्यावैं * तुमते चारि पदारथ पावैं ॥

सकल धर्म ते शरण तुम्हारी * है सब जीवनको सुखकारी ॥

यह हम सुनी पतिन मुख बानी * कहत वेद इतिहास बखानी ॥

ताते शरण तुम्हारी आई * यह दूषण नहिं हमें गुसाई ॥

तव मायावश सकल भुलाने * ताते पतिन न तुम पहिंचाने ॥

तिनको दोष क्षमा प्रभु कीजै * हमको शरण आपनी दीजै ॥

चारि पदारथ हूते भारो * है प्रभुदरशन शरण तुम्हारो ॥

ताते नहीं निरादर कीजै * अपने चरण शरण रख लीजै ॥

सुनि प्रभु द्विजपत्नी की बानी * भये प्रसन्न भक्त सुखदानी ॥

धन्य धन्य प्रभु तिनको भाख्यो * हित करि तिनको भोजन राख्यो ॥

दोहा—दे अपनी दृढ भक्ति हरि, तिन्हें कल्यो घर जाहु ॥

है हैं तुम्हारे दरशते, शुद्धि तुम्हारे नाहु ॥

सो०—हरि आयसु धरि माथ, पाय भक्ति वरदान वर ॥

राखि हृदय ब्रजनाथ, चलीं हर्षि द्विजतिय सदन ॥

नँद नंदनकी करत बडाई * द्विजपत्नी सब घरको आई ॥

देखत तिन्हैं विप्र समुदाई * भये पुनीत विमल मति पाई ॥
 धन्य धन्य कहि तियन बखानी, आप कहत हम अति अज्ञानी ॥
 जिनके हेतु यज्ञ हम कीन्हो * तिन मांग्यो भोजन नहिं दीन्हो
 हम विद्या अभिमान भुलाने * अविगतिकी गति कैसे जाने ॥
 परब्रह्म प्रभुजन सुखदाई * भक्तन हित प्रगटे प्रभु आई ॥
 तिनको हम पहिचान्यो नाहीं * बारबार यह कहि पछिताहीं ॥
 हैं ये तिय अतिशय बडभागी * कृष्णचरण पङ्कज अनुरागी ॥
 ब्रह्मादिक खोजत हैं जिनको * देख्यो जाय प्रगट इन तिनको ॥
 ऐसे बहु विधि तियन सराहीं * आदर करि लीन्ही घरमाहीं ॥
 प्रेमप्रीति करि जो हरि ध्यावै * सो नर नारि अभयपद पावै ॥
 नरनारी कछु नाहिं बिचारा * प्रभुको केवल प्रेम पियारा ॥

दोहा—भाव तियनको धारि उर, तहँ हरि कृपानिकेत ॥

सखन सहित भोजन करत, रुचि सों प्रीति समेत ॥

सो०—ब्रह्मलोक लौं शोर, ग्वालनके संग खात हरि ॥

छीनि छीनिकै कौर, करत परस्पर हासरस ॥

अति हित भोजन तहँ हरि कीनो * सखावृन्दको अति सुख दीनो
 वनमें फिरत चरावत गैयां * बैठे आय कदम की छैयां ॥
 भये सखा सिंगरे इकठाहीं * गैयां बगर रहीं वनमाहीं ॥
 दुपहर घाम जान मनमाहीं * लागे चलन सघन वनछाहीं ॥
 बैठे ग्वालबाल चहुँ उरियां * आगे धरीं दूधकी घरियां ॥
 मध्य श्याम सुन्दर नंदनन्दा * उडंगणमें जिमि पूरणचन्दा ॥
 मोर मुकुट कटि कछुनी काछे * कोटि कामकी छबिको बाछे ॥
 कबहुँ मुरली मधुर बजावैं * कबहुँ सखन मिलि सारंग गावैं ॥

कोऊ सखा नृत्यको करहीं * कोऊ टटकारी उच्चरहीं ॥
करत केलि ऐसे बन माहीं * देखि देखि सुरचन्द सिहाहीं ॥
कोऊ ताल बजावत नीके * उपजावत कोऊ आनंद जीके ॥
कहत धन्य ये बजकी बाला * विहरत जिन संग कृष्ण कृपाला ॥

दोहा—धन्य विटप धनि भूमि यह, धनि चन्दावन चन्द ॥

धनि बज कहि वर्षे सुमन, रीझ रीझ सुरचन्द ॥

सो०—मन मन देव सिहाहिं, वन विहार हरिको निरखि ॥

श्री चन्दावन माहिं, हम न भये द्रुमलता तृण ॥

श्रीदामा सब कल्यो बुझाई * खेलहिमें सब रहे भुलाई ॥
गैयां कितहिं चरति को जानें * यह सुनिकै सब खेल भुलानें ॥
जित तित हेरनको उठि धाये * गैयां जाय घेरि लै आये ॥
जे सुरभी आई नहिं जानी * चरत सघन वन मांझ सयानी ॥
तिनको तरु चढि काह बुलाई * मुरली टेर सुनत उठि धाई ॥
ऐसी गैयां श्याम सधाई * मुरली सुनि सब हरिपै आई ॥
जब जब गैयन श्याम बुलावैं * हूं हूं करि सब हरिपै आवैं ॥
तिनपर कर फेरत मनमोहन * पीतांबर सों झारत छोहन ॥
करत प्यार तिनपर वनमाली * हस्त कमल की सब प्रतिपाली ॥
हरिको निरखि गाय सुख पावैं * तिनके भाग्य कहत नहिं आवैं ॥
जब हरि गैयन करसों परसैं * लखि २ कामधेनु मन तरसैं ॥
कहत कहा जो कामद कीनो * हमको विधि बज जन्म न दीनां ॥

दोहा—धनि २ बजकी धेनु ये, चारत त्रिभुवन नाथ ॥

झारत पोंछत दुहत नित, हित करि अपने हाथ ॥

सो०—मनहीं मन पछिताहिं, कामधेनु बज धेनु लखि ॥